

# 《法句經選集》

編輯：林崇安

佛法教材系列 S2

財團法人內觀教育基金會出版

## 編 序

《法句經》是釋尊時期流傳在印度各地的佛陀偈頌，對印度大眾的教化起了很大的作用，今日要使大眾正確地瞭解佛法，《法句經》便是一個重要的入門。此處所選集的五篇是：

(A) 南傳《法句經》26 品本：共 423 偈，為上座銅牒部所傳，有幾種漢譯本，今採用了參法師的譯文。

(B) 北傳《法句經》26 品本：共 490 偈，是西元 225 年頃，維祇難、竺將炎等人所譯，由下之 (C) 39 品抽出而成。

(C) 北傳《法句經》39 品本：共 758 偈，是西元 225 年頃，維祇難、竺將炎等人所譯。

(D) 北傳《法句譬喻經》39 品本：是西元 290-306 年，法炬、法立共同譯出，內含「75 篇」法句偈頌的譬喻/因緣。

(E) 北傳《法集要頌》33 品本：約 928 偈，西元 50 年頃法救所編，990-1000 年天息災譯出。

相關而未編入者：

(F) 北傳《出曜經》33 品本：偈為法救編，383 年竺佛念譯出，有法句偈頌之譬喻/因緣，並對偈頌略作註釋。

(G) 南傳《法句註》26 品本：440 年頃覺音所註釋，共有「305 篇」法句偈頌的譬喻/因緣。

(H) 藏傳《法句經》33 品本及其註釋（內有譬喻/因緣）。

本書書末有《法句經及其譬喻的演變略探》一文解說《法句經》的源流以及演變的情形。此處所編的【內觀教育版】，是將經文分段標點，使其段落分明，便於誦讀、分析與比對。

願此工作，有助於學佛者在義理和實踐上的增進。

林崇安 2004.3

於桃園縣[中壢市]內觀教育基金會

# 目錄

南傳《法句經》26 品……………01  
北傳《法句經》26 品……………19

【 1】雙要品第九（22 偈）……………19  
【 2】放逸品第十（20 偈）……………20  
【 3】心意品第十一（12 偈）……………20  
【 4】華香品第十二（17 偈）……………21  
【 5】愚闇品第十三（19 偈）……………21  
【 6】明哲品第十四（17 偈）……………22  
【 7】羅漢品第十五（10 偈）……………23  
【 8】述千品第十六（16 偈）……………23  
【 9】惡行品第十七（22 偈）……………24  
【10】刀杖品第十八（14 偈）……………24  
【11】老耗品第十九（14 偈）……………25  
【12】愛身品第二十（13 偈）……………25  
【13】世俗品第二十一（14 偈）……………26  
【14】述佛品第二十二（21 偈）……………26  
【15】安寧品第二十三（14 偈）……………27  
【16】好喜品第二十四（12 偈）……………28  
【17】忿怒品第二十五（26 偈）……………28  
【18】塵垢品第二十六（19 偈）……………29  
【19】奉持品第二十七（17 偈）……………29  
【20】道行品第二十八（28 偈）……………30  
【21】廣衍品第二十九（14 偈）……………31  
【22】地獄品第三十（16 偈）……………31  
【23】象喻品第三十一（18 偈）……………32  
【24】愛欲品第三十二（33 偈）……………33  
【25】沙門品第三十四（32 偈）……………34  
【26】梵志品第三十五（40 偈）……………35

北傳《法句經》39 品……………37  
北傳《法句譬喻經》39 品……………65

無常品第一……………65  
教學品=護戒品第二……………69  
多聞品第三……………72

篤信品第四	76
戒慎品第五	78
惟念品第六	79
慈仁品第七	80
言語品第八	82
雙要品第九	83
放逸品第十	87
心意品第十一	88
華香品第十二	88
愚闇品第十三	92
明哲品第十四	94
羅漢品第十五	97
述千品第十六	98
惡行品第十七	102
刀仗品第十八	104
老耄品第十九	107
愛身品第二十	109
世俗品第二十一	111
述佛品第二十二	112
安寧品第二十三	113
好喜品第二十四	116
忿怒品第二十五	117
塵垢品第二十六	118
奉持品第二十七	119
道行品第二十八	120
廣衍品第二十九	122
地獄品第三十	123
象品第三十一	125
愛欲品第三十二	128
利養品第三十三	133
沙門品第三十四	134
梵志品第三十五	135
泥洹品第三十六	136
生死品第三十七	137
道利品第三十八	139
吉祥品第三十九	144

北傳《法集要頌》33品	146
《法句經》及其譬喻的演變略探	178

《法句經》選集

南傳《法句經》26 品

了參法師譯

林崇安編，內觀教育基金會出版

【內觀教育版】2004

【1】雙品

- 01 諸法意先導，意主意造作。若以染污意，或語或行業，  
是則苦隨彼，如輪隨獸足。
- 02 諸法意先導，意主意造作。若以清淨意，或語或行業，  
是則樂隨彼，如影不離形。
- 03 彼罵我打我，敗我劫奪我！若人懷此念，怨恨不能息。
- 04 彼罵我打我，敗我劫奪我！若人捨此念，怨恨自平息。
- 05 於此世界中，從非怨止怨，唯以忍止怨；此古聖常法。
- 06 彼人不了悟：我等將毀滅。若彼等知此，則諍論自息。
- 07 唯求住淨樂，不攝護諸根，飲食不知量，懈惰不精進，  
彼實為魔伏，如風吹弱樹。
- 08 願求非樂住，善攝護諸根，飲食知節量，具信又精進，  
魔不能勝彼，如風吹石山。
- 09 若人穿袈裟，不離諸垢穢，無誠實克己，不應著袈裟。
- 10 若人離諸垢，能善持戒律，克己與誠實，彼應著袈裟。
- 11 非真思真實，真實見非真，邪思惟境界，彼不達真實。
- 12 真實思真實，非真知非真，正思惟境界，彼能達真實。
- 13 如蓋屋不密，必為雨漏浸，如是不修心，貪欲必漏入。
- 14 如善密蓋屋，不為雨漏浸，如是善修心，貪欲不漏入。
- 15 現世此處悲，死後他處悲，作諸惡業者，兩處俱憂悲，  
見自惡業已，他悲他苦惱。
- 16 現世此處樂，死後他處樂，作諸善業者，兩處俱受樂，  
見自善業已，他樂他極樂。
- 17 現世此處苦，死後他處苦，作諸惡業者，兩處俱受苦，  
現悲「我作惡」，墮惡趣更苦。

- 18 現世此處喜，死後他處喜，修諸福業者，兩處俱歡喜，  
現喜「我修福」，生善趣更喜。
- 19 雖多誦經集，放逸而不行，如牧數他牛，自無沙門分。
- 20 雖誦經典少，能依教實行，具足正知識，除滅貪瞋癡，  
善淨解脫心，棄捨於世欲，此界或他界，彼得沙門分。

## 【2】不放逸品

- 21 無逸不死道，放逸趣死路。無逸者不死，放逸者如尸。
- 22 智者深知此，所行不放逸。不放逸得樂，喜悅於聖境。
- 23 智者常堅忍，勇猛修禪定，解脫得安穩，證無上涅槃。
- 24 奮勉常正念，淨行能克己，如法而生活，無逸善名增。
- 25 奮勉不放逸，克己自調御，智者自作洲，不為洪水沒。
- 26 暗鈍愚癡人，耽溺於放逸，智者不放逸，如富人護寶。
- 27 莫耽溺放逸。莫嗜愛欲樂。警覺修定者，始得大安樂。
- 28 智者以無逸，除逸則無憂，聖賢登慧閣，觀患者多憂，  
如登於高山，俯視地上物。
- 29 放逸中無逸，如眾睡獨醒。智者如駿馳，駑駘所不及。
- 30 摩伽以無逸，得為諸天主。無逸人所讚，放逸為人訶。
- 31 樂不放逸比丘，或者懼見放逸，猶如猛火炎炎，燒去大結小結。
- 32 樂不放逸比丘，或者懼見放逸，彼已隣近涅槃，必定不易墮落。

## 【3】心品

- 33 輕動變易心，難護難制伏。智者調直之，如匠搦箭直。
- 34 如魚離水棲，投於陸地上，以此戰慄心，擺脫魔境界。
- 35 此心隨欲轉，輕躁難捉摸。善哉心調伏，心調得安樂。
- 36 此心隨欲轉，微妙極難見。智者防護心，心護得安樂。
- 37 遠行與獨行，無形隱深窟。誰能調伏心，解脫魔羅縛。
- 38 心若不安定，又不了正法，信心不堅者，智慧不成就。
- 39 若得無漏心，亦無諸惑亂，超越善與惡，覺者無恐怖。
- 40 知身如陶器，住心似城廓，慧劍擊魔羅，守勝莫染著。
- 41 此身實不久，當睡於地下，被棄無意識，無用如木屑。
- 42 仇敵害仇敵，怨家對怨家，若心向邪行，惡業最為大。
- 43 善非父母作，亦非他眷屬，若心向正行，善業最為大。

#### 【4】花品

- 44 誰征伏地界，閻魔界天界？誰善說法句，如巧匠採花？  
45 有學克地界，閻魔界天界；有學說法句，如巧匠採花。  
46 知此身如泡，覺悟是幻法，折魔羅花箭，越死王所見。  
47 採集諸花已，其人心愛著，死神捉將去，如瀑流睡村。  
48 採集諸花已，其人心愛著，貪欲無厭足，實為死魔伏。  
49 牟尼入村落，譬如蜂採華，不壞色與香，但取其蜜去。  
50 不觀他人過，不觀作不作，但觀自身行，已作與未作。  
51 猶如鮮妙花，色美而無香，如是說善語，彼不行無果。  
52 猶如鮮妙花，色美而芳香，如是說善語，彼實行有果。  
53 如從諸花聚，得造眾花鬘，如是生為人，當作諸善事。  
54 花香不逆風，旃檀多伽羅，末利香亦爾。  
    德香逆風薰，彼正人之香，遍聞於諸方。  
55 旃檀多伽羅，拔悉基青蓮，如是諸香中，戒香為最上。  
56 栴檀多伽羅，此等香甚微。持戒者最上，香薰諸天間。  
57 成就諸戒行，住於不放逸，正智解脫者，魔不知所趣。  
58 猶如糞穢聚，棄著於大道，蓮華生其中，香潔而悅意。  
59 如是糞穢等，盲昧凡夫中，正覺者弟子，以智慧光照。

#### 【5】愚品

- 60 不眠者夜長，倦者由旬長，不明達正法，愚者輪迴長。  
61 不得勝我者為友，與我相等者亦無，  
    寧可堅決獨行居，不與愚人作伴侶。  
62 「此我子我財」，愚人常為憂。我且無有我，何有子與財？  
63 愚者自知愚，彼即是智人。愚人自謂智，實稱真愚夫。  
64 愚者雖終身，親近於智人，彼不了達摩，如匙嘗湯味。  
65 慧者須臾頃，親近於智人，能速解達摩，如舌嘗湯味。  
66 愚人不覺知，與自仇敵行，造作諸惡業，定受眾苦果。  
67 彼作不善業，作已生後悔，哭泣淚滿面，應得受異熟。  
68 若彼作善業，作已不追悔，歡喜而愉悅，應得受異熟。  
69 惡業未成熟，愚人思如蜜；惡業成熟時，愚人必受苦。  
70 愚者月復月，雖僅取少食，以孤沙草端；  
    彼所得功德，不及思法者，十六分之一。

- 71 猶如搆牛乳，醍醐非速成。愚人造惡業，不即感惡果，業力隨其後，如死灰覆火。
- 72 愚夫求知識，反而趨滅亡，損害其幸福，破碎其頭首。
- 73 愚人驚虛名：僧中作上座，僧院為院主，他人求供養。
- 74 僧與俗共知，此事由我作，事無論大小，皆由我作主：愚人作此想，貪與慢增長。
- 75 一道引世利，一道向涅槃。佛弟子比丘，當如是了知：莫貪著世利，專注於遠離。

### 【6】智者品

- 76 若見彼智者，能指示過失，並能譴責者，當與彼為友；猶如知識者，能指示寶藏，與彼智人友，定善而無惡。
- 77 訓誡與教示，阻他人過惡。善人愛此人，但為惡人憎。
- 78 莫與惡友交，莫友卑鄙者。應與善友交，應友高尚士。
- 79 得飲法水者，心清而安樂。智者常喜悅，聖者所說法。
- 80 灌溉者引水，箭匠之矯箭，木匠之繩木，智者自調御。
- 81 猶如堅固巖，不為風所搖，毀謗與讚譽，智者不為動。
- 82 亦如一深池，清明而澄淨，智者聞法已，如是心清淨。
- 83 善人離諸欲，不論諸欲事。苦樂所不動，智者無喜憂。
- 84 不因自因他，智者作諸惡，不求子求財、及謀國作惡。不欲以非法，求自己繁榮。彼實具戒行，智慧正法者。
- 85 於此人羣中，達彼岸者少。其餘諸人等，徘徊於此岸。
- 86 善能說法者，及依正法行，彼能達彼岸，度難度魔境。
- 87 應捨棄黑法，智者修白法，從家來無家，喜獨處不易。
- 88 當求是法樂，捨欲無所有，智者須清淨，自心諸垢穢。
- 89 彼於諸覺支，正心而修習。遠離諸固執，樂捨諸愛著，漏盡而光耀，此世證涅槃。

### 【7】阿羅漢品

- 90 路行盡無憂，於一切解脫，斷一切繫縛，無有苦惱者。
- 91 正念奮勇者，彼不樂在家，如鵝離池去，彼等棄水家。
- 92 彼等無積聚，於食如實知，空無相解脫，是彼所行境，如鳥遊虛空，蹤跡不可得。

- 93 彼等諸漏盡，亦不貪飲食，空無相解脫，是彼所行境，  
如鳥遊虛空，蹤跡不可得。
- 94 彼諸根寂靜，如御者調馬，離我慢無漏，為天人所慕。
- 95 彼已無憤恨，猶如於大地，彼虔誠堅固，如因陀揭羅，  
如無污泥池，是人無輪迴。
- 96 彼人心寂靜，語與業寂靜，正智而解脫，如是得安穩。
- 97 無信知無為，斷繫因永謝，棄捨於貪欲，真實無上士。
- 98 於村落林間，平地或丘陵，何處有羅漢，彼地即可慶。
- 99 林野甚可樂，世人所不樂；彼喜離欲樂，不求諸欲樂。

### 【8】千品

- 100 雖誦一千言，若無義理者，不如一義語，聞已得寂靜。
- 101 唯誦千句偈，若無義理者，不如一句偈，聞已得寂靜。
- 102 彼誦百句偈，若無義理者，不如一法句，聞已得寂靜。
- 103 彼於戰場上，雖勝百萬人，未若克己者，戰士之最上。
- 104 能克制自己，過於勝他人。若有克己者，常行自節制。
- 105 天神乾闥婆，魔王並梵天，皆遭於敗北，不能勝彼人。
- 106 月月投千金，供犧牲百年，不如須臾間，供養修己者，  
彼如是供養，勝祭祀百年。
- 107 若人一百年，事火於林中，不如須臾間，供養修己者，  
彼如是供養，勝祭祀百年。
- 108 若人於世間，施捨或供養，求福一週年，如是諸功德，  
不及四分之一，禮敬正直者。
- 109 好樂敬禮者，常尊於長老，四法得增長：壽美樂與力。
- 110 若人壽百歲，破戒無三昧，不如生一日，持戒修禪定。
- 111 若人壽百歲，無慧無三昧，不如生一日，具慧修禪定。
- 112 若人壽百歲，怠惰不精進，不如生一日，勵力行精進。
- 113 若人壽百歲，不見生滅法，不如生一日，得見生滅法。
- 114 若人壽百歲，不見不死道，不如生一日，得見不死道。
- 115 若人壽百歲，不見最上法，不如生一日，得見最上法。

### 【9】惡品

- 116 應急速作善，制止罪惡心。怠慢作善者，心則喜於惡。
- 117 若人作惡已，不可數數作。莫喜於作惡，積惡則受苦。

- 118 若人作善已，應復數數作。當喜於作善，積善則受樂。
- 119 惡業未成熟，惡者以為樂。惡業成熟時，惡者方見惡。
- 120 善業未成熟，善人以為苦。善業成熟時，善人始見善。
- 121 莫輕於小惡，謂我不招報，須知滴水落，亦可滿水瓶，  
愚夫盈其惡，少許少許積。
- 122 莫輕於小善，謂我不招報，須知滴水落，亦可滿水瓶，  
智者完其善，少許少許積。
- 123 商人避險道，伴少而貨多；愛生避毒品，避惡當亦爾。
- 124 假若無有瘡傷手，可以其手持毒藥，  
毒不能患無傷手，不作惡者便無惡。
- 125 若犯無邪者，清淨無染者，罪惡向愚人，如逆風揚塵。
- 126 有人生於母胎中，作惡者則墮地獄，  
正直之人昇天界，漏盡者證入涅槃。
- 127 非於虛空及海中，亦非入深山洞窟，  
欲求逃遁惡業者，世間實無可覓處。
- 128 非於虛空及海中，亦非入深山洞窟，  
欲求不為死魔制，世間實無可覓處。

### 【10】刀杖品

- 129 一切懼刀杖，一切皆畏死，以自度他情，莫殺教他殺。
- 130 一切懼刀杖，一切皆愛生，以自度他情，莫殺教他殺。
- 131 於求樂有情，刀杖加惱害，但求自己樂，後世樂難得。
- 132 於求樂有情，不加刀杖害，欲求自己樂，後世樂可得。
- 133 對人莫說粗惡語，汝所說者還說汝。  
憤怒之言實堪痛，互擊刀杖可傷汝。
- 134 汝若自默然，如一破銅鑼，已得涅槃路，於汝無諍故。
- 135 如牧人以杖，驅牛至牧場，如是老與死，驅逐眾生命。
- 136 愚夫造作諸惡業，却不自知有果報，  
癡人以自業感苦，宛如以火而自燒。
- 137 若以刀杖害，無惡無害者，十事中一種，彼將迅速得：
- 138 極苦痛失財；身體被損害；或重病所逼；或失心狂亂。
- 139 或為王迫害；或被誣重罪；或眷屬離散；或破滅財產。
- 140 或彼之房屋，為劫火焚燒；癡者身亡後，復墮於地獄。

- 141 非裸行結髮，非塗泥絕食，臥地自塵身，非以蹲踞住，不斷疑惑者，能令得清淨。
- 142 嚴身住寂靜，調御而克制，必然修梵行，不以刀杖等，加害諸有情，彼即婆羅門，彼即是沙門，彼即是比丘。
- 143 以慚自禁者，世間所罕有，彼善避羞辱，如良馬避鞭。
- 144 如良馬加鞭，當奮勉懺悔。以信戒精進，以及三摩地，善分別正法，以及明行足，汝當念勿忘，消滅無窮苦。
- 145 灌溉者引水，箭匠之矯箭，木匠之繩木，善行者自御。

### 【11】老品

- 146 常在燃燒中，何喜何可笑？幽暗之所蔽，何不求光明？
- 147 觀此粉飾身，瘡傷一堆骨，疾病多思惟，絕非常存者。
- 148 此衰老形骸，病藪而易壞，朽聚必毀滅，有生終歸死。
- 149 猶如葫蘆瓜，散棄於秋季，骸骨如鴿色，觀此何可樂？
- 150 此城骨所建，塗以血與肉，儲藏老與死，及慢並虛偽。
- 151 盛飾王車亦必朽，此身老邁當亦爾。  
唯善人法不老朽，善人傳示於善人。
- 152 寡聞之愚人，生長如牡牛，唯增長筋肉，而不增智慧。
- 153 經多生輪迴，尋求造屋者，但未得見之，痛苦再再生。
- 154 已見造屋者，不再造於屋，椽桷皆毀壞，棟梁亦摧折。  
我既證無為，一切愛盡滅。
- 155 少壯不得財，並不修梵行，如池邊老鷺，無魚而萎滅。
- 156 少壯不得財，並不修梵行，臥如破折弓，悲歎於過去。

### 【12】自己品

- 157 若人知自愛，須善自保護，三時中一時，智者應醒覺。
- 158 第一將自己，安置於正道，然後教他人；賢者始無過。
- 159 若欲誨他者，應如己所行，自制乃制他，克己實最難。
- 160 自為自依怙，他人何可依？自己善調御，證難得所依。
- 161 惡業實由自己作，從自己生而自起。  
惡業摧壞於愚者，猶如金剛破寶石。
- 162 破戒如蔓蘿，纏覆袈羅樹。彼自如此作，徒快敵者意。
- 163 不善事易作，然無益於己；善與利益事，實為極難行。

- 164 惡慧愚癡人，以其邪見故，侮蔑羅漢教、依正法行者、  
以及尊者教，而自取毀滅，如格他格草，結果自滅亡。
- 165 惡實由己作，染污亦由己；由己不作惡，清淨亦由己。  
淨不淨依己，他何能淨他？
- 166 莫以利他事，忽於己利益。善知己利者，常專心利益。

### 【13】世品

- 167 莫從卑劣法。莫住於放逸。莫隨於邪見。莫增長世俗。
- 168 奮起莫放逸！行正法善行。依正法行者，此世他世樂。
- 169 行正法善行。勿行於惡行。依正法行者，此世他世樂。
- 170 視如水上浮漚，視如海市蜃樓，若人觀世如是，死王不得見他。
- 171 來看這個世界，猶如莊嚴王車。愚人沉湎此中，智者毫無執著。
- 172 若人先放逸，但後不放逸，彼照耀此世，如月出雲翳。
- 173 若作惡業已，覆之以善者，彼照耀此生，如月出雲翳。
- 174 此世界盲暝，能得見者少，如鳥脫羅網，鮮有昇天者。
- 175 天鵝飛行太陽道，以神通力可行空。  
智者破魔王魔眷，得能脫離於世間。
- 176 違犯一乘法，及說妄語者，不信來世者，則無惡不作。
- 177 慳者不生天。愚不讚布施。智者隨喜施，後必得安樂。
- 178 一統大地者，得生天上者，一切世界主，不及預流勝。

### 【14】佛陀品

- 179 彼之勝利無能勝，敗者於世無可從，  
佛智無邊無行跡，汝復以何而誑惑？
- 180 彼已不具於結縛，愛欲難以誘使去，  
佛智無邊無行跡，汝復以何而誑惑？
- 181 智者修禪定，喜出家寂靜，正念正覺者，天人所敬愛。
- 182 得生人道難，生得壽終難，得聞正法難，遇佛出世難。
- 183 一切惡莫作，一切善應行，自調淨其意，是則諸佛教。
- 184 諸佛說涅槃最上，忍辱為最高苦行。  
害他實非出家者，惱他不名為沙門。
- 185 不誹與不害，嚴持於戒律，飲食知節量，遠處而獨居，  
勤修增上定，是為諸佛教。
- 186 即使兩金錢，欲心不滿足。智者知淫欲，樂少而苦多。

- 187 故彼於天欲，亦不起希求。正覺者弟子，希滅於愛欲。  
188 諸人恐怖故，去歸依山岳，或依於森林，園苑樹支提。  
189 此非安穩依，此非最上依，如是歸依者，不離一切苦。  
190 若人歸依佛，歸依法及僧，由於正智慧，得見四聖諦。  
191 苦與苦之因，以及苦之滅，並八支聖道，能令苦寂滅。  
192 此歸依安穩，此歸依無上，如是歸依者，解脫一切苦。  
193 聖人極難得，彼非隨處生；智者所生處，家族咸蒙慶。  
194 諸佛出現樂，演說正法樂，僧伽和合樂，修士和合樂。  
195 供養應供者：脫離於虛妄，超越諸憂患，佛及佛弟子。  
196 若供養如是：寂靜無畏者，其所得功德，無能測量者。

### 【15】樂品

- 197 我等實樂生，憎怨中無憎。於憎怨人中，我等無憎住。  
198 我等實樂生，疾病中無病。於疾病人中，我等無病住。  
199 我等實樂生，貪欲中無欲。於貪欲人中，我等無欲住。  
200 我等實樂生，我等無物障。我等樂為食，如光音天人。  
201 勝利生憎怨，敗者住苦惱。勝敗兩俱捨，和靜住安樂。  
202 無火如貪欲，無惡如瞋恨，無苦如五蘊，無樂勝寂靜。  
203 飢為最大病，行為最大苦；如實知此已，涅槃樂最上。  
204 無病最上利，知足最上財，信賴最上親，涅槃最上樂。  
205 已飲獨居味，以及寂靜味，喜飲於法味，離怖畏去惡。  
206 善哉見聖者，與彼同住樂。由不見愚人，彼即常歡樂。  
207 與愚者同行，長時處憂悲。與愚同住苦，如與敵同居。  
與智者同住，樂如會親族。  
208 〔是故賢智多聞者，持戒虔誠與聖者〕，  
從斯善人賢慧遊，猶如月從於星道。

### 【16】喜愛品

- 209 專事不當事，不事於應修，棄善趨愛欲，却羨自勉者。  
210 莫結交愛人，莫結不愛人。不見愛人苦，見憎人亦苦。  
211 是故莫愛著，愛別離為苦。若無愛與憎，彼即無羈縛。  
212 從喜愛生憂，從喜愛生怖；離喜愛無憂，何處有恐怖？  
213 從親愛生憂，從親愛生怖；離親愛無憂，何處有死怖？  
214 從貪欲生憂，從貪欲生怖；離貪欲無憂，何處有恐怖？

- 215 從欲樂生憂，從欲樂生怖；離欲樂無憂，何處有恐怖？  
216 從愛欲生憂，從愛欲生怖；離愛欲無憂，何處有恐怖？  
217 具戒及正見，住法知真諦，圓滿自所行，彼為世人愛。  
218 渴求離言法，充滿思慮心，諸欲心不著，是名上流人。  
219 久客異鄉者，自遠處安歸，親友與知識，歡喜而迎彼。  
220 造福亦如是，從此生彼界，福業如親友，以迎愛者來。

### 【17】忿怒品

- 221 捨棄於忿怒，除滅於我慢，解脫一切縛，不執著名色，  
彼無一物者，苦不能相隨。  
222 若能抑忿發，如止急行車，是名善御者，餘為執韁人。  
223 以不忿勝忿。以善勝不善。以施勝慳吝。以實勝虛妄。  
224 諦語不瞋恚，分施與乞者；以如是三事，能生於諸天。  
225 彼無害牟尼，常調伏其身，到達不死境，無有悲憂處。  
226 恆常醒覺者，日夜勤修學，志向於涅槃，息滅諸煩惱。  
227 阿多羅應知！此非今日事，古語已有之：默然為人誹，  
多語為人誹，寡言為人誹。不為誹謗者，斯世實無有。  
228 全被人誹者，或全被讚者，非曾有當有，現在亦無有。  
229 若人朝朝自反省，行無瑕疵並賢明，  
智慧戒行兼具者，彼為智人所稱讚。  
230 品如閻浮金，誰得誹辱之？彼為婆羅門，諸天所稱讚。  
231 攝護身忿怒，調伏於身行。捨離身惡行，以身修善行。  
232 攝護語忿怒，調伏於語行。捨離語惡行，以語修善行。  
233 攝護意忿怒，調伏於意行。捨離意惡行，以意修善行。  
234 智者身調伏，亦復語調伏，於意亦調伏，實一切調伏。

### 【18】垢穢品

- 235 汝今已似枯焦葉，閻魔使者近身邊。  
汝已踰立死門前，旅途汝亦無資糧。  
236 汝宜自造安全洲，迅速精勤為智者。  
拂除塵垢無煩惱，得達諸天之聖境。  
237 汝今壽命行已終，汝已移步近閻魔。  
道中既無停息處，旅途汝亦無資糧。

- 238 汝宜自造安全洲，迅速精勤為智者。  
 拂除塵垢無煩惱，不復重來生與老。
- 239 剎那剎那間，智者分分除，漸拂自垢穢，如冶工鍛金。
- 240 如鐵自生鏽，生已自腐蝕，犯罪者亦爾，自業導惡趣。
- 241 不誦經典穢，不勤為家穢，懶惰為色穢，放逸護衛穢。
- 242 邪行婦人穢，吝嗇施者穢。此界及他界，惡法實為穢。
- 243 此等諸垢中，無明垢為最，汝當除此垢，成無垢比丘。
- 244 生活無慚愧，鹵莽如烏鴉，詆毀於他人，大膽自誇張，  
 傲慢邪惡者，其人生活易。
- 245 生活於慚愧，常求於清淨，不著欲謙遜，住清淨生活，  
 富於識見者，其人生活難。
- 246 若人於世界，殺生說妄語，取人所不與，犯於別人妻，  
 247 及耽湏飲酒，行為如是者，即於此世界，毀掘自善根。
- 248 如是汝應知！不制則為惡。莫貪與非法，自陷於永苦。
- 249〔人〕信樂故施。心〔不足〕得食，彼於晝或夜，不得入三昧。
- 250 若斬斷此心，拔根及除滅，則於晝或夜，彼得入三昧。
- 251 無火等於貪欲，無執著如瞋恚，無網等於愚癡，無河流如愛欲。
- 252 易見他人過，自見則為難，揚惡如颶糠，已過則覆匿，  
 如彼狡博者，隱匿其格利。
- 253 若見他人過，心常易忿者，增長於煩惱；去斷惑遠矣。
- 254 虛空無道跡，外道無沙門。眾生喜虛妄，如來無虛妄。
- 255 虛空無道跡，外道無沙門。五蘊無常住，諸佛無動亂。

### 【19】法住品

- 256 鹵莽處事故，不為法住者。智者應辨別：孰正與孰邪。
- 257 導人不鹵莽，如法而公平，智者護於法，是名法住者。
- 258 不以多言故，彼即為智者。安靜無怨怖，是名為智者。
- 259 不以多言故，彼為持法者。彼雖聞少分，但由身見法，  
 於法不放逸，是名持法者。
- 260 不因彼白頭，即得為長老，彼年齡虛熟，徒有長老名。
- 261 於彼具真實，具法不殺生，節制並調伏，彼有智慧人，  
 除滅諸垢穢，實名為長老。
- 262 嫉慳虛偽者，雖以其辯才，或由相端嚴，不為善良人。
- 263 若斬斷此心，拔根及除滅，彼捨瞋智者，名為善良人。

264 若破戒妄語，削髮非沙門。充滿欲與貪，云何為沙門？  
265 彼息滅諸惡，無論大與小，因息滅諸惡，故名為沙門。  
266 僅向他行乞，不即是比丘。行宗教法儀，亦不為比丘。  
267 僅捨善與惡，修於梵行者，以知住此世，彼實名比丘。  
268 愚昧無知者，不以默然故，而名為牟尼。智者如權衡。  
269 捨惡取其善，乃得為牟尼。彼知於兩界，故稱為牟尼。  
270 彼人非聖賢，以其殺生故。不害諸眾生，是名為聖者。  
271 不以戒律行，或由於多聞，或由證三昧，或由於獨居，  
272 謂「受出家樂，非凡夫所能」。汝等漏未盡，莫生保信想。

### 【20】道品

273 八支道中勝，四句諦中勝，離欲法中勝，具眼兩足勝。  
274 實唯此一道，無餘知見淨。汝等順此行，魔為之惑亂。  
275 汝順此道行，使汝苦滅盡。知我所說道，得除去荊棘。  
276 汝當自努力！如來唯說者。隨禪定行者，解脫魔繫縛。  
277 「一切行無常」，以慧觀照時，得厭離於苦。此乃清淨道。  
278 「一切行是苦」，以慧觀照時，得厭離於苦。此乃清淨道。  
279 「一切法無我」，以慧觀照時，得厭離於苦。此乃清淨道。  
280 當努力時不努力，年雖少壯陷怠惰，  
意志消沉又懶弱，怠者不以智得道。  
281 慎語而制意，不以身作惡。淨此三業道，得聖所示道。  
282 由瑜伽生智，無瑜伽慧滅。了知此二道，及其得與失，  
當自努力行，增長於智慧。  
283 應伐欲稠林，勿伐於樹木。從欲林生怖，當脫欲稠林。  
284 男女欲絲絲，未斷心猶繫；如飲乳犢子，不離於母牛。  
285 自己斷除愛情，如以手折秋蓮。勤修寂靜之道，善逝所說涅槃。  
286 「雨季我住此，冬夏亦住此」，此為愚夫想，而不覺危險。  
287 溺愛子與畜，其人心惑著，死神捉將去，如瀑流睡村。  
288 父子與親戚，莫能為救護。彼為死所制，非親族能救。  
289 了知此義已，智者持戒律，通達涅槃路，迅速令清淨。

### 【21】雜品

290 若棄於小樂，但見於大樂。智者棄小樂，當見於大樂。  
291 施與他人苦，為求自己樂；彼為瞋繫縛，怨憎不解脫。

- 292 應作而不作，不應作而作，傲慢放逸者，彼之漏增長。
- 293 常精勤觀身，不作不應作，應作則常作，觀者漏滅盡。
- 294 殺愛欲母與慢父，殺刹帝利族二王，  
破王國殺其從臣，趨向無憂婆羅門。
- 295 殺愛欲母與慢父，殺婆羅門族二王，  
殺其虎將第五疑，趨向無憂婆羅門。
- 296 喬達摩弟子，常善自醒覺，無論晝與夜，彼常念佛陀。
- 297 喬達摩弟子，常善自醒覺，無論晝與夜，彼常念達摩。
- 298 喬達摩弟子，常善自醒覺，無論晝與夜，彼常念僧伽。
- 299 喬達摩弟子，常善自醒覺，無論晝與夜，彼常念於身。
- 300 喬達摩弟子，常善自醒覺，無論晝與夜，常樂不殺生。
- 301 喬達摩弟子，常善自醒覺，無論晝與夜，心常樂禪定。
- 302 出家愛樂難。在家生活難。非儔共住苦。輪迴往來苦。  
故不應往來，隨從於痛苦。
- 303 正信而具戒，得譽及財者，彼至於何處，處處受尊敬。
- 304 善名揚遠方，高顯如雲山。惡者如夜射，雖近不能見。
- 305 獨坐與獨臥，獨行而不倦，彼獨自調御，喜樂於林中。

## 【22】地獄品

- 306 說妄語者墮地獄，或已作言「我無作」。  
此二惡業者死後，他世同受地獄苦。
- 307 多袈裟纏頸，惡行不節制，惡人以惡業，終墮於地獄。
- 308 若破戒無制，受人信施食，不如吞鐵丸，熱從火焰出。
- 309 放逸淫人妻，必遭於四事：獲罪睡不安，誹三地獄四。
- 310 非福並惡趣，恐怖樂甚少，國王加重罪，故莫淫他婦。
- 311 不善執孤沙，則傷害其手；沙門作邪行，則趣向地獄。
- 312 諸有懈惰行，及染污戒行，懷疑修梵行，彼不得大果。
- 313 應作所當作，作之須盡力！放蕩遊行僧，增長於欲塵。
- 314 不作惡業勝，作惡後受苦。作諸善業勝，作善不受苦。
- 315 譬如邊區域，內外均防護，自護當亦爾。刹那莫放逸。  
刹那疏忽者，入地獄受苦。
- 316 不應羞而羞，應羞而不羞，懷此邪見者，眾生趨惡趣。
- 317 不應怖見怖，應怖不見怖，懷此邪見者，眾生趨惡趣。
- 318 非過思為過，是過見無過，懷此邪見者，眾生趨惡趣。

319 過失知過失，無過知無過，懷此正見者，眾生趨善趣。

### 【23】象品

320 如象在戰陣，堪忍弓箭射，我忍謗亦爾。世多破戒者。

321 調御象可赴集會，調御象可為王乘。

若能堪忍於謗言，人中最勝調御者。

322 調御之驪為優良，信度駿馬為優良，

僑羅大象亦優良，自調御者更優良。

323 實非彼等車乘，得達難到境地，若人善自調御，由於調御得達。

324 如象名財護，泌液暴難制，繫縛不入食，惟念於象林。

325 樂睡又貪食，轉側唯長眠，如豬食無厭，愚者數入胎。

326 我此過去心，任意隨所欲，隨愛好遊行。

我今悉調伏，如象師持鈎，制御泌液象。

327 當樂不放逸，善護於自心。自救出難處，如象出泥坑。

328 若得同行伴，善行富智慮，能伏諸艱困，欣然共彼行。

329 若無同行伴，善行富智慮，應如王棄國，如象獨行林。

330 寧一人獨行，不與愚為友。獨行離欲惡，如象獨遊林。

331 應時得友樂，適時滿足樂，命終善業樂，離一切苦樂。

332 世中敬母樂，敬父親亦樂。世敬沙門樂，敬聖人亦樂。

333 至老持戒樂，正信成就樂，獲得智慧樂，不作諸惡樂。

### 【24】愛欲品

334 若住於放逸，愛增如蔓蘿。此生又彼生，如猿求林果。

335 若於此世界，為惡欲纏縛，憂苦日增長，如毗羅得雨。

336 若於此世界，降難降愛欲，憂苦自除落，如水滴蓮葉。

337 我說此善事：汝等集於此，掘愛欲之根，如求毗羅那，

掘去其甜根。勿再為魔王，屢屢害汝等，如洪水侵葦。

338 不傷深固根，雖伐樹還生。愛欲不斷根，苦生亦復爾。

339 彼具三十六愛流，勢強奔流向欲境，

是則彼具邪見人，為欲思惟漂蕩去。

340 欲流處處流，蔓蘿盛發芽，汝見蔓蘿生，以慧斷其根。

341 世喜悅欲滋潤，亦喜馳逐六塵。彼雖向樂求樂，但唯得於生滅。

342 隨逐愛欲人，馳迴如網兔。纏縛於煩惱，再再長受苦。

343 隨逐愛欲人，馳迴如網兔。比丘求無欲，故須自離欲。

- 344 捨欲喜林間，離欲復向欲，當觀於此人，解縛復向縛。
- 345 鐵木麻作者，智說非堅縛。迷戀妻子財，是實為堅縛。
- 346 能引墮落者，智說為堅縛。彼雖似寬緩，而實難解脫。  
斷此無著者，捨欲而出家。
- 347 彼耽於欲隨欲流，投自結網如蜘蛛。  
斷此縛而無著者，離一切苦而遨遊。
- 348 捨過現未來，而渡於彼岸，心解脫一切，不再受生老。
- 349 惡想所亂者，求樂欲熾然，彼欲倍增長，自作堅牢縛。
- 350 喜離惡想者，常念於不淨，當除於愛欲，不為魔羅縛。
- 351 達究竟處無畏，離愛欲無垢穢，斷除生有之箭，此為彼最後身。
- 352 離欲無染者，通達詞無礙，善知義與法，及字聚次第，  
彼為最後身，大智大丈夫。
- 353 我降伏一切，我了知一切。一切法無染，離棄於一切，  
滅欲得解脫，自證誰稱師？
- 354 諸施法施勝；諸味法味勝；諸喜法喜勝；除愛勝諸苦。
- 355 財富毀滅愚人，決非求彼岸者。愚人為財欲害，自害如害他人。
- 356 雜草害田地，貪欲害世人。施與離貪者，故得大果報。
- 357 雜草害田地，瞋恚害世人。施與離瞋者，故得大果報。
- 358 雜草害田地，愚癡害世人。施與離癡者，故得大果報。
- 359 雜草害田地，欲望害世人。施與離欲者，故得大果報。

## 【25】比丘品

- 360 善哉制於眼。善哉制於耳。善哉制於鼻。善哉制於舌。
- 361 善哉制於身。善哉制於語。善哉制於意。善哉制一切。  
制一切比丘，解脫一切苦。
- 362 調御手足及言語，調御最高之頭首，  
心喜於禪住於定，獨居知足名比丘。
- 363 比丘調於語，善巧而寂靜，顯示法與義，所說甚和婉。
- 364 住法之樂園，喜法與隨法，思惟憶念法，比丘不復退。
- 365 莫輕自所得，莫羨他所得。比丘羨他得，不證三摩地。
- 366 比丘所得雖少，而不輕嫌所得，生活清淨不怠，實為諸天稱讚。
- 367 若於名與色，不著我我所，非有故無憂，彼實稱比丘。
- 368 住於慈悲比丘，喜悅佛陀教法，到達寂靜安樂，諸行解脫境界。
- 369 比丘汲此舟水，水去則舟輕快。斷除貪欲瞋恚，則得證於涅槃。

- 370 五斷及五棄，而五種勤修，越五著比丘，名渡瀑流者。  
371 修定莫放逸，心莫惑於欲。莫待吞鐵丸，燒然乃苦號。  
372 無慧者無定，無定者無慧。兼具定與慧，彼實近涅槃。  
373 比丘入屏虛，彼之心寂靜，審觀於正法，得受超人樂。  
374 若人常正念：諸蘊之生滅，獲得喜與樂。知彼得不死。  
375 若智慧比丘，於世先作是：攝根及知足，護持別解脫。  
376 態度須誠懇，行為須端正；是故彼多樂，得滅盡諸苦。  
377 如跋悉伽花，枯萎而凋謝，汝等諸比丘，棄貪瞋亦爾。  
378 身靜及語靜，心寂住三昧，捨俗樂比丘，是名寂靜者。  
379 汝當自警策，汝應自反省。自護與正念，比丘住安樂。  
380 自為自保護，自為自依怙。汝應自調御，如商調良馬。  
381 比丘具歡喜心，誠信佛陀教法，到達寂靜安樂，諸行解脫境界。  
382 比丘雖年少，勤行佛陀教，彼輝耀此世，如月出雲翳。

## 【26】婆羅門品

- 383 勇敢斷除於欲流，汝當棄欲婆羅門！  
    若知於諸蘊滅盡，汝便知無作涅槃。  
384 若常住於二法，婆羅門達彼岸；所有一切繫縛，從彼智者而滅。  
385 無彼岸此岸，兩岸悉皆無，離苦無繫縛，是謂婆羅門。  
386 彼人入禪定，安住離塵垢，所作皆已辦，無諸煩惱漏，  
    證最高境界，是謂婆羅門。  
387 日照晝兮月明夜，剎帝利武裝輝耀，  
    婆羅門禪定光明，佛陀光普照晝夜。  
388 棄除惡業者，是名婆羅門。行為清淨者，則稱為沙門。  
    自除垢穢者，是名出家人。  
389 莫打婆羅門，婆羅門莫瞋，打彼者可恥，忿發恥更甚。  
390 婆羅門此非小益：若自喜樂制其心，  
    隨時斷除於害心，是唯得止於苦痛。  
391 不以身語意，行作諸惡業，制此三處者，是謂婆羅門。  
392 正等覺者所說法，不論從何而得聞，  
    於彼說者應敬禮，如婆羅門敬聖火。  
393 不因髻髮與種族，亦非生為婆羅門。  
    誰知真實及達摩，彼為幸福婆羅門。  
394 愚者結髮髻，衣〔羊皮〕何益？內心具欲林，形儀徒嚴飾。

- 395 諸著糞掃衣，消瘦露經脈，林中獨入定，是謂婆羅門。
- 396 所謂婆羅門，非從母胎生。如執諸煩惱，但名說「菩」者。  
若無一切執，是謂婆羅門。
- 397 斷除一切結，彼實無恐怖，無著離繫縛，是謂婆羅門。
- 398 除皮帶與韁，及斷繩所屬，捨障礙覺者，是謂婆羅門。
- 399 能忍罵與打，而無有瞋恨，具忍刀強軍，是謂婆羅門。
- 400 無有瞋怒具德行，持戒不為諸欲潤，  
調御得達最後身，我稱彼為婆羅門。
- 401 猶如水落於蓮葉，如置芥子於針鋒，  
不染著於愛欲者，我稱彼為婆羅門。
- 402 若人於此世界中，覺悟消滅其自苦，  
放棄重負得解脫，我稱彼為婆羅門。
- 403 有甚深智慧，善辨道非道，證無上境界，是謂婆羅門。
- 404 不與俗人混，不與僧相雜，無家無欲者，是謂婆羅門。
- 405 一切強弱有情中，彼人盡棄於刀杖，  
不自殺不教他殺，我稱彼為婆羅門。
- 406 於仇敵中友誼者，執杖人中溫和者，  
執著人中無著者，我稱彼為婆羅門。
- 407 貪欲瞋恚并慢心，以及虛偽皆脫落，  
猶如芥子落針鋒，我稱彼為婆羅門。
- 408 不言粗惡語，說益語實語，不觸怒於人，是謂婆羅門。
- 409 於此善或惡，修短與粗細，不與而不取，是謂婆羅門。
- 410 對此世他世，均無有欲望，無欲而解脫，是謂婆羅門。
- 411 無有貪欲者，了悟無疑惑，證得無生地，是謂婆羅門。
- 412 若於此世間，不著善與惡，無憂而清淨，是謂婆羅門。
- 413 如月淨無瑕，澄靜而清明，滅於再生欲，是謂婆羅門
- 414 超越泥濘崎嶇道，並踰愚癡輪迴海，  
得度彼岸住禪定，無欲而又無疑惑，  
無著證涅槃寂靜，我稱彼為婆羅門。
- 415 棄捨欲樂於此世，出家而成無家人，  
除滅欲樂生起者，我稱彼為婆羅門。
- 416 棄捨愛欲於此世，出家而成無家人，  
除滅愛欲生起者，我稱彼為婆羅門。
- 417 遠離人間縛，超越天上縛，除一切縛者，是謂婆羅門。

- 418 棄捨喜不喜，清涼無煩惱，勇者勝世間，是謂婆羅門。
- 419 若遍知一切：有情死與生，無執善逝佛，是謂婆羅門。
- 420 諸天乾闥婆及人，俱不知彼之所趣，  
煩惱漏盡阿羅漢，我稱彼為婆羅門。
- 421 前後與中間，彼無有一物，不著一物者，是謂婆羅門。
- 422 牛王最尊勇猛者，大仙無欲勝利者，  
浴已無垢及覺者，我稱彼為婆羅門。
- 423 牟尼能知於前生，並見天界及惡趣，  
獲得除滅於再生，業已完成無上智，  
一切圓滿成就者，我稱彼為婆羅門。

※※※※※※※※※※※※※※※※※※※※※※※※※※※※※※

## 《法句經》選集

# 北傳《法句經》26 品

維祇難、竺將焰等譯

林崇安編，內觀教育基金會出版

【內觀教育版】2004

說明：此處《法句經》26 品，是由北傳《法句經》（大正 No.210）抽出其中 26 品 490 偈而成。為便於比對，偈頌所標示的編號，是南傳《法句經》26 品 423 偈之編號。凡是北傳獨有之偈頌，則以◎標示。

### 【1】雙要品第九（22 偈）

- 1 心為法本，心尊心使，中心念惡，即言即行，罪苦自追，車轢于轍。
- 2 心為法本，心尊心使，中心念善，即言即行，福樂自追，如影隨形。
- ◎隨亂意行，拘愚入冥，自大無法，何解善言。
- ◎隨正意行，開解清明，不為妒嫉，敏達善言。
- 5 慍於怨者，未嘗無怨，不慍自除，是道可宗。
- 6 不好責彼，務自省身，如有知此，永滅無患。
- 7 行見身淨，不攝諸根，飲食不節，慢墮怯弱，為邪所制，如風靡草。
- 8 觀身不淨，能攝諸根，食知節度，常樂精進，不為邪動，如風大山。
- 9 不吐毒態，欲心馳騁，未能自調，不應法衣。
- 10 能吐毒態，戒意安靜，降心已調，此應法衣。
- 11 以真為偽，以偽為真，是為邪計，不得真利。
- 12 知真為真，見偽知偽，是為正計，必得真利。
- 13 蓋屋不密，天雨則漏，意不惟行，淫泆為穿。
- 14 蓋屋善密，雨則不漏，攝意惟行，淫泆不生。
- ◎鄙夫染人，如近臭物，漸迷習非，不覺成惡。
- ◎賢夫染人，如近香熏，進智習善，行成潔芳。
- 15 造憂後憂，行惡兩憂，彼憂惟懼，見罪心懍。
- 16 造喜後喜，行善兩喜，彼喜惟歡，見福心安。
- 17 今悔後悔，為惡兩悔，厥為自殃，受罪熱惱。
- 18 今歡後歡，為善兩歡，厥為自祐，受福悅豫。

19 巧言多求，放蕩無戒，懷姪怒癡，不惟止觀，  
聚如群牛，非佛弟子。

20 時言少求，行道如法，除姪怒癡，覺正意解，  
見對不起，是佛弟子。

## 【2】放逸品第十（20 偈）

21 戒為甘露道，放逸為死徑，不貪則不死，失道為自喪。

22 慧智守道勝，終不為放逸，不貪致歡喜，從是得道樂。

23 常當惟念道，自強守正行，健者得度世，吉祥無有上。

24 正念常興起，行淨惡易滅，自制以法壽，不犯善名增。

25 發行不放逸，約以自調心，慧能作定明，不返冥淵中。

26 愚人意難解，貪亂好諍訟，上智常重慎，護斯為寶尊。

27 莫貪莫好諍，亦莫嗜欲樂，思心不放逸，可以獲大安。

28 放逸如自禁，能卻之為賢，已昇智慧閣，去危為即安，  
明智觀於愚，譬如山與地。

29 居亂而身正，彼為獨覺悟，是力過師子，棄惡為大智。

◎睡眠重若山，癡冥為所弊，安臥不計苦，是以常受胎。

◎不為時自恣，能制漏得盡，自恣魔得便，如師子搏鹿。

◎能不自恣者，是為戒比丘，彼思正淨者，常當自護心。

31 比丘謹慎樂，放逸多憂愆，變諍小致大，積惡入火焰。

32 守戒福致善，犯戒有懼心，能斷三界漏，此乃近泥洹。

172 若前放逸，後能自禁，是炤世間，念定其宜。

173 過失為惡，追覆以善，是炤世間，念善其宜。

382 少莊捨家，盛修佛教，是炤世間，如月雲消。

173 人前為惡，後止不犯，是炤世間，如月雲消。

◎生不施惱，死而不感，是見道悍，應中勿憂。

87-88 斷濁黑法，學惟清白，度淵不反，棄猗行止，  
不復染樂，欲斷無憂。

## 【3】心意品第十一（12 偈）

33 意使作狗，難護難禁，慧正其本，其明乃大。

35 輕躁難持，唯欲是從，制意為善，自調則寧。

36 意微難見，隨欲而行，慧常自護，能守即安。

37 獨行遠逝，覆藏無形，損意近道，魔繫乃解。

38 心無住息，亦不知法，迷於世事，無有正智。  
39 念無適止，不絕無邊，福能遏惡，覺者為賢。  
◎佛說心法，雖微非真，當覺逸意，莫隨放心。  
◎見法最安，所願得成，慧護微意，斷苦因緣。  
41 有身不久，皆當歸土，形壞神去，寄住何貪。  
42 心豫造處，往來無端，念多邪僻，自為招惡。  
43 是意自造，非父母為，可勉向正，為福勿回。  
40 藏六如龜，防意如城，慧與魔戰，勝則無患。

#### 【4】華香品第十二（17偈）

44 孰能擇地，捨鑑取天，誰說法句，如擇善華。  
45 學者擇地，捨鑑取天，善說法句，能採德華。  
◎知世坏喻，幻法忽有，斷魔華敷，不睹生死。  
46 見身如沫，幻法自然，斷魔華敷，不睹生死。  
47 身病則萎，若華零落，死命來至，如水湍驟。  
48 貪欲無厭，消散人念，邪致之財，為自侵欺。  
49 如蜂集華，不饒色香，但取味去，仁人聚然。  
50 不務觀彼，作與不作，常自省身，知正不正。  
51 如可意華，色好無香，工語如是，不行無得。  
52 如可意華，色美且香，工語有行，必得其福。  
53 多作寶花，結步搖綺，廣積德者，所生轉好。  
54 奇草芳花，不逆風熏，近道敷開，德人逼香。  
55 旃檀多香，青蓮芳花，雖曰是真，不如戒香。  
56 華香氣微，不可謂真，持戒之香，到天殊勝。  
57 戒具成就，行無放逸，定意度脫，長離魔道。  
58 如作田溝，近于大道，中生蓮華，香潔可意。  
59 有生死然，凡夫處邊，慧者樂出，為佛弟子。

#### 【5】愚闇品第十三（19偈）

60 不寐夜長，疲倦道長，愚生死長，莫知正法。  
癡意常冥，逝如流川。  
61 在一行疆，獨而無偶，愚人著數，憂戚久長，  
與愚居苦，於我猶怨。  
62 有子有財，愚惟汲汲，我且非我，何憂子財？

- 286 暑當止此，寒當止此，愚多務慮，莫知來變。
- 63 愚矇愚極，自謂我智，愚而勝智，是謂極愚。
- 64 頑闇近智，如瓢斟味，雖久狎習，猶不知法。
- 65 開達近智，如舌嘗味，雖須與習，即解道要。
- 66 愚人施行，為身招患，快心作惡，自致重殃。
- 67 行為不善，退見悔吝，致涕流面，報由宿習。
- 68 行為德善，進睹歡喜，應來受福，喜笑悅習。
- 69 過罪未熟，愚以恬淡，至其熟處，自受大罪。
- ◎愚所望處，不謂適苦，臨墮厄地，乃知不善。
- 136 愚蠢作惡，不能自解，殃迫自焚，罪成熾燃。
- 70 愚好美食，月月滋甚，於十六分，未一思法。
- 72 愚生念慮，至終無利，自招刀杖，報有印章。
- ◎觀處知其愚，不施而廣求，所墮無道智，往往有惡行。
- ◎遠道近欲者，為食在學名，貪猗家居故，多取供異姓。
- 74 學莫墮二望，莫作家沙門，貪家違聖教，為後自匱乏，此行與愚同，但令欲慢增。
- 75 利求之願異，求道意亦異，是以有識者，出為佛弟子，棄愛捨世習，終不墮生死。

## 【6】明哲品第十四（17 偈）

- 76 深觀善惡，心知畏忌，畏而不犯，終吉無憂，故世有福，念思紹行，善致其願，福祿轉勝。
- ◎信善作福，積行不厭，信知陰德，久而必彰。
- 78 常避無義，不親愚人，思從賢友，押附上士。
- 79 喜法臥安，心悅意清，聖人演法，慧常樂行。
- ◎仁人智者，齋戒奉道，如星中月，照明世間。
- 80 弓工調角，水人調船，材匠調木，智者調身。
- 81 譬如厚石，風不能移，智者意重，毀譽不傾。
- 82 譬如深淵，澄靜清明，慧人聞道，心淨歡然。
- 83 大人體無欲，在所照然明，雖或遭苦樂，不高現其智。
- 84 大賢無世事，不願子財國，常守戒慧道，不貪邪富貴。
- ◎智人知動搖，譬如沙中樹，朋友志未強，隨色染其素。
- 85 世皆沒淵，鮮剋度岸，如或有人，欲度必奔。
- 86 誠貪道者，覽受正教，此近彼岸，脫死為上。

- 87 斷五陰法，靜思智慧，不反入淵，棄猗其明。  
88 抑制情欲，絕樂無為，能自拯濟，使意為慧。  
89 學取正智，意惟正道，一心受諦，不起為樂，  
漏盡習除，是得度世。

### 【7】羅漢品第十五（10偈）

- 90 去離憂患，脫於一切，縛結已解，冷而無煖。  
91 心淨得念，無所貪樂，已度癡淵，如鴈棄池。  
92 量腹而食，無所藏積，心空無想，度眾行地，  
如空中鳥，遠逝無礙。  
93 世間習盡，不復仰食，虛心無患，已到脫處，  
譬如飛鳥，暫下輒逝。  
94 制根從止，如馬調御，捨憍慢習，為天所敬。  
95 不怒如地，不動如山，真人無垢，生死世絕。  
96 心已休息，言行亦正，從正解脫，寂然歸滅。  
97 棄欲無著，缺三界障，望意已絕，是謂上人。  
98 在聚若野，平地高岸，應真所過，莫不蒙祐。  
99 彼樂空閑，眾人不能，快哉無望，無所欲求。

### 【8】述千品第十六（16偈）

- 100 雖誦千言，句義不正，不如一要，聞可滅意。  
101 雖誦千言，不義何益，不如一義，聞行可度。  
102 雖多誦經，不解何益，解一法句，行可得道。  
103 千千為敵，一夫勝之，未若自勝，為戰中上。  
104 自勝最賢，故曰人雄，護意調身，自損至終。  
105 雖曰尊天，神魔梵釋，皆莫能勝，自勝之人。  
106 月千反祠，終身不輟，不如須臾，一心念法，  
一念道福，勝彼終身。  
107 雖終百歲，奉事火祠，不如須臾，供養三尊，  
一供養福，勝彼百年。  
108 祭神以求福，從後觀其報，四分未望一，不如禮賢者。  
109 能善行禮節，常敬長者，四福自然增，色力壽而安。  
110 若人壽百歲，遠正不持戒，不如生一日，守戒正意禪。  
111 若人壽百歲，邪偽無有智，不如生一日，一心學正智。

- 112 若人壽百歲，懈怠不精進，不如生一日，勉力行精進。  
113 若人壽百歲，不知成敗事，不如生一日，見微知所忌。  
114 若人壽百歲，不見甘露道，不如生一日，服行甘露味。  
115 若人壽百歲，不知大道義，不如生一日，學推佛法要。

### 【9】惡行品第十七（22 偈）

- 116 見善不從，反隨惡心，求福不正，反樂邪淫。  
136 凡人為惡，不能自覺，愚癡快意，令後鬱毒。  
117 凶人行虐，沈漸數數，快欲為人，罪報自然。  
118 吉人行德，相隨積增，甘心為之，福應自然。  
119 妖孽見福，其惡未熟，至其惡熟，自受罪虐。  
120 貞祥見禍，其善未熟，至其善熟，必受其福。  
◎擊人得擊，行怨得怨，罵人得罵，施怒得怒，  
◎世人無聞，不知正法，生此壽少，何宜為惡。  
121 莫輕小惡，以為無殃，水滸雖微，漸盈大器，  
    凡罪充滿，從小積成。  
122 莫輕小善，以為無福，水滴雖微，漸盈大器，  
    凡福充滿，從纖纖積。  
◎夫士為行，好之與惡，各自為身，終不敗亡。  
◎好取之士，自以為可，沒取彼者，人亦沒之。  
71 惡不即時，如搆牛乳，罪在陰祠，如灰覆火。  
67 戲笑為惡，以作身行，號泣受報，隨行罪至。  
◎作惡不覆，如兵所截，牽往乃知，已墮惡行，後受苦報，如前所習。  
◎如毒摩瘡，船入洄復，惡行流行，靡不傷剋。  
125 加惡誣罔人，清白猶不污，愚殃反自及，如塵逆風空。  
◎過失犯非惡，能追悔為善，是明照世間，如日無雲暘。  
◎夫士所以行，然後身自見，為善則得善，為惡則得惡。  
126 有識墮胞胎，惡者入地獄，行善上昇天，無為得泥洹。  
127 非空非海中，非隱山石間，莫能於此處，避免宿惡殃。  
◎眾生有苦惱，不得免老死，唯有仁智者，不念人非惡。

### 【10】刀杖品第十八（14 偈）

- 129 一切皆懼死，莫不畏杖痛，恕己可為譬，勿殺勿行杖。  
132 能常安群生，不加諸楚毒，現世不逢害，後世長安穩。

- 133 不當羸言，言當畏報，惡往禍來，刀杖歸軀。
- 134 出言以善，如叩鐘磬，身無論議，度世則易。
- 137 歐杖良善，妄讒無罪，其殃十倍，災迅無赦：
- 138 生受酷痛，形體毀折，自然惱病，失意恍惚。
- 139 人所誣咎，或縣官厄，財產耗盡，親戚離別。
- 140 舍宅所有，災火焚燒，死入地獄，如是為十。
- 141 雖裸剪髮，長服草衣，沐浴踞石，奈癡結何。
- ◎不伐殺燒，亦不求勝，人愛天下，所適無怨。
- 143 世黨有人，能知慚愧，是名誘進，如策良馬。
- 144 如策善馬，進道能遠，人有信戒，定意精進，  
受道慧成，便滅眾苦。
- 142 自嚴以修法，滅損受淨行，杖不加群生，是沙門道人。
- ◎無害於天下，終身不遇害，常慈於一切，孰能與為怨？

### 【11】老耗品第十九（14偈）

- 146 何喜何笑，命常熾然，深弊幽冥，如不求錠？
- 147 見身形範，倚以為安，多想致病，豈知非真。
- 148 老則色衰，病無光澤，皮緩肌縮，死命近促。
- 149 身死神徒，如御棄車，肉消骨散，身何可怙。
- 150 身為如城，骨幹肉塗，生至老死，但藏恚慢。
- 151 老則形變，喻如故車，法能除苦，宜以仿學。
- 152 人之無聞，老若特牛，但長肌肥，無有福慧。
- 153 生死無聊，往來艱難，意猗貪身，生苦無端。
- 154 慧以見苦（屋），是故棄身，滅意斷行，愛盡無生。
- 155 不修梵行，又不富財，老如白鷺，守伺空池。
- 156 既不守戒，又不積財，老羸氣竭，思故何逮。
- ◎老如秋葉，何穢鑑錄，命疾脫至，亦用後悔。
- ◎命欲日夜盡，及時可勲力，世間諦非常，莫惑墮冥中。
- ◎當學燃意燈，自練求智慧，離垢勿染污，執燭觀道地。

### 【12】愛身品第二十（13偈）

- 157 自愛身者，慎護所守，悵望欲解，學正不寐。
- 158 為身第一，常自勉學，利乃誨人，不倦則智。
- 159 學先自正，然後正人，調身入慧，必遷為上。

- ◎身不能利，安能利人，心調體正，何願不至？
- 161 本我所造，後我自受，為惡自更，如剛鑽珠。
- 162 人不持戒，滋蔓如藤，逞情極欲，惡行日增。
- 163 惡行危身，愚以為易，善最安身，愚以為難。
- 164 如真人教，以道法身，愚者疾之，見而為惡，  
行惡得惡，如種苦種。
- 165 惡自受罪，善自受福，亦各須熟，彼不自代，  
習善得善，亦如種甜。
- 166 自利利人，益而不費，欲知利身，**戒聞為最**。
- ◎如有自憂，欲生天上，敬樂聞法，當念佛教。
- ◎凡用必豫慮，勿以損所務，如是意日修，事務不失時。
- ◎夫治事之士，能至終成利，真見身應行，如是得所欲。

### 【13】世俗品第二十一（14 偈）

- ◎如車行道，捨平大途，從邪徑敗，生折軸憂。
- ◎離法如是，從非法增，愚守至死，亦有折患。
- 169 順行正道，勿隨邪業，行住臥安，世世無患。
- 170 萬物如泡，意如野馬，居世若幻，奈何樂此？
- ◎若能斷此，伐其樹根，日夜如是，必至于定。
- ◎一施如信，如樂之人，或從惱意，以飯食眾，  
此輩日夜，不得定意。
- 174 世俗無眼，莫見道真，如少見明，**當養善意**。
- 175 如鴈將群，避羅高翔，明人導世，度脫邪眾。
- ◎世皆有死，三界無安，諸天雖樂，福盡亦喪。
- ◎觀諸世間，無生不終，欲離生死，當行道真。
- ◎癡覆天下，貪令不見，邪疑卻道，苦愚從是。
- 176 一法脫過，謂妄語人，不免後世，靡惡不更。
- 178 雖多積珍寶，嵩高至于天，如是滿世間，不如見道跡。
- ◎不善像如善，愛如似無愛，以苦為樂像，狂夫為所厭。

### 【14】述佛品第二十二（21 偈）

- 179 己勝不受惡，一切勝世間，叡智廓無疆，開矇令人道。
- 180 決網無罣礙，愛盡無所積，佛意深無極，未踐跡令踐。
- 181 勇健立一心，出家日夜滅，根斷無欲意，學正念清明。

◎見諦淨無穢，已度五道淵，佛出照世間，為除眾憂苦。  
 182 得生人道難，生壽亦難得，世間有佛難，佛法難得聞。  
 ◎我既無歸保，亦獨無伴侶，積一行得佛，自然通聖道。  
 ◎船師能渡水，精進為橋梁，人以種姓繫，度者為健雄。  
 ◎壞惡度為佛，止地為梵志，除饑為學法，斷種為弟子。  
 184 觀行忍第一，佛說泥洹最，捨罪作沙門，無燒害於彼。  
 185 不燒亦不惱，如戒一切持，少食捨身貪，有行幽隱處，  
 意諦以有點，是能奉佛教。  
 183 諸惡莫作，諸善奉行，自淨其意，是諸佛教。  
 ◎佛為尊貴，斷漏無婬，諸釋中雄，一群從心。  
 ◎快哉福報，所願皆成，敏於上寂，自致泥洹。  
 188 或多自歸，山川樹神，廟立圖像，祭祠求福。  
 189 自歸如是，非吉非上，彼不能來，度我眾苦。  
 190 如有自歸，佛法聖眾，道德四諦，必見正慧。  
 191 生死極苦，從諦得度，度世八道，斯除眾苦。  
 192 自歸三尊，最吉最上，唯獨有是，度一切苦。  
 ◎士如中正，志道不慳，利哉斯人，自歸佛者。  
 193 明人難值，亦不比有，其所生處，族親蒙慶。  
 194 諸佛興快，說經道快，眾聚和快，和則常安。

### 【15】安寧品第二十三（14偈）

197 我生已安，不慍於怨，眾人有怨，我行無怨。  
 198 我生已安，不病於病，眾人有病，我行無病。  
 199 我生已安，不感於憂，眾人有憂，我行無憂。  
 200 我生已安，清淨無為，以樂為食，如光音天。  
 ◎我生已安，澹泊無事，彌薪國火，安能燒我。  
 201 勝則生怨，負則自鄙，去勝負心，無爭自安。  
 202 熱無過婬，毒無過怒，苦無過身，樂無過滅。  
 ◎無樂小樂，小辯小慧，觀求大者，乃獲大安。  
 ◎我為世尊，長解無憂，正度三有，獨降眾魔。  
 206 見聖人快，得依附快，得離愚人，為善獨快。  
 ◎守正道快，工說法快，與世無諍，戒具常快。  
 207b-208a 依賢居快，如親親會，近仁智者，多聞高遠。  
 ◎壽命鮮少，而棄世多，學當取要，令至老安。

◎諸欲得甘露，棄欲滅諦快，欲度生死苦，當服甘露味。

### 【16】好喜品第二十四（12偈）

- 209 違道則自順，順道則自違，捨義取所好，是為順愛欲。  
210 不當趣所愛，亦莫有不愛，愛之不見憂，不愛見亦憂。  
211 是以莫造愛，愛憎惡所由，已除縛結者，無愛無所憎。  
212 愛喜生憂，愛喜生畏，無所愛喜，何憂何畏？  
214 好樂生憂，好樂生畏，無所好樂，何憂何畏？  
216 貪欲生憂，貪欲生畏，解無貪欲，何憂何畏？  
217 貪法戒成，至誠知慚，行身近道，為眾所愛。  
218 欲態不出，思正乃語，心無貪愛，必截流渡。  
219 譬人久行，從遠吉還，親厚普安，歸來歡喜。  
220 好行福者，從此到彼，自受福祚，如親來喜。  
77 起從聖教，禁制不善，近道見愛，離道莫親。  
◎近與不近，所住者異，近道昇天，不近墮獄。

### 【17】忿怒品第二十五（26偈）

- ◎忿怒不見法，忿怒不知道，能除忿怒者，福喜常隨身。  
◎貪婬不見法，愚癡意亦然，除婬去癡者，其福第一尊。  
222 恚能自制，如止奔車，是為善御，棄冥入明。  
223 忍辱勝恚，善勝不善，勝者能施，至誠勝欺。  
224 不欺不怒，意不多求，如是三事，死則上天。  
225 常自攝身，慈心不殺，是生天上，到彼無憂。  
226 意常覺寤，明慕勤學，漏盡意解，可致泥洹。  
227 人相謗毀，自古至今，既毀多言，又毀訥忍，  
亦毀中和，世無不毀。  
228 欲意非聖，不能制中，一毀一譽，但為利名。  
229 明智所譽，唯稱是賢，慧人守戒，無所譏謗。  
230 如羅漢淨，莫而誣謗，諸人咨嗟，梵釋所稱。  
231 常守慎身，以護瞋恚，除身惡行，進修德行。  
232 常守慎言，以護瞋恚，除口惡言，誦習法言。  
233 常守慎心，以護瞋恚，除心惡念，思惟念道。  
234 節身慎言，守攝其心，捨恚行道，忍辱最強。  
221 捨恚離慢，避諸愛會，不著名色，無為滅苦。

- ◎起而解怒，姪生自禁，捨不明健，斯皆得安。
- ◎瞋斷臥安，恚滅姪憂，怒為毒本，軟意梵志，言善得譽，斷為無患。
- ◎同志相近，詳為作惡，後別餘恚，火自燒惱。
- ◎不知慚愧，無戒有怒，為怒所牽，不厭有務。
- ◎有力近兵，無力近軟，夫忍為上，宜常忍羸。
- ◎舉眾輕之，有力者忍，夫忍為上，宜常忍羸。
- ◎自我與彼，大畏有三，如知彼作，宜滅己中。
- ◎俱兩行義，我為彼教，如知彼作，宜滅己中。
- ◎苦智勝愚，驕言惡說，欲常勝者，於言宜默。
- ◎夫為惡者，怒有怒報，怒不報怒，勝彼鬥負。

### 【18】塵垢品第二十六（19偈）

- 237 生無善行，死墮惡道，住疾無間，到無資用。
- 238 當求智慧，以然意定，去垢勿污，可離苦形。
- 239 慧人以漸，安徐稍進，洗除心垢，如工鍊金。
- 240 惡生於心，還自壞形，如鐵生垢，反食其身。
- 241 不誦為言垢，不勤為家垢，不嚴為色垢，放逸為事垢。
- 242 慳為惠施垢，不善為行垢，今世亦後世，惡法為常垢。
- 243 垢中之垢，莫甚於癡，學當捨惡，比丘無垢。
- 244 苟生無恥，如鳥長喙，強顏耐辱，名曰穢生。
- 245 廉恥雖苦，義取清白，避辱不妄，名曰潔生。
- 246 愚人好殺，言無誠實，不與而取，好犯人婦。
- 247 逞心犯戒，迷惑於酒，斯人二世，自掘身本。
- 248 人如覺是，不當念惡，愚近非法，久自燒沒。
- 249 若信布施，欲揚名譽，會人虛飾，非入淨定。
- 250 一切斷欲，截意根原，晝夜守一，必入定意。
- ◎著垢為塵，從染塵漏，不染不行，淨而離愚。
- ◎見彼自侵，常內自省，行漏自欺，漏盡無垢。
- 251 火莫熱於姪，捷莫疾於怒，網莫密於癡，愛流駛乎河。
- 254 虛空無轍跡，沙門無外意，眾人盡樂惡，唯佛淨無穢。
- 255 虛空無轍跡，沙門無外意，世間皆無常，佛無我所有。

### 【19】奉持品第二十七（17偈）

- 256 好經道者，不競於利，有利無利，無欲不惑。

- 257 常愍好學，正心以行，擁懷寶慧，是謂為道。
- 258 所謂智者，不必辯言，無恐無懼，守善為智。
- 259 奉持法者，不以多言，雖素少聞，身依法行，  
守道不忌，可謂奉法。
- 260 所謂老者，不必年耆，形熟髮白，蠢愚而已。
- 261 謂懷諦法，順調慈仁，明遠清潔，是為長老。
- 262 所謂端政，非色如花，慳嫉虛飾，言行有違。
- 263 謂能捨惡，根原已斷，慧而無恚，是謂端政。
- 264 所謂沙門，非必除髮，妄語貪取，有欲如凡。
- 265 謂能止惡，恢廓弘道，息心滅意，是為沙門。
- 266 所謂比丘，非時乞食，邪行姪彼，稱名而已。
- 267 謂捨罪福，淨修梵行，慧能破惡，是為比丘。
- 268 所謂仁明，非口不言：用心不淨，外順而已。
- 269 謂心無為，內行清虛，此彼寂滅，是為仁明。
- 270 所謂有道，非救一物，普濟天下，無害為道。
- 271 戒眾不言，我行多誠，得定意者，要由閉損。
- 272 意解求安，莫習凡人，使結未盡，莫能得脫。

## 【20】道行品第二十八（28 偈）

- 273 八直最上道，四諦為法跡，不姪行之尊，施燈必得眼。
- 274 是道無復畏，見淨乃度世，此能壞魔兵，力行滅邪苦。
- 276 我已開正道，為大現異明，已聞當自行，行乃解邪縛。
- 277-278 生死非常、苦，能觀見為慧，欲離一切苦，行道一切除。
- ◎生死非常、空，能觀見為慧，欲離一切苦，但當勤行道。
- 280 起時當即起，莫如愚覆淵，與墮與瞻聚，計罷不進道。
- 282 念應念則正，念不應則邪，慧而不起邪，思正道乃成。
- 281 慎言守意念，身不善不行，如是三行除，佛說是得道。
- 283 斷樹無伐本，根在猶復生，除根乃無樹，比丘得泥洹。
- 284 不能斷樹，親戚相戀，貪意自縛，如犢慕乳。
- 285 能斷意本，生死無彊，是為近道，疾得泥洹。
- ◎貪姪致老，瞋恚致病，愚癡致死，除三得道。
- ◎釋前解後，脫中度彼，一切念滅，無復老死。
- 287 人營妻子，不觀病法，死命卒至，如水湍驟。
- 288 父子不救，餘親何望，命盡怙親，如盲守燈。

289 慧解是意，可修經戒，勤行度世，一切除苦。  
 ◎遠離諸淵，如風卻雲，已滅思想，是為知見。  
 ◎智為世長，惓樂無為，知受正教，生死得盡。  
 ◎知眾行空，是為慧見，罷厭世苦，從是道除。  
 278 知眾行苦，是為慧見，罷厭世苦，從是道除。  
 279 眾行非身，是為慧見，罷厭世苦，從是道除。  
 ◎吾語汝法，愛箭為射，宜以自勗，受如來言。  
 ◎吾為都以滅，往來生死盡，非一情以解，所演為道眼。  
 ◎駛流澍于海，潘水漾疾滿，故為智者說，可趣服甘露。  
 ◎前未聞法輪，轉為哀眾生，於是奉事者，禮之度三有。  
 ◎三念可念善，三亦難不善，從念而有行，滅之為正斷。  
 ◎三定為轉念，棄猗行無量，得三三窟除，解結可應念。  
 ◎知以戒禁惡，思惟慧樂念，已知世成敗，息意一切解。

### 【21】廣衍品第二十九（14 偈）

290 施安雖小，其報彌大，慧從小施，受見景福。  
 291 施勞於人，而欲望祐，殃咎歸身，自遭廣怨。  
 292 已為多事，非事亦造，伎樂放逸，惡習日增。  
 293 精進惟行，習是捨非，修身自覺，是為正習。  
 ◎既自解慧，又多學問，漸進普廣，油酥投水。  
 ◎自無慧意，不好學問，凝縮狹小，酪酥投水。  
 304 近道名顯，如高山雪，遠道闇昧，如夜發箭。  
 296-298 為佛弟子，常寤自覺，晝夜念佛，惟法、思眾。  
 301 為佛弟子，當寤自覺，日暮思禪，樂觀一心。  
 ◎人當有念意，每食知自少，則是痛欲薄，節消而保壽。  
 302 學難捨罪難，居在家亦難，會止同利難，難難無過有。  
 ◎比丘乞求難，何可不自勉，精進得自然，後無欲於人。  
 303 有信則戒成，從戒多致寶，亦從得諧偶，在所見供養。  
 305 一坐一處臥，一行無放恣，守一以正身，心樂居樹間。

### 【22】地獄品第三十（16 偈）

306 妄語地獄近，作之言不作，二罪後俱受，是行自牽往。  
 307 法衣在其身，為惡不自禁，苟沒惡行者，終則墮地獄。  
 308 無戒受供養，理豈不自損，死噉燒鐵丸，然熱劇火炭。

- 309 放逸有四事，好犯他人婦，臥險非福利，毀三淫泆四。
- 310 不福利墮惡，畏惡畏樂寡，王法重罰加，身死入地獄。
- 311 譬如拔菅草，執緩則傷手，學戒不禁制，獄錄乃自賊。
- 312 人行為慢惰，不能除眾勞，梵行有玷缺，終不受大福。
- 313 常行所當行，自持必令強，遠離諸外道，莫習為塵垢。
- 314 為所不當為，然後致鬱毒，行善常吉順，所適無悔吝。
- ◎其於眾惡行，欲作若已作，是苦不可解，罪近難得避。
- ◎妄證求敗，行已不正，怨譖良人，以枉治士，罪縛斯人，自投于坑。
- 315 如備邊城，中外牢固，自守其心，非法不生，  
行缺致憂，令墮地獄。
- 316 可羞不羞，非羞反羞，生為邪見，死墮地獄。
- 317 可畏不畏，非畏反畏，信向邪見，死墮地獄。
- 318 可避不避，可就不就，翫習邪見，死墮地獄。
- 319 可近則近，可遠則遠，恒守正見，死墮善道。

### 【23】象喻品第三十一（18偈）

- 320 我如象鬥，不恐中箭，常以誠信，度無戒人。
- 321 譬象調正，可中王乘，調為尊人，乃受誠信。
- 322 雖為常調，如彼新馳，亦最善象，不如自調。
- 323 彼不能適，人所不至，唯自調者，能到調方。
- 324 如象名財守，猛害難禁制，繫絆不與食，而猶暴逸象。
- 325 沒在惡行者，恒以貪自繫，其象不知厭，故數入胞胎。
- 326 本意為純行，及常行所安，悉捨降伏結，如鉤制象調。
- 327 樂道不放逸，能常自護心，是為拔身苦，如象出于坑。
- 328 若得賢能伴，俱行行善悍，能伏諸所聞，至到不失意。
- 329 不得賢能伴，俱行行惡悍，廣斷王邑里，寧獨不為惡。
- 330 寧獨行為善，不與愚為侶，獨而不為惡，如象驚自護。
- 331 生而有利安，伴軟和為安，命盡為福安，眾惡不犯安。
- 332 人家有母樂，有父斯亦樂，世有沙門樂，天下有道樂。
- 333 持戒終老安，信正所正善，智慧最安身，不犯惡最安。
- 144 如馬調軟，隨意所如，信戒精進，定法要具，  
明行成立，忍和意定，是斷諸苦，隨意所如。
- 94 從是往定，如馬調御，斷恚無漏，是受天樂。
- 29 不自放恣，從是多寤，羸馬比良，棄惡為賢。

## 【24】愛欲品第三十二（33 偈）

- 334 心放在姪行，欲愛增枝條，分布生熾盛，超躍貪果猴。
- 335 以為愛忍苦，貪欲著世間，憂患日夜長，莖如蔓草生。
- ◎人為恩愛惑，不能捨情欲，如是憂愛多，潺潺盈于池。
- ◎夫所以憂悲，世間苦非一，但為緣愛有，離愛則無憂。
- ◎己意安棄憂，無愛何有世，不憂不染求，不愛焉得安。
- ◎有憂以死時，為致親屬多，涉憂之長塗，愛苦常墮危。
- 337 為道行者，不與欲會，先誅愛本，無所植根，  
勿如刈葦，令心復生。
- 338 如樹根深固，雖截猶復生，愛意不盡除，輒當還受苦。
- 344 猿猴得離樹，得脫復趣樹，眾人亦如是，出獄復入獄。
- 339 貪意為常流，習與憍慢并，思想猗姪欲，自覆無所見。
- 340 一切意流行，愛結如葛藤，唯慧分別見，能斷意根原。
- 341 夫從愛潤澤，思想為滋蔓，愛欲深無底，老死是用增。
- ◎所生枝不絕，但用食貪欲，養怨益丘塚，愚人常汲汲。
- 345 雖獄有鉤鑠，慧人不調牢，愚見妻子息，染著愛甚牢。
- 346 慧說愛為獄，深固難得出，是故當斷棄，不視欲能安。
- ◎見色心迷惑，不惟觀無常，愚以為美善，安知其非真。
- 347 以姪樂自裹，譬如蠶作繭，智者能斷棄，不盼除眾苦。
- 349 心念放逸者，見姪以為淨，恩愛意盛增，從是造獄牢。
- 350 覺意滅姪者，常念欲不淨，從是出邪獄，能斷老死患。
- ◎以欲網自蔽，以愛蓋自覆，自恣縛於獄，如魚入筍口。
- ◎為老死所伺，若犢求母乳，離欲滅愛跡，出網無所弊。
- 352 盡道除獄縛，一切此彼解，已得度邊行，是為大智士。
- ◎勿親遠法人，亦勿為愛染，不斷三世者，會復墮邊行。
- 353 若覺一切法，能不著諸法，一切愛意解，是為通聖意。
- 354 眾施經施勝，眾味道味勝，眾樂法樂勝，愛盡勝眾苦。
- 355 愚以貪自縛，不求度彼岸，貪為敗處故，害人亦自害。
- 356-358 愛欲意為田，姪、怨、癡為種，故施度世者，得福無有量。
- 123 伴少而貨多，商人怵惕懼，嗜欲賊害命，故慧不貪欲。
- ◎心可則為欲，何必獨五欲，違可絕五欲，是乃為勇士。
- 351 無欲無有畏，恬惓無憂患，欲除使結解，是為長出淵。
- ◎欲我知汝本，意以思想生，我不思想汝，則汝而不有。
- 283 伐樹忽休，樹生諸惡，斷樹盡株，比丘滅度。

284 夫不伐樹，少多餘親，心繫於此，如犢求母。

### 【25】沙門品第三十四（32 偈）

360-361 端目耳鼻口，身意常守正，比丘行如是，可以免眾苦。

362 手足莫妄犯，節言順所行，常內樂定意，守一行寂然。

363 學當守口，宥言安徐，法義為定，言必柔軟。

364 樂法欲法，思惟安法，比丘依法，正而不費。

365 學無求利，無愛他行，比丘好他，不得定意。

366 比丘少取，以得無積，天人所譽，生淨無穢。

368 比丘為慈，愛敬佛教，深入止觀，滅行乃安。

367 一切名色，非有莫惑，不近不憂，乃為比丘。

369 比丘扈船，中虛則輕，除婬怒癡，是為泥洹。

370 捨五斷五，思惟五根，能分別五，乃渡河淵。

371 禪無放逸，莫為欲亂，不吞洋銅，自惱焦形。

372 無禪不智，無智不禪，道從禪智，得至泥洹。

373 當學入空，靜居止意，樂獨屏處，一心觀法。

374 常制五陰，伏意如水，清淨和悅，為甘露味。

375 不受所有，為慧比丘，攝根知足，戒律悉持。

376 生當行淨，求善師友，智者成人，度苦致喜。

377 如衛師華，熟如自墮，釋婬怒癡，生死自解。

378 止身止言，心守玄默，比丘棄世，是為受寂。

379 當自救身，內與心爭，護身念諦，比丘惟安。

380 我自為我，計無有我，故當損我，調乃為賢。

381 喜在佛教，可以多喜，至到寂寞，行滅永安。

382 儻有少行，應佛教戒，此照世間，如日無暄。

◎棄慢無餘僑，蓮華水生淨，學能捨此彼，知是勝於故。

◎割愛無戀慕，不受如蓮華，比丘渡河流，勝欲明於故。

◎截流自恃，逝心卻欲，仁不割欲，一意猶走。

◎為之為之，必強自制，捨家而懈，意猶復染。

◎行懈緩者，勞意弗除，非淨梵行，焉致大寶。

◎沙門何行，如意不禁，步步著粘，但隨思走。

307 袈裟披肩，為惡不損，惡惡行者，斯墮惡道。

◎不調難誠，如風枯樹，作自為身，曷不精進。

◎息心非別，慢訑無戒，捨貪思道，乃應息心。

◎息心非別，放逸無信，能滅眾苦，為上沙門。

### 【26】梵志品第三十五（40偈）

383 截流而渡，無欲如梵，知行已盡，是謂梵志。

384 以無二法，清淨渡淵，諸欲結解，是謂梵志。

385 適彼無彼，彼彼已空，捨離貪婬，是謂梵志。

386 思惟無垢，所行不漏，上求不起，是謂梵志。

387 日照於晝，月照於夜，甲兵照軍，禪照道人，  
佛出天下，照一切冥。

◎非剃為沙門，稱吉為梵志，謂能捨眾惡，是則為道人。

388 出惡為梵志，入正為沙門，棄我眾穢行，是則為捨家。

390 若猗於愛，心無所著，已捨已正，是滅眾苦。

391 身口與意，淨無過失，能捨三行，是謂梵志。

392 若心曉了，佛所說法，觀心自歸，淨於為水。

393 非蒺結髮，名為梵志，誠行法行，清白則賢。

394 飾髮無慧，草衣何施，內不離著，外捨何益。

395 被服弊惡，躬承法行，閑居思惟，是謂梵志。

396 佛不教彼，讚己自稱，如諦不妄，乃為梵志。

397 絕諸可欲，不婬其志，委棄欲數，是謂梵志。

398 斷生死河，能忍起度，自覺出塹，是謂梵志。

399 見罵見擊，默受不怒，有忍辱力，是謂梵志。

400 若見侵欺，但念守戒，端身自調，是謂梵志。

401 心棄惡法，如蛇脫皮，不為欲污，是謂梵志。

402 覺生為苦，從是滅意，能下重擔，是謂梵志。

403 解微妙慧，辯道不道，體行上義，是謂梵志。

404 棄捐家居，無家之畏，少求寡欲，是謂梵志。

405 棄放活生，無賊害心，無所憍惱，是謂梵志。

406 避爭不爭，犯而不慍，惡來善待，是謂梵志。

407 去婬怒癡，憍慢諸惡，如蛇脫皮，是謂梵志。

408 斷絕世事，口無麤言：八道審諦，是謂梵志。

409 所世惡法，修短巨細，無取無捨，是謂梵志。

410 今世行淨，後世無穢，無習無捨，是謂梵志。

411 棄身無猗，不誦異行，行甘露滅，是謂梵志。

412 於罪與福，兩行永除，無憂無塵，是謂梵志。

- 413 心喜無垢，如月盛滿，謗毀已除，是謂梵志。
- 414 見癡往來，墮塹受苦，欲單渡岸，不好他語，  
唯滅不起，是謂梵志。
- 415-416 已斷恩愛，離家無欲，愛有已盡，是謂梵志。
- 417 離人聚處，不墮天聚，諸聚不歸，是謂梵志。
- 418 棄樂無樂，滅無熅燻，健違諸世，是謂梵志。
- 419 所生已訖，死無所趣，覺安無依，是謂梵志。
- 420 已度五道，莫知所墮，習盡無餘，是謂梵志。
- 421 于前于後，乃中無有，無操無捨，是謂梵志。
- 422 最雄最勇，能自解度，覺意不動，是謂梵志。
- 423 自知宿命，本所更來，得要生盡，叡通道玄，  
明如能默，是謂梵志。

※※※※※※※※※※※※※※※※※※※※※※※※※※※※※※

## 《法句經》選集

# 北傳《法句經》39品

法救撰集，維祇難、竺將焰等譯  
林崇安編，內觀教育基金會出版  
【內觀教育版】2004

### 法句經（支謙）序

曇鉢偈者，眾經之要義，曇之言法，鉢者句也。而法句經別有數部，有九百偈，或七百偈，及五百偈。偈者結語，猶詩頌也。是佛見事而作，非一時言，各有本末，布在諸經。

佛一切智，厥性大仁，愍傷天下，出興于世，開顯道義，所以解人，凡十二部經，總括其要，別為數部。四部阿含，佛去世後，阿難所傳，卷無大小，皆稱聞如是處佛所在，究暢其說。是後五部沙門，各自鈔眾經中四句、六句之偈，比次其義，條別為品，於十二部經，靡不斟酌，無所適名，故曰法句。諸經為法，言法句者，由法言也。近世葛氏傳七百偈，偈義致深，譯人出之，頗使其渾，惟佛難值，其文難聞，又諸佛興，皆在天竺。天竺言語，與漢異音，云其書為天書，語為天語，名物不同，傳實不易。唯昔藍調安侯世高，都尉佛調，譯梵為秦，實得其體。斯已難繼，後之傳者雖不能密，猶常貴其寶，粗得大趣。

始者維祇難，出自天竺，以黃武三年來適武昌，僕從受此五百偈本，請其同道竺將焰為譯。將焰雖善天竺語，未備曉漢，其所傳言，或得梵語，或以義出音，迎質真樸，初謙其為辭不雅。維祇難曰：佛言依其義，不用飾，取其法，不以嚴，其傳經者令易曉，勿失厥義，是則為善。坐中咸曰：老氏稱美言不信，信言不美；仲尼亦云，書不盡言，言不盡意。明聖人意深遠無極，今傳梵義實宜經達。是以自偈受譯人口，因修本旨，不加文飾，譯所不解則闕不傳，故有脫失，多不出者。

然此雖辭朴而旨深，文約而義博，事鉤眾經章，有本句、有義說，其在天竺始進業者，不學法句，謂之越敘。此乃始進者之洪漸，深入者之奧藏也。可以啟矇辯惑，誘人自立，學之功微而所苞者廣，寔可謂妙要也哉。

昔傳此時，有所不解，會將炎來，更從諮問，受此偈輩，復得十三品，并校往古，有所增定，第其品目，合為一部三十九篇，大凡偈七百五十二章（註：今實計為 758 偈），庶有補益，共廣問焉。

## 北傳《法句經》39 品

### 無常品第一，二十有一章

- 無常品者，寤欲昏亂，榮命難保，唯道是真。
- 01 睡眠解寤，宜歡喜思，聽我所說，撰記佛言。
  - 02 所行非常，謂興衰法，夫生輒死，此滅為樂。
  - 03 譬如陶家，埏埴作器，一切要壞，人命亦然。
  - 04 如河駛流，往而不返，人命如是，逝者不還。
  - 05 譬人操杖，行牧食牛，老死猶然，亦養命去。
  - 06 千百非一，族姓男女，貯聚財產，無不衰喪。
  - 07 生者日夜，命自攻削，壽之消盡，如[榮-木+巾][雨/井]水。
  - 08 常者皆盡，高者亦墮，合會有離，生者有死。
  - 09 眾生相剋，以喪其命，隨行所墮，自受殃福。
  - 10 老見苦痛，死則意去，樂家縛獄，貪世不斷。
  - 11 咄嗟老至，色變作耄，少時如意，老見蹈藉。
  - 12 雖壽百歲，亦死過去，為老所厭，病條至際。
  - 13 是日已過，命則隨滅，如少水魚，斯有何樂。
  - 14 老則色衰，所病自壞，形敗腐朽，命終自然。
  - 15 是身何用，恒漏臭處，為病所困，有老死患。
  - 16 嗜欲自恣，非法是增，不見聞變，壽命無常。
  - 17 非有子恃，亦非父兄，為死所迫，無親可怙。
  - 18 晝夜慢惰，老不止姪，有財不施，不受佛言，  
有此四弊，為自侵欺。
  - 19 非空非海中，非入山石間，無有地方所，脫之不受死。
  - 20 是務是吾作，當作令致是，人為此譟擾，履踐老死憂。
  - 21 知此能自淨，如是見生盡，比丘厭魔兵，從生死得度。

### 教學品第二，二十有九章

- 教學品者，導以所行，釋己愚闇，得見道明。
- 01 咄哉何為寐，蝸螺蚌蠹類，隱弊以不淨，迷惑計為身。
  - 02 焉有被斫創，心如嬰疾痛，遭于眾厄難，而反為用眠。
  - 03 思而不放逸，為仁學仁跡，從是無有憂，常念自滅意。
  - 04 正見學務增，是為世間明，所生福千倍，終不墮惡道。
  - 05 莫學小道，以信邪見，莫習放蕩，令增欲意。

- 06 善修法行，學誦莫犯，行道無憂，世世常安。
- 07 愍學攝身，常慎思言：是到不死，行滅得安。
- 08 非務勿學，是務宜行，已知可念，則漏得滅。
- 09 見法利身，夫到善方，知利健行，是謂賢明。
- 10 起覺義者，學滅以固，著滅自恣，損而不興。
- 11 是向以強，是學得中，從是解義，宜憶念行。
- 12 學先斷母，率君二臣，廢諸營從，是上道人。
- 13 學無朋類，不得善友，寧獨守善，不與愚偕。
- 14 樂戒學行，奚用伴為，獨善無憂，如空野象。
- 15 戒聞俱善，二者孰賢，方戒稱聞，宜諦學行。
- 16 學先護戒，開閉必固，施而無受，仿行勿臥。
- 17 若人壽百歲，邪學志不善，不如生一日，精進受正法。
- 18 若人壽百歲，奉火修異術，不如須臾頃，事戒者福稱。
- 19 能行說之可，不能勿空語，虛偽無誠信，智者所屏棄。
- 20 學當先求解，觀察別是非，受諦應誨彼，慧然不復惑。
- 21 被髮學邪道，草衣內貪濁，矇矇不識真，如聾聽五音。
- 22 學能捨三惡，以藥消眾毒，健夫度生死，如蛇脫故皮。
- 23 學而多聞，持戒不失，兩世見譽，所願者得。
- 24 學而寡聞，持戒不完，兩世受痛，喪其本願。
- 25 夫學有二，常親多聞，安諦解義，雖困不邪。
- 26 稊稗害禾，多欲妨學，耘除眾惡，成收必多。
- 27 慮而後言，辭不強梁，法說義說，言而莫違。
- 28 善學無犯，畏法曉忌，見微知者，誠無後患。
- 29 遠捨罪福，務成梵行，終身自攝，是名善學。

### 多聞品第三，十有九章

多聞品者，亦勸聞學，積聞成聖，自致正覺。

- 01 多聞能持固，奉法為垣牆，精進難踰毀，從是戒慧成。
- 02 多聞令志明，已明智慧增，智則博解義，見義行法安。
- 03 多聞能除憂，能以定為歡，善說甘露法，自致得泥洹。
- 04 聞為知法律，解疑亦見正，從聞捨非法，行到不死處。
- 05 為能師現道，解疑令學明，亦興清淨本，能奉持法藏。
- 06 能攝為解義，解則義不穿，受法猗法者，從是疾得安。
- 07 若多少有聞，自大以憍人，是如盲執燭，炤彼不自明。

- 08 夫求爵位財，尊貴升天福，辯慧世間悍，斯聞為第一。
- 09 帝王聘禮聞，天上天亦然，聞為第一藏，最富旅力強。
- 10 智者為聞屈，好道者亦樂，王者盡心事，雖釋梵亦然。
- 11 仙人常敬聞，況貴巨富人，是以慧為貴，可禮無過是。
- 12 事日為明故，事父為恩故，事君以力故，聞故事道人。
- 13 人為命事醫，欲勝依豪強，法在智慧處，福行世世明。
- 14 察友在為謀，別伴在急時，觀妻在房樂，欲知智在說。
- 15 聞為今世利，妻子昆弟友，亦致後世福，積聞成聖智。
- 16 是能散憂患，亦除不祥衰，欲得安穩吉，當事多聞者。
- 17 斫創無過憂，射箭無過愚，是壯莫能拔，唯從多聞除。
- 18 盲從是得眼，闇者從得燭，亦導世間人，如日將無日。
- 19 是故可捨癡，離慢豪富樂，務學事聞者，是名積聚德。

#### 篤信品第四，十有八章

篤信品者，立道之根果，於因正見，行不回顧。

- 01 信慚戒意財，是法雅士譽，斯道明智說，如是昇天世。
- 02 愚不修天行，亦不譽布施，信施助善者，從是到彼安。
- 03 信者真人長，念法所住安，近者意得上，智壽壽中賢。
- 04 信能得道，法致滅度，從聞得智，所到有明。
- 05 信能度淵，攝為船師，精進除苦，慧到彼岸。
- 06 士有信行，為聖所譽，樂無為者，一切縛解。
- 07 信之與戒，慧意能行，健夫度患，從是脫淵。
- 08 信使戒誠，亦受智慧，在在能行，處處見養。
- 09 比方世利，慧信為明，是財上寶，家產非常。
- 10 欲見諸真，樂聽講法，能捨慳垢，此之為信。
- 11 信能度河，其福難奪，能禁止盜，野沙門樂。
- 12 無信不習，好剝正言：如拙取水，掘泉揚泥。
- 13 賢夫習智，樂仰清流，如善取水，思令不擾。
- 14 信不染他，唯賢與人，可好則學，非好則遠。
- 15 信為我輿，莫知斯載，如大象調，自調最勝。
- 16 信財戒財，慚愧亦財，聞財施財，慧為七財。
- 17 從信守戒，常淨觀法，慧而利行，奉敬不忘。
- 18 生有此財，不問男女，終以不貧，賢者識真。

## 戒慎品第五，十有六章

誠慎品者，授與善道，禁制邪非，後無所悔也。

- 01 人而常清，奉律至終，淨修善行，如是戒成。
- 02 慧人護戒，福致三寶，名聞得利，後上天樂。
- 03 常見法處，護戒為明，得成真見，輩中吉祥。
- 04 持戒者安，令身無惱，夜臥恬淡，寤則常歡。
- 05 修戒布施，作福為福，從是適彼，常到安處。
- 06 何終為善，何善安止，何為人寶，何盜不取。
- 07 戒終老安，戒善安止，慧為人寶，福盜不取。
- 08 比丘立戒，守攝諸根，食知自節，悟意令應。
- 09 以戒降心，守意正定，內學正觀，無忘正智。
- 10 明哲守戒，內思正智，行道如應，自清除苦。
- 11 蠲除諸垢，盡慢勿生，終身求法，勿暫離聖。
- 12 戒定慧解，是當善惟，都已離垢，無禍除有。
- 13 著解則度，餘不復生，越諸魔界，如日清明。
- 14 狂惑自恣，已常外避，戒定慧行，求滿勿離。
- 15 持戒清淨，心不自恣，正智已解，不睹邪部。
- 16 是往吉處，為無上道，亦捨非道，離諸魔界。

## 惟念品第六，十有二章

惟念品者，守微之始，內思安般，必解道紀。

- 01 出息入息念，具滿諦思惟，從初竟通利，安如佛所說。
- 02 是則炤世間，如雲解月現，起止學思惟，坐臥不廢忘。
- 03 比丘立是念，前利後則勝，始得終必勝，逝不睹生死。
- 04 若見身所住，六更以為最，比丘常一心，便自知泥洹。
- 05 已有是諸念，自身常建行，若其不如是，終不得意行。
- 06 是隨本行者，如是度愛勞，若能悟意念，知解一心樂，  
應時等行法，是度老死惱。
- 07 比丘悟意行，當令應是念，諸念生死棄，為能作苦際。
- 08 常當聽微妙，自覺悟其意，能覺者為賢，終始無所會。
- 09 以覺意能應，日夜務學行，當解甘露要，令諸漏得盡。
- 10 夫人得善利，乃來自歸佛，是故當晝夜，常念佛法眾。
- 11 已知自覺意，是為佛弟子，常當晝夜念，佛與法及僧。
- 12 念身念非常，念戒布施德，空不願無相，晝夜當念是。

## 慈仁品第七，十有〔九〕章

- 慈仁品者，是謂大人，聖人所履，德普無量。
- 01 為仁不殺，常能攝身，是處不死，所適無患。
  - 02 不殺為仁，慎言守心，是處不死，所適無患。
  - 03 彼亂已整，守以慈仁，見怒能忍，是為梵行。
  - 04 至誠安徐，口無羸言，不瞋彼所，是謂梵行。
  - 05 垂拱無為，不害眾生，無所憍惱，是應梵行。
  - 06 常以慈哀，淨如佛教，知足知止，是度生死。
  - 07 少欲好學，不惑於利，仁而不犯，世上所稱。
  - 08 仁壽無犯，不興變快，人為諍擾，慧以嘿安。
  - 09 普憂賢友，哀加眾生，常行慈心，所適者安。
  - 10 仁儒不邪，安止無憂，上天衛之，智者樂慈。
  - 11 晝夜念慈，心無剋伐，不害眾生，是行無仇。
  - 12 不慈則殺，違戒言妄，過不與他，不觀眾生。
  - 13 酒致失志，為放逸行，後墮惡道，無誠不真。
  - 14 履仁行慈，博愛濟眾，有十一譽，福常隨身。
  - 15 臥安覺安，不見惡夢，天護人愛，不毒不兵。
  - 16 水火不喪，在所得利，死昇梵天，是為十一。
  - 17 若念慈心，無量不廢，生死漸薄，得利度世。
  - 18 仁無亂志，慈最可行，愍傷眾生，此福無量。
  - 19 假令盡壽命，懃事天下人，象馬以祠天，不如行一慈。

## 言語品第八，十有二章

- 言語品者，所以戒口，發說談論，當用道理。
- 01 惡言罵詈，僞陵蔑人，興起是行，疾怨滋生。
  - 02 遜言順辭，尊敬於人，棄結忍惡，疾怨自滅。
  - 03 夫士之生，斧在口中，所以斬身，由其惡言。
  - 04 諍為少利，如掩失財，從彼致諍，令意向惡。
  - 05 譽惡惡所譽，是二俱為惡，好以口儻鬥，是後皆無安。
  - 06 無道墮惡道，自增地獄苦，遠愚修忍意，念諦則無犯。
  - 07 從善得解脫，為惡不得解，善解者為賢，是為脫惡惱。
  - 08 解自抱損意，不躁言得中，義說如法說，是言柔軟甘。
  - 09 是以言語者，必使己無患，亦不剋眾人，是為能善言。
  - 10 言使投意可，亦令得歡喜，不使至惡意，出言眾悉可。

- 11 至誠甘露說，如法而無過，諦如義如法，是為近道立。  
12 說如佛言者，是吉得滅度，為能作浩際，是謂言中上。

### 雙要品第九，二十有二章

- 雙要品者，兩兩相明，善惡有對，舉義不單。。
- 01 心為法本，心尊心使，中心念惡，即言即行，  
罪苦自追，車轆于轍。
- 02 心為法本，心尊心使，中心念善，即言即行，  
福樂自追，如影隨形。
- 03 隨亂意行，拘愚入冥，自大無法，何解善言。
- 04 隨正意行，開解清明，不為妒嫉，敏達善言。
- 05 慍於怨者，未嘗無怨，不慍自除，是道可宗。
- 06 不好責彼，務自省身，如有知此，永滅無患。
- 07 行見身淨，不攝諸根，飲食不節，慢墮怯弱，  
為邪所制，如風靡草。
- 08 觀身不淨，能攝諸根，食知節度，常樂精進，  
不為邪動，如風大山。
- 09 不吐毒態，欲心馳騁，未能自調，不應法衣。
- 10 能吐毒態，戒意安靜，降心已調，此應法衣。
- 11 以真為偽，以偽為真，是為邪計，不得真利。
- 12 知真為真，見偽知偽，是為正計，必得真利。
- 13 蓋屋不密，天雨則漏，意不惟行，淫泆為穿。
- 14 蓋屋善密，雨則不漏，攝意惟行，淫泆不生。
- 15 鄙夫染人，如近臭物，漸迷習非，不覺成惡。
- 16 賢夫染人，如近香熏，進智習善，行成潔芳。
- 17 造憂後憂，行惡兩憂，彼憂惟懼，見罪心懍。
- 18 造喜後喜，行善兩喜，彼喜惟歡，見福心安。
- 19 今悔後悔，為惡兩悔，厥為自殃，受罪熱惱。
- 20 今歡後歡，為善兩歡，厥為自祐，受福悅豫。
- 21 巧言多求，放蕩無戒，懷姪怒癡，不惟止觀，  
聚如群牛，非佛弟子。
- 22 時言少求，行道如法，除姪怒癡，覺正意解，  
見對不起，是佛弟子。

## 放逸品第十，有二十章

放逸品者，引律戒情，防邪檢失，以道勸賢。

- 01 戒為甘露道，放逸為死徑，不貪則不死，失道為自喪。
- 02 慧智守道勝，終不為放逸，不貪致歡喜，從是得道樂。
- 03 常當惟念道，自強守正行，健者得度世，吉祥無有上。
- 04 正念常興起，行淨惡易滅，自制以法壽，不犯善名增。
- 05 發行不放逸，約以自調心，慧能作定明，不返冥淵中。
- 06 愚人意難解，貪亂好諍訟，上智常重慎，護斯為寶尊。
- 07 莫貪莫好諍，亦莫嗜欲樂，思心不放逸，可以獲大安。
- 08 放逸如自禁，能卻之為賢，已昇智慧閣，去危為即安，  
明智觀於愚，譬如山與地。
- 09 居亂而身正，彼為獨覺悟，是力過師子，棄惡為大智。
- 10 睡眠重若山，癡冥為所弊，安臥不計苦，是以常受胎。
- 11 不為時自恣，能制漏得盡，自恣魔得便，如師子搏鹿。
- 12 能不自恣者，是為戒比丘，彼思正淨者，常當自護心。
- 13 比丘謹慎樂，放逸多憂愆，變諍小致大，積惡入火焰。
- 14 守戒福致善，犯戒有懼心，能斷三界漏，此乃近泥洹。
- 15 若前放逸，後能自禁，是炤世間，念定其宜。
- 16 過失為惡，追覆以善，是炤世間，念善其宜。
- 17 少莊捨家，盛修佛教，是炤世間，如月雲消。
- 18 人前為惡，後止不犯，是炤世間，如月雲消。
- 19 生不施惱，死而不感，是見道悍，應中勿憂。
- 20 斷濁黑法，學惟清白，度淵不反，棄猗行止，  
不復染樂，欲斷無憂。

## 心意品第十一，十有二章

心意品者，說意精神，雖空無形，造作無竭。

- 01 意使作狗，難護難禁，慧正其本，其明乃大。
- 02 輕躁難持，唯欲是從，制意為善，自調則寧。
- 03 意微難見，隨欲而行，慧常自護，能守即安。
- 04 獨行遠逝，覆藏無形，損意近道，魔繫乃解。
- 05 心無住息，亦不知法，迷於世事，無有正智。
- 06 念無適止，不絕無邊，福能遏惡，覺者為賢。
- 07 佛說心法，雖微非真，當覺逸意，莫隨放心。

- 08 見法最安，所願得成，慧護微意，斷苦因緣。
- 09 有身不久，皆當歸土，形壞神去，寄住何貪。
- 10 心豫造處，往來無端，念多邪僻，自為招惡。
- 11 是意自造，非父母為，可勉向正，為福勿回。
- 12 藏六如龜，防意如城，慧與魔戰，勝則無患。

### 華香品第十二，十有七章

- 華香品者，明學當行，因華見實，使偽反真。
- 01 孰能擇地，捨鑑取天，誰說法句，如擇善華。
  - 02 學者擇地，捨鑑取天，善說法句，能採德華。
  - 03 知世坏喻，幻法忽有，斷魔華敷，不睹生死。
  - 04 見身如沫，幻法自然，斷魔華敷，不睹生死。
  - 05 身病則萎，若華零落，死命來至，如水湍驟。
  - 06 貪欲無厭，消散人念，邪致之財，為自侵欺。
  - 07 如蜂集華，不饒色香，但取味去，仁人聚然。
  - 08 不務觀彼，作與不作，常自省身，知正不正。
  - 09 如可意華，色好無香，工語如是，不行無得。
  - 10 如可意華，色美且香，工語有行，必得其福。
  - 11 多作寶花，結步搖綺，廣積德者，所生轉好。
  - 12 奇草芳花，不逆風熏，近道敷開，德人逼香。
  - 13 旃檀多香，青蓮芳花，雖曰是真，不如戒香。
  - 14 華香氣微，不可謂真，持戒之香，到天殊勝。
  - 15 戒具成就，行無放逸，定意度脫，長離魔道。
  - 16 如作田溝，近于大道，中生蓮華，香潔可意。
  - 17 有生死然，凡夫處邊，慧者樂出，為佛弟子。

### 愚闇品第十三，〔十有九章〕

- 愚闇品者，將以開矇，故陳其態，欲使闡明，癡意常冥，逝如流川。
- 01 不寐夜長，疲倦道長，愚生死長，莫知正法。
  - 02 在一行疆，獨而無偶，愚人著數，憂感久長，  
與愚居苦，於我猶怨。
  - 03 有子有財，愚惟汲汲，我且非我，何憂子財？
  - 04 暑當止此，寒當止此，愚多務慮，莫知來變。
  - 05 愚矇愚極，自謂我智，愚而勝智，是謂極愚。

- 06 頑闇近智，如瓢斟味，雖久狎習，猶不知法。
- 07 開達近智，如舌嘗味，雖須臾習，即解道要。
- 08 愚人施行，為身招患，快心作惡，自致重殃。
- 09 行為不善，退見悔吝，致涕流面，報由宿習。
- 10 行為德善，進睹歡喜，應來受福，喜笑悅習。
- 11 過罪未熟，愚以恬憒，至其熟處，自受大罪。
- 12 愚所望處，不謂適苦，臨墮厄地，乃知不善。
- 13 愚憊作惡，不能自解，殃追自焚，罪成熾燃。
- 14 愚好美食，月月滋甚，於十六分，未一思法。
- 15 愚生念慮，至終無利，自招刀杖，報有印章。
- 16 觀處知其愚，不施而廣求，所墮無道智，往往有惡行。
- 17 遠道近欲者，為食在學名，貪猗家居故，多取供異姓。
- 18 學莫墮二望，莫作家沙門，貪家違聖教，為後自匱乏，  
此行與愚同，但令欲慢增。
- 19 利求之願異，求道意亦異，是以有識者，出為佛弟子，  
棄愛捨世習，終不墮生死。

#### 明哲品第十四，〔十有七章〕

- 明哲品者，舉智行者，修福進道，法為明鏡。
- 01 深觀善惡，心知畏忌，畏而不犯，終吉無憂。
- 02 故世有福，念思紹行，善致其願，福祿轉勝。
- 03 信善作福，積行不厭，信知陰德，久而必彰。
- 04 常避無義，不親愚人，思從賢友，押附上士。
- 05 喜法臥安，心悅意清，聖人演法，慧常樂行。
- 06 仁人智者，齋戒奉道，如星中月，照明世間。
- 07 弓工調角，水人調船，材匠調木，智者調身。
- 08 譬如厚石，風不能移，智者意重，毀譽不傾。
- 09 譬如深淵，澄靜清明，慧人聞道，心淨歡然。
- 10 大人體無欲，在所照然明，雖或遭苦樂，不高現其智。
- 11 大賢無世事，不願子財國，常守戒慧道，不貪邪富貴。
- 12 智人知動搖，譬如沙中樹，朋友志未強，隨色染其素。
- 13 世皆沒淵，鮮剋度岸，如或有人，欲度必奔。
- 14 誠貪道者，覽受正教，此近彼岸，脫死為上。
- 15 斷五陰法，靜思智慧，不反入淵，棄猗其明。

- 16 抑制情欲，絕樂無為，能自拯濟，使意為慧。  
17 學取正智，意惟正道，一心受諦，不起為樂，  
漏盡習除，是得度世。

### 羅漢品第十五，有十章

- 羅漢品者，言真人性，脫欲無著，心不渝變。  
01 去離憂患，脫於一切，縛結已解，冷而無煖。  
02 心淨得念，無所貪樂，已度癡淵，如鴈棄池。  
03 量腹而食，無所藏積，心空無想，度眾行地，  
如空中鳥，遠逝無礙。  
04 世間習盡，不復仰食，虛心無患，已到脫處，  
譬如飛鳥，暫下輒逝。  
05 制根從止，如馬調御，捨憍慢習，為天所敬。  
06 不怒如地，不動如山，真人無垢，生死世絕。  
07 心已休息，言行亦正，從正解脫，寂然歸滅。  
08 棄欲無著，缺三界障，望意已絕，是謂上人。  
09 在聚若野，平地高岸，應真所過，莫不蒙祐。  
10 彼樂空閑，眾人不能，快哉無望，無所欲求。

### 述千品第十六，十有六章

- 述千品者，示學者，經多而不要，不如約明。  
01 雖誦千言，句義不正，不如一要，聞可滅意。  
02 雖誦千言，不義何益，不如一義，聞行可度。  
03 雖多誦經，不解何益，解一法句，行可得道。  
04 千千為敵，一夫勝之，未若自勝，為戰中上。  
05 自勝最賢，故曰人雄，護意調身，自損至終。  
06 雖曰尊天，神魔梵釋，皆莫能勝，自勝之人。  
07 月千反祠，終身不輟，不如須臾，一心念法，  
一念道福，勝彼終身。  
08 雖終百歲，奉事火祠，不如須臾，供養三尊，  
一供養福，勝彼百年。  
09 祭神以求福，從後觀其報，四分未望一，不如禮賢者。  
10 能善行禮節，常敬長老者，四福自然增，色力壽而安。  
11 若人壽百歲，遠正不持戒，不如生一日，守戒正意禪。

- 12 若人壽百歲，邪偽無有智，不如生一日，一心學正智。  
13 若人壽百歲，懈怠不精進，不如生一日，勉力行精進。  
14 若人壽百歲，不知成敗事，不如生一日，見微知所忌。  
15 若人壽百歲，不見甘露道，不如生一日，服行甘露味。  
16 若人壽百歲，不知大道義，不如生一日，學推佛法要。

## 惡行品第十七，二十有二章

- 惡行品者，感切惡人，動有罪報，不行無患。
- 01 見善不從，反隨惡心，求福不正，反樂邪淫。  
02 凡人為惡，不能自覺，愚癡快意，令後鬱毒。  
03 凶人行虐，沈漸數數，快欲為人，罪報自然。  
04 吉人行德，相隨積增，甘心為之，福應自然。  
05 妖孽見福，其惡未熟，至其惡熟，自受罪虐。  
06 貞祥見禍，其善未熟，至其善熟，必受其福。  
07 擊人得擊，行怨得怨，罵人得罵，施怒得怒。  
08 世人無聞，不知正法，生此壽少，何宜為惡。  
09 莫輕小惡，以為無殃，水滸雖微，漸盈大器，  
凡罪充滿，從小積成。  
10 莫輕小善，以為無福，水滴雖微，漸盈大器，  
凡福充滿，從纖纖積。  
11 夫士為行，好之與惡，各自為身，終不敗亡。  
12 好取之士，自以為可，沒取彼者，人亦沒之。  
13 惡不即時，如搆牛乳，罪在陰祠，如灰覆火。  
14 戲笑為惡，以作身行，號泣受報，隨行罪至。  
15 作惡不覆，如兵所截，牽往乃知，已墮惡行，  
後受苦報，如前所習。  
16 如毒摩瘡，船入洄復，惡行流行，靡不傷剋。  
17 加惡誣罔人，清白猶不污，愚殃反自及，如塵逆風盆。  
18 過失犯非惡，能追悔為善，是明照世間，如日無雲噎。  
19 夫士所以行，然後身自見，為善則得善，為惡則得惡。  
20 有識墮胞胎，惡者入地獄，行善上昇天，無為得泥洹。  
21 非空非海中，非隱山石間，莫能於此處，避免宿惡殃。  
22 眾生有苦惱，不得免老死，唯有仁智者，不念人非惡。

## 刀杖品第十八，十有四章

- 刀杖品者，教習慈仁，無行刀杖，賊害眾生。
- 01 一切皆懼死，莫不畏杖痛，恕己可為譬，勿殺勿行杖。
  - 02 能常安群生，不加諸楚毒，現世不逢害，後世長安穩。
  - 03 不當羸言，言當畏報，惡往禍來，刀杖歸軀。
  - 04 出言以善，如叩鐘磬，身無論議，度世則易。
  - 05 歐杖良善，妄讒無罪，其殃十倍，災迅無赦：
  - 06 生受酷痛，形體毀折，自然惱病，失意恍惚。
  - 07 人所誣咎，或縣官厄，財產耗盡，親戚離別。
  - 08 舍宅所有，災火焚燒，死入地獄，如是為十。
  - 09 雖裸剪髮，長服草衣，沐浴踞石，奈癡結何。
  - 10 不伐殺燒，亦不求勝，人愛天下，所適無怨。
  - 11 世黨有人，能知慚愧，是名誘進，如策良馬。
  - 12 如策善馬，進道能遠，人有信戒，定意精進，  
受道慧成，便滅眾苦。
  - 13 自嚴以修法，滅損受淨行，杖不加群生，是沙門道人。
  - 14 無害於天下，終身不遇害，常慈於一切，孰能與為怨？

## 老耗品第十九，十有四章

- 老耗品者，誨人勲仂，不與命競，老悔何益？
- 01 何喜何笑，命常熾然，深弊幽冥，如不求錠？
  - 02 見身形範，倚以為安，多想致病，豈知非真。
  - 03 老則色衰，病無光澤，皮緩肌縮，死命近促。
  - 04 身死神徒，如御棄車，肉消骨散，身何可怙。
  - 05 身為如城，骨幹肉塗，生至老死，但藏恚慢。
  - 06 老則形變，喻如故車，法能除苦，宜以仂學。
  - 07 人之無聞，老若特牛，但長肌肥，無有福慧。
  - 08 生死無聊，往來艱難，意猗貪身，生苦無端。
  - 09 慧以見苦（屋），是故棄身，滅意斷行，愛盡無生。
  - 10 不修梵行，又不富財，老如白鷺，守伺空池。
  - 11 既不守戒，又不積財，老羸氣竭，思故何逮。
  - 12 老如秋葉，何穢鑑錄，命疾脫至，亦用後悔。
  - 13 命欲日夜盡，及時可勲力，世間諦非常，莫惑墮冥中。
  - 14 當學燃意燈，自練求智慧，離垢勿染污，執燭觀道地。

## 愛身品第二十，十有三章

- 愛身品者，所以勸學，終有益己，滅罪興福。
- 01 自愛身者，慎護所守，悵望欲解，學正不寐。
  - 02 為身第一，常自勉學，利乃誨人，不倦則智。
  - 03 學先自正，然後正人，調身入慧，必遷為上。
  - 04 身不能利，安能利人，心調體正，何願不至？
  - 05 本我所造，後我自受，為惡自更，如剛鑽珠。
  - 06 人不持戒，滋蔓如藤，逞情極欲，惡行日增。
  - 07 惡行危身，愚以為易，善最安身，愚以為難。
  - 08 如真人教，以道法身，愚者疾之，見而為惡，行惡得惡，如種苦種。
  - 09 惡自受罪，善自受福，亦各須熟，彼不自代，習善得善，亦如種甜。
  - 10 自利利人，益而不費，欲知利身，戒聞為最。
  - 11 如有自憂，欲生天上，敬樂聞法，當念佛教。
  - 12 凡用必豫慮，勿以損所務，如是意日修，事務不失時。
  - 13 夫治事之士，能至終成利，真見身應行，如是得所欲。

## 世俗品第二十一，十有四章

- 世俗品者，說世幻夢，當捨浮華，勉修道用。
- 01 如車行道，捨平大途，從邪徑敗，生折軸憂。
  - 02 離法如是，從非法增，愚守至死，亦有折患。
  - 03 順行正道，勿隨邪業，行住臥安，世世無患。
  - 04 萬物如泡，意如野馬，居世若幻，奈何樂此？
  - 05 若能斷此，伐其樹根，日夜如是，必至于定。
  - 06 一施如信，如樂之人，或從惱意，以飯食眾，此輩日夜，不得定意。
  - 07 世俗無眼，莫見道真，如少見明，當養善意。
  - 08 如鴈將群，避羅高翔，明人導世，度脫邪眾。
  - 09 世皆有死，三界無安，諸天雖樂，福盡亦喪。
  - 10 觀諸世間，無生不終，欲離生死，當行道真。
  - 11 癡覆天下，貪令不見，邪疑卻道，苦愚從是。
  - 12 一法脫過，謂妄語人，不免後世，靡惡不更。
  - 13 雖多積珍寶，嵩高至于天，如是滿世間，不如見道跡。

14 不善像如善，愛如似無愛，以苦為樂像，狂夫為所厭。

### 述佛品第二十二，二十有一章

述佛品者，道佛神德，無不利度，明為世則。

- 01 已勝不受惡，一切勝世間，叡智廓無疆，開矇令人道。
- 02 決網無罣礙，愛盡無所積，佛意深無極，未踐跡令踐。
- 03 勇健立一心，出家日夜滅，根斷無欲意，學正念清明。
- 04 見諦淨無穢，已度五道淵，佛出照世間，為除眾憂苦。
- 05 得生人道難，生壽亦難得，世間有佛難，佛法難得聞。
- 06 我既無歸保，亦獨無伴侶，積一行得佛，自然通聖道。
- 07 船師能渡水，精進為橋梁，人以種姓繫，度者為健雄。
- 08 壞惡度為佛，止地為梵志，除饑為學法，斷種為弟子。
- 09 觀行忍第一，佛說泥洹最，捨罪作沙門，無燒害於彼。
- 10 不燒亦不惱，如戒一切持，少食捨身貪，

有行幽隱處，意諦以有點，是能奉佛教。

- 11 諸惡莫作，諸善奉行，自淨其意，是諸佛教。
- 12 佛為尊貴，斷漏無婬，諸釋中雄，一群從心。
- 13 快哉福報，所願皆成，敏於上寂，自致泥洹。
- 14 或多自歸，山川樹神，廟立圖像，祭祠求福。
- 15 自歸如是，非吉非上，彼不能來，度我眾苦。
- 16 如有自歸，佛法聖眾，道德四諦，必見正慧。
- 17 生死極苦，從諦得度，度世八道，斯除眾苦。
- 18 自歸三尊，最吉最上，唯獨有是，度一切苦。
- 19 士如中正，志道不慳，利哉斯人，自歸佛者。
- 20 明人難值，亦不比有，其所生處，族親蒙慶。
- 21 諸佛興快，說經道快，眾聚和快，和則常安。

### 安寧品第二十三，十有四章

安寧品者，差次安危，去惡即善，快而不墮。

- 01 我生已安，不慍於怨，眾人有怨，我行無怨。
- 02 我生已安，不病於病，眾人有病，我行無病。
- 03 我生已安，不感於憂，眾人有憂，我行無憂。
- 04 我生已安，清淨無為，以樂為食，如光音天。
- 05 我生已安，澹泊無事，彌薪國火，安能燒我。

- 06 勝則生怨，負則自鄙，去勝負心，無爭自安。
- 07 熱無過姪，毒無過怒，苦無過身，樂無過滅。
- 08 無樂小樂，小辯小慧，觀求大者，乃獲大安。
- 09 我為世尊，長解無憂，正度三有，獨降眾魔。
- 10 見聖人快，得依附快，得離愚人，為善獨快。
- 11 守正道快，工說法快，與世無諍，戒具常快。
- 12 依賢居快，如親親會，近仁智者，多聞高遠。
- 13 壽命鮮少，而棄世多，學當取要，令至老安。
- 14 諸欲得甘露，棄欲滅諦快，欲度生死苦，當服甘露味。

### 好喜品第二十四，十有二章

好喜品者，禁人多喜，能不貪欲，則無憂患。

- 01 違道則自順，順道則自違，捨義取所好，是為順愛欲。
- 02 不當趣所愛，亦莫有不愛，愛之不見憂，不愛見亦憂。
- 03 是以莫造愛，愛憎惡所由，已除縛結者，無愛無所憎。
- 04 愛喜生憂，愛喜生畏，無所愛喜，何憂何畏？
- 05 好樂生憂，好樂生畏，無所好樂，何憂何畏？
- 06 貪欲生憂，貪欲生畏，解無貪欲，何憂何畏？
- 07 貪法戒成，至誠知慚，行身近道，為眾所愛。
- 08 欲態不出，思正乃語，心無貪愛，必截流渡。
- 09 譬人久行，從遠吉還，親厚普安，歸來歡喜。
- 10 好行福者，從此到彼，自受福祚，如親來喜。
- 11 起從聖教，禁制不善，近道見愛，離道莫親。
- 12 近與不近，所住者異，近道昇天，不近墮獄。

### 忿怒品第二十五，二十有六章

忿怒品者，見瞋恚害，寬弘慈柔，天祐人愛。

- 01 忿怒不見法，忿怒不知道，能除忿怒者，福喜常隨身。
- 02 貪姪不見法，愚癡意亦然，除姪去癡者，其福第一尊。
- 03 恚能自制，如止奔車，是為善御，棄冥入明。
- 04 忍辱勝恚，善勝不善，勝者能施，至誠勝欺。
- 05 不欺不怒，意不多求，如是三事，死則上天。
- 06 常自攝身，慈心不殺，是生天上，到彼無憂。
- 07 意常覺寤，明慕勤學，漏盡意解，可致泥洹。

- 08 人相謗毀，自古至今，既毀多言，又毀訥忍，亦毀中和，世無不毀。
- 09 欲意非聖，不能制中，一毀一譽，但為利名。
- 10 明智所譽，唯稱是賢，慧人守戒，無所譏謗。
- 11 如羅漢淨，莫而誣謗，諸人咨嗟，梵釋所稱。
- 12 常守慎身，以護瞋恚，除身惡行，進修德行。
- 13 常守慎言，以護瞋恚，除口惡言，誦習法言。
- 14 常守慎心，以護瞋恚，除心惡念，思惟念道。
- 15 節身慎言，守攝其心，捨恚行道，忍辱最強。
- 16 捨恚離慢，避諸愛會，不著名色，無為滅苦。
- 17 起而解怒，姪生自禁，捨不明健，斯皆得安。
- 18 瞋斷臥安，恚滅姪憂，怒為毒本，軟意梵志，言善得譽，斷為無患。
- 19 同志相近，詳為作惡，後別餘恚，火自燒惱。
- 20 不知慚愧，無戒有怒，為怒所牽，不厭有務。
- 21 有力近兵，無力近軟，夫忍為上，宜常忍羸。
- 22 舉眾輕之，有力者忍，夫忍為上，宜常忍羸。
- 23 自我與彼，大畏有三，如知彼作，宜滅己中。
- 24 俱兩行義，我為彼教，如知彼作，宜滅己中。
- 25 苦智勝愚，麤言惡說，欲常勝者，於言宜默。
- 26 夫為惡者，怒有怒報，怒不報怒，勝彼鬥負。

### 塵垢品第二十六，十有九章

- 塵垢品者，分別清濁，學當潔白，無行污辱。
- 01 生無善行，死墮惡道，住疾無間，到無資用。
- 02 當求智慧，以然意定，去垢勿污，可離苦形。
- 03 慧人以漸，安徐稍進，洗除心垢，如工鍊金。
- 04 惡生於心，還自壞形，如鐵生垢，反食其身。
- 05 不誦為言垢，不勤為家垢，不嚴為色垢，放逸為事垢。
- 06 慳為惠施垢，不善為行垢，今世亦後世，惡法為常垢。
- 07 垢中之垢，莫甚於癡，學當捨惡，比丘無垢。
- 08 苟生無恥，如鳥長喙，強顏耐辱，名曰穢生。
- 09 廉恥雖苦，義取清白，避辱不妄，名曰潔生。
- 10 愚人好殺，言無誠實，不與而取，好犯人婦。

- 11 逞心犯戒，迷惑於酒，斯人二世，自掘身本。
- 12 人如覺是，不當念惡，愚近非法，久自燒沒。
- 13 若信布施，欲揚名譽，會人虛飾，非入淨定。
- 14 一切斷欲，截意根原，晝夜守一，必入定意。
- 15 著垢為塵，從染塵漏，不染不行，淨而離愚。
- 16 見彼自侵，常內自省，行漏自欺，漏盡無垢。
- 17 火莫熱於姪，捷莫疾於怒，網莫密於癡，愛流駛乎河。
- 18 虛空無轍跡，沙門無外意，眾人盡樂惡，唯佛淨無穢。
- 19 虛空無轍跡，沙門無外意，世間皆無常，佛無我所有。

### 奉持品第二十七，十有七章

- 奉持品者，解說道義，法貴德行，不用貪侈。
- 01 好經道者，不競於利，有利無利，無欲不惑。
  - 02 常愍好學，正心以行，擁懷寶慧，是謂為道。
  - 03 所謂智者，不必辯言，無恐無懼，守善為智。
  - 04 奉持法者，不以多言，雖素少聞，身依法行，守道不忌，可謂奉法。
  - 05 所謂老者，不必年耆，形熟髮白，蠢愚而已。
  - 06 謂懷諦法，順調慈仁，明遠清潔，是為長老。
  - 07 所謂端政，非色如花，慳嫉虛飾，言行有違。
  - 08 謂能捨惡，根原已斷，慧而無恚，是謂端政。
  - 09 所謂沙門，非必除髮，妄語貪取，有欲如凡。
  - 10 謂能止惡，恢廓弘道，息心滅意，是為沙門。
  - 11 所謂比丘，非時乞食，邪行姪彼，稱名而已。
  - 12 謂捨罪福，淨修梵行，慧能破惡，是為比丘。
  - 13 所謂仁明，非口不言：用心不淨，外順而已。
  - 14 謂心無為，內行清虛，此彼寂滅，是為仁明。
  - 15 所謂有道，非救一物，普濟天下，無害為道。
  - 16 戒眾不言，我行多誠，得定意者，要由閉損。
  - 17 意解求安，莫習凡人，使結未盡，莫能得脫。

### 道行品第二十八，二十有八章

- 道行品者，旨說大要，度脫之道，此為極妙。
- 01 八直最上道，四諦為法跡，不姪行之尊，施燈必得眼。

- 02 是道無復畏，見淨乃度世，此能壞魔兵，力行滅邪苦。  
03 我已開正道，為大現異明，已聞當自行，行乃解邪縛。  
04 生死非常苦，能觀見為慧，欲離一切苦，行道一切除。  
05 生死非常空，能觀見為慧，欲離一切苦，但當勤行道。  
06 起時當即起，莫如愚覆淵，與墮與瞻聚，計罷不進道。  
07 念應念則正，念不應則邪，慧而不起邪，思正道乃成。  
08 慎言守意念，身不善不行，如是三行除，佛說是得道。  
09 斷樹無伐本，根在猶復生，除根乃無樹，比丘得泥洹。  
10 不能斷樹，親戚相戀，貪意自縛，如犢慕乳。  
11 能斷意本，生死無彊，是為近道，疾得泥洹。  
12 貪婬致老，瞋恚致病，愚癡致死，除三得道。  
13 釋前解後，脫中度彼，一切念滅，無復老死。  
14 人營妻子，不觀病法，死命卒至，如水湍驟。  
15 父子不救，餘親何望，命盡怙親，如盲守燈。  
16 慧解是意，可修經戒，勤行度世，一切除苦。  
17 遠離諸淵，如風卻雲，已滅思想，是為知見。  
18 智為世長，愜樂無為，知受正教，生死得盡。  
19 知眾行空，是為慧見，罷厭世苦，從是道除。  
20 知眾行苦，是為慧見，罷厭世苦，從是道除。  
21 眾行非身，是為慧見，罷厭世苦，從是道除。  
22 吾語汝法，愛箭為射，宜以自勗，受如來言。  
23 吾為都以滅，往來生死盡，非一情以解，所演為道眼。  
24 駛流澍于海，潘水漾疾滿，故為智者說，可趣服甘露。  
25 前未聞法輪，轉為哀眾生，於是奉事者，禮之度三有。  
26 三念可念善，三亦難不善，從念而有行，滅之為正斷。  
27 三定為轉念，棄猗行無量，得三三窟除，解結可應念。  
28 知以戒禁惡，思惟慧樂念，已知世成敗，息意一切解。

### 廣衍品第二十九，十有四章

廣衍品者，言凡善惡，積小致大，證應章句。

- 01 施安雖小，其報彌大，慧從小施，受見景福。  
02 施勞於人，而欲望祐，殃咎歸身，自遭廣怨。  
03 已為多事，非事亦造，伎樂放逸，惡習日增。  
04 精進惟行，習是捨非，修身自覺，是為正習。

- 05 既自解慧，又多學問，漸進普廣，油酥投水。
- 06 自無慧意，不好學問，凝縮狹小，酪酥投水。
- 07 近道名顯，如高山雪，遠道闇昧，如夜發箭。
- 08 為佛弟子，常寤自覺，晝夜念佛，惟法、思眾。
- 09 為佛弟子，當寤自覺，日暮思禪，樂觀一心。
- 10 人當有念意，每食知自少，則是痛欲薄，節消而保壽。
- 11 學難捨罪難，居在家亦難，會止同利難，難難無過有。
- 12 比丘乞求難，何可不自勉，精進得自然，後無欲於人。
- 13 有信則戒成，從戒多致寶，亦從得諧偶，在所見供養。
- 14 一坐一處臥，一行無放恣，守一以正身，心樂居樹間。

### 地獄品第三十，十有六章

地獄品者，道泥梨事，作惡受惡，罪牽不置。

- 01 妄語地獄近，作之言不作，二罪後俱受，是行自牽往。
- 02 法衣在其身，為惡不自禁，苟沒惡行者，終則墮地獄。
- 03 無戒受供養，理豈不自損，死噉燒鐵丸，然熱劇火炭。
- 04 放逸有四事，好犯他人婦，臥險非福利，毀三淫泆四。
- 05 不福利墮惡，畏惡畏樂寡，王法重罰加，身死入地獄。
- 06 譬如拔菅草，執緩則傷手，學戒不禁制，獄錄乃自賊。
- 07 人行為慢惰，不能除眾勞，梵行有玷缺，終不受大福。
- 08 常行所當行，自持必令強，遠離諸外道，莫習為塵垢。
- 09 為所不當為，然後致鬱毒，行善常吉順，所適無悔吝。
- 10 其於眾惡行，欲作若已作，是苦不可解，罪近難得避。
- 11 妄證求敗，行已不正，怨譖良人，以枉治士，  
罪縛斯人，自投于坑。
- 12 如備邊城，中外牢固，自守其心，非法不生，  
行缺致憂，令墮地獄。
- 13 可羞不羞，非羞反羞，生為邪見，死墮地獄。
- 14 可畏不畏，非畏反畏，信向邪見，死墮地獄。
- 15 可避不避，可就不就，翫習邪見，死墮地獄。
- 16 可近則近，可遠則遠，恒守正見，死墮善道。

### 象喻品第三十一，十有八章

象喻品者，教人正身，為善得善，福報快焉。

- 01 我如象鬥，不恐中箭，常以誠信，度無戒人。
- 02 譬象調正，可中王乘，調為尊人，乃受誠信。
- 03 雖為常調，如彼新馳，亦最善象，不如自調。
- 04 彼不能適，人所不至，唯自調者，能到調方。
- 05 如象名財守，猛害難禁制，繫絆不與食，而猶暴逸象。
- 06 沒在惡行者，恒以貪自繫，其象不知厭，故數入胞胎。
- 07 本意為純行，及常行所安，悉捨降伏結，如鉤制象調。
- 08 樂道不放逸，能常自護心，是為拔身苦，如象出于坑。
- 09 若得賢能伴，俱行行善悍，能伏諸所聞，至到不失意。
- 10 不得賢能伴，俱行行惡悍，廣斷王邑里，寧獨不為惡。
- 11 寧獨行為善，不與愚為侶，獨而不為惡，如象驚自護。
- 12 生而有利安，伴軟和為安，命盡為福安，眾惡不犯安。
- 13 人家有母樂，有父斯亦樂，世有沙門樂，天下有道樂。
- 14 持戒終老安，信正所正善，智慧最安身，不犯惡最安。
- 15 如馬調軟，隨意所如，信戒精進，定法要具。
- 16 明行成立，忍和意定，是斷諸苦，隨意所如。
- 17 從是往定，如馬調御，斷恚無漏，是受天樂。
- 18 不自放恣，從是多寤，羸馬比良，棄惡為賢。

### 愛欲品第三十二，三十有〔三〕章

愛欲品者，賤婬恩愛，世人為此，盛生災害。

- 01 心放在婬行，欲愛增枝條，分布生熾盛，超躍貪果猴。
- 02 以為愛忍苦，貪欲著世間，憂患日夜長，莖如蔓草生。
- 03 人為恩愛惑，不能捨情欲，如是憂愛多，潺潺盈于池。
- 04 夫所以憂悲，世間苦非一，但為緣愛有，離愛則無憂。
- 05 己意安棄憂，無愛何有世，不憂不染求，不愛焉得安。
- 06 有憂以死時，為致親屬多，涉憂之長塗，愛苦常墮危。
- 07 為道行者，不與欲會，先誅愛本，無所植根，  
勿如刈葦，令心復生。
- 08 如樹根深固，雖截猶復生，愛意不盡除，輒當還受苦。
- 09 猿猴得離樹，得脫復趣樹，眾人亦如是，出獄復入獄。
- 10 貪意為常流，習與憍慢并，思想猗婬欲，自覆無所見。

- 11 一切意流行，愛結如葛藤，唯慧分別見，能斷意根原。
- 12 夫從愛潤澤，思想為滋蔓，愛欲深無底，老死是用增。
- 13 所生枝不絕，但用食貪欲，養怨益丘塚，愚人常汲汲。
- 14 雖獄有鉤鑠，慧人不調牢，愚見妻子息，染著愛甚牢。
- 15 慧說愛為獄，深固難得出，是故當斷棄，不視欲能安。
- 16 見色心迷惑，不惟觀無常，愚以為美善，安知其非真。
- 17 以姪樂自裹，譬如蠶作繭，智者能斷棄，不盼除眾苦。
- 18 心念放逸者，見姪以為淨，恩愛意盛增，從是造獄牢。
- 19 覺意滅姪者，常念欲不淨，從是出邪獄，能斷老死患。
- 20 以欲網自蔽，以愛蓋自覆，自恣縛於獄，如魚入筍口。
- 21 為老死所伺，若犢求母乳，離欲滅愛跡，出網無所弊。
- 22 盡道除獄縛，一切此彼解，已得度邊行，是為大智士。
- 23 勿親遠法人，亦勿為愛染，不斷三世者，會復墮邊行。
- 24 若覺一切法，能不著諸法，一切愛意解，是為通聖意。
- 25 眾施經施勝，眾味道味勝，眾樂法樂勝，愛盡勝眾苦。
- 26 愚以貪自縛，不求度彼岸，貪為敗處故，害人亦自害。
- 27 愛欲意為田，姪、怨、癡為種，故施度世者，得福無有量。
- 28 伴少而貨多，商人怵惕懼，嗜欲賊害命，故慧不貪欲。
- 29 心可則為欲，何必獨五欲，違可絕五欲，是乃為勇士。
- 30 無欲無有畏，恬惓無憂患，欲除使結解，是為長出淵。
- 31 欲我知汝本，意以思想生，我不思想汝，則汝而不有。
- 32 伐樹忽休，樹生諸惡，斷樹盡株，比丘滅度。
- 33 夫不伐樹，少多餘親，心繫於此，如犢求母。

### 利養品第三十三，有二十章

利養品者，勵己防貪，見德思議，不為穢生。

- 01 芭蕉以實死，竹蘆實亦然，駞驢坐妊死，士以貪自喪。
- 02 如是貪無利，當知從癡生，愚為此害賢，首領分于地。
- 03 天雨七寶，欲猶無厭，樂少苦多，覺者為賢。
- 04 雖有天欲，慧捨無貪，樂離恩愛，為佛弟子。
- 05 遠道順邪，貪養比丘，止有慳意，以供彼姓。
- 06 勿猗此養，為家捨罪，此非至意，用用何益。
- 07 愚為愚計，欲慢用增，異哉失利，泥洹不同。
- 08 諦知是者，比丘佛子，不樂利養，閑居卻意。

- 09 自得不恃，不從他望，望彼比丘，不至正定。
- 10 夫欲安命，息心自省，不知計數，衣服飲食。
- 11 夫欲安命，息心自省，取得知足，守行一法。
- 12 夫欲安命，息心自省，如鼠藏穴，潛隱習教。
- 13 約利約耳，奉戒思惟，為慧所稱，清吉勿怠。
- 14 如有三明，解脫無漏，寡智鮮識，無所憶念。
- 15 其於食飲，從人得利，而有惡法，從供養嫉。
- 16 多結怨利，強服法衣，但望飲食，不奉佛教。
- 17 當知是過，養為大畏，寡取無憂，比丘釋心。
- 18 非食命不濟，孰能不揣食，夫立食為先，知是不宜嫉。
- 19 嫉先創己，然後創人，擊人得擊，是不得除。
- 20 寧噉燒石，吞飲洋銅，不以無戒，食人信施。

### 沙門品第三十四，三十有二章

沙門品者，訓以法正，弟子受行，得道解淨。

- 01 端目耳鼻口，身意常守正，比丘行如是，可以免眾苦。
- 02 手足莫妄犯，節言順所行，常內樂定意，守一行寂然。
- 03 學當守口，宥言安徐，法義為定，言必柔軟。
- 04 樂法欲法，思惟安法，比丘依法，正而不費。
- 05 學無求利，無愛他行，比丘好他，不得定意。
- 06 比丘少取，以得無積，天人所譽，生淨無穢。
- 07 比丘為慈，愛敬佛教，深入止觀，滅行乃安。
- 08 一切名色，非有莫惑，不近不憂，乃為比丘。
- 09 比丘扈船，中虛則輕，除婬怒癡，是為泥洹。
- 10 捨五斷五，思惟五根，能分別五，乃渡河淵。
- 11 禪無放逸，莫為欲亂，不吞洋銅，自惱焦形。
- 12 無禪不智，無智不禪，道從禪智，得至泥洹。
- 13 當學入空，靜居止意，樂獨屏處，一心觀法。
- 14 常制五陰，伏意如水，清淨和悅，為甘露味。
- 15 不受所有，為慧比丘，攝根知足，戒律悉持。
- 16 生當行淨，求善師友，智者成人，度苦致喜。
- 17 如衛師華，熟如自墮，釋婬怒癡，生死自解。
- 18 止身止言，心守玄默，比丘棄世，是為受寂。
- 19 當自救身，內與心爭，護身念諦，比丘惟安。

- 20 我自為我，計無有我，故當損我，調乃為賢。
- 21 喜在佛教，可以多喜，至到寂寞，行滅永安。
- 22 儻有少行，應佛教戒，此照世間，如日無暘。
- 23 棄慢無餘憍，蓮華水生淨，學能捨此彼，知是勝於故。
- 24 割愛無戀慕，不受如蓮華，比丘渡河流，勝欲明於故。
- 25 截流自恃，逝心卻欲，仁不割欲，一意猶走。
- 26 為之為之，必強自制，捨家而懈，意猶復染。
- 27 行懈緩者，勞意弗除，非淨梵行，焉致大寶。
- 28 沙門何行，如意不禁，步步著粘，但隨思走。
- 29 袈裟披肩，為惡不損，惡惡行者，斯墮惡道。
- 30 不調難誠，如風枯樹，作自為身，曷不精進。
- 31 息心非別，慢訑無戒，捨貪思道，乃應息心。
- 32 息心非別，放逸無信，能滅眾苦，為上沙門。

### 梵志品第三十五，有四十章

- 梵志品者，言行清白，理學無穢，可稱道士。
- 01 截流而渡，無欲如梵，知行已盡，是謂梵志。
- 02 以無二法，清淨渡淵，諸欲結解，是謂梵志。
- 03 適彼無彼，彼彼已空，捨離貪婬，是謂梵志。
- 04 思惟無垢，所行不漏，上求不起，是謂梵志。
- 05 日照於晝，月照於夜，甲兵照軍，禪照道人，  
佛出天下，照一切冥。
- 06 非剃為沙門，稱吉為梵志，謂能捨眾惡，是則為道人。
- 07 出惡為梵志，入正為沙門，棄我眾穢行，是則為捨家。
- 08 若猗於愛，心無所著，已捨已正，是滅眾苦。
- 09 身口與意，淨無過失，能捨三行，是謂梵志。
- 10 若心曉了，佛所說法，觀心自歸，淨於為水。
- 11 非蔕結髮，名為梵志，誠行法行，清白則賢。
- 12 飾髮無慧，草衣何施，內不離著，外捨何益。
- 13 被服弊惡，躬承法行，閑居思惟，是謂梵志。
- 14 佛不教彼，讚己自稱，如諦不妄，乃為梵志。
- 15 絕諸可欲，不婬其志，委棄欲數，是謂梵志。
- 16 斷生死河，能忍起度，自覺出塹，是謂梵志。
- 17 見罵見擊，默受不怒，有忍辱力，是謂梵志。

- 18 若見侵欺，但念守戒，端身自調，是謂梵志。
- 19 心棄惡法，如蛇脫皮，不為欲污，是謂梵志。
- 20 覺生為苦，從是滅意，能下重擔，是謂梵志。
- 21 解微妙慧，辯道不道，體行上義，是謂梵志。
- 22 棄捐家居，無家之畏，少求寡欲，是謂梵志。
- 23 棄放活生，無賊害心，無所憍惱，是謂梵志。
- 24 避爭不爭，犯而不慍，惡來善待，是謂梵志。
- 25 去姪怒癡，憍慢諸惡，如蛇脫皮，是謂梵志。
- 26 斷絕世事，口無羸言：八道審諦，是謂梵志。
- 27 所世惡法，修短巨細，無取無捨，是謂梵志。
- 28 今世行淨，後世無穢，無習無捨，是謂梵志。
- 29 棄身無猗，不誦異行，行甘露滅，是謂梵志。
- 30 於罪與福，兩行永除，無憂無塵，是謂梵志。
- 31 心喜無垢，如月盛滿，謗毀已除，是謂梵志。
- 32 見癡往來，墮墜受苦，欲單渡岸，不好他語，  
唯滅不起，是謂梵志。
- 33 已斷恩愛，離家無欲，愛有已盡，是謂梵志。
- 34 離人聚處，不墮天聚，諸聚不歸，是謂梵志。
- 35 棄樂無樂，滅無熅燻，健違諸世，是謂梵志。
- 36 所生已訖，死無所趣，覺安無依，是謂梵志。
- 37 已度五道，莫知所墮，習盡無餘，是謂梵志。
- 38 于前于後，乃中無有，無操無捨，是謂梵志。
- 39 最雄最勇，能自解度，覺意不動，是謂梵志。
- 40 自知宿命，本所更來，得要生盡，叡通道玄，  
明如能默，是謂梵志。

### 泥洹品第三十六，三十有〔五〕章

泥洹品者，敘道大歸，恬惓寂滅，度生死畏。

- 01 忍為最自守，泥洹佛稱上，捨家不犯戒，息心無所害。
- 02 無病最利，知足最富，厚為最友，泥洹最快。
- 03 飢為大病，行為最苦，已諦知此，泥洹最樂。
- 04 少往善道，趣惡道多，如諦知此，泥洹最安。
- 05 從因生善，從因墮惡，由因泥洹，所緣亦然。
- 06 麋鹿依野，鳥依虛空，法歸其報，真人歸滅。

- 07 始無如不，始不如無，是為無得，亦無有思。
- 08 心難見習可睹，覺欲者乃具見，無所樂為苦際，在愛欲為增痛。
- 09 明不清淨能御，無所近為苦際，見有見聞有聞，念有念識有識。
- 10 睹無著亦無識，一切捨為得際，除身想滅痛行，識已盡為苦竟。
- 11 猗則動虛則淨，動非近非有樂，樂無近為得寂，寂已寂已往來。
- 12 來往絕無生死，生死斷無此彼，此彼斷為兩滅，滅無餘為苦除。
- 13 比丘有世生，有有有作行，有無生無有，無作無所行。
- 14 夫唯無念者，為能得自致，無生無復有，無作無行處。
- 15 生有作行者，是為不得要，若已解不生，不有不作行。
- 16 則生有得要，從生有已起，作行致死生，為開為法果。
- 17 從食因緣有，從食致憂樂，而此要滅者，無復念行跡，  
諸苦法已盡，行滅湛然安。
- 18 比丘吾已知，無復諸入地，無有虛空入，無諸入用入。
- 19 無想不想入，無今世後世，亦無日月想，無往無所懸。
- 20 我已無往反，不去而不來，不沒不復生，是際為泥洹。
- 21 如是像無像，苦樂為以解，所見不復恐，無言言無疑。
- 22 斷有之射箭，邁愚無所猗，是為第一快，此道寂無上。
- 23 受辱心如地，行忍如門闕，淨如水無垢，生盡無彼受。
- 24 利勝不足恃，雖勝猶復苦，當自求去勝，已勝無所生。
- 25 畢故不造新，厭胎無姪行，種燋不復生，意盡如火滅。
- 26 胞胎為穢海，何為樂姪行，雖上有善處，皆莫如泥洹。
- 27 悉知一切斷，不復著世間，都棄如滅度，眾道中斯勝。
- 28 佛以現諦法，智勇能奉持，行淨無瑕穢，自知度世安。
- 29 道務先遠欲，早服佛教戒，滅惡極惡際，易如鳥逝空。
- 30 若已解法句，至心體道行，是度生死岸，苦盡而無患。
- 31 道法無親疏，正不問羸強，要在無識想，結解為清淨。
- 32 上智饜腐身，危跪非實真，苦多而樂少，九孔無一淨。
- 33 慧以危貿安，棄猗脫眾難，形腐銷為沫，慧見捨不貪。
- 34 觀身為苦器，生老病無痛，棄垢行清淨，可以獲大安。
- 35 依慧以卻邪，不受漏得盡，行淨致度世，天人莫不禮。

### 生死品第三十七，十有八章

生死品者，說諸人魂，靈亡神在，隨行轉生。

- 01 命如果待熟，常恐會零落，已生皆有苦，孰能致不死。

- 02 從初樂恩愛，可姪入泡影，受形命如電，晝夜流難止。
- 03 是身為死物，精神無形法，假令死復生，罪福不敗亡。
- 04 終始非一世，從癡愛久長，自此受苦樂，身死神不喪。
- 05 身四大為色，識四陰曰名，其情十八種，所緣起十二。
- 06 神止凡九處，生死不斷滅，世間愚不聞，蔽闇無天眼。
- 07 自塗以三垢，無目意妄見，謂死如生時，或謂死斷滅。
- 08 識神造三界，善不善五處，陰行而默到，所往如響應。
- 09 欲色不色有，一切因宿行，如種隨本像，自然報如意。
- 10 神以身為名，如火隨形字，著燭為燭火，隨炭草糞薪。
- 11 心法起則起，法滅而則滅，興衰如雨雹，轉轉不自識。
- 12 識神走五道，無一處不更，捨身復受身，如輪轉著地。
- 13 如人一身居，去其故室中，神以形為廬，形壞神不亡。
- 14 精神居形軀，猶雀藏器中，器破雀飛去，身壞神逝生。
- 15 性癡淨常想，樂身想疑想，嫌望非上要，佛說是不明。
- 16 一本二展轉，三垢五彌廣，諸海十三事，淵銷越度歡。
- 17 三事斷絕時，知身無所直，命氣熅煖識，捨身而轉逝。
- 18 當其死臥地，猶草無所知，觀其狀如是，但幻而愚貪。

### 道利品第三十八，有〔二十章〕

道利品者，君父師行，開示善道，率之以正。

- 01 人知奉其上，君父師道士，信戒施聞慧，終吉所生安。
- 02 宿命有福慶，生世為人尊，以道安天下，奉法莫不從。
- 03 王為臣民長，常以慈愛下，身率以法戒，示之以休咎。
- 04 處安不忘危，慮明福轉厚，福德之反報，不問尊以卑。
- 05 夫為世間將，修正不阿枉，心調勝諸惡，如是為法王。
- 06 見正能施惠，仁愛好利人，既利以平均，如是眾附親。
- 07 如牛厲渡水，導正從亦正，奉法心不邪，如是眾普安。
- 08 勿妄燒神象，以招苦痛患，惡意為自煞，終不至善方。
- 09 戒德可恃怙，福報常隨己，見法為人長，終遠三惡道。
- 10 戒慎除苦畏，福德三界尊，鬼龍邪毒害，不犯持戒人。
- 11 無義不誠信，欺妄好鬥諍，當知遠離此，近愚興罪多。
- 12 仁賢言誠信，多聞戒行具，當知親附此，近智誠善多。
- 13 善言不守戒，志亂無善行，雖身處潛隱，是為非學法。
- 14 美說正為上，法說為第二，愛說可彼三，誠說不欺四。

- 15 無便獲利刃，自以剋其身，愚學好妄說，行牽受幸戾。
- 16 貪婬瞋恚癡，是三非善本，身以斯自害，報由癡愛生。
- 17 有福為天人，非法受惡形，聖人明獨見，常善承佛令。
- 18 戒德後世業，以作福追身，天人稱譽善，心正無不安。
- 19 為惡不念止，日縛不自悔，命逝如川流，是恐宜守戒。
- 20 今我上體首，白生為被盜，已有天使召，時正宜出家。

### 吉祥品第三十九，十有九章

吉祥品者，修己之術，去惡就善，終厚景福。

- 01 佛尊過諸天，如來常現義，有梵志道士，來問何吉祥。
- 02 於是佛愍傷，為說真有要，已信樂正法，是為最吉祥。
- 03 若不從天人，希望求僥倖，亦不禱祠神，是為最吉祥。
- 04 友賢擇善居，常先為福德，敕身從真正，是為最吉祥。
- 05 去惡從就善，避酒知自節，不婬于女色，是為最吉祥。
- 06 多聞如戒行，法律精進學，修己無所爭，是為最吉祥。
- 07 居孝事父母，治家養妻子，不為空之行，是為最吉祥。
- 08 不慢不自大，知足念反復，以時誦習經，是為最吉祥。
- 09 所聞常以忍，樂欲見沙門，每講輒聽受，是為最吉祥。
- 10 持齋修梵行，常欲見賢聖，依附明智者，是為最吉祥。
- 11 以信有道德，正意向無疑，欲脫三惡道，是為最吉祥。
- 12 等心行布施，奉諸得道者，亦敬諸天人，是為最吉祥。
- 13 常欲離貪欲，愚癡瞋恚意，能習誠道見，是為最吉祥。
- 14 若以棄非務，能勤修道用，常事於可事，是為最吉祥。
- 15 一切為天下，建立大慈意，修仁安眾生，是為最吉祥。
- 16 欲求吉祥福，當信敬於佛，欲求吉祥福，當聞法句義。
- 17 欲求吉祥福，當供養眾僧，戒具清淨者，是為最吉祥。
- 18 智者居世間，常習吉祥行，自致成慧見，是為最吉祥。
- 19 梵志聞佛教，心中大歡喜，即前禮佛足，歸命佛法眾。

※※※※※※※※※※※※※※※※※※※※※※※※※※※※※※

## 《法句經》選集

# 《法句譬喻經》39 品

法炬、法立譯

林崇安編，內觀教育基金會出版

【內觀教育版】2004

法句譬喻經卷第一

無常品第一

### 【1】

- (1) 昔者天帝釋，五德離身，自知命盡，當下生世間，在陶作家受驢胞胎。何謂五德？一者身上光滅，二者頭上華萎，三者不樂本坐，四者腋下汗臭，五者塵土著身，以此五事自知福盡，甚大愁憂，自念：三界之中，濟人苦厄，唯有佛耳。於是奔馳，往到佛所。
- (2) 時佛在耆闍崛山石室中，坐禪入普濟三昧。
- (3) 天帝見佛，稽首作禮，伏地至心三自歸命佛、法、聖眾，未起之間，其命忽出，便至陶家驢母腹中作子。
- (4) 時驢自解走瓦坏間，破壞坏器，其主打之，尋時傷胎，其神即還入故身中，五德還備，復為天帝。
- (5) 佛三昧覺，讚言：善哉天帝！能於殞命之際，歸命三尊，罪對已畢，不更勤苦。
- (6) 爾時世尊以偈頌曰：

所行非常，謂興衰法，夫生輒死，此滅為樂。

譬如陶家，埏埴作器，一切要壞，人命亦然。

- (7) 帝釋聞偈，知無常之要，達罪福之變，解興衰之本，遵寂滅之行，歡喜奉受，得須陀洹道。

### 【2】

- (1) 昔佛在舍衛國精舍中，為諸天、人、龍、鬼說法。

- (2) 時國王波斯匿大夫人，年過九十，卒得重病，醫藥望差，遂便喪亡。
- (3) 王及國臣如法葬送，遷神墳墓，葬送畢訖，還過佛所，脫服跣襪，前禮佛足。
- (4) 佛命令坐而問之曰：王所從來，衣羸形異，何所施為也？
- (5) 王稽首曰：國大夫人年過九十，間得重病，奄便喪亡，遣送靈柩，遷葬墳墓，今始來還，過覲聖尊。
- (6) 佛告王曰：自古至今，大畏有四，生則老枯，病無光澤，死則神去，親屬別離，是謂為四。不與人期，萬物無常，難得久居，一日過去，人命亦然，如五河流，晝夜無息，人命駛疾，亦復如是。
- (7) 於是世尊即說偈言：

如河駛流，往而不返，人命如是，逝者不還。

- (8) 佛告大王：世皆有是，無長存者，皆當歸死，無有脫者，往昔國王、諸佛、真人、五通仙士，亦皆過去，無能住者，空為悲感，以殞軀形，夫為孝子，哀愍亡者，為福為德，以歸流之，福祐往追，如餉遠人。
- (9) 佛說是時，王及群臣莫不歡喜，忘憂除患，諸來一切，皆得道跡。

### 【3】

- (1) 昔佛在羅閱祇竹園中，與諸弟子入城受請，說法畢訖，晡時出城，道逢一人驅大群牛，放還入城，肥飽跳騰，轉相舐觸。
- (2) 於是世尊即說偈言：

譬人操杖，行牧食牛，老死猶然，亦養命去。  
千百非一，族姓男女，貯聚財產，無不哀喪。  
生者日夜，命自攻削，壽之消盡，如[榮-木+巾][雨/井]水。

- (3) 佛到竹林洗足卻坐，阿難即前，稽首問言：世尊，向者道中，說此三偈，不審其義？願蒙開化。
- (4) 佛告阿難：汝見有人驅放群牛不？唯然見之。

- (5) 佛告阿難，此屠家群牛，本有千頭，屠兒日日遣人出城，求好水草養令肥長，擇取肥者日牽殺之，殺之死者過半，而餘者不覺，方相舐犢，跳騰鳴吼，傷其無智，故說偈耳。
- (6) 佛語阿難：何但此牛，世人亦爾，計於吾我，不知非常，饕餮五欲，養育其身，快心極意，更相殘賊，無常宿對，卒至無期，矇矓不覺，何異於此也。
- (7) 時坐中有貪養比丘二百人，聞法自勵，逮六神通，得阿羅漢，眾坐悲喜，為佛作禮。

#### 【4】

- (1) 昔佛在舍衛國祇樹給孤獨園，為諸弟子說法。
- (2) 時有梵志女，年十四五，端正聰辯，父甚憐愛，卒得重病，即便喪亡。田有熟麥，為野火所燒。梵志得此，憂惱愁憤，失意恍惚，譬如狂人，不能自解，傳聞人說：佛為大聖，天人之師，演說經道，忘憂除患。
- (3) 於是梵志往到佛所，作禮長跪，白佛言：素少子息，唯有一女，愛以忘憂，卒得重病，捨我喪亡，天性悼愍，情不自勝，唯願世尊，垂神開化，釋我憂結。
- (4) 佛告梵志：世有四事，不可得久，何謂為四？一者有常必無常，二者富貴必貧賤，三者合會必別離，四者強健必當死。於是世尊即說偈言：

常者皆盡，高者必墮，合會有離，生者有死。

- (5) 梵志聞偈，心即開解，願作比丘，鬚髮自墮，即成比丘，重惟非常，得羅漢道。

#### 【5】

- (1) 昔佛在羅閱祇耆闍崛山中，時城內有姪女人，名曰蓮華，姿容端正，國中無雙，大臣子弟莫不尋敬。
- (2) 爾時蓮華善心自生，欲棄世事，作比丘尼，即詣山中，就到佛所，未至中道，有流泉水，蓮華飲水澡手，自見面像，容色紅輝，頭髮紺青，形貌方正，挺特無比，心自悔曰：人生於世，形體如此，云何自棄，行作沙門？且當順時，快我私情。念已

便還。

- (3) 佛知蓮華應當化度，化作一婦人，端正絕世，復勝蓮華數千萬倍，尋路逆來。
- (4) 蓮華見之，心甚愛敬，即問化人：從何所來？夫主、兒子、父兄中外皆在何許？云何獨行而無將從？
- (5) 化人答言：從城中來欲還歸家，雖不相識，寧可共還，到泉水上，坐息共語不？蓮華言：善。
- (6) 二人相將還到水上，陳意委曲。
- (7) 化人睡來，枕蓮華膝眠，須臾之頃，忽然命絕，膨脹臭爛，腹潰蟲出，齒落髮墮，肢體解散。
- (8) 蓮華見之，心大驚怖，云何好人，忽便無常，此人尚爾，我豈久存？故當詣佛，精進學道。即至佛所，五體投地，作禮已訖，具以所見，向佛說之。
- (9) 佛告蓮華：人有四事，不可恃怙，何謂為四？一者少壯會當歸老，二者強健會當歸死，三者六親聚歡娛樂會當別離，四者財寶積聚要當分散，於是世尊即說偈言：

老則色衰，所病自壞，形敗腐朽，命終其然。  
是身何用，洎漏臭處，為病所困，有老死患。  
嗜欲自恣，非法是增，不見聞變，壽命無常。  
非有子恃，亦非父兄，為死所迫，無親可怙。

- (10) 蓮華聞法，欣然解釋，觀身如化，命不久停，唯有道德，泥洹永安，即前白佛，願為比丘尼。
- (11) 佛言：善哉！頭髮自墮，即成比丘尼，思惟止觀，即得羅漢。諸在坐者，聞佛所說，莫不歡喜。

## 【6】

- (1) 昔佛在王舍城竹園中說法。
- (2) 時有梵志兄弟四人，各得五通，卻後七日皆當命盡，自共議言：五通之力，反覆天地，手捫日月，移山住流，靡所不能，寧當不能避此死對？
- (3a) 一人言：吾入大海，上不出現，下不至底，正處其中，無常殺鬼，安知我處？

- (3b) 一人言：吾入須彌山中，還合其表，令無際現，無常殺鬼，安知吾處？
- (3c) 一人言：吾當輕舉，隱虛空中，無常殺鬼，安知吾處？
- (3d) 一人言：吾當藏入大市之中，無常殺鬼，趣得一人，何必求吾也？
- (4) 四人議訖，相將辭王：吾等壽算，餘有七日，今欲逃命，冀當得脫，還乃覲省，唯願進德。於是別去，各到所在，七日期滿，各以命終，猶果熟落。
- (5) 市監白王：有一梵志卒死市中。
- (6) 王乃悟曰：四人避對，一人已死，其餘三人豈得獨免？
- (7) 王即嚴駕，往至佛所，作禮卻坐，王白佛言：近有梵志兄弟四人，各獲五通，自知命盡，皆共避之，不審今者皆能得脫不？
- (8) 佛告大王：人有四事，不可得離，何謂為四？一者在中陰中，不得不受生，二者已生，不得不受老，三者已老，不得不受病，四者已病，不得不受死，於是世尊即說偈言：

非空非海中，非入山石間，無有地方所，脫之不受死。  
 是務是吾作，當作令致是，人為此躁擾，履踐老死憂。  
 知此能自靜，如是見生盡，比丘厭魔兵，從生死得度。

- (9) 王聞佛言歎曰：善哉！誠如尊教，四人避對，一人已死，祿命有分，餘復然矣。群臣從官莫不信受。

## 教學品 = 護戒品第二

### 【7】

- (1) 昔佛在舍衛國祇樹精舍。
- (2) 佛告諸比丘：當勤修道，除棄陰蓋，心明神定，可免眾苦。
- (3) 有一比丘志不明達，飽食入室，閉房靜眠，愛身快意，不觀非常，冥冥懈怠，無復晝夜，卻後七日其命將終。
- (4) 佛愍傷之，懼墮惡道，即入其室，彈指覺曰：

咄起何為寐，蝸螺蚌蠹類，隱蔽以不淨，迷惑計為身。  
 焉有被斫瘡，心如嬰病痛，邁于眾厄難，而反為用眠。

思而不放逸，為仁學仁跡，從是無有憂，常念自滅意。  
正見學務增，是為世間明，所生福千倍，終不墮惡道。

- (5) 比丘聞偈，即便驚寤，見佛親誨，加敬悚息，即起稽首，為佛作禮。
- (6) 佛告比丘：汝寧自識本宿命不？
- (7) 比丘對曰：陰蓋所覆，實不自識也。
- (8) 佛告比丘：昔維衛佛時，汝曾出家，貪身利養，不念經戒，飽食卻眠，不念非常，命終魂神，生螭蟲中，積五萬歲，壽盡復為螺蚌之蟲、樹中蠹蟲，各五萬歲，此四品蟲生長冥中，貪身愛命，樂處幽隱，以冥為家，不喜光明，一眠之時，百歲乃覺，纏綿罪網，不求出要，今始罪畢，得為沙門，如何睡眠，不知厭足？
- (9) 於是比丘重聞宿緣，慚怖自責，五蓋雲除，即得羅漢。

## 【8】

- (1) 昔佛在舍衛國祇樹給孤獨園，與諸天人、四輩說法。
- (2) 時有一年少比丘，為人頑愚，質直疏野，未解道要，情意興盛，思想於欲，陽氣隆盛，不能自制，以此為惱，不獲度世，坐自思惟：有根斷者，然後清淨可得道跡。即至檀越家，從之借斧，還房閉戶，脫去衣服，坐木板上，欲自斫陰，正坐此陰，令我勤苦，經歷生死無央數劫，三塗六趣皆由色欲，不斷此者無緣得道。
- (3) 佛知其意愚癡乃爾，道從制心，心是根源，不知當死自害墮罪，長受苦痛。於是世尊往入其房，即問比丘：欲作何等？
- (4) 放斧著衣，禮佛自陳：學道日久，未解法門，每坐禪定，垂當得道，為欲所蓋，陽氣隆盛，意惑目冥，不覺天地，諦自責念，事皆由此，是以借斧，欲斷制之。
- (5) 佛告比丘：卿何愚癡，不解道理，欲求道者先斷其癡，然後制心，心者善惡之根源，欲斷根者先制其心，心定意解，然後得道，於是世尊即說偈言：

學先斷母，率君二臣，廢諸營從，是上道人。

- (6) 佛告比丘：十二因緣以癡為本，癡者眾罪之源，智者眾行之本，先當斷癡，然後意定。
- (7) 佛說是已，比丘慚愧即自責言：我為愚癡，迷惑來久，不解古典，使如此耳，今佛所說，甚為妙哉！內思正定，安般守意，制心伏情，杜閉諸欲，即得定意，在於佛前逮得應真。

### 【9】

- (1) 昔佛在羅閱祇國靈鷲山中，為諸天人、國王、大臣說甘露法。
- (2) 有一比丘剛猛勇健，佛知其意，遣至山後鬼神谷中，令樹下坐，數息求定，知息長短，安般守意，斷求滅苦，可得泥洹。
- (3) 比丘受教往至谷中，欲坐定意，但聞山中鬼神語聲，不見其形，但有音聲，悚息怖懼，不能自寧，意欲悔還，即自念言：居家大富宗族，又強出家學道，獨見安處，鬼神深山，既無伴侶，又無行人，但有諸鬼數來怖人。思惟如是。
- (4) 未去之間，於是世尊往到其邊，坐一樹下而問之曰：汝獨在此，將無怖懼耶？
- (5) 比丘稽首白言：初未曾入山，在此實憂。
- (6) 須臾之間，有一野象王來，在邊倚一樹臥，心獨歡喜，遠離諸象，一何快哉。
- (7) 佛知象意告比丘曰：汝寧知是象所由來不？對曰：不審。
- (8) 佛告比丘：此象眷屬大小五百餘頭，厭患小象，捨來至此，倚樹而臥，自念得離恩愛牢獄，一何快哉。象是畜生，猶思閑靜，況汝捨家，欲求度世，方以獨自欲求伴侶，愚冥伴侶，多所傷敗，獨住無對，亦無謀議，寧獨修道，不用愚伴。於是世尊即說偈言：

學無朋類，不得善友，寧獨守善，不與愚偕。  
樂戒學行，奚用伴為，獨善無憂，如空野象。

- (9) 佛說是時，比丘意解，內思聖教，即得應真。谷中鬼神亦皆聞解，為佛弟子，受誓誡敕，不復侵民。佛與比丘共還精舍。

### 【10】

- (1) 昔佛在舍衛國祇桓精舍，為諸天人宣演經法。

- (2) 時羅閱祇國，有二新學比丘，欲往見佛。二國中間，曠無人民，于時旱熱，泉水枯竭，二人飢渴，熱喝呼吸，故泉之中，有升餘水而有細蟲，不可得飲。二人相對曰：故從遠來，欲望見佛，不圖今日沒命於此也。
- (3a) 一人言曰：且當飲水以濟吾命，進前見佛焉，知其餘也。
- (3b) 一人答曰：佛之明戒，仁慈為首，殘生自活，見佛無益，寧守戒而死，不犯戒而生也。
- (4a) 一人即起，極意快飲，於是進路。
- (4b) 一人不飲，遂致殞命，即生第二忉利天上，思惟自省，即識宿命，持戒不犯，今來生此，信哉福報，其不遠矣，即持華香，下到佛所，為佛作禮，卻住一面。
- (5) 其飲水者，道路疲頓，經日乃達，見佛神德，至尊巍巍，稽首禮畢，涕泣自陳，我伴一人於彼命終，感其不達，願佛知之。
- (6) 佛言：吾已明矣。佛以手指曰：今此天人則汝伴也，全戒生天，又先至矣。
- (7) 於是世尊披胸示之，汝觀我形，不奉我戒，雖云見我，我不見汝也；去我萬里奉行經戒，此人則為在我目前，於是世尊即說偈言：

學而多聞，持戒不失，兩世見譽，所願者得。  
 學而寡聞，持戒不完，兩世受痛，喪其本願。  
 夫學有二，常親多聞，安諦解義，雖困不耶。

- (8) 於是比丘聞偈慚怖，稽首悔過，嘿思所行。天人聞偈，心意欣悅，逮得法眼，天人眾會莫不奉行。

### 多聞品第三

#### 【11】

- (1) 昔舍衛國有一貧家，夫婦慳惡不信道德。
- (2) 佛愍其愚，現為貧凡沙門，詣門分衛。時夫不在，其婦罵詈無有道理。
- (3) 沙門語曰：吾為道士，乞丐自居，不得罵詈，唯望一食耳。
- (4) 主人婦曰：若汝立死，食尚叵得，況今平健，欲望我食，但稽

留時節，不如早去。

- (5) 於是沙門住立其前，戴眼抒氣，便現死相，身體膨脹，鼻口蟲出，腹潰腸爛，不淨流漫。其婦見此，恐怖失聲，棄而捨走。
- (6) 於是道人忽然捨去，去舍數里坐樹下息。
- (7) 其夫來歸，道中見婦，怪其驚怖，其婦語夫，有一沙門見怖如此。夫大瞋怒，問為所在？婦曰：已去，想亦未遠。夫即執弓，帶刀，尋跡往逐，張弓拔刀，奔走直前，欲斫道人。
- (8) 道人即化作琉璃小城，以自圍遶。
- (9) 其人繞城數匝不能得入，即問道人：何不開門？
- (10) 道人曰：欲使開門，棄汝弓刀。
- (11) 其人自念，當隨其語，若當得入手拳加之。尋棄弓刀，門故不開，復語道人：已棄弓刀，門何不開？
- (12) 道人曰：吾使汝棄心中惡意弓刀耳，非謂手中弓刀也。
- (13) 於是其人，心驚體悸：道人神聖乃知我心。即便叩頭悔過，稽首道人曰：我有弊妻，不識真人，使我興惡，願小垂慈，莫便見捨，今欲將來，勸令修道。即起還歸。
- (14) 其妻問曰：沙門所在？其夫具說神變之德，今者在彼，卿自宜往，改悔滅罪。
- (15) 於是夫妻至道人所，五體悔過，願為弟子，長跪問曰：道人神變聖達乃爾，有琉璃城堅固難踰，志明意定，永無憂患，行何道德，致此神妙？
- (16) 道人答曰：吾博學無厭，奉法不懈，精進持戒，慧不放逸，緣是得道，自致泥洹，於是道人因說偈言：

多聞能持故，奉法為垣牆，精進難踰毀，從是戒慧成。  
多聞令志明，已明智慧增，智則博解義，見義行法安。  
多聞能除憂，能以定為歡，善說甘露法，自致得泥洹。  
聞為知法律，解疑亦見正，從聞捨非法，行到不死處。

- (17) 道人說偈已，現佛光相，洪暉赫奕，照曜天地。夫妻驚愕，精神戰懼，改惡洗心，頭腦打地，壞二十億惡，得須陀洹道。

## 【12】

- (1) 昔佛在拘睢尼國美音精舍，與諸四輩廣說大法。

- (2) 有一梵志道士，智博通達，眾經備舉，無事不貫，貢高自譽，天下無比，求敵而行，無敢應者，晝日執炬，行城市中。
- (3) 人問之曰：何以晝日，執炬而行？
- (4) 梵志答曰：世皆愚冥，目無所見，是以執炬，以照之耳。觀察世間，無敢言者。
- (5) 佛知梵志宿福應度，而行貢高，求勝名譽，不計無常，自恃憍恣，如是當墮太山地獄無央數劫，求出甚難。
- (6) 佛即化作一賢者，居肆上坐，即呼梵志：何為作此？
- (7) 梵志答曰：以眾人冥，晝夜不見明，故執炬火而照之耳。
- (8) 賢者重問梵志：經中有四明法，為知之不？對曰：不審。
- (9) 何謂四明法？一者明於天文地理，和調四時，二者明於星宿，分別五行，三者明於治國，綏化有方，四者明於將兵，固而無失，卿為梵志有此四明法以不？
- (10) 梵志慚愧，棄炬叉手，有不及心。
- (11) 佛知其意，即還復身，光明炳然，晃照天地，便持梵聲，為梵志說偈言：

若多少有聞，自大以憍人，是如盲執燭，照彼不自明。

- (12) 佛說偈已，告梵志曰：冥中之甚，無過於汝，而晝執炬，行入大國，如卿所知，何如一塵？
- (13) 梵志聞之，有慚愧色，即便叩頭，願為弟子。
- (14) 佛即受之，令作沙門，意解妄止，即得應真。

### 【13】

- (1) 昔舍衛國有大長者，名曰須達，得須陀洹；有親友長者名曰好施，不信佛道及諸醫術，時得重病，痿頓著床，宗親知友皆就省問，勸令治病，至死不肯，答眾人言：吾事日月，忠孝君父，畢命於此，終不改志。
- (2) 須達語曰：吾所事師，號曰為佛，神德廣被，見者得福，可試請來，說經咒願，聽其所說，言行進趣，何如餘道，事之與不，隨卿所志，以卿病久，不時除差，勸卿請佛，冀蒙其福。
- (3) 好施曰：佳！卿便為吾，請佛及眾弟子。
- (4) 須達即便請佛及僧，往詣其門。佛放光明，內外通徹。

- (5) 長者見光，欣然身輕。
- (6) 佛前就坐，慰問長者：所病何如？昔事何神？作何療治？
- (7) 長者白佛：奉事日月、君長先人，恭敬齋戒，祈請萬端，得病經時，未蒙恩祐，醫藥針灸，居門所忌，經戒福德，素所不知，先人以來，守死於此。
- (8) 佛告長者：人生世間，橫死有三。有病不治為一橫死，治而不慎為二橫死，憍恣自用，不達逆順為三橫死。如此病者，非日月天地、先人君父所能除遣。當以明道，隨時安濟，一者四大寒熱，當須醫藥，二者眾邪惡鬼，當須經戒，三者奉事賢聖，矜濟窮厄，德威神祇福祐群生，以大智慧消去陰蓋，奉行如此，現世安吉，終無枉橫，戒慧清淨，世世常安，於是世尊即說偈言：

事日為明故，事父為恩故，事君以力故，聞故事道人。  
 人為命事豎，欲勝依豪強，法在智慧處，福行世世明。  
 察友在為務，別伴在急時，觀妻在房樂，欲知智在說。  
 為能師見道，解疑令學明，亦與清淨本，能奉持法藏。  
 聞能今世利，妻子昆弟友，亦致後世福，積聞成聖智。  
 能攝為解義，解則戒不穿，受法猗法者，從是疾得安。  
 是能散憂患，亦除不祥衰，欲得安穩吉，當事多聞者。

- (9) 於是長者聞佛說法，心意疑結，霍然雲除，良醫進療，委心道德，四大安靜，眾患消除，如飲甘露，中外怡懌，身安心定，得須陀洹道，宗室國人，莫不敬奉。

#### 【14】

- (1) 昔羅閱祇國南有大山，去城二百里，南土諸國路由此山，山道深邃，有五百賊依嶮劫人，後遂縱橫，所害狼藉，眾賈被毒，王路不通，國王追討不能擒獲。
- (2) 時佛在國，哀愍群生，念彼賊輩不知罪福，世有如來而目不睹，法鼓日震而耳不聞，吾不往度如石沈淵，化作一人，著好衣服，乘馬帶劍，手執弓矢，鞍勒嚴飾，金銀莊校，以明月珠垂絡馬體，跨馬鳴絃，往入山中。
- (3) 群賊見之，以為成事，作賊積年，未有此便，卵之投石，與此

何異？群賊齊頭住前圍繞，挽弓拔刀，諍欲剝脫。

- (4) 於是化人舉弓一發，使五百賊各被一箭，以刀指擬各被一瘡，瘡重箭深，即皆顛倒，五百群賊宛轉臥地，叩頭歸降，為是何神威力乃爾？乞蒙原赦，以活微命，願時拔箭使瘡除愈，今者瘡痛不可堪忍。
- (5) 化人答曰：是瘡不痛，箭不為深，天下瘡重，莫過於憂，殘害之甚，莫過於愚，汝懷貪得之憂、殘殺之愚，刀瘡毒箭終不可愈，此二事者，根本深固，勇力壯士所不能拔，唯有經戒，多聞慧義，以此明道療治心病，拔除憂愛、愚癡貢高，制伏剛強豪富貪欲，積德學慧乃可得除，長獲安穩。
- (6) 於是化人即現佛身，相好挺特，金顏英妙，即說偈言：

斫瘡無過憂，射箭無過愚，是壯莫能拔，唯從多聞除。  
盲者從得眼，闇者從得燭，示導世間人，如目將無目。  
是故可捨癡，離慢豪富樂，務學事聞者，是名積聚德。

- (7) 於是五百人見佛光相，重聞此偈，叩頭歸命，剋心悔過，刀瘡毒箭自然除愈，歡喜心開，即受五戒，國界安寧，莫不歡喜。

## 篤信品第四

### 【15】

- (1) 昔者舍衛國東南有大江，水既深而廣，有五百餘家居在岸邊，未聞道德度世之行，習於剛強欺詐為務，貪利自恣快心極意。
- (2) 世尊常念其應度者，當往度之，知此諸家福應當度，於是世尊往至水邊，坐一樹下，村人見佛，光相奇異，莫不驚肅，皆往禮敬，或拜或揖，問訊起居。
- (3) 佛命令坐，為說經法，眾人聞之而心不信，習於欺怠，不信真言。
- (4) 佛便化作一人從江南來，足行水上，正沒其踝，來至佛前，稽首禮佛，眾人見之，莫不驚怪，問化人曰：吾等先人以來，居此江邊，未曾聞人行水上者，卿是何人，有何道術履水不沒？願聞其意。
- (5) 化人答曰：吾是江南愚直之人，聞佛在此，貪樂道德，至南岸

邊，不時得度，問彼岸人：水為深淺？彼人見語：水可齊蹠，何不涉渡？吾信其言，便爾來過，無他異術。

- (6) 佛時讚言：善哉善哉！夫執信誠諦，可度生死之淵，數里之江，何足為奇？於是世尊即說偈言：

信能渡淵，攝為船師，精進除苦，慧到彼岸。  
士有信行，為聖所譽，樂無為者，一切縛解。  
信乃得道，法致滅度，從聞得智，所到有明。  
信之與戒，慧意能行，健夫度慧，從是脫淵。

- (7) 於是村人聞佛所說，見信之證，心開信堅，皆受五戒，為清信士，明信日修，法教普聞。

#### 【16】

- (1) 昔佛在世時，有大長者名修陀羅，財富無數，信向道德，自誓常以臘月八日請佛及僧，終身子孫，奉行不廢。長者亡時，囑兒勿廢。兒名比羅陀，後日漸貧，居無所有，臘月已至，無有供辦，愁感不樂。
- (2) 佛遣目連往問比羅陀：汝父直月欲至，當設何計？
- (3) 比羅陀答言：亡父教令，不敢違之，唯願世尊勿見忽棄也。八日中時，迴光臨眄。
- (4) 目連還白如是。
- (5) 比羅陀即將妻子至外家，質取百兩金，還舍供辦，一切具足。佛與千二百五十眾僧，往詣其舍，坐畢行水，下食澡竟，還於精舍。
- (6) 比羅陀歡喜，不敢悔恨，其日夜半，諸故藏中，自然寶物悉滿如故。比羅陀夫婦明旦見之，喜而且懼，懼官見問所從得此？夫妻共議：當往問佛，尋到佛所，具白如此。
- (7) 佛告比羅陀：安意快用，勿有疑難，汝之履信，不違父教，持戒慚愧，沒命不二，聞、施、慧道七財滿具，福德所致，非為災變，智者能行，不問男女所生之處，福應自然。
- (8) 於是世尊，即說偈言：

信財戒財，慚愧亦財，聞財施財，慧為七財。

從信守戒，常淨觀法，慧而履行，奉教不忘。  
生有此財，不問男女，終已不貧，賢者識真。

- (9) 比羅陀聞佛所說，益加篤信，稽首佛足，歡喜還家，具宣佛教，誨其妻子，遂相承繼，皆得道跡。

## 戒慎品第五

### 【17】

- (1) 昔波羅奈國有山，去城四五十里，有五沙門處山學道，晨旦出山，人間乞食，食訖還山，晚暮乃到，往還疲極，不堪坐禪思惟正定，歷年如是，不能得道。
- (2) 佛愍念之，勞而無獲，化作一道人往到其所，問諸道人：隱居修道，得無勞倦？
- (3) 諸沙門言：吾等在此，去城既遠，四大之身當須飲食，日日供給，往還疲勞，經年歷歲，勤苦竟已，晝日往返，暮輒疲頓，不暇復得修道，為當正爾畢命而已。
- (4) 道人語曰：夫為道者以戒為本，攝心為行，賤形貴真，捐棄軀命，食以支形，守意正定，內學止觀，滅意得道，養身順情，安得免苦，願諸道人明日莫行，吾當供養，使諸道人休息一日。
- (5) 時五沙門意大歡喜，怪未曾有，安心定意，不復憂行，明日日中，此化道人送食而來，食訖安和，心意憐怕。
- (6) 於是化人為說偈言：

比丘立戒，守攝諸根，食知自節，寤意令應。  
以戒降心，守意正定，內學止觀，無忘正智。  
明哲守戒，內思正智，行道如應，自淨除苦。

- (7) 化道人說此偈已，顯現佛身，光相之容，於是五沙門精神震疊，咸思惟戒，即得阿羅漢道。

## 惟念品第六

### 【18】

- (1) 昔佛在世時，弗加沙王與瓶沙王親友。
- (2) 弗加沙王未知佛道，作七寶華以遺瓶沙。瓶沙王得之，轉奉上佛，白佛言：弗加沙王與我為友，遺我此華，今已上佛，願令彼王心開意解，見佛聞法，奉敬聖眾，當以何物，以報所遺？
- (3) 佛告瓶沙：寫十二因緣經，送持與之，彼王得經，心必信解。
- (4) 即寫經卷，別書文曰：卿以寶華見遺，今以法華相上，詳思其義，果報深美，到便誦習，以同道味。
- (5) 弗加沙王得經讀之，尋省反覆，宣然信解，喟然嘆曰：道化真妙，精義安神國榮，五欲憂惱之元，累劫習迷，始今乃寤，顧視流俗，無可貪樂。
- (6) 即召群臣國付太子，便自剃頭，行作沙門，法服持鉢，詣羅閱祇城外，在陶家窯中寄宿，明日當入城分衛，食訖當至佛所奉受經戒。
- (7) 佛以神通知弗加沙明日食時，其命將終，故從遠來不得見佛，又不聞經甚可憐愍，於是世尊化作沙門，往至陶家，欲求寄宿。
- (8) 陶家語曰：向有一沙門，在彼窯中可往共止宿也。
- (9) 把草入窯，坐於一面，問弗加沙：從何所來？師為是誰？以何因緣行作沙門？為見佛未？
- (10) 弗加沙言：吾未見佛，聞十二因緣，便作沙門，明日入城乃分衛已，當往見佛耳。
- (11) 化沙門言：人命危脆，朝夕有變，無常宿對，卒至無期，但當觀身四大所由，合成散滅，各還其本，思惟覺意，空淨無想，專念三尊，布施戒德，能知無常，見佛無異，方念明日，種無益想、
- (12) 時化沙門即說偈言：

夫人得善利，乃來自歸佛，是故當晝夜，常念佛法眾。  
已知自覺意，是為佛弟子，常當晝夜念，佛與法及眾。  
念身念非常，念戒布施德，空不願無想，晝夜當念是。
- (13) 時化沙門在於窯中，為弗加沙說非常之要，弗加沙王思惟意定，

即得阿那含道。

- (14) 佛知已解，為現佛身，光明相好。弗加沙王驚喜踊躍，稽首作禮。佛重告之曰：罪對無常，畢故莫恐。弗加沙王言：敬奉尊教。忽然別去。
- (15) 明日食時，弗加沙王入城分衛，於城門中逢新產犍牛護犢，舐殺弗加沙王，潰腹命終，即生阿那含天。
- (16) 佛遣諸弟子耶旬起塔。佛語諸弟子：罪對之根，不可不慎。

## 慈仁品第七

### 【19】

- (1) 昔佛在羅閱祇。去國五百里有山，山中有一家，有百二十二人生長山藪，殺獵為業，衣皮食肉，初不田作，奉事鬼神，不識三尊。
- (2) 佛以聖智，明其應度，往詣其家，坐一樹下，男子行獵，唯有婦女在，見佛光相，明照天地，山中木石皆變金色，大小驚喜，知佛神人，皆往禮拜，供施坐席。
- (3) 佛為諸母人說殺生之罪，行慈之福，恩愛一時，會有離別。
- (4) 諸母人聞經歡喜，前白佛言：山民貪害以肉為食，欲設微供，願當納受。
- (5) 佛告諸母人：諸佛之法不以肉食，吾已食來不須復辦，因告之曰：夫人生世所食無數，何以不作有益之食，而殘害群生以自濟活？死墮惡道損而無益，人食五穀，當愍眾生蠕動之類，莫不貪生，殺彼活已，殃罪不朽，慈仁不殺，世世無患。
- (6) 於是世尊即說偈言：

為仁不殺，常能攝身，是處不死，所適無患。  
不殺為仁，慎言守心，是處不死，所適無患。  
垂拱無為，不害眾生，無所燒惱，是應梵天。  
常以慈哀，淨如佛教，知足知止，是度生死。

- (7) 佛說偈已，男子獵還，諸婦聽經不復行迎，其夫驚疑，怪不如常，棄肉來歸，謂有變故，至見諸婦皆坐佛前，叉手聽經，瞋恚聲張，欲圖毀佛。

- (8) 諸婦諫曰：此是神人，勿興惡意也。即各悔過，為佛作禮。
- (9) 佛重為說不殺之福，殘害之罪。
- (10) 夫主意解，長跪白佛：吾等生長深山，以殺獵自居，罪過累積，當行何法，得免重殃？
- (11) 於是世尊即說偈言：

履仁行慈，博愛濟眾，有十一譽，福常隨身。  
臥安覺安，不見惡夢，天護仁愛，不毒不兵。  
水火不喪，所在得利，死昇梵天，是為十一。

- (12) 佛說偈已，男女大小百二十二人，歡欣信受，皆奉持五戒。佛語瓶沙王：給其田地，賜與穀食，仁化廣普，國界安寧。

## 【20】

- (1) 昔有大國王，名和默，處在邊境，未睹三尊聖妙之化，奉事梵志外道妖蠱，舉國奉邪，殺生祭祀，以此為常。
- (2) 時王母病，痿頓著床，使諸醫師，不蒙湯藥，遣諸醫女所在請求，經年歷歲未得除差，更召國內諸婆羅門，得二百人，請入令坐，供設飲食而告之曰：吾大夫人病困經久，不知何故乃使如此，卿等多智，明識相法天地星宿，有何不可具見告示？
- (3) 諸婆羅門言：星宿倒錯，陰陽不調，故使爾耳。
- (4) 王曰：作何方宜，使得除愈？
- (5) 婆羅門言：當於城外，平治淨處，郊祠四山、日月、星宿，當得百頭畜生種種各異類及一少兒，殺以祠天。王自躬身將母至彼，跪拜請命，然後乃差。
- (6) 王即供辦，如其所言，驅人象馬、牛羊百頭，隨道悲鳴，震動天地，從東門出，當就祭壇，殺以祠天。
- (7) 世尊大慈普濟眾生，愍是國王頑愚之甚，云何興惡，殺眾生命，欲救一人？於是世尊將從大眾往到其國，在城東門道路，逢王及婆羅門輩，所驅畜生悲鳴而來。
- (8) 王遙見佛如日初出，如月盛滿，光相炳然，照曜天地，人民見者，莫不愛敬，所驅畜生祭餼之具，皆願求脫。王即前進下車，卻蓋為佛作禮，叉手長跪，問訊世尊。
- (9) 佛命令坐，問欲所至。

- (10) 拱手答言：國大夫人得病經久，良醫神祇無不周遍，今始欲行，解謝星宿四山五嶽，為母請命，冀蒙得差。
- (11) 佛告大王：善聽一言！欲得穀食當行耕種，欲得大富當行布施，欲得長命當行大慈，欲得智慧當行學問，行此四事隨其所種，還得其果，夫富貴之家，不貪貧賤之食，諸天以七寶為宮殿，衣食自然，豈當捨甘露之餐來食麤穢也。祠祀姪亂，以邪為正，殺生求生，去生道遠，殺害眾命，欲救一人，安得如此？
- (12) 於是世尊即說偈言：

若人壽百歲，勤事天下神，象馬用祭祀，不如行一慈。

- (13) 佛說偈時，即放光明，烈照天地，三塗八難，莫不歡喜，各得其所。
- (14) 國王和默聞說妙法，又睹光明，甚大歡喜，即得道跡。病母聞法，五情悅豫，所患消除。二百梵志睹佛光相，重聞其言，慚愧悔過，願為弟子。佛盡受之，皆作沙門，各得如願。
- (15) 王及大臣請佛供養，一月乃去，以法治正，國遂興隆。

## 言語品第八

### 【21】

- (1) 昔弗加沙王入羅閱祇城分衛，於城門中為新產犍牛所舐殺。
- (2) 牛主怖懼，賣牛轉與他人，其人牽牛欲飲之，牛從後復舐殺其主。其主有子，瞋恚取牛殺之，於市賣肉。
- (3) 有田舍人買取牛頭，貫擔持歸，去舍里餘，坐樹下息，以牛頭掛樹枝上，須臾繩斷，牛頭來下，正墮人上，牛角刺人，即時命終。一日之中，凡殺三人。
- (4) 瓶沙王聞之，怪其如此，即與群臣行詣佛所，到作禮畢，卻坐王位，叉手白佛言：大可怪，世尊！一頭犍牛而殺三人，將有變故，願聞其意。
- (5) 佛告瓶沙王：罪對有原，非適今也。王曰：願聞其由。
- (6) 佛言：往昔有賈客三人，到他國治生，寄住孤獨老母舍，應雇舍直，見老母孤獨欺不欲與，伺老母不在，默聲捨去，竟不與直。老母來歸，不見賈客，即問比居，云皆已去。老母瞋恚，

尋後追逐，疲頓乃及，責索舍直。三賈客逆罵詈言：我前已相與，云何復索？同聲共舐不肯與直。老母單弱不能奈何，懊惱咒誓，語三賈客：我今窮厄何忍欺舐於我，願我後世所生之處，若當相值，要當殺汝，正使得道，終不相置也。殺汝乃休，不爾不止。

- (7) 佛語瓶沙王，爾時老母者，今此犍牛是也。三賈客者，弗迦沙等三人為牛所舐殺者是也。
- (8) 於是世尊即說偈言：

惡言罵詈，憍陵蔑人，興起是行，疾怨茲生。  
遜言順辭，尊敬於人，棄結忍惡，疾怨自滅。  
夫士之生，斧在口中，所以斬身，由其惡言。

- (9) 佛說是時，瓶沙王、官屬一切莫不恭肅，願崇善行，作禮而去。

## 雙要品第九

### 【22】

- (1) 昔舍衛國王，名波斯匿，來至佛所，下車卻蓋，解劍脫履，拱手直進，五體投地，稽首足下，長跪白佛：願以來日，於四街道，施設微食，欲使國人，知佛至尊；願令眾生，遠鬼妖蠱，悉奉五戒，以消國患。
- (2) 佛言：善哉！夫為國主，宜有明導，率民以道，求來世福。
- (3) 王曰：至真請退嚴辦。手自為饌，身往奉迎。佛與眾僧，俱至四衢。
- (4) 佛至就座，即行澡水，手自斟酌。佛飯食畢，於四道頭，為王說法，觀者無數。
- (5) 時有兩商人，一人念曰：佛如帝王，弟子猶忠臣，佛陳明法，弟子誦宣。斯王明矣，知佛可尊，屈意奉之。
- (6) 一人念曰：斯王愚哉，爾為國王，將復何求？佛者若牛，弟子猶車，彼牛牽車東西南北，佛亦如是，子有何道而下意奉之？
- (7) 二人俱去，行三十里，亭宿沽酒共飲，平論屬事。其善念者四王護之。其惡念者太山鬼神令酒入腹，如火燒身，出亭路臥，宛轉轍中，晨商人車五百乘轢殺之焉。

- (8) 伴明日求之已然曰：還國見疑殺人取物去不義。輕身委財，逝至他國。國王崩亡，無有太子，讖書云：中土有微人，當王斯土。故王有神馬，任王必屈膝，即具嚴駕神馬印綬，行求國主，觀者數千。商人亦出，國太史曰：彼有黃雲之蓋，斯王者氣也。神馬屈膝舐商人足。群臣豫作香湯澡浴，拜為國王。於是遂處位，聽省國事，深自思曰：余無微善，何緣獲此？必是佛恩使之然也。即與群臣，向舍衛國遙稽首曰：賤人無德，蒙世尊慈恩，得王此國，明日願與應真眾俱，垂意願斯。
- (9) 一時三月，佛告阿難：敕諸比丘，明日彼王請，皆當作變化，令彼國王人民歡喜。各作神足往到彼國，皆次就座，如法儼然，下食畢訖，澡手為王說法。
- (10) 王曰：吾本微人，素無快德，何緣獲斯？
- (11) 佛告王曰：昔彼大王，飯佛於四衢道，王心念言：佛如國王，弟子猶臣下，王種斯核，今自獲果。後一人云：佛者若牛，弟子猶車，彼人自種車轆之核，今在太山地獄為火車所轆，自獲其果，然非王勇健所能致矣。為善福隨，為惡禍追，此為自作，非天龍鬼神所不能與此，於是世尊即說偈言：

心為法本，心尊心使，中心念惡，即言即行，  
 罪苦自追，車轆於轍。  
 心為法本，心尊心使，中心念善，即言即行，  
 福樂自追，如影隨形。

- (12) 佛說經偈已，王及臣民聽者無數，皆大歡喜，逮得法眼。

### 【23】

- (1) 昔長者須達，買太子園田，共造精舍，奉上世尊，各請佛及僧供養一月。佛為二人廣陳明法，皆得道跡。
- (2) 太子祇陀歡喜還東宮，歎佛之德，作樂自娛。
- (3) 祇弟琉璃，常在王邊。時王素服與諸近臣及後宮夫人，往詣佛所稽首禮畢，一心聽經。
- (4) 琉璃在後，典衛御座。時諸佞臣阿薩陀等，姦謀啟曰：試著大王印綬，坐御座上，如似王不？
- (5) 於是琉璃即隨其言，被服昇座。諸佞臣等皆共拜賀：正似大王，

千載遭遇，黎庶之願，豈使東宮窺窬於此？此之御座，豈可昇而復下也？即率所從，貫甲拔劍，自就到祇洹精舍，斥徙大王不得還宮，與王官屬戰祇洹間，殺王近臣五百餘人。

- (6) 王與夫人播迸，晨夜至舍夷國，中道飢餓，王噉蘆菹腹脹而薨。於是琉璃遂即專制，便拔劍入東宮，斫殺兄祇。
- (7) 祇知無常，心不恐懼，顏色不變，含笑熙怡，甘心受刃，命未絕間，聞虛空中自然音樂聲，迎其魂神。
- (8) 佛於祇洹即說偈言：

造喜後喜，行善兩喜，彼喜惟歡，見福心安。  
今歡後歡，為善兩歡，厥為自祐，受福悅豫。

- (9) 是時琉璃王尋興兵眾，伐舍夷國，殺害釋種道跡之人，殘暴無道，五逆兼備。
- (10) 佛記琉璃不孝不忠，眾罪深重，卻後七日當為地獄火所燒殺，又太史記記與佛同。
- (11) 王大怖懍，即乘船入江：吾今處水，火焉得來？
- (12) 七日日中，有自然火，從水中出，燒船覆沒。王亦被燒，恐怖毒熱，忽然沈終。
- (13) 於是世尊即說偈言：

造憂後憂，行惡兩憂，彼憂唯懼，見罪心懍。  
今悔後悔，為惡兩悔，厥為自殃，受罪熱惱。

- (14) 佛說是已，告諸比丘：太子祇者，不貪榮位，守死懷道，上生天上，安樂自然；琉璃王者，狂愚快意，死墮地獄，受苦無數，一切世間豪貴貧賤，皆歸無常，無長存者，是以高士殞命全行為精神寶。
- (15) 佛說是時，莫不信受。

#### 【24】

- (1) 昔耆闍崛山後有婆羅門七十餘家，宿福應度。佛到其村，現道神化，眾人見佛，光相巍巍，莫不敬伏。
- (2) 佛坐樹下問諸梵志：居此山中，為幾何世？有何方業以自供給？

答曰：居此以來三十餘世，田作畜牧以此為業。

- (3) 又問：奉脩何行求離生死？答曰：事日月水火，隨時祭祠，若有死者，大小聚會，唱生梵天，以離生死。
- (4) 佛語諸婆羅門：夫田作畜牧、祭祠日月水火，唱叫生天，非是長存離生死法，極福無過二十八天，無有道慧，還墮三塗，唯有出家修清淨志，履行寂義，可得泥洹，於是世尊即說偈言：

以真為偽，以偽為真，是為邪計，不得真利。  
知真為真，見偽為偽，是為正計，必得真利。  
世皆有死，三界無安，諸天雖樂，福盡亦喪。  
觀諸世間，無生不終，欲離生死，當行道真。

- (5) 七十婆羅門聞佛所說，欣然意解，願作沙門。
- (6) 佛言：善來比丘！鬚髮自墮皆成沙門。佛與比丘共還精舍。
- (7) 至於中路，顧戀妻息，各有退意，時遇天雨，益懷憂慘。
- (8) 佛知其意，便於道邊化作數十間舍，入中避雨而舍穿漏。佛因舍漏而說偈言：

蓋屋不密，天雨則漏，意不惟行，媿泆為穿。  
蓋屋善密，雨則不漏，攝意惟行，媿匿不生。

- (9) 七十沙門聞說此偈，雖強自進，猶懷瞢瞢。雨止前行，地有故紙。佛告比丘取之，受教即取。
- (10) 佛問比丘：以為何紙？諸比丘白佛：此裹香紙，今雖捐棄，處香如故。
- (11) 佛復前行，地有斷索。佛告比丘取之，受教即取。
- (12) 佛復問曰：此何等索？諸比丘白佛，其索腥臭，此繫魚之索。
- (13) 佛語比丘，夫物本淨，皆由因緣以興罪福，近賢明則道義隆，友愚闇則殃罪臻，譬彼紙索，近香則香，繫魚則腥，漸染翫習，各不自覺，於是世尊即說偈言：

鄙夫染人，如近臭物，漸迷習非，不覺成惡。  
賢夫染人，如附香熏，進智習善，行成芳潔。

(14) 七十沙門重聞此偈，知家欲為穢藪，妻子為桎梏，執信堅固，往至精舍，攝意惟行，得羅漢道。

## 放逸品第十

### 【25】

- (1) 昔佛在世時，有五百賈客從海中出，大持七寶還歸本國，經歷深山，為惡鬼所迷不能得出，糧食乏盡，窮頓困厄，遂皆餓死，所齎寶貨，散在山間。
- (2) 時有沙門在山中學，見其如此，便起想念：吾勤苦學道，積已七年，不能得道，又復貧窮，無以自濟，此寶物無主取之，持歸用立門戶。於是下山拾取寶物，藏著一處訖便出山，求呼兄弟，負馳持歸，方到道半。
- (3) 佛念比丘應當得度，佛便化作一比丘尼，剃頭法服，莊面畫眉，金銀瓔珞，隨谷入山，道逢沙門，頭面作禮，問訊起居。
- (4) 道人呵比丘尼曰：為道之法，應得爾不？剃頭著法衣，云何復莊面畫眉，瓔珞身體也？
- (5) 比丘尼答曰：沙門之法，為應爾不？辭親學道，山居靜志，云何復取非其財物，貪欲忘道，快心放意，不計無常，生世如寄，罪報延長？於是比丘尼為說偈言：

比丘謹慎戒，放逸多憂愆，變諍小致大，積惡入火焚。  
守戒福致喜，犯戒有懼心，能斷三界漏，此乃近涅槃。

- (6) 是時比丘尼說此偈已，為現佛身，相好光明。沙門見之，悚然毛豎，稽首佛足，悔過自陳，愚癡迷謬，違犯正教，往而不返，其將奈何！
- (7) 於是世尊即說偈言：

若前放逸，後能自禁，是照世間，念定其宜。  
過失為惡，追覆以善，是照世間，念善其宜。  
少壯捨家，盛修佛教，是照世間，如月雲消。  
人前為惡，後止不犯，是照世間，如月雲消。

(8) 於是比丘重聞此偈，結解貪止，稽首佛足，還到樹下，數息相隨，止觀還淨，獲道果證，成阿羅漢。

## 心意品第十一

### 【26】

- (1) 昔佛在世時，有一道人在河邊樹下，學道十二年中，貪想不除，走心散意，但念六欲，目色、耳聲、鼻香、口味、身更、心法，身靜意遊曾無寧息，十二年中不能得道。
- (2) 佛知可度，化作沙門往至其所，樹下共宿。
- (3) 須臾月明，有龜從河中出，來至樹下。復有一水狗，飢行求食，與龜相逢，便欲噉龜。龜縮其頭尾及其四腳，藏於甲中，不能得噉。水狗小遠，復出頭足行步如故，不能奈何，遂便得脫。
- (4) 於是道人問化沙門：此龜有護命之鎧，水狗不能得其便。
- (5) 化沙門答曰：吾念世人，不如此龜，不知無常，放恣六情，外魔得便，形壞神去，生死無端，輪轉五道，苦惱百千，皆意所造，宜自勉勵，求滅度安，於是化沙門即說偈言：

有身不久，皆當歸土，形壞神去，寄住何貪。  
心豫造處，往來無端，念多邪僻，自為招患。  
是意自造，非父母為，可勉向正，為福勿回。  
藏六如龜，防意如城，慧與魔戰，勝則無患。

- (6) 於是比丘聞說此偈，貪斷望止，即得羅漢道，知化沙門是佛世尊，敬肅整服，稽首佛足。天龍、鬼神莫不歡喜。

## 華香品第十二

### 【27】

- (1) 昔佛在舍衛國，國東南海中有臺，臺上有華香樹，樹木清淨，有婆羅門女五百人，奉事異道，意甚精進，不知有佛。
- (2) 於時諸女自相謂曰：我等稟形生為女人，從少至老為三事所鑑，不得自由，命又短促，形如幻化，當復死亡，不如共至華香臺上，採取香華，精進持齋，降屈梵天，當從求願，願生梵天長

壽不死，又得自在無有鑑忌，離諸罪對，無復憂患。

- (3) 即齋供具，往至臺上，採取華香，奉事梵天，一心持齋，願屈尊神。
- (4) 於是世尊見此諸女，雖為俗齋，其心精進應可化度，即與大眾弟子、菩薩、天龍、鬼神，飛昇虛空，往至臺上，坐於樹下。
- (5) 諸女歡喜，謂是梵天，自相慶慰，得我所願矣。
- (6) 時一天人語諸女言：此非梵天，是三界尊，號名為佛，度人無量。
- (7) 於是諸女前至佛所，為佛作禮，前白佛言：我等多垢，今為女人，求離鑑檢，願生梵天。
- (8) 佛言：諸女！快得善利，乃發此願，世有二事其報明審，為善受福，為惡受殃，世間之苦，天上之樂，有為之煩，無為之寂，誰能選擇，取其真者，善哉諸女！乃有明志，於是世尊即說偈言：

孰能擇地，捨鑑取天，誰說法句，如擇善華。  
學者擇地，捨鑑取天，善說法句，能採德華。  
知世坏喻，幻法忽有，斷魔華敷，不現死生。  
見身如沫，幻法自然，斷魔華敷，不現死生。

- (9) 於是諸女聞佛此偈，願學真道，為比丘尼，頭髮自墮，法衣具足，思惟寂定，即得羅漢道。
- (10) 阿難白佛言：今此諸女素有何德，乃令世尊就而度之，一聞說法出家得道也？
- (11) 佛告阿難：昔迦葉佛時，有大長者財富無數，夫人嫫女有五百人，其性妒惡，門不妄開，夫人嫫女欲往見佛，終不肯聽。後日國王請諸大臣，上殿宴會，會輒竟日，時夫人嫫女見長者入會，便共至佛所稽首作禮，小坐聽經，各發願言：令我世世莫與惡人共相遭遇，所生之處恒與道德聖人相值，聞來世有佛名釋迦文，願與相值，出家學道，奉持訓誨。
- (12) 佛語阿難：爾時夫人嫫女五百人者，今此五百比丘尼是，本願懇惻，今應得度，是以世尊就度之耳。
- (13) 佛說是時，莫不歡喜。

## 法句譬喻經卷第二

### 【28】

- (1) 昔佛始得道，在羅閱祇國教化，轉到舍衛國，國王群臣莫不宗仰。時有賈客大人名曰波利，與五百賈人入海求寶。
- (2) 時海神出掬水問波利言：海水為多？掬水為多？
- (3) 波利答曰：掬水為多，所以者何？海水雖多，無益時用，不能救彼飢渴之人；掬水雖少，值彼渴者，持用與之，以濟其命，世世受福不可稱計。
- (4) 海神歡喜，讚言善哉！即脫身上八種香瓔，校以七寶，以上波利。
- (5) 海神送之，安善往還到舍衛國，持此香瓔上波斯匿王，具陳所由，念是香瓔，非小人所服，謹以貢上，願蒙納受。
- (6) 王得香瓔，以為奇異，即呼諸夫人羅列前住，若最好者以香瓔與之。六萬夫人盡嚴來出。
- (7) 王問：末利夫人何以不出？侍人答言：今十五日持佛法齋，素服不嚴，是以不出。
- (8) 王便瞋恚，遣人呼曰：汝今持齋，應違王主之命不乎？如是三反，末利夫人素服而出，在眾人中，猶如日月，倍好於常。
- (9) 王意悚然，加敬問曰：有何道德，炳然有異？
- (10) 夫人白王：自念少福，稟斯女形，情態穢垢，日夜山積，人命促短，懼墜三塗，是以日月奉佛法齋，割愛從道，世世蒙福。
- (11) 王聞歡喜，便以香瓔以與末利夫人。
- (12) 夫人答言：我今持齋，不應著此，可與餘人。
- (13) 王曰：我本發意，欲與勝者，卿今最勝，又奉法齋，道志殊高，是以相與，若卿不受吾將安置？
- (14) 夫人答言：大王勿憂，願王屈意，共到佛所，以此香瓔奉上世尊，并採聖訓，累劫之福矣。
- (15) 王即許焉，即敕嚴駕往到佛所，稽首於地，卻就王位，王白佛言：海神香瓔波利所上，六萬夫人莫不貪得，末利夫人與而不取，持佛法齋，心無貪欲，謹以上佛，願垂納受，世尊弟子執心護齋，直信如此，豈有福乎？
- (16) 於是世尊為受香瓔，即說偈言：

多作寶華，結步搖綺，廣積德香，所生轉好。

琦草芳華，不逆風熏，近道敷開，德人逼香。  
梅檀多香，青蓮芳花，雖曰是真，不如戒香。  
華香氣微，不可謂真，持戒之香，到天殊勝。  
戒具成就，行無放逸，定意度脫，長離魔道。

(17) 佛說偈已，重告王曰：齋之福祐，明譽廣遠，譬如天下十六大國，滿中珍寶持用布施，不如末利夫人一日一夕持佛法齋，如比其福，須彌以豆矣，積福學慧可到泥洹。

(18) 王及夫人、群臣大小，莫不歡喜，執戴奉行。

### 【29】

- (1) 昔佛在羅閱祇耆闍崛山中，於時城中有長者子五十人，往詣佛所，作禮卻坐。
- (2) 時佛為說無常、苦、空、非身之法，恩愛如夢，會當別離，尊榮豪貴亦有憂戚，唯有泥洹永離生死，群殃盡滅乃可大安。時五十人聞法喜悅，願為弟子。
- (3) 佛言：善來比丘！鬚髮自墮，法衣具足，即成沙門。
- (4) 此諸沙門有親友長者，聞其出家，意大歡喜，往到崛山，與之相見，讚言：諸君快哉善利，乃有此志。為之設壇，請佛及僧，明日佛與眾會就其舍食，食訖說法，晡時乃還。
- (5) 此諸新學沙門，戀慕宗黨，皆欲返退。
- (6) 佛知其意，將出城門，見田溝中，污泥糞壤中生蓮華，五色香潔，其香芬熏乃蔽諸臭。佛便趣之，因說偈言：

如作田溝，近於大道，中生蓮華，香潔可意。  
有生死然，凡夫處邊，智者樂出，為佛弟子。

- (7) 佛說偈已，即還山中。賢者阿難前白佛言：向者世尊臨田溝上，所說二偈不審其義，願聞其意！
- (8) 佛告阿難：汝見溝中污泥不淨，糞壤之中生蓮華不？唯然見之。
- (9) 佛言：阿難！人在世間展轉相生，計壽百歲或長或短，妻子恩愛，飢渴寒熱，或悲或欣，一凶、二吉、三毒、四倒、五陰、六入、七識、八邪、九惱、十惡，猶如田溝，畜藏糞壤，污泥不淨，歎有一人覺世無常，發心學道修清淨志，凝神斷想自致

得道，亦如污泥生好蓮華，身自得道還度宗親，一切眾生皆蒙開解，亦如華香奄蔽臭穢。

(10) 五十比丘聞佛說法，進志堅固，即得阿羅漢道。

### 愚闇品第十三

#### 【30】

- (1) 昔佛在舍衛國。時城中有婆羅門，年向八十，財富無數，為人頑闇，慳貪難化，不識道德，不計無常，更作好舍，前序後堂，涼臺煖室，東西廂廡，數十梁間，唯後堂前，拒陽未訖，時婆羅門恒自經營指授眾事。
- (2) 佛以道眼，見此老翁，命不終日，當就後世，不能自知而方匆匆，形瘦力竭，精神無福，甚可憐愍。
- (3) 佛將阿難往到其門，慰問老翁，得無勞倦，今作此舍皆何所安？
- (4) 老翁答言：前序待客，後堂自處，東西二廂當安兒息、財物、僕使，夏上涼臺，冬入溫室。
- (5) 佛語老翁：久聞宿德，思遲談講，偶有要偈，存亡有益，欲以相贈，不審可小廢事，共坐論不也？
- (6) 老翁答言：今正大懣，不容坐語，後日更來，當共善敘，所云要偈便可說之。
- (7) 於是世尊即說偈言：

有子有財，愚惟汲汲，我且非我，何憂子財？  
暑當止此，寒當止此，愚多預慮，莫知來變。  
愚蒙愚極，自謂我智，愚而勝智，是謂極愚。

- (8) 婆羅門言：善說此偈，今實太懣，後來更論之。於是世尊傷之而去。
- (9) 老翁於後，自授屋椽，椽墮打頭，即時命過。室家啼哭，驚動四鄰。
- (10) 佛去未遠，便有此變。佛到里頭，逢諸梵志有數十人，前問佛言：從何所來？
- (11) 佛言：屢到此死翁舍，為翁說法，不信佛語，不知無常，今者忽然已就後世。具為諸梵志，更說前偈義，聞之欣然，即得道

跡，於是世尊，而說偈言：

愚闇近智，如瓢斟味，雖久狎習，猶不知法。  
開達近智，如舌嘗味，雖須臾習，即解道要。  
愚人施行，為身招患，快心作惡，自致重殃。  
行為不善，退見悔吝，致涕流面，報由宿習。

(12) 時諸梵志重聞此偈，益懷篤信，為佛作禮，歡喜奉行。

### 【31】

- (1) 昔佛在舍衛國給孤獨精舍，為諸天人說法。時波斯匿王有一寡女，名曰金剛，壯寡未歸，父母哀愍，別為宮舍，作好舍宅，給五百妓女，以娛樂之。
- (2) 眾中有一長老青衣，名曰度勝，恒行市買脂粉香華。時見男女無數大眾各齎香華，出城詣佛，即問行人：欲何所至？
- (3) 眾人答言：佛出於世三界之尊，度脫眾生皆得泥洹。
- (4) 度勝聞之，心悅意喜，即自念言：會老見佛，宿世之福，便分香直，持買好華，隨眾人輩往到佛所，作禮卻立，散華燒香，一心聽法已，過市取香，因聽法功德，宿行所追，香氣熏聞，斤兩倍前。
- (5) 嫌其遲晚而共詰之。度勝奉道，即如事言：世有聖師，三界之尊，擊無上法鼓，震動三千，往聽法者無央數人，實隨聽法，是以稽遲。
- (6) 金剛之徒，聞說世尊法義深妙，非世所聞，悚然心歡而自歎曰：吾等何罪，獨自不聞！即報度勝：試為我說之。
- (7) 度勝白曰：身賤口穢，不敢便宣，乞更諮受，如命說之。
- (8) 即便遣出，重告之曰：具受儀式。
- (9) 度勝未還，金剛侍女側息中庭，如子待母。佛告度勝：汝還說法，多所度脫，說法之儀，先施高座。
- (10) 度勝受敕，具宣聖旨，皆大歡喜，各脫衣服一領，積為高座。
- (11) 度勝洗浴，承佛威神，如應說法，金剛之等五百餘人，疑解破惡，得須陀洹道。說法甚美，不覺失火，一時燒死，即生天上。
- (12) 王將人從，來欲救火，見之已燃，收拾棺殮，葬送畢訖，往過佛所，為佛作禮，卻坐常位。

- (13) 佛問王曰：所從來也？
- (14) 王叉手言：女金剛不幸不覺失火，大小燒盡，適棺殮還，不審何罪，遇此火害？唯願世尊，彰告未聞。
- (15) 佛告大王：過去世時，有城名波羅奈，有長者婦，將姪女五百人，至城外大祠祀。其法難犯，他姓之人不得到邊，不問親疏，其有來者擲著火中。時世有一辟支佛名曰迦羅，處在山中，晨來分衛，暮輒還山，迦羅分衛，來趣郊祠。長者婦見之，忿然瞋恚，共捉迦羅，撲著火中，舉身焦爛，便現神足，飛昇虛空。眾女驚怖，泣淚悔過，長跪舉頭而自陳曰：女人蠢愚，不識至真，群愚荒駭，毀辱神靈，自惟過豐，罪惡若山，願降尊德以消重殃。尋聲即下而般泥洹。諸女起塔，供養舍利。
- (16) 佛為大王而說偈言：

愚恚作惡，不能自解，殃迫自焚，罪成熾然。  
愚所望處，不謂適苦，臨墮厄地，乃知不善。

- (17) 佛告大王：爾時長者婦，今王女金剛是。五百侍女今度勝等五百伎女是。罪福追人，久無不彰，善惡隨人，如影隨形。
- (18) 說是法時，國內大小信伏歡喜，咸歸三尊，皆受五戒，即得道跡。

## 明哲品第十四

### 【32】

- (1) 昔有梵志其年二十，天才自然，事無大小，過目則能，自以聰哲而自誓曰：天下技術要當盡知，一藝不通則非明達也。
- (2) 於是遊學，無師不造，六藝雜術、天文、地理、醫方、鎮壓山崩地動、擣菹博奕、妓樂博撮、裁割衣裳、文繡綾綺、廚膳切割、調和滋味，人間之事無不兼達，心自念曰：丈夫如此，誰能及者？試遊諸國，摧伏觝對，奮名四海，技術衝天，然後載功竹帛，垂勳百代。
- (3) 於是遊行，往至一國，入市觀視，見有一人，坐作角弓，析筋治角，用手如飛，作弓調快，買者爭前，即自念曰：少來所學自以具足，邂逅自輕，不學作弓，若彼鬥技，吾則不如矣，當

從受學耳。遂從弓師，求為弟子，盡心受學，月日之中，具解弓法，所作巧妙乃踰於師，布施財物，奉辭而去。

- (4) 去之一國，當渡江水，有一船師，用船若飛，迴旋上下，便疾無雙，復自念曰：吾技雖多，未曾習船，雖為賤術，其於不知，宜當學之，萬技悉備。遂從船師，願為弟子，供奉盡敬，竭力勞動，月日之中，知其逆順，御船迴旋乃踰於師，布施財物，奉辭而去。
- (5) 復至一國，國王宮殿天下無雙，即自念曰：作此殿匠，巧妙乃爾，自隱遊來，偶不學之，若與競術，必不勝矣，且當復學，意乃足耳。遂求殿匠，願為弟子，盡心供養，執持斤斧，月日之間，具解尺寸，方圓規知，彫文刻鏤，木事盡知，天才明朗，事輒勝師，布施所有，辭師而去。
- (6) 周行天下，遍十六大國，命敵拏技，獨言隻步，無敢應者，心自貢高曰：天地之間，誰有勝我者？
- (7) 佛在祇洹，遙見此人，應可化度。佛以神足化作沙門，拄杖持鉢，在前而來。
- (8) 梵志由來，國無道法，未見沙門，怪是何人，須至當問。須臾來到，梵志問曰：百王之則，未見君輩，衣裳制度，無有此服，宗廟異物不見此器，君是何人，形服改常也？
- (9) 沙門答曰：吾調身人也。
- (10) 復問，何謂調身？於是沙門，因其所習而說偈言：

弓匠調角，水人調船，巧匠調木，智者調身。  
譬如厚石，風不能移，智者意重，毀譽不傾。  
譬如深淵，澄靜清明，慧人聞道，心淨歡然。

- (11) 於是沙門說此偈已，身昇虛空，還現佛身，三十二相、八十種好，光明洞達，照耀天地，從虛空來下，謂其人曰：吾道德變化，調身之力也。
- (12) 於是其人五體投地，稽首問曰：願聞調身其有要乎？
- (13) 佛告梵志：五戒、十善、四等、六度、四禪、三解脫，此調身之法也。夫弓船、木匠、六藝奇術，斯皆綺飾華譽之事，蕩身縱意生死之路也。
- (14) 梵志聞之，欣然信解願為弟子。

- (15) 佛言：沙門善來！鬚髮自墮，即成沙門。  
(16) 佛重為說四諦、八解之要，尋時即得阿羅漢道。

【33】

- (1) 昔佛在舍衛國。有山民村五六十家，去國五百里，村中有一貧家，其主人婦懷妊十月，雙生二男甚大，端政無比，父母愛之，便為作字，一名雙德，二名雙福。生五六十日，其父放牛來還懈息，卻臥床上，其母出田，拾薪未還。
- (2) 此二小兒左右顧視，不見父母，便共相責，語一人言：前世之時，垂當得道，正坐愚意，謂命可常，退墮生死不可計劫，今乃得生此貧家作子，穰草之中，以氈褐自覆，食飲羸惡，纔自支身，如此至久云何得道？皆坐前世戀慕富貴，放身散意，快樂須臾，從爾以來，長塗受苦，如今憂惱，當何恃怙？
- (3) 一人答曰：我爾時小難一時之勲，竟不意精進，而令數世遭諸苦患，此是自為，非父母作也。但共當之，復何所言？
- (4) 父聞二子相責如是，甚大怪之，謂呼是鬼祟，來生災變，云何數十日小兒乃作此言？恐其後日，殺親滅族，曼小未大，宜當殺之。
- (5) 其父驚出，閉門捨去，到田取薪，欲燒殺之。其母來還，問夫用此薪為？
- (6) 夫言：甚大可怪，所說如是，此似是鬼，必破人門族，以其曼小，欲燒殺之。
- (7) 其母聞此，意中愕然，猶豫未信，小停數日，更聽其言。至明日，夫婦俱出，於戶外潛聽。二兒在內相責如故，夫婦重共聞之，甚怪所以，便共集薪密欲燒之。
- (8) 佛以天眼，見此夫婦，欲燒殺二子，愍其可憐，宿福應度，往到其村，普放光明，天地大動，山川樹木皆作金色，村中大小，驚到佛所，為佛作禮莫，不歡喜，知佛至神，三界無比。
- (9) 佛到雙生小兒家，二兒見佛光明，喜踊難量，父母又驚，各抱一子將至佛所，問佛世尊：此小兒生來五六十日，所說如是，甚共怪之，恐作禍害，欲火燒殺之，正值佛來，未及得燒，不知此小兒為是何等鬼魅也，唯願解說是何災怪，小兒見佛踊躍歡喜？
- (10) 佛見小兒大笑，口出五色光，普照天地。佛告小兒父母及村人

大小：此二小兒，非是鬼魅，福德之子，前迦葉佛時，曾作沙門，少小共為朋友，同志出家，各自精進，臨當得道，歛起邪想，共相沮敗，樂世榮華，恃福生天，下為侯王國主長者，歛起是想，便墮退轉，不得涅槃，更此生死，彌連劫數，常相鉤牽，輒共雙生。遭我世時，今始乃生，已往供養佛功德故，餘福應度，罪滅福生，自識宿命，是以世尊故來度之，我不度者橫為火所燒。

(11) 於是世尊即說偈言：

大人體無欲，在所照然明，雖或遭苦樂，不高現其智。  
大賢無世事，不願子財國，常守戒慧道，不貪邪富貴。  
智人知動搖，譬如沙中樹，朋友志未強，隨色染其素。

(12) 佛說是時，小兒見佛，其身即踊，如八歲小兒，即作沙彌，得羅漢道。村人大小見佛光相，又見小兒形變踊大，皆大歡喜，得須陀洹道，父母疑解，亦得法眼。

## 羅漢品第十五

【34】

- (1) 昔有一國名曰那梨，近南海邊，其中人民採真珠、梅檀，以為常業。其國有一家兄弟二人，父母終亡，欲求分異。
- (2) 家有一奴，名曰分那，年少聰了，賈販市買，入海治生，無事不知，居家財物分為一分，以奴分那持作一分。
- (3) 兄弟擲籌，弟得分那，止將妻子，空手出舍，時世飢儉唯得分那，恐不相活，以為愁憂。
- (4) 時奴分那白大家言：願莫愁憂！分那作計，月日之中，當令勝兄。
- (5) 大家言：若審能爾者，放汝為良人。
- (6) 大家夫人有私珠物，與分那作本。
- (7) 時海潮來，城內人民至水邊取薪，分那持珠物出至城外，見一乞兒負薪，薪中有牛頭梅檀香，可治重病，一兩直千兩金，時世有一，不可常得，分那識之，以金錢二枚買得持歸，破作數十段。時有長者得重病，當須此牛頭梅檀香二兩合藥，求不能

- 得。分那持往即得二千兩金。如是賣盡，所得不訾富兄十倍。大家感念分那之恩，不違言誓，放為良人，隨意所樂。
- (8) 於是分那辭行學道，到舍衛國為佛作禮，長跪白佛：所出微賤，心樂道德，唯願世尊，垂慈濟度。
- (9) 佛言：善來分那！頭髮自墮，法衣著身，即成沙門。佛為說法，尋得羅漢道，坐自思惟今得六通存亡自由，皆主人之恩，今當往度并化國人。
- (10) 於時分那往到本國，至主人家。主人歡喜，請坐設食，食訖澡手，飛昇虛空，分身散體，半出水火，光明洞達，從上來下，告主人曰：此之神德，皆是主人放捨之福，往到佛所，所學如是。
- (11) 主人答曰：佛之神化，微妙乃爾，願見世尊受其教訓。
- (12) 分那答曰：但當志心，供設饌具，佛三達智必自來矣。即便設供，宿昔已辦，向舍衛國稽首長跪，燒香請佛，唯願屈尊，廣度一切。
- (13) 佛知其意，即與五百羅漢，各以神足往到其舍。國王人民莫不敬肅，來至佛所五體投地，卻坐王位，食畢澡訖。
- (14) 佛為主人及王官屬廣陳明法。
- (15) 皆受五戒，為佛弟子，起住佛前，歎分那曰：在家精勤，出家得道，神德高遠，家國蒙度，我當云何以報其恩？
- (16) 於是世尊重歎分那而說偈言：

心已休息，言行亦止，從正解脫，寂然歸滅。  
棄欲無著，缺三界障，望意已絕，是謂上人。  
若聚若野，平地高岸，應真所過，莫不蒙度。  
彼樂空閑，眾人不能，快哉無望，無所欲求。

- (17) 佛說偈已，主人及王益加歡喜，供養七日，得須陀洹道。

## 述千品第十六

### 【35】

- (1) 昔佛在舍衛國，有一長老比丘，字般特，新作比丘稟性闇塞。
- (2) 佛令五百羅漢日日教之，三年之中不得一偈，國中四輩皆知其

愚冥。佛愍傷之，即呼著前，授與一偈：

守口攝意，身莫犯非，如是行者，得度世〔間〕。

- (3) 時，般特感佛慈恩，歡欣心開，誦偈上口。
- (4) 佛告之曰：汝今年老，方得一偈，人皆知之，不足為奇，今當為汝解說其義，一心諦聽！般特受教而聽。
- (5) 佛即為說身三、口四、意三所由，觀其所起，察其所滅，三界五道輪轉不息，由之昇天，由之墮淵，由之得道，涅槃自然，分別為說無量妙法。
- (6) 時般特霍然心開，即得羅漢道。
- (7) 爾時有五百比丘尼別有精舍。佛日遣一比丘為說經法。
- (8) 明日般特，次應當行。諸尼聞之，皆豫含笑，明日來者，我等當共逆說其偈，令之慚愧，無所一言。
- (9) 明日般特往，諸比丘尼大小皆出作禮，相視而笑，坐畢下食，食已澡手，請令說法。
- (10) 時般特即上高座，自慚否曰：薄德下才，末為沙門，頑鈍有素，所學不多，唯知一偈，粗識其義，當為敷演，願各靜聽。
- (11) 諸年少比丘尼，欲逆說偈，口不能開，驚怖自責，稽首悔過。
- (12) 般特即如佛所說，一一分別身意所由，罪福內外，昇天得道，凝神斷想，入定之法。
- (13) 即時諸尼聞其所說，甚怪甚異，一心歡喜，皆得羅漢道。
- (14) 後日國王波斯匿，請佛眾僧於正殿會。佛欲現般特威神，與鉢令持，隨後而行。
- (15) 門士識之，留不聽入：卿為沙門，一偈不了，受請何為？吾是俗人由尚知偈，豈況沙門無有智慧？施卿無益，不須入門。
- (16) 時般特即住門外。佛坐正殿上，行水已畢，般特即擎鉢申臂，遙以授佛。
- (17) 王及群臣夫人太子，眾會四輩，見臂來入，不見其形，怪而問佛：是何人臂？
- (18) 佛言：是般特比丘臂也，近日得道，向吾使持鉢，門士不聽來入，是以申臂授吾鉢耳。即便請入，威神倍常。
- (19) 王白佛言：聞般特本性愚鈍方知一偈，何緣得道？
- (20) 佛告王曰：學不必多，行之為上，般特解一偈義，精理入神，

身口意寂，淨如天金，人雖多學，不解不行，徒喪識想，有何益哉！

(21) 於是世尊即說偈言：

雖誦千章，句義不正，不如一要，聞可滅惡。  
雖誦千言，不義何益，不如一義，聞行可度。  
雖多誦經，不解何益，解一法句，行可得道。

(22) 佛說偈已，三百比丘得阿羅漢道。王及群臣、夫人、太子莫不歡喜。

### 【36】

- (1) 昔佛在舍衛國精舍之中，為天人說法。
- (2) 時舍衛國中有婆羅門長者，名藍達，大富無極，其家資財不可計數。梵志之法，當作大壇，以顯名譽，盡家之財，持用布施，作般闍于瑟，供養婆羅門五千餘人。五年之中供給衣被、床榻、醫藥、珍琦寶物、郊祠供具，盡所愛惜。
- (3) 諸梵志等五年之中，為羅摩達長者，祭祀諸天、四山五嶽、星宿水火，無不周遍，咒願長者長夜受福。
- (4) 五歲已周，最後一日，極大布施。如長者法，金鉢盛銀粟，銀鉢盛金粟，象馬車乘、奴婢、資財，七寶服飾、散蓋、履屣、鹿皮之衣、錫杖踞床、澡罐、澡盤、床榻、席薦，所應當得事事八萬四千，盡持布施。當其爾日皆來大會，鬼神、國王、大臣、梵志、大姓，悉來會坐，隱隱闐闐莫不歡欣。
- (5) 佛見如是，歎然言曰：此大姓梵志何以愚癡？所施大多，福報薄少，如種火中，何從得報也？若我不化，長離法門。
- (6) 於是世尊便起嚴服，化從地出，放大光明，普照眾會，大小見之，怪未曾有，驚怖悚懼，不知何神？
- (7) 長者羅摩達及諸大眾，頭面著地，為佛作禮。
- (8) 佛見眾人皆有敬心，因其恭肅，便說偈言：

月千反祠，終身不徹，不如須臾，一心念法。  
一念造福，勝彼終身，雖終百歲，奉事火神。  
不如須臾，供養三尊，一供養福，勝彼百年。

- (9) 於是世尊告藍達曰：施有四事，何等為四？一者施多得福報少，二者施少得福報多，三者施多得福報多，四者施少得報亦少。
- (10a) 何謂施多得福報少者，其人愚癡，殺生祭祠，飲酒歌舞，破損財寶，無有福慧。
- (10b) 何謂施少得報少者，以慳貪惡意，施凡道士，俱兩愚癡，是故無福。
- (10c) 何謂施少得福多者，能以慈心，奉道德人，道士食已，精進學誦，施此雖少，其福彌大。
- (10d) 何謂施多得福多者，若有賢者，覺世無常，好心出財，起立塔寺、精舍、果園，供養三尊衣服、履屣、床榻、廚膳，斯福如五河流入於大海，福流如是，世世不斷，是為施多其報轉多。譬如農家，地有厚薄，所得不同。
- (11) 爾時藍達長者座中會人，見佛變化，聞說法言，皆大歡喜。諸天人神皆得須陀洹道。五千梵志皆作沙門，得應真道。主人藍達居家大小，皆受五戒亦得道跡。國王、大臣皆受三自歸，為優婆塞，亦得法眼。

### 【37】

- (1) 昔佛在舍衛精舍教化時，羅閱祇國有一人，為人凶愚，不孝父母，輕侮良善，不敬長老，居門衰耗，常不如意，便行事火，欲求福祐。事火之法，日適欲沒，燃大火聚，向之跪拜，或至夜半，火滅乃止。
- (2) 如是三年不得其福，更事日月。事日月法，晝以日出，夜以月明，向日月拜，沒乃休止。
- (3) 如是三年復不得福，轉復事天，燒香跪拜，奉上甘美香華酒脯豬羊牛犢，遂至貧困，故不得福，慙苦憔悴，病不去門。
- (4) 聞舍衛國有佛，諸天所宗，當往奉事，必望得福，即到佛所，至精舍門瞻睹世尊，光相晃然，容顏奇異，如星中月，見佛歡喜，頭面作禮，叉手白佛：生長愚癡，不識三尊，事火日月及諸天神，九年精慙，永不蒙福，顏色憔悴，氣力衰微，四大多患，死亡無日，伏承世尊度人之師，故遠自歸，願垂福慶。
- (5) 佛告之曰：汝之所事，彌是妖邪、魑魅、魍魎，禱祀如山，罪如江海，殺生求福，去福遠矣，正使百劫慙苦，盡殺普天豬羊，持用禱祀，罪如須彌，福無芥子，徒自費喪，豈不惑哉？又卿

為人不孝父母，輕易賢善，不敬長老，僑慢貢高，三毒熾盛，罪豐日深，何緣得福？若能改心，禮敬賢者，威儀禮節，供奉長老，棄惡信善，修己崇仁，四福日增，世世無患，何等為四？一者顏色端正，二者氣力豐強，三者安穩無病，四者益壽終不枉橫，行之不懈亦可得道。

(6) 於是世尊即說偈言：

祭神以求福，從後觀其報，四分未望一，不如禮賢者。  
能善行禮節，常敬長老者，四福自然增，色力壽而安。

(7) 於是其人聞佛此偈，歡喜信解，稽首作禮，重白佛言：罪垢所蔽，積罪九年，幸賴慈化，今得開解，唯願世尊，聽為沙門。

(8) 佛言：善來比丘！頭髮自墮，即成沙門。內思安般，即得羅漢道。

## 惡行品第十七

### 【38】

(1) 昔佛在羅閱祇國，遣一羅漢名曰須漫，持佛髮爪至罽賓南，山中作佛圖寺。五百羅漢常止其中，旦夕燒香繞塔禮拜。

(2) 時彼山中有五百獼猴，見諸道人供養塔寺，即便相將至深澗邊，負輦泥石效作佛圖，豎木立剎，幣幡繫頭，旦夕禮拜，亦如道人。

(3) 時山水瀑漲，五百獼猴一時漂沒，魂神即生第二忉利天上，七寶殿舍，衣食自然，各自念言：從何所來得生天上？即以天眼自見本形，獼猴之身效諸道人戲作塔寺，雖身漂沒神得生天，今當下報故屍之恩。各將侍從華香伎樂，臨故屍上，散華燒香，繞之七匝。

(4) 時山中有五百婆羅門，外學邪見，不信罪福，見諸天人散華作樂，繞獼猴屍，怪而問曰：諸天光影，巍巍乃爾，何故屈意供養此屍？

(5) 諸天人言：此屍是吾等故身，昔在此間效諸道人戲立塔寺，山水瀑漲漂殺吾等，以此微福得生天上，今故散華以報故身之恩，戲為塔寺獲福如此，若當至心奉佛世尊，其德難喻，卿等邪見

不信正真，百劫懃苦，無所一得，不如共往至耆闍崛山，禮事供養得福無限。

- (6) 即皆欣然共至佛所，五體作禮，散華供養，諸天人白佛：我等近世獼猴之身，蒙世尊之恩得生天上，恨不見佛，今故自歸，重白佛言：我等前世有何罪行，受此獼猴身，雖作塔寺，身被漂殺？
- (7) 佛告天人：此有因緣，不從空生，吾當為汝說其所由，乃往昔時有五百年少婆羅門，共行入山欲求仙道。時山上有一沙門，欲於山上泥治精舍，下谷取水，身輕若飛。五百婆羅門興嫉妒意，同聲笑之：今此沙門上下翻疾，亦如獼猴耳，何足為奇也！如是取水不止，山水一來，溺殺不久。
- (8) 佛告諸天人：爾時上下沙門我身是也。五百年少婆羅門者，五百獼猴身是，戲笑作罪，身受其報。
- (9) 於是世尊即說偈言：

戲笑為惡，已作身行，號泣受報，隨行罪至。

- (10) 佛告諸天人：汝之近世雖為獸身，乃能戲笑起作塔寺，今得生天罪滅福興，今者復來躬奉正教，從此因緣，長離眾苦。
- (11) 佛說是已，五百天人即得道跡，其所共來水邊五百婆羅門，聞罪福之報而自歎曰：吾等學仙積有年數，未蒙果報，不如獼猴戲笑為福，得生天上，佛之道德實妙乃爾，於是稽首佛足，願為弟子。
- (12) 佛言：善來比丘！即成沙門，精進日脩，遂得羅漢道。

### 【39】

- (1) 昔佛在舍衛國精舍之中，為諸天人說法。
- (2) 時國王第二兒名曰琉璃，其年二十，將從官屬，退其父王，伐兄太子，自禪為王。
- (3) 有一惡名曰耶利，白琉璃王：王本為皇子，時至舍夷國外家舍，看到佛精舍中，為諸釋種子所呵，罵詈無有好醜，爾時見敕：若我為王，便啟此事。今時已到，兵馬興盛，宜當報怨！即敕嚴駕引率兵馬，往伐舍夷國。
- (4) 佛有第二弟子名摩訶目犍連，見琉璃王引率兵士，伐舍夷國以

報宿怨，今當伐殺四輩弟子，念其可憐，便往到佛所，白佛言：今琉璃王攻舍夷國，我念中人，當遭辛苦，我欲以四方便救舍夷國人，一者舉舍夷國人著虛空中，二者舉舍夷國人著大海中，三者舉舍夷國人著兩鐵圍山間，四者舉舍夷國人著他方大國中央，令琉璃王不知其處。

- (5) 佛告目連：雖知卿有是智德能，安處舍夷國人，萬物眾生有七不可避，何謂為七？一者生，二者老，三者病，四者死，五者罪，六者福，七者因緣，此七事意雖欲避不能得自在，如卿威神可得作此，宿對罪負不可得離。
- (6) 於是目連禮已便去，自以私意，取舍夷國人知識檀越四五千人，盛著鉢中，舉著虛空星宿之際。
- (7) 琉璃王伐舍夷國，殺三億人已，引軍還國。於是目連往到佛所，為佛作禮，自貢高曰：琉璃王伐舍夷國，弟子承佛威神，救舍夷國人四五千人，今在虛空皆盡得脫。
- (8) 佛告目連：卿為往看鉢中人不也？曰：未往視之。
- (9) 佛言：卿先往視鉢中人眾。目連以道力下鉢，見中人皆死盡。
- (10) 於是目連悵然悲泣愍其辛苦，還白佛言：鉢中人者今皆死盡，道德神力不能免彼宿對之罪。
- (11) 佛告目連：有此七事，佛及眾聖、神仙、道士，隱形散體皆不能免此七事。
- (12) 於是世尊即說偈言：

非空非海中，非隱山石間，莫能於此處，避免宿惡殃。  
眾生有苦惱，不得免老死，唯有仁智者，不念人非惡。

- (13) 佛說是時，座上無央數人，聞佛說無常法，皆共悲哀，念對難免，欣然得道，逮須陀洹證。

## 刀仗品第十八

### 【40】

- (1) 昔有一國，名曰賢提，時有長老比丘，長病委頓，羸瘦垢穢，在賢提精舍中臥，無瞻視者。
- (2) 佛將五百比丘往至其所，使諸比丘傳共視之，為作糜粥，而諸

比丘聞其臭處，皆共賤之。佛使天帝釋取湯水。佛以金剛之手，洗病比丘身體，地尋震動，霍然大明，莫不驚肅。

- (3) 國王、臣民、天龍、鬼神、無央數人，往到佛所，稽首作禮，白佛言：佛為世尊，三界無比，道德已備，云何屈意，洗此病瘦垢穢比丘？
- (4) 佛告國王及眾會者：如來所以出現於世，正為此窮厄無護者耳，供養病瘦沙門道士及諸貧窮孤獨老人，其福無量，所願如意，譬五河流，福來如是，功德漸滿，會當得道。
- (5) 王白佛言：今此比丘宿有何罪，困病積年，療治不差？
- (6) 佛告王曰：往昔有王，名曰惡行，治政嚴暴，使一多力五百，主令鞭人。五百假王威怒私作寒熱，若欲鞭人責其價數，得物鞭輕不得鞭重，舉國患之。有一賢者為人所誣，應當得鞭，報五百言：吾是佛弟子，素無罪過，為人所枉，願小垂恕。五百聞是佛弟子，輕手過鞭，無著身者。五百壽終，墮地獄中，考掠萬毒，罪滅復出，墮畜生中，恒被撻杖，五百餘世，罪畢為人，常嬰重病，痛不離身。
- (7) 爾時國王者今調達是也。時五百者今此病比丘是也。時賢者者吾身是也。吾以前世為其所恕，鞭不著身，是故世尊躬為洗之。人作善惡，殃福隨身，雖更生死，不可得免。
- (8) 於是世尊即說偈言：

撻杖良善，妄讒無罪，其殃十倍，災卒無赦。  
生受酷痛，形體毀折，自然惱病，失意恍惚。  
人所誣者，或縣官厄，財產耗盡，親戚離別。  
舍宅所有，災火焚燒，死入地獄，如是為十。

- (9) 時病比丘聞佛此偈及宿命事，自知本行，剋心自責，即於佛前，所患除愈，身安意定，即得羅漢道。賢提國王歡喜信解，尋受五戒為清信士，沒命奉行，得須陀洹道。

#### 【41】

- (1) 昔佛在舍衛國祇樹給孤獨精舍中，為天人、龍鬼說法。東方有國，名鬱多羅波提。
- (2) 昔有婆羅門等五百人相率欲詣恒水。岸邊有三祠神池，沐浴垢

穢，裸形求仙，如尼捷法，道由大澤，迷不得過，中道乏糧，遙望見一大樹如有神氣，想有人居，馳趣樹下，了無所見。婆羅門等舉聲大哭，飢渴委厄，窮死斯澤。

- (3) 樹神人現，問諸梵志：道士那來，今欲何行？同聲答曰：欲詣神池，澡浴望仙，今日飢渴，幸哀矜濟。
- (4) 樹神即舉手，百味飲食，從手流溢，給眾飯食，皆得飽滿，其餘食飲，足供道糧，臨當別去，詣神請問：本行何德，致此巍巍？
- (5) 神答梵志：吾本所居在舍衛國，時國大臣名曰須達，飯佛眾僧，詣市買酪，無提酪者，左右顧視，倩我提之，往到精舍，使我斟酌，訖行澡水，儼然聽法，一切歡喜，稱善無量。時我奉齋，暮還不餐，婦怪問我：不食何恨？答曰：不恨也。吾行於市，見長者須達，於園飯佛，我往持齋，齋名八關。其婦瞋恚忿然言曰：瞿曇亂俗，奚足採納，君毀遺則，禍從此興。蹙迫不已，便共俱食。時我爾夜，年壽算盡，終於夜半。神來生此，為是愚婦敗我齋法，不卒其業，來生斯澤，作此樹神，提酪之福，手出飲食。若終齋法，應生天上，封受自然，即為梵志而說頌曰：

祠祀種禍根，日夜長枝條，唐苦敗身本，齋法度世仙。

- (6) 梵志聞偈，迷解信受，旋還舍衛，路由一國，國名拘藍尼，有長者名曰美音，為人恩仁，眾人敬仰。
- (7) 梵志過宿，長者問曰：道士那來今欲所至？具陳彼澤樹神功德，欲詣舍衛，造須達所，攢採齋法，冀蒙得福。
- (8) 美音喜踊，宿行所迫，且自解暢，宣令宗室：誰能共行，受齋戒法？合五百人僉然應命，本願相引，威儀嚴出，共詣舍衛。未至祇洹，道逢須達，遇而不識，顧問從者：此何丈夫？對曰須達也。
- (9) 梵志眾等，喜而追曰：吾願成矣！求人得人，馳趣相見，同聲歎曰：樹神歎德，注仰虛心，具說所嗟，故來投託，冀示法齋！
- (10) 住車答曰：所求大善，吾有尊師，號曰如來，眾祐，度脫人類，近在祇洹，可共親造。
- (11) 即皆敬諾，恭肅進前，遙見如來，情喜難量，五體投地，退坐

一面，皆共長跪，白世尊曰：本初發家，欲至三池，沐浴求仙，經由樹神所陳如此，是故投化，願示極靈。

(12) 於是世尊因其所行，而說偈言：

雖裸剪髮，長服草衣，沐浴踞石，奈疑結何？  
不伐殺燒，亦不求勝，仁愛天下，所適無怨。

(13) 五百梵志聞偈歡喜，皆作沙門，得應真道。美音宗等逮得法眼。

(14) 諸比丘白佛言：五百梵志及長者等，本行何德，得道何速？

(15) 世尊告曰：過去久遠時，世有佛名曰迦葉，為諸弟子說法，當來五濁之時。時有梵志長者千人，同發是言：令我遭見釋迦文佛。爾時梵志者今此等梵志是，爾時長者今美音等是，從是因緣見我便解。

(16) 比丘歡喜，作禮奉行。

### 法句譬喻經卷第三

#### 喻老耄品第十九

#### 【42】

(1) 昔佛在舍衛國祇樹精舍，食後為天人、帝王、臣民、四輩弟子說甘露法。

(2) 時有遠方長老婆羅門七人，來至佛所，稽首於地，叉手白佛言：吾等遠人伏聞聖化，久當歸命而多諸礙，今乃得來覲睹聖顏，願為弟子，得滅眾苦。

(3) 佛即受之，悉為沙門，即令七人共止一房。然此七人，睹見世尊，尋為得道，不惟無常，共坐房中，但思世事，小語大笑，不計成敗，命日促盡，不與人期，但共喜笑，迷意三界。

(4) 佛以三達智，知命欲盡，佛哀愍之，起至其房，而告之曰：卿等為道當求度世，何為大笑也？一切眾生以五事自恃，何謂為五？一者恃怙年少，二者恃怙端政，三者恃怙多力，四者恃怙財富，五者恃怙貴姓，卿等七人小語大笑，為何所恃？

(5) 於是世尊即說偈言：

何喜何笑，念常熾然，深蔽幽冥，不如求定。

見身形範，倚以為安，多想致病，豈知不真。  
老則色衰，病無光澤，皮緩肌縮，死命近促。  
身死神從，如御棄車，肉消骨散，身何可怙。

(6) 佛說偈已，七比丘意解望止，即於佛前得阿羅漢道。

【43】

- (1) 昔佛在舍衛精舍，為諸天人、帝王說法。
- (2) 時有婆羅門村，五百餘家中，有五百年少婆羅門，修婆羅術，為人憍慢，不敬長老，貢高自貴，以此為常。
- (3) 五百梵志歎自議言：沙門瞿曇自稱為佛，三達權智，無敢共論者，吾等可共請求論議，事事詰問，知為何如？即辦供具，往請佛來。
- (4) 佛與諸弟子，往到梵志村中，坐畢行水，食訖澡手，時有長老梵志夫婦二人，於此村中共行乞丐，佛知其本大富無數，曾作大臣。
- (5) 佛即問諸年少梵志：汝等識長老婆羅門不？皆言曾識。
- (6) 又問：本為何似也？曰：本為大臣，財富無數。
- (7) 今者何故復行乞丐？皆言：散用無道，是以守貧。
- (8) 佛告諸婆羅門：世有四事，人不能行，行者得福，不致此貧，何謂為四？一者年盛力壯慎莫憍慢，二者年老精進不貪姪勃，三者有財珍寶常念布施，四者就師學問聽受正言。如此老公，不行四事，謂之有常，不計成敗，一旦離散，譬如老鵠，守此空池，永無所獲。
- (9) 於是世尊即說偈言：

晝夜慢惰，老不止姪，有財不施，不受佛言，  
有此四蔽，為自侵欺。  
咄嗟老至，色變作耄，少時如意，老見蹈踐。  
不修梵行，又不富財，老如白鵠，守斯空池。  
既不守戒，又不積財，老羸氣竭，思故何逮。  
老如秋葉，行穢鑑錄，命疾脫至，不容後悔。

(10) 佛告梵志：世有四時，行道得福、得度，可免眾苦，何謂為四？

一者年少有力勢時，二者富貴有財物時，三者得遇三尊好福田時，四者當計萬物憂離散時，行此四事，所願皆獲，必得道跡。

(11) 於是世尊重說偈言：

命欲日夜盡，及時可勤力，世間諦非常，莫惑墮冥中。  
當學然意燈，自練求智慧，離垢勿染污，執燭觀道地。

(12) 佛說是時，放大光明，照曜天地。五百年少梵志，因此心解，衣毛為豎，起禮佛足，白佛言：歸命世尊，願為弟子。

(13) 佛言：善來比丘！即成沙門，得羅漢道。村人大小皆得道跡，莫不歡欣。

## 愛身品第二十

【44】

(1) 昔有一國名多摩羅，去城七里有精舍，五百沙門常處其中，讀經行道。有一長老比丘名摩訶盧，為人闇塞，五百道人傳共教之，數年之中不得一偈，眾共輕之，不將會同，常守精舍，敕令掃除。

(2) 後日國王請諸道人入宮供養，摩訶盧比丘自念言：我生世間，闇塞如此，不知一偈，人所薄賤，用是活為？即持繩至後園中大樹下，欲自絞死。

(3) 佛以道眼遙見如是，化作樹神，半身人現而呵之曰：咄咄！比丘何為作此！

(4) 摩訶盧即具陳辛苦，化神呵曰：勿得作是！且聽我言：往迦葉佛時，卿作三藏沙門，有五百弟子，自以多智輕慢眾人，吝惜經義，初不訓誨，是以世所生諸根闇鈍，但當自責，何為自賊？

(5) 於是世尊現神光像，即說偈言：

自愛身者，慎護所守，希望欲解，學正不寐。  
身為第一，常自勉學，利能誨人，不倦則智。  
學先自正，然後正人，調身入慧，必遷為上。  
身不能利，安能利人，心調體正，何願不至。

本我所造，後我自受，為惡自更，如剛鑽珠。

- (6) 摩訶盧比丘見佛現身光像，悲喜悚慄，稽首佛足，思惟偈義，即入定意，尋在佛前，逮得羅漢道，自識宿命，無數世事，三藏眾經即貫在心。
- (7) 佛語摩訶盧：著衣持鉢，就王宮食，在五百道人上坐，此諸道人是卿先世五百弟子，還為說法，令得道跡，并使國王明信罪福。
- (8) 即受佛教，徑入宮裏，坐於上座。眾人心恚，怪其所以，各護王意，不敢呵譴，念其愚冥，不曉達觀，心為之疲。王便下食，手自斟酌。
- (9) 摩訶盧即為達觀，音如雷震，清辭雨下，坐上道人，驚怖自悔，皆得羅漢。為王說法，莫不解釋。群臣、百官皆得須陀洹道。

#### 【45】

- (1) 昔佛在舍衛國。有五百婆羅門，常求佛便，欲誹謗之。
- (2) 佛三達之智，普見人心，愍欲度之，其果未熟，因緣未到，一切罪福欲來至時，自作因緣而迎罪福。此諸梵志宿有微福，應當得度，福德牽之，自作方宜。
- (3) 五百梵志自共議言：當使屠兒殺生，請佛及諸眾僧，佛必受請讚歎屠兒，吾等便前而共譏之。
- (4) 於是屠兒為之請佛。佛即受請，告屠兒言：果熟自墮，福熟自度。屠兒還歸，供設飯食。佛將諸弟子到屠兒村中，至檀越舍。
- (5) 梵志大小皆共歡喜：今日乃得佛之便耳，若當讚檀越福德者，當以其前後殺生作罪，持用譏之；佛若當說其由來之罪者，當以今日之福難之，二宜之中，今日乃得佛便耳。
- (6) 佛到即坐，行水下食，於是世尊觀察眾心，應有度者，即出舌覆面舐耳，放大光明，照一城內，即以梵聲，說偈咒願：

如真人教，以道活身，愚者嫉之，見而為惡，行惡得惡，如種苦種。惡自受罪，善自受福，亦各須熟，彼不相代，習善得善，亦如種甜。

- (7) 佛說偈已，五百梵志意自開解，即前禮佛，五體投地，叉手白佛言：頑愚不及，未達聖訓，唯願愍育，得為沙門。佛即聽受，

皆為沙門。

- (8) 村人大小見佛變化，莫不歡欣，皆得道跡，稱之賢聖，無復屠兒之名。佛食畢訖，即還精舍。

## 世俗品第二十一

### 【46】

- (1) 昔有婆羅門國王，名多味寫。其王奉事異道九十六種。王忽一日發於善心，欲大布施。如婆羅門法，積七寶如山，持用布施，有來乞者聽令自取重一撮去，如是數日，其積不減。
- (2) 佛知是王宿福應度，化作梵志，往到其國。
- (3) 王出相見，共相禮問起居曰：何所求索？莫自疑難。
- (4) 梵志答言：吾從遠來，欲乞珍寶，持作舍宅。
- (5) 王言：大善！自取重一撮去。梵志取一撮，行七步還著故處。
- (6) 王問：何故不取？梵志答曰：此纔足作舍廬耳，復當娶婦，俱不足用，是以不取。
- (7) 王言：更取三撮。梵志即取，行七步復還著故處。
- (8) 王問梵志：何以復爾？答曰：此足娶婦，復無田地、奴婢、牛馬，計復不足，是以息意也。
- (9) 王言：更取七撮。梵志即取，行七步復還著故處。
- (10) 王言：復何意故？梵志答言：若有男女當復嫁娶，吉凶用費，計不足用，是以不取。
- (11) 王言：盡以積寶，持用相上。梵志受而捨去。
- (12) 王甚怪之，重問意故。梵志答曰：本來乞丐欲用生活，諦念人命處世無幾，萬物無常，旦夕難保，因緣遂重，憂苦日深，積寶如山，無益於己，貪欲規圖，唐自艱苦，不如息意，求無為道，是以不取。
- (13) 王意開解，願奉明教。
- (14) 於是梵志現佛光相，踊住空中，為說偈言：

雖得積珍寶，崇高至於天，如是滿世間，不如見道跡。  
不善像如善，愛如似不愛，以苦為樂相，狂夫為所厭。

- (15) 於是國王見佛光相，遍照天地，又聞此偈，踊躍歡喜。

(16) 王及群臣即受五戒，得須陀洹道。

## 述佛品第二十二

### 【47】

- (1) 昔佛在摩竭提界，善勝道場元吉樹下，德力降魔，坐自惟曰：甘露法鼓聞於三千，昔父王遣五人，供養麻米，執侍有勞，功報應敘，此五人者，在波羅奈國。
- (2) 於是如來從樹下起，相好嚴儀，明暉天地，威神震動，見者喜悅，至波羅奈國，未至中道，逢一梵志，名曰憂呼，辭親離家，求師學道，瞻睹尊妙，驚喜交集，下在道側，舉聲歎曰：威靈感人，儀雅挺特，本事何師，乃得斯容？
- (3) 佛為憂呼而作頌曰：

八正覺自得，無離無所染，愛盡破欲網，自然無師受。  
我行無師保，志獨無伴侶，積一得作佛，從是通聖道。

- (4) 憂呼聞偈，悵惘不解，即問世尊：瞿曇如行？佛告梵志：欲詣波羅奈國，擊甘露法鼓，轉無上法輪，三界眾聖未曾有轉法輪，遷人入泥洹，如我今者也。
- (5) 憂呼大喜：善哉！善哉！如佛言者，願聞甘露，如應說法。梵志揖已，即便過去，未到師所，於道路宿，至其夜半，卒便命終。
- (6) 佛以道眼，見其已終，愍傷之曰：世間愚癡，謂命有常，見佛捨去而獨喪亡，法鼓震動而獨不聞，甘露滅苦而獨不嘗，展轉五道，生死彌長，經歷劫數，何時得度？
- (7) 佛以慈愍而說偈言：

見諦淨無穢，已度五道淵，佛出照世間，為除眾憂苦。  
得生人道難，生壽亦難得，世間有佛難，佛法難得聞。

- (8) 佛說此偈時，空中五百天人，聞偈歡忻，皆得須陀洹道。

## 安寧品第二十三

### 【48】

- (1) 昔佛在羅閱祇。東南三百里，有山民村五百餘家，為人剛強難以導化，宿世福願，應蒙開度。
- (2) 於是世尊化作沙門，至村分衛，分衛畢竟，出於村外樹下坐定，入泥洹三昧，至于七日，不喘不息，不動不轉。
- (3) 村人見之，謂為命終，共相謂曰：沙門已死，當共葬送。各持束薪就往燒之，火然薪盡。
- (4) 佛從坐起，現道神化，光明照曜，感動十方，現變畢訖，還坐樹下，容體靜安，怡悅如故。
- (5) 村人大小莫不驚懼，稽首謝曰：山民頑野不識神人，妄以薪火燒於未然，自惟獲罪，重於太山，唯垂慈赦，不見咎怨，不審神人得無傷病乎？將無愁感乎？將無飢渴乎？將無熱惱乎？
- (6) 於是世尊和顏含笑，而說偈言：

我生已安，不慍於怨，眾人有怨，我行無怨。  
我生已安，不病於病，眾人有病，我行無病。  
我生已安，不感於憂，眾人有憂，我行無憂。  
我生已安，清淨無為，以樂為食，如光音天。  
我生已安，恬惓無事，彌薪國火，安能燒我。

- (7) 爾時，村中五百人聞說偈已，皆作沙門，得羅漢道，村人大小皆信三尊。佛與五百人飛還竹園。賢者阿難見佛與得道者俱來，前白佛言：此諸比丘，有何異德乃使世尊自往臨度？
- (8) 佛告阿難：我未下為佛時，世有辟支佛常處是山，去村不遠在一樹下欲般泥洹，現道神德，便取滅度。村人持薪火就往燒之，斂取舍利，著寶瓶中埋在山頂，各共求願：願後得道。如是沙門滅度快樂也。緣此福故，應當得道，是故如來往度之耳。
- (9) 佛說是時，天人無數皆得道跡。

### 【49】

- (1) 昔佛在舍衛國精舍，時有四比丘坐於樹下，共相問言：一切世間何者最苦？

- (2) 一人言：天下之苦無過婬欲，一人言：世間之苦無過瞋恚，一人言：世間之苦無過飢渴，一人言：天下之苦莫過驚怖。共諍苦義云云不止。
- (3) 佛知其言往到其所，問諸比丘屬論何事？即起作禮具白所論。
- (4) 佛言：比丘汝等所論不究苦義，天下之苦莫過有身。飢渴、寒熱、瞋恚、驚怖、色欲怨禍，皆由於身，夫身者眾苦之本，患禍之元，勞心極慮，憂畏萬端，三界蠕動，更相殘賊，吾我縛著，生死不息，皆由於身。欲離世苦，當求寂滅，攝心守正，怕然無想，可得泥洹，此為最樂，於是世尊即說偈言：

熱無過婬，毒無過怒，苦無過身，樂無過滅。  
無樂小樂，小辯小慧，觀求大者，乃獲大安。  
我為世尊，長解無憂，正度三有，獨降眾魔。

- (5) 佛說偈已，告諸比丘：往昔久遠無數世，時有五通比丘，名精進力，在山中樹下閑寂求道。時有四禽依附左右，常得安穩，一者鴿、二者烏、三者毒蛇、四者鹿。是四禽者，晝行求食，暮則來還。四禽一夜自相問言：世間之苦何者為重？
- (6) 烏言：飢渴最苦，飢渴之時身羸目冥神識不寧，投身羅網不顧鋒刃，我等喪身莫不由之，以此言之飢渴為苦。
- (7) 鴿言：婬欲最苦，色欲熾盛無所顧念，危身滅命莫不由之。
- (8) 毒蛇言：瞋恚最苦，毒意一起不避親疏，亦能殺人復能自殺。
- (9) 鹿言：驚怖最苦我遊林野心恒怵惕，畏懼獵師及諸豺狼，彷彿有聲奔投坑岸，母子相捐肝膽悼悸，以此言之驚怖為苦。
- (10) 比丘聞之，即告之曰：汝等所論是其末耳，不究苦本，天下之苦無過有身，身為苦器憂畏無量，吾以是故捨俗學道，滅意斷想，不貪四大，欲斷苦原，志存泥洹，泥洹道者寂滅無形，憂患永畢，爾乃大安。四禽聞之，心即開解。
- (11) 佛告比丘：爾時五通比丘則吾身是，時四禽者今汝四人是也。前世已聞苦本之義，如何今日方復云爾？
- (12) 比丘聞之，慚愧自責，即於佛前得羅漢道。

## 【50】

- (1) 昔羅閱祇南四千里有國，奉事梵志數千人。時國大旱，三年不

雨，禱祠諸神無所不遍。王問梵志，問其所由。

- (2) 諸梵志言：吾等當齋戒訖竟，當遣人與梵天相聞問其災異。王言大善，齋戒所乏願見告示。
- (3) 諸梵志言：當得二十車薪酥蜜膏油、華香旛蓋、金銀祭器，盡用須之。王即辦送。出至城外，去城七里平廣之地，積薪如山，共相推獎：其有不惜身者終生梵天。
- (4) 選得七人，當就火燒遣至梵天。七人受祭，咒願訖，蹶使上薪。從下放火當燒殺之，煙焰炯然，熱氣直至。
- (5) 七人惶懼，左右求救，無有救者，舉聲曰：三界之中，寧有大慈愍念我厄者，願受自歸。
- (6) 佛遙知之，尋聲往救，在虛空中顯現相好，七人見佛，悲喜跳踊，唯願自歸救我痛熱。
- (7) 於是世尊即說偈言：

或多自歸，山川樹神，厝立圖像，禱祠求福。  
自歸如是，非吉非上，彼不能來，度汝眾苦。  
如有自歸，佛法僧眾，道德四諦，必見正慧。  
生死極苦，從諦得度，度世八難，斯除眾苦。  
自歸三尊，最吉最上，唯獨有是，度一切苦。

- (8) 佛說渴訖，火聲尋滅。七人獲安心喜無量。梵志、國人莫不驚悚，仰瞻世尊，光相赫奕，分身散體，東沒西現，存亡自由，身出水火，五色晃昱，眾人見之，五體歸命。
- (9) 於是七人從薪下出，悲喜交集而說偈言：

見聖人快，得依附快，得離愚人，為善獨快。  
守正見快，互說法快，與世無諍，戒具常快。  
使賢居快，如親親會，近仁智者，多聞高遠。

- (10) 於是七人說此偈已，及諸梵志願為弟子。
- (11) 佛即受之，皆為沙門，得羅漢道。國王、臣民咸各修道，天尋大雨，國豐民寧，道化興隆，莫不樂聞。

## 好喜品第二十四

### 【51】

- (1) 昔佛在舍衛精舍，時有四新學比丘，相將至奈樹下坐禪行道，奈華榮茂，色好且香，因相謂曰：世間萬物何者可愛，以快人情？
- (2) 一人言：仲春之月，日木榮華，遊戲原野，此最為樂。
- (3) 一人言：宗親吉會，觴酌交錯，音樂歌舞，此最為樂。
- (4) 一人言：多積財寶，所欲即得，車馬服飾，與眾有異，出入光顯，行者矚目，此最為樂。
- (5) 一人言：妻妾端正，綵服鮮明，香熏芬馥，恣意縱情，此最為樂。
- (6) 佛知四人應可化度，而走意六欲，不惟無常，即呼四人而問之曰：屬坐樹下共論何事？四人以實，具白所樂。
- (7) 佛告四人：汝等所論盡是憂畏危亡之道，非是永安最樂之法也。萬物春榮秋冬衰落，宗親歡娛皆當別離，財寶車馬五家之分，妻妾美色愛憎之主也。凡夫處世，興招怨禍，危身滅族，憂畏無量，三塗八難，苦痛萬端，靡不由之矣，是以比丘捨世求道，志存無為，不貪榮利，自致泥洹乃為最樂，於是世尊即說偈言：

愛喜生憂，愛喜生畏，無所愛喜，何憂何畏？  
好樂生憂，好樂生畏，無所好樂，何憂何畏？  
貪欲生憂，貪欲生畏，解無貪欲，何憂何畏？  
貪法戒成，至誠知慚，行身近道，為眾所愛。  
欲態不出，思正乃語，心無貪愛，必截流度。

- (8) 佛告四比丘：昔有國王名曰普安，與鄰國四王共為親友，請此四王宴會一月，飲食娛樂極歡無比。臨別之日，普安王問四王曰：人居世間以何為樂？一王言：遊戲為樂，一王言：宗親吉會，音樂為樂，一王言：多積財寶，所欲如意為樂，一王言：愛欲恣情，此最為樂。普安王言：卿等所論，是苦惱之本，憂畏之原，前樂後苦，憂悲萬端，皆由此興，不如寂靜無求無欲，淡泊守一，得道為樂。四王聞之，歎喜信解。
- (9) 佛告四比丘：爾時普安王者，我身是也。四王者，汝四人是也。

前已說之，今故不解，生死荏蔓，何由休息？

(10) 時四比丘重聞此義，慚愧悔過，心意開悟，滅意斷欲，得羅漢道。

## 忿怒品第二十五

### 【52】

- (1) 昔佛在羅閱祇耆闍崛山中，時調達與阿闍賈王共議毀佛及諸弟子。王敕國人不得奉佛，眾僧分衛不得施與。時舍利弗、目連、迦葉、須菩提等，及波和提比丘尼等，各將弟子去到他國，唯佛與五百羅漢住崛山中。
- (2) 調達往至阿闍賈所與王議言：佛諸弟子今已迸散，尚有五百弟子在佛左右，願王明日請佛入城，吾當飲五百大象令醉，佛來入城，驅使醉象令踏殺之，盡斷其種，吾當作佛，教化世間。阿闍賈王聞之歡喜，即到佛所稽首作禮，白佛言：明日設薄施，願屈世尊及諸弟子於宮內食。
- (3) 佛知其謀，答言：大善！明旦當往。王退而去，還語調達佛已受請，當念前計，飲象令醉伺候待之。
- (4) 明日食時，佛與五百羅漢共入城門。五百醉象鳴鼻而前，唐突牆壁，樹木摧折，行人驚怖，一城戰慄。五百羅漢飛在空中，獨有阿難在佛邊住，醉象齊頭，徑前趣佛。
- (5) 佛因舉手，五指應時化為五百師子王，同聲俱吼，震動天地，於是醉象屈膝伏地，不敢舉頭，酒醉尋解，垂淚悔過。王及臣民莫不驚肅。世尊徐前至王殿上，與諸羅漢食訖咒願。
- (6) 王白佛言：稟性不明，信彼讒言，興造逆惡，圖為不軌，願垂大慈，恕我迷愚。
- (7) 於是世尊告阿闍賈及諸大眾：世有八事，興長誹謗，皆由名譽，又貪利養，以致大罪累劫不息，何等為八？利、衰、毀、譽、稱、譏、苦、樂，自古至今，眇不為惑，於是世尊即說偈言：

人相謗毀，自古至今，既毀多言，又毀訥忍，  
亦毀中和，世無不毀。  
欲意非聖，不能折中，一毀一譽，但為名利。  
明智所譽，唯稱正賢，慧人守戒，無所譏謗。

如羅漢淨，莫而誣謗，諸天咨嗟，梵釋所敬。

- (8) 佛說偈已，重告王曰：昔有國王，喜食鴈肉，常遣獵師張網捕鴈，日送一鴈以供王食。時有鴈王，將五百鴈飛下求食，鴈王墮網，為獵師所得，餘鴈驚飛，徘徊不去。時有一鴈，連翻追隨，不避弓矢，悲鳴吐血，晝夜不息。獵師見之，感憐其義，即放鴈王，令相隨去，群鴈得王，歡喜迴繞。爾時獵師具以聞王，王感其義，斷不捕鴈。
- (9) 佛告阿闍賈王：爾時鴈王者，我身是也。一鴈者，阿難是也。五百群鴈，今五百羅漢是也。食鴈國王者，今大王是也。時獵師者，今調達是也。前世已來恒欲害我，我以大慈之力，因而得濟，不念怨惡自致得佛。
- (10) 佛說是時，王及群臣莫不開解。

## 塵垢品第二十六

### 【53】

- (1) 昔有一人，無有兄弟，為小兒時，父母憐愛，赤心悽悽，欲令成就，將詣師友，勸之書學，其兒僑蹇，永不用心，朝受暮棄，初不誦習，如是積年，無所知識。父母呼歸，令治家業。其兒僑誕，不念勤力，家道遂窮，眾事妨廢，其兒放縱，無所顧錄，糶賣家物，快心恣意，亂頭徒跣，衣服不淨，慳貪唐突，不避恥辱，愚癡自用，人所惡賤，國人咸憎，謂之凶惡，出入行步，無與語者。不自知惡，反咎眾人，上怨父母，次責師友，先祖神靈，不肯祐助，使我賴帶，輾軻如此，不如事佛，可得其福，即到佛所，為佛作禮，前白佛言：佛道寬弘，無所不容，願為弟子，乞蒙聽許。
- (2) 佛告此人：夫欲求道，當行清淨行，汝齎俗垢，入我道中，唐自去就，何所長益？不如歸家，孝事父母，誦習師教，沒命不忘，勤修居業，富樂無憂，以禮自將，不犯非宜，沐浴衣服，慎於言行，執心守一，所作事辦，敏行精修，人所歎慕，如此之行，乃可為道耳。
- (3) 於是世尊即說偈言：

不誦為言垢，不勤為家垢，不嚴為色垢，放逸為事垢。  
慳為惠施垢，不善為行垢，今世亦後世，惡法為常垢。  
垢中之垢，莫甚於癡，學當捨此，比丘無垢。

- (4) 其人聞偈，自知僑癡，即承佛教，歡喜還歸，思惟偈義，改悔自新，孝事父母，尊敬師長，誦習經道，勤修居業，奉戒自攝，非道不行，宗族稱孝，鄉黨稱悌，善名遐布，國內稱賢。
- (5) 三年之後，還至佛所，五體作禮，懇惻自陳，尊敬至真，得全形骸，棄惡為善，上下蒙慶，願垂大慈，接度為道。
- (6) 佛言：善哉！鬚髮尋落，即成沙門，內思止觀，四諦正道，精進日登，得羅漢道。

## 奉持品第二十七

### 【54】

- (1) 昔有長老婆羅門，名薩遮尼犍，才明多智，國中第一，有五百弟子，貢高自大，不顧天下，以鐵鑠鑠腹。人問其故，答曰：恐智溢出故也。聞佛出世，道化明達，心懷妒嫉，寤寐不安，語諸弟子：吾聞瞿曇沙門自稱為佛，今當往問深妙之事，令其心悸，不知所陳。
- (2) 即與弟子往到祇洹列住門外，遙見世尊威光赫奕如，日初出，五情騰踊，喜懼交錯，於是徑前為佛作禮。
- (3) 佛命就座坐訖，尼犍問佛言：何謂為道？何謂為智？何謂為長老？何謂為端正？何謂為沙門？何謂為比丘？何謂為仁明？何謂為有道？何謂為奉戒？若能解答，願為弟子。
- (4) 於是世尊觀其所應，以偈答言：

常愍好學，正心以行，唯懷寶慧，是謂為道。  
所謂智者，不必辯言，無恐無懼，守善為智。  
所謂老者，不以年耆，形熟髮白，蠢愚而已。  
謂懷諦法，順調慈仁，明達清潔，是為長老。  
所謂端正，非色如華，貪嫉虛飾，言行有違。  
謂能捨惡，根原已斷，慧而無恚，是謂端正。  
所謂沙門，不必除髮，妄語貪取，有欲如凡。

謂能止惡，恢廓弘道，息心滅意，是謂沙門。  
所謂比丘，非持乞食，邪行望彼，求名而已。  
謂捨罪業，淨修梵行，慧能破惡，是為比丘。  
所謂仁明，非口所言，用心不精，外順而已。  
謂心無為，內行清虛，此彼寂滅，是為仁明。  
所謂有道，非救一物，普濟天下，無害無道。  
奉持法者，不以多言，雖素少聞，身依法行。  
守道不忘，是為奉法。

(5) 薩遮尼犍及五百弟子，聞佛此偈，歡喜開解，棄捐貢高，皆作沙門。

(6) 尼乾一人發菩薩心，五百弟子皆得阿羅漢道。

## 道行品第二十八

### 【55】

- (1) 昔有婆羅門，年少出家學道，至年六十不能得道。婆羅門法，六十不得道，然後歸家娶婦為居，生得一男，端正可愛，至年七歲，書學聰了，才辯出口，有踰人之操，卒得重病，一宿命終。
- (2) 梵志憐惜，不能自勝，伏其屍上，氣絕復蘇，親族諫喻，強奪殯殮，埋著城外。梵志自念：我今啼哭，計無所益，不如往至閻羅王所，乞索兒命。
- (3) 於是梵志沐浴齋戒，齎持華香，發舍而去，所在問人：閻羅王所治處為在何許？展轉前行，行數千里，至深山中，見諸得道梵志，復問如前。
- (4) 諸梵志問曰：卿問閻羅王所治處，欲求何等？答言：我有一子，辯慧過人，近日卒亡，悲窮懊惱，不能自解，欲至閻羅王所，乞索兒命，還將歸家，養以備老。
- (5) 諸梵志等愍其愚癡，即告之曰：閻羅王所治處，非是生人可得到也。當視卿方宜，從此西行四百餘里有大川，其中有城，此是諸天神案行世間，停宿之城，閻羅王常以月八日案行，必過此城，卿持齋戒往必見之。
- (6) 梵志歡喜，奉教而去，到其川中，見好城郭，宮殿屋宇如忉利

- 天。梵志詣門，燒香翹腳，咒願求見閻羅王。王敕門人問之。
- (7) 梵志啟言：晚生一男，欲以備老，養育七歲，近日命終，唯願大王垂恩布施，還我兒命。
- (8) 閻羅王言：大善！卿兒今在東園中戲，自往將去。
- (9) 梵志即往，見兒與諸小兒共戲，即前抱之，向之啼泣曰：我晝夜念汝，食寐不甘，汝寧念父母辛苦以不？
- (10) 小兒驚喚，逆呵之曰：癡騃老翁，不達道理，寄住須臾，名之為子，勿妄多言，不如早去，今我此間自有父母，邂逅之間唐自抱乎？
- (11) 梵志悵然，悲泣而去，即自念言：我聞瞿曇沙門，知人魂神變化之道，當往問之。於是梵志即還，求至佛所。
- (12) 時佛在舍衛祇洹為大眾說法。梵志見佛，稽首作禮，具以本末，向佛陳之，實是我兒不肯見認，反謂我為癡騃老翁，寄住須臾，認我為子，永無父子之情，何緣乃爾？
- (13) 佛告梵志：汝實愚癡，人死神去，便更受形，父母妻子因緣會居，譬如寄客，起則離散，愚迷縛著，計為己有，憂悲苦惱，不識根本，沈溺生死，未央休息，唯有慧者不貪恩愛，覺苦捨習，勤修經戒，滅除識想，生死得盡。
- (14) 於是世尊即說偈言：

人榮妻子，不觀病法，死命卒至，如水湍驟。  
父子不救，餘親何望，命盡怙親，如盲守錠。  
慧解是意，可修經戒，佯行度世，一切除苦。  
遠離諸淵，如風卻雲，已滅思想，是為知見。  
智為世長，愴樂無為，如受正教，生死得盡。

- (15) 梵志聞偈，霍然意解，知命無常，妻子如客，稽首委質，願為沙門。
- (16) 佛言：善哉！鬚髮自落，法衣在身，即成比丘，思惟偈義，滅愛斷想，即於座上得阿羅漢道。

## 廣衍品第二十九

### 【56】

- (1) 昔佛在舍衛國說法教化，天龍、鬼神、帝王、人民三時往聽。
- (2) 彼時國王名波斯匿，為人憍慢，放恣情欲，目惑於色，耳亂於聲，鼻著馨香，口恣五味，身受細滑，食飲極美，初無厭足，食遂進多，恒苦飢虛，廚膳不廢，以食為常，身體肥盛，乘輿不勝，臥起呼吸，但苦短氣，氣閉息絕，經時驚覺，坐臥呻吟，恒苦身重，不能轉側，以身為患。便敕嚴駕，往到佛所，侍者扶持問訊，卻坐叉手，白佛言：世尊！違遠侍觀，諮受無階，不知何罪，身為自肥，不能自覺，何故使爾，每自患之，是以違替，不數禮覲。
- (3) 佛告大王：人有五事，令人常肥，一者數食，二者喜眠，三者憍樂，四者無愁，五者無事，是為五事，喜令人肥，若欲不肥，減食羸燥，然後乃瘦。
- (4) 於是世尊即說偈言：

人當有念意，每食知自少，從是痛用薄，節消而保壽。

- (5) 王聞此偈，歡喜無量，即呼廚士而告之曰：受誦此偈，若下食時，先為我說，然後下食。
- (6) 王辭還宮，廚士下食，輒便說偈，王聞偈喜，日減一匙，食轉減少，遂以身輕，即瘦如前，自見如此，歡欣念佛，即起步行，往到佛所，為佛作禮。
- (7) 佛命令坐而問王曰：車馬人從，為所在也，何緣步行？王喜白佛：前得佛教，奉行如法，今者身輕，世尊之力，是以步來，知為何如。
- (8) 佛告大王：世人如此，不知無常，長身情欲，不念為福，人死神去，留身墳塚，智者養神，愚者養身，若能解此，奉修聖教，於是世尊重說偈言：

人之無聞，老如特牛，但長肌肥，無有智慧。  
生死無聊，往來艱難，意倚貪身，更苦無端。  
慧人見苦，是以棄身，減意斷欲，愛盡無生。

(9) 王重聞偈，欣然意解，即發無上正真道意，聽者無數皆得法眼。

### 地獄品第三十

#### 【57】

- (1) 昔舍衛國有婆羅門師，名富蘭迦葉，與五百弟子相隨，國王、人民先共奉事。佛初得道，與諸弟子從羅閱祇至舍衛國，身相顯赫，道教弘美，國王中宮率土人民，莫不奉敬。
- (2) 於是富蘭迦葉起嫉妒意，欲毀世尊，獨望敬事，即將弟子見波斯匿王而自陳曰：吾等長老先學國之舊師，沙門瞿曇後出求道，實無神聖，自稱為佛，而王捨我，欲專奉之，今欲與佛拏試道德，知誰為勝，勝者王便終身奉之。
- (3) 王言：大善。王即嚴駕，往到佛所，禮畢白言：富蘭迦葉欲與世尊拏盡道力，現神變化，不審世尊為可爾不？
- (4) 佛言：大佳！結期七日，當拏變化。
- (5) 王於城東，平廣好地立二高座，高四十丈，七寶莊校，施設幢幡，整頓座席，二座中間相去二里。二部弟子各坐其下，國王、群臣、大眾雲集，欲觀二人拏其神化。
- (6) 於時迦葉與諸弟子先到座所，登梯而上。有鬼神王名曰般師，見迦葉等虛妄嫉妒，即起大風吹其高座，坐具顛倒，幢幡飛揚，雨沙礫石，眼不得視。世尊高座淡然不動。
- (7) 佛與大眾庠序而來，方向高座，忽然已上，眾僧一切寂然次坐。
- (8) 王及群臣加敬稽首白佛言：願垂神化，厭伏邪見，并令國人明信正真。
- (9) 於是世尊即於座上，霍然不現，即昇虛空，奮大光明，東沒西現，四方亦爾，身出水火，上下交易，坐臥空中十二變化，沒身不現，還在座上。天龍、鬼神華香供養，讚善之聲，震動天地。
- (10) 富蘭迦葉自知無道，低頭慚愧，不敢舉目。於是金剛力士舉金剛杵，杵頭火出，以擬迦葉，何以不現卿變化乎？
- (11) 迦葉惶怖，投座而走，五百弟子奔波迸散。世尊威顏，容無欣感，還到祇樹給孤獨園。國王群臣，歡喜辭退。
- (12) 於是富蘭迦葉與諸弟子受辱而去，去至道中，逢一老優婆夷，字摩尼，逆罵之曰：卿等群愚不自忖度，而欲與佛比拏道德，

狂愚欺誑，不知羞恥，亦可不須持此面目行於世間也。

- (13) 富蘭迦葉羞諸弟子至江水邊，誑諸弟子：我今投水必生梵天，若我不還，則知彼樂。
- (14) 諸弟子待之不還，自共議言：師必上天，我何宜住？一一投水，冀當隨師。不知罪牽，皆墮地獄。
- (15) 後日國王聞其如此，甚驚怪之，往到佛所，白佛言：富蘭迦葉師徒迷愚，何緣乃爾？
- (16) 佛告王曰：富蘭迦葉師徒重罪有二，一者三毒熾盛，自稱得道，二者謗毀如來，欲望敬事。以此二罪應墮地獄，殃咎催逼，使其投河，身死神去，受苦無量。是以智者守攝其心，內不興惡，外罪不至，譬如邊城，與寇連接，守備牢固，無所畏懼，內人安穩，外寇不入，智者自護，亦復如是。
- (17) 於是世尊即說偈言：

妄證求賂，行已不正，怨譖良人，以枉治世，罪牽斯人，自投於坑。  
如備邊城，中外牢固，自守其心，非法不生，行缺致憂，令墮地獄。

- (18) 佛說偈已，重告王曰：乃往昔時有二獼猴王，各主五百獼猴，一王起嫉妒，意欲殺一王，規圖獨治，便往共鬥，數數不如，羞慚退去，到大海邊海曲之中，有水聚沫，風吹積聚高數百丈，獼猴王愚癡，謂是雪山，語群輩言：久聞海中有雪山，其中快樂，甘果恣口，今日乃見，吾當先往行視，若審樂者不能復還，若不樂者當來語汝。於是上樹盡力跳騰，投聚沫中，溺沒海底。餘者怪之不出，謂必大樂，一一投中斷群溺死。
- (19) 佛告王曰：爾時嫉妒獼猴王者，今富蘭迦葉是也。群輩者今富蘭迦葉弟子五百人是也。彼一獼猴王者，我身是也。富蘭迦葉前世坐懷嫉妒，為罪所牽，自投聚沫，絕群斷種，今復誹謗，盡投江河，罪對使然，累劫無限。
- (20) 王聞信解，作禮而去。

### 【58】

- (1) 昔有七比丘入山學道，十二年中不能得道，自共議言：學道甚難，毀形執節，不避寒苦，終身乞食，受辱難堪，道卒叵得，罪難可除，唐自勞勤，殞命山中，不如歸家，修立門戶，娶妻

- 養子，廣為利業，快心樂意，安知後事。於是七人即起出山。
- (2) 佛遙知之，應當得度，不忍小苦，終墮地獄，甚可憐傷。佛即化作沙門，往到谷口，逢七比丘，化人問曰：久承學道，何以來出？
  - (3) 七人答言：學道勤苦，罪根難拔，分衛乞食，受辱難堪，又此山中，無供養者，瓌瓌積年，恒守儉約，唐自困苦，道不可得，且欲還家，廣求利業，大作資財，後老求道。
  - (4) 化沙門言：且止且止！聽我所言：人命無常，旦不保夕，學道雖難，前苦後樂，居家艱難，億劫無息，妻息會止，願同安利，欲望永樂，不遭患難，是猶治病服毒，有增無損也。三界有形皆有憂惱，唯有信、戒、無放逸意，精進得道，眾苦永畢。
  - (5) 於是化沙門現佛身相，光像巍巍，即說偈言：

學難捨罪難，居在家亦難，會止同利難，艱難無過有。  
比丘乞求難，何可不自勉，精進得自然，終無欲於人。  
有信則戒成，從戒多致寶，亦從得諧偶，在所見供養。  
一坐一處臥，一行不放恣，守一以正心，心樂居樹間。

- (6) 於是七比丘見佛身相，又聞此偈，慚怖戰慄，五體投地，稽首佛足，攝心悔過，作禮而去，還入山中，殞命精進，思惟偈義，守一正心，閑居寂滅，得羅漢道。

### 象品第三十一

#### 【59】

- (1) 昔者羅雲未得道時，心性羸獷，言少誠信。佛敕羅雲：汝到賢提精舍中住，守口攝意，勤修經戒。羅雲奉教，作禮而去，住九十日，慚愧自悔，晝夜不息。
- (2) 佛往見之，羅雲歡喜，趣前禮佛，安施繩床，攝受震越。
- (3) 佛踞繩床，告羅雲曰：澡盤取水，為吾洗足。羅雲受教，為佛洗足，洗足已訖。
- (4) 佛語羅雲：汝見澡盤中洗足水不？羅雲白佛：唯然見之。
- (5) 佛語羅雲：此水可用食飲、盥漱以不？羅雲白言：不可復用，所以者何？此水本實清淨，今以洗足受於塵垢，是以之故不可

復用。

- (6) 佛語羅雲：汝亦如是，雖為吾子，國王之孫，捨世榮祿，得為沙門，不念精進，攝身守口，三毒垢穢，充滿胸懷，亦如此水，不可復用。
- (7) 佛語羅雲：棄澡盤中水。羅雲即棄。
- (8) 佛語羅雲：澡盤雖空，可用盛飲食不耶？白佛言：不可用，所以然者，用有澡盤之名，曾受不淨故。
- (9) 佛語羅雲：汝亦如是，雖為沙門，口無誠信，心性剛強，不念精進，曾受惡名，亦如澡盤不中盛食。佛以足指，撥卻澡盤。澡盤應時輪轉而走，自跳自墮，數返乃止。
- (10) 佛語羅雲：汝寧惜澡盤恐破不？羅雲白佛：洗足之器，賤價之物，意中雖惜，不大慙。
- (11) 佛語羅雲：汝亦如是，雖為沙門，不攝身口，麤言惡說，多所中傷，眾所不愛，智者不惜，身死神去，輪轉三塗，自生自死，苦惱無量，諸佛賢聖所不愛惜，亦如汝言不惜澡盤。羅雲聞之，慚愧怖悸。
- (12) 佛告羅雲：聽我說喻，昔有國王，有一大象，猛黠能戰，計其力勢，勝五百小象。其王興軍，欲伐逆國，被象鐵鎧，象士御之，以雙予戟，繫象兩牙，復以二劍，繫著兩耳，以曲刃刀，繫象四腳，復以鐵槌，繫著象尾，被象九兵，皆使嚴利。象雖藏鼻，護不用鬥。象士歡喜，知象護身命，所以者何？象鼻軟脆，中箭即死，是以不出鼻鬥耳。象鬥殊久，出鼻求劍。象士不與，念此猛象不惜身命，出鼻求劍欲著鼻頭。王及群臣惜此大象，不復使鬥。
- (13) 佛告羅雲：人犯九惡，唯當護口，如此大象，護鼻不鬥，所以然者，畏中箭死，人亦如是，所以護口，當畏三塗，地獄苦痛，十惡盡犯。不護口者，如此大象，分喪身命不計中箭，出鼻鬥耳。人亦如是，十惡盡犯，不惟三塗毒痛辛苦。若行十善，攝口身意，眾惡不犯，便可得道，長離三塗，無生死患。
- (14) 於是世尊即說偈言：

我如象鬥，不恐中箭，常以誠信，度無戒人。  
譬象調伏，可中王乘，調為尊人，乃受誠信。

(15) 羅雲聞佛懇惻之誨，感激自勵，剋骨不忘，精進和柔，懷忍如地，識想寂靜，得羅漢道。

【60】

- (1) 昔佛在舍衛國祇樹精舍，為四部弟子、天龍、鬼神、帝王、臣民敷演大法。
- (2) 時有長者居士，名曰呵提曇，來詣佛所，為佛作禮，卻坐一面，叉手長跪，白世尊曰：久承洪化，欽仰奉顏，逼私不獲，願垂慈恕。
- (3) 世尊令坐，即問所從來，姓字為何？長跪答曰：本居士種，字呵提曇，乃先王時為王調象。
- (4) 佛問居士：調象之法有幾事乎？答曰：常以三事用調大象，何謂為三？一者剛鉤鉤口，著其羈絆，二者減食，常令飢瘦，三者捶杖，加其楚痛，以此三事乃得調良。
- (5) 又問：施此三事，何所攝治也？曰：鐵鉤鉤口以制強，口不與食飲，以制身獷，如捶杖者，以伏其心，正爾便調。
- (6) 曰：作此伏者，為何所施用？答曰：如是伏已，可中王乘，亦可令鬥，隨意前卻，無有罣礙。
- (7) 又問居士：正有此法，復有其異？答曰：調象之法正如此耳。
- (8) 佛告居士：但能調象，復能自調。即曰：不審自調，其義云何？唯願世尊，彰演未聞。
- (9) 佛告居士：吾亦有三事，用調一切人，亦以自調，得至無為，一者至誠，制御口業，二以慈貞，伏身剛強，三以智慧，滅意癡蓋，持是三事，度脫一切，離三惡道，自致無為，不遭生死、憂悲、苦惱，於是世尊即說偈言：

如象名護財，猛害難禁制，繫絆不與食，而猶慕逸象。  
本意為純行，及常行所安，悉捨降結使，如鉤制象調。  
樂道不放逸，能常自護心，是為拔身苦，如象出于陷。

雖為常調，如彼新馳，亦最善象，不如自調。

彼不能適，人所不至，唯自調者，能到調方。

(10) 居士聞偈，喜慶難量，內情解釋，即得法眼。聽者無數皆得道跡。

## 愛欲品第三十二

### 【61】

- (1) 昔佛在羅閱祇國耆闍崛山精舍之中，為天、人、龍、鬼轉大法輪。時有一人，捨家妻子，來至佛所，為佛作禮，求為沙門。佛即受之，令作沙門，命令樹下坐，思惟道德。
- (2) 比丘受教便入深山，去精舍百餘里，獨坐樹間，思道三年，心不堅固，意欲退還，自念：捨家求道勤苦，不如早歸，見我妻子。作此念已，便起出山。
- (3) 佛以聖達，見此比丘，應當得道，愚故還歸。佛以神足化作沙門，便往逆之，道路相見。
- (3) 化人即問所從來也。此地平坦，可共坐語。於是二人便坐息語，即答化人：吾捨家妻子，求作沙門，處此深山不能得道，與妻子別，不如本願，唐喪我命，勞而無獲，今欲悔還，見我妻子，快相娛樂，後更作計。
- (4) 須臾之間，有老獼猴，久已遠離樹木之間，在無樹之處，於中生活。化沙門問此比丘：是獼猴何故獨在平地，無有樹木，云何樂此？比丘答化人言：我久見此獼猴，以二事故來住此耳，何等為二？一以妻子眷屬群多，不得飲食快樂恣口，二常晝夜上下樹木，腳底穿壞，不得寧息。以此二事故捨樹木，來住是間。
- (5) 二人語頃，復見獼猴走還上樹，化沙門語比丘言：汝見獼猴還趣樹木不也？答曰：見之！此〔猴〕愚癡，得離樹木，群從憤鬧，不厭勞煩而還入中。
- (6) 化人復言：卿亦如是，與此獼猴復何異矣！卿本以二事故來入此山中，何等為二？一以妻婦舍宅為牢獄故，二以兒子眷屬為桎梏故。卿以是故來索求道，斷生死苦，方欲歸家，還著桎梏，入牢獄中，恩愛戀慕，徑趣地獄。
- (7) 化沙門即現相好，丈六金色，光明普照，感動一山，飛鳥走獸，尋光而來，皆識宿命，心內悔過，於是世尊即說偈言：

如樹根深固，雖截猶復生，愛意不盡除，輒當還受苦。  
獼猴如離樹，得脫復趣樹，眾人亦如是，出獄復入獄。  
貪意為常流，習與憍慢并，思想猗婬欲，自覆無所見。

一切意流行，愛結如葛藤，唯慧分別見，能斷意根源。  
夫從愛潤澤，思想為滋蔓，愛欲深無底，老死是用增。

- (8) 比丘見佛，光相炳著，又聞偈言，悚然戰慄，五體投地，懺悔謝過，內自改責，即便卻息，數隨止觀，在於佛前逮得應真。
- (9) 諸天來聽，聞皆歡喜，散華供養，稱善無量。

#### 法句譬喻經卷第四

##### 【62】

- (1) 昔佛在舍衛國為天、人說法。
- (2) 時城中有婆羅門長者，財富無數，為人慳貪，不好布施，食常閉門，不喜人客。若其食時，輒敕門士堅閉門戶，勿令有人妄入門裏。乞丐求索，沙門梵志不能得與其相見。
- (3) 爾時長者歎思美食，便敕其妻，令作飯食，教殺肥雞，薑椒和調，炙之令熟，飲食釘飯，即時已辦，敕外閉門。夫婦二人坐一小兒，著聚中央，便共飲食，父母取雞肉，著兒口中，如是數過，初不肯廢。
- (3) 佛知此長者宿福應度，化作沙門，伺其坐食，現出坐前，咒願且言：多少布施，可得大富。
- (4) 長者舉頭，見化沙門，即罵之曰：汝為道士而無羞恥，室家坐食，何為唐突？
- (5) 沙門答曰：卿自愚癡不知慚羞，今我乞士，何為慚羞？
- (6) 長者問曰：吾及室家自相娛樂，何故慚羞？
- (7) 沙門答曰：卿殺父妻母，供養怨家，不知慚羞，反謂乞士，何不慚羞？於是沙門即說偈言：

所生枝不絕，但用食貪欲，養怨益丘塚，愚人常汲汲。  
雖獄有鈎鑠，慧人不謂牢，愚見妻子飾，染著愛甚牢。  
慧說愛為獄，深固難得出，是故當斷棄，不親欲為安。

- (8) 長者聞偈，驚而問之：道人何故而說此語也？
- (9) 道人答曰：案上雞者，是卿先世時父，以慳貪故常生雞中，為卿所食。此小兒者，往昔作羅剎，卿作賈客，大人乘船入海，每輒流墮羅剎國中，為羅剎所食，如是五百世壽盡，來生為卿

作子，以卿餘罪未畢故來欲相害耳。今是妻者，是卿先世時母，以恩愛深固故今還與卿作婦。今卿愚癡，不識宿命，殺父養怨，以母為妻，五道生死輪轉無際，周旋五道誰能知者，唯有道士見此睹彼，愚者不知，豈不慚羞？

- (10) 於是長者慄然毛豎，如畏怖狀。
- (11) 佛現威神，令識宿命，長者見佛即識宿命，尋則懺悔謝佛，便受五戒。佛為說法，即得須陀洹道。

### 【63】

- (1) 昔佛在舍衛國，祇洹說法。
- (2) 時有年少比丘入城分衛，見一年少女人端正無比，心存色欲，迷結不解，遂便成病，食飲不下，顏色憔悴，委臥不起。同學道人往問訊之：何所患苦？
- (3) 年少比丘具說其意，欲壞道心，從彼愛欲，願不如意，愁結為病。同學諫喻不入其耳，便強扶持，將至佛所，具以事狀，啟白世尊。
- (3) 佛告年少比丘：汝願易得耳，不足愁結也。吾當為汝方便解之，且起食飲。比丘聞之，坦然意喜，氣結便通。
- (4) 於是世尊將此比丘并與大眾，入舍衛城，到好女舍。好女已死，停屍三日，室家悲號，不忍埋藏，身體臭脹，不淨流出。
- (5) 佛告比丘：汝所貪惑好女人者，今已如此，萬物無常，變在呼吸，愚者觀外，不見其惡，纏綿罪網以為快樂，於是世尊即說偈言：

見色心迷惑，不惟觀無常，愚以為美善，安知其非真。  
以姪樂自裹，譬如蠶作繭，智者能斷棄，不眇除眾苦。  
心念放逸者，見姪以為淨，恩愛意盛增，從是造牢獄。  
覺意滅姪者，常念欲不淨，從是出邪獄，能斷老死患。

- (6) 於是年少比丘見此女人，死已三日，面色膨爛，其臭難近，又聞世尊清誨之偈，悵然意悟，自知迷謬，為佛作禮，叩頭悔過。
- (7) 佛授自歸，將還祇洹，沒命精進，得羅漢道。所將大眾、無央數人，見色欲之穢，信無常之證，貪愛望止亦得道跡。

【64】

- (1) 昔佛在舍衛精舍為天、人、龍、鬼說法。
- (2) 時世有大長者，財富無數，有一息男，年十二三。父母命終，其兒年小，未知生活理家之事，泮散財物，數年便盡，久後行乞，由不自供。
- (3) 其父有親友長者，大富無數，一日見之，問其委曲。長者愍念，將歸經紀，以女配之，給與奴婢、車馬、資財無數，更作屋宅，成立門戶，為人懶惰，無有計校，不能生活，坐散財盡，日更飢困。長者以其女故，更與資財，故復如前，遂至貧乏。長者數餉，用之無道，念叵成就，欲奪其婦更嫁與人。宗家共議，女竊聞之，還語其夫：我家群強，勢能奪卿，以卿不能生活故，卿當云何欲作何計也？
- (4) 其夫聞婦言，慚愧自念：是吾薄福，生失覆蓋，不習家計生活之法，今當失婦，乞丐如故，恩愛已行，貪欲情著，今當生別，情豈可勝？思惟反覆，便興惡念，將婦入房：今欲與汝共死一處。即便刺婦，還自刺害，夫婦俱死。
- (5) 奴婢驚走，往告長者。長者大小驚來看視，見其已然，棺殮遣送，如國常法。長者大小憂愁，念女不去，須臾聞佛在世教化說法，見者歡喜，妄憂除患，將家大小，往到佛所，為佛作禮，卻坐一面。
- (6) 佛問長者：為所從來，何以不樂憂愁之色？
- (7) 長者白言：居門不德，前嫁一女，值遇愚夫不能生活，欲奪其婦，便殺婦及身共死，如此遣送適還，過覲世尊。
- (8) 佛告長者：貪欲、瞋恚，世之常病，愚癡、無智患，害之門，三界五道由此墮淵，展轉生死無央數劫，受苦萬端，由尚不悔，豈況愚人能得識此？貪欲之毒，滅身滅族，害及眾生，何況夫婦？於是世尊即說偈言：

愚以貪自縛，不求度彼岸，貪為財愛故，害人亦自害。  
愛欲意為田，姪怒癡為種，故施度世者，得福無有量。  
伴少而貨多，商人怵惕懼，嗜欲賊害命，故慧不貪欲。

- (9) 爾時長者聞佛說偈，欣然歡喜，忘憂除患，即於座上一切大小及諸聽者，破二十億惡，得須陀洹道。

【65】

- (1) 昔佛在舍衛精舍中，為天、龍、鬼、神、帝王、臣民說法。
- (2) 時有遊蕩子二人共為親友，常相追隨一體無異。二人共議欲作沙門，即便相將，來至佛所，為佛作禮，長跪叉手，白佛言：願欲作沙門，唯見聽許。佛便受之，即作沙門。
- (3) 佛令二人共止一房，二人共止，但念世間恩愛榮樂，更共咨嗟情欲形體，說其姿媚，專著不捨，念不止息，不計無常污露不淨，以此鬱佛，病生於內。
- (4) 佛以慧眼，知其想亂，走意於欲，放心不住，以是不度。佛令一人行，便自化作一人入房，問之言：吾等所思，意志不離，可共往觀，視其形體，知為何如，但空想念，疲勞無益！
- (5) 二人相隨至婬女村。佛於村內化作一婬女人，共入其舍而告之曰：吾等道人，受佛禁戒不犯身事，意欲觀女人形容，當顧直如法，於是化女即解瓔珞、香薰、衣裳，裸形而立，臭處難近。
- (6) 二人觀之，具見污露，化沙門即謂一人言：女人之好，但有脂粉、芬薰、眾華、沐浴、塗香，著眾雜色衣裳，以覆污露，強薰以香，欲以人觀，譬如革囊盛屎，有何可貪？於是化比丘即說偈言：

欲我知汝本，意以思想生，我不思想汝，則汝而不有。  
心可則為欲，何必獨五欲，速可絕五欲，是乃為勇力。  
無欲無所畏，恬惓無憂患，欲除使結解，是為長出淵。

- (7) 佛說偈已，現其光相，比丘見之，慚愧悔過，五體投地，為佛作禮。重為說法，欣然得解，便得羅漢。
- (8) 一人行還，見伴顏姿，欣悅於常，即問其伴：獨何如斯？即如事說，佛之大慈愍度如此，蒙世尊恩得免眾苦，於是比丘重為說偈言：

晝夜念嗜欲，意走不念休，見女欲污露，想滅則無憂。

- (9) 其伴比丘聞此偈已，便自思惟，斷欲滅想，即得法眼。

### 利養品第三十三

#### 【66】

- (1) 昔佛將諸弟子，至俱曇彌國美音精舍，為諸天人、神龍說法。
- (2) 時彼國王名曰優填，有大夫人執行仁愛，顯譽清潔。王珍其操，每私恭敬，聞佛來化，嚴駕共出，往至佛所，為佛作禮，卻坐常位。
- (3) 佛為國王及夫人姪女說無常、苦、空，人所由生，合會別離、怨憎會苦，由福生天，由惡入淵。
- (4) 國王夫人歡欣信解，各受五戒，為清信士女，禮佛辭退，還入宮中。
- (5) 時有婆羅門，名曰吉星，生一好女，世間少比，至年十六，無能訶者，懸金千兩，積九十日，募索智者，有能訶此女為不端正者，以金與之，無敢應者。女以長大，應當嫁處，念當與誰？若有端正如我女者，以女與之，聽聞沙門瞿曇釋迦之種，姿容金色，世所希有，當以此女往配與之。
- (6) 即便將至佛所，為佛作禮，白佛言：我女好潔，世間無雙，年大應嫁，世無匹偶，瞿曇端正，可以為雙，故遠將來，以配世尊。
- (7) 佛告吉星：卿女端正是卿家好，如我之好是諸佛好，我之所好其道不同，卿自譽女端正姝好，譬如畫瓶中盛屎尿，有何奇特？好為所在著眼耳鼻口，身之大賊，面首端正，身之大患，破家滅族，殺親害子，皆由女色。吾為沙門，一身獨立，由尚恐危，況受禍災殘賊之貨也？卿自將去，吾不受之。
- (8) 於是梵志瞋恚便去，到優填王所讚女姿媚，具白王言：此女應相當為王妃，今以年大故送與王。
- (9) 王見歡喜，即納受之，拜為第二左夫人，即以印綬金銀珍寶，賜與吉星，拜為輔臣。
- (10) 此女得敘，每協嫉妒，妖蠱迷王，數譖大夫人，如是非一。
- (11) 王返辱曰：卿等妖媚，言返不遜，彼人操行可貴而返譖之。
- (12) 此女心忌猶欲害之，數譖不已，王頗惑之，前後心謀，伺其齋時，因勸白王：今日之樂，宜請右夫人。
- (13) 王便普召敕令皆會，大夫人持齋，獨不應命，反覆三呼，執齋不移。王怒隆盛，遣人拽出，縛著殿前，欲射殺之。

- (14) 夫人不怖，一心歸佛。
- (15) 王自射之，箭還向王，後射輒還，數箭亦爾，時王大怖，自解而問之曰：汝有何術乃致如此？
- (16) 夫人對曰：唯事如來，歸命三尊，朝奉佛齋，過中不餐，加行八事，飾不近身，必是世尊哀顧若茲。
- (17) 王曰：善哉！豈可言不？即出吉星女，還其父母，以大夫人正理宮內。
- (18) 王與大夫人、後宮太子，嚴駕群臣往到佛所，作禮卻坐，叉手聽法，王即白佛，具以如事，向佛陳之。
- (19) 佛告大王：妖蠱女人有八十四態，大態有八，慧人所惡，何謂為八？一者嫉妒、二者妄瞋、三者罵詈、四者咒詛、五者鎮厭、六者慳貪、七者好飾、八者含毒，是為八大態。
- (20) 於是世尊即說偈言：

天雨七寶，欲猶無厭，樂少苦多，覺之為賢。  
雖有天欲，慧捨不貪，樂離恩愛，為佛弟子。

- (21) 佛告大王：人行罪福各有本性，所受影報萬倍不同，若行六德，持齋福多，諸佛所譽，終生梵天，福樂自然。
- (22) 佛說是時，王及夫人嫖女大臣，一切心解，皆得道跡。

## 沙門品第三十四

### 【67】

- (1) 昔佛在舍衛國精舍之中，為天龍、鬼神、國王、人民說法。
- (2) 時有一年少比丘，晨旦著衣服，拄杖持鉢，至大村中分衛。
- (3) 時大道邊有官菜園，外面種黍稷，其田外草中，施張發箭，若有蟲獸盜賊來者，觸網箭發，中箭則死。有一端正年少女子獨守此園，人欲往者，遙喚示道，乃得入園，不知道者必為發箭所殺，而此女子獨守悲歌，其聲妖亮，聽者莫不頓車止馬，迴旋蹀躞，而欲趣之，盤桓不去，皆坐聲響。
- (4) 時此比丘分衛行還，道聞歌聲，側耳聽音，五情逸豫，心迷意亂，貪著不捨，想是女人必大端正，思想欲見坐起言語，便旋往趣，未到中間意志恍惚，手失錫杖，肩失衣鉢，殊不自覺。

- (5) 佛以三達見此比丘，小復前行，為箭所殺，福應得道，為愚所迷，欲蓋所覆，憐愍其愚，欲度脫之，自化作白衣，往到其邊，以偈呵之曰：

沙門何行，如意不禁，步步著粘，但隨思走。  
袈裟被肩，為惡不損，行惡行者，斯墮惡道。  
截流自持，折心卻欲，人不割欲，一意猶走。  
為之為之，必強自制，捨家而懈，意猶復染。  
行懈緩者，誘意不除，非淨梵行，焉致大寶。  
不調難誠，如風枯樹，自作為身，曷不精進。

- (6) 說此偈已，即自復形，相好炳然光照天地，若有見者迷解亂止，各得其所。
- (7) 比丘見佛，心意霍開，如冥闢明，即五體投地，為佛作禮，叩頭悔過，懺悔謝佛，內解止觀，即得羅漢，隨佛還精舍。聽者無數皆得法眼。

### 梵志品第三十五

#### 【68】

- (1) 昔私訶牒國中有大山，名私休遮他，山中有梵志，五百餘人各達神通，自相謂曰：吾等所得，正是涅槃。
- (2) 佛始出世，初建法鼓，開甘露門。此等梵志聞而不就，宿福應度，佛往就之，獨行無侶，到其路口，坐一樹下，三昧定意，放身光明，照一山中，狀如失火，山中盡燃。
- (3) 梵志怖懼，咒水滅之，盡其神力，不能使滅，怪而捨走，從路出山，遙見世尊，樹下坐禪，譬如日出金山之側，相好炳然，如月星中，怪是何神，就而觀之。
- (4) 佛命令坐，問所從來。梵志對曰：止此山中，修道來久，旦歎火起燒山樹木，怖而走出。
- (5) 佛告梵志：此是福火，不傷損人，欲滅卿等癡結之垢。
- (6) 梵志師徒顧相謂曰：是何道士也？九十六種未曾有此。師曰：曾聞白淨王子，名曰悉達，不樂聖位，出家求佛，將無是也？
- (7) 徒等啟師：可共問佛，梵志所行事，為如法不也？師徒之等共

起白佛：梵志經法名四無礙，天文、地理、王者治國、領民之法，并九十六種道術所應行法，此經為是涅槃法不？願佛解說，開化未聞。

- (8) 佛告梵志：善聽思之！吾從宿命無數劫來，常行此經，亦得五通移山住流，更歷生死不可計數，既不得涅槃，亦復不聞有得道者，如汝等行，非名梵志，於是世尊以偈報曰：

截流如渡，無欲如梵，知行已盡，是謂梵志。  
以無二法，清淨渡淵，諸欲結解，是謂梵志。  
非蒺結髮，名為梵志，誠行法行，清白則賢，  
飾髮無慧，草衣何施，內不離著，外捨何益？  
去婬怒癡，憍慢諸惡，如蛇脫皮，是謂梵志。  
斷絕世事，口無麤言，八道審諦，是謂梵志。  
已斷恩愛，離家無欲，愛著已盡，是謂梵志。  
離人聚處，不墮天聚，諸聚不歸，是為梵志。  
自識宿命，本所更來，生死得盡，觀通道玄，  
明如能嘿，是謂梵志。

- (9) 佛說偈已，告諸梵志：汝等所修自謂已達涅槃，如少水魚豈有長樂？合本無者也。
- (10) 梵志聞經，五情內發喜悅，長跪白佛：願為弟子。頭髮自墮，即作沙門，本行清淨，因而得道為阿羅漢。天龍鬼神，皆得道跡。

## 泥洹品第三十六

### 【69】

- (1) 昔佛在王舍城靈鷲山中，時與諸比丘千二百五十人俱。
- (2) 時摩竭國王號名阿闍世，所領五百國各有姓名，近有一國，名曰越祇，不順王命，欲往伐之，即召群臣講宣議曰：越祇國人富樂熾盛，多出珍寶，不首伏於我，寧可起兵往伐之不？
- (3) 國有賢公承相，名曰兩舍，對曰：唯然。王告兩舍：佛去是不遠，聖哲三達，靡事不貫，汝持吾聲往至佛所，如卿意智委悉問之，欲往伐彼寧得勝不？

- (3) 承相受教，即嚴車馬，往至精舍，前到佛所，頭面著地，為佛作禮。佛命令坐，公即就坐。
- (4) 佛問國承相：從何所來？公言：王使臣來，稽首佛足，問訊起居、餐食如常？
- (5) 佛即問公：王及國土、人民、臣下皆自平安不？公言：國主及民皆蒙佛恩。公白佛言：王與越祇國有嫌，欲往伐之，於佛聖意，為可得勝不？
- (6) 佛告承相：是越祇國人民奉行七法，不可勝之，王可諦思，勿妄舉動。公即問佛：何等七法？
- (7) 佛言：越祇國人數相聚會，講議正法，修福自守，以此為常，是謂為一。越祇國人君臣常和，所任忠良，教諫承用，不相違戾，是謂為二。越祇國人奉法相牽，無取無捨，不敢犯過，上下循常，是謂為三。越祇國人禮化謹敬，男女有別，長幼相承，不失儀法，是謂為四。越祇國人孝養父母，遜悌師長，受誡教誨，以為國則，是謂為五。越祇國人承天則地，敬畏社稷，奉順四時，民農不廢，是謂為六。越祇國人尊道敬德，國有沙門得道應真，方遠來者，供養衣被、床臥、醫藥，是謂為七。夫為國主行此七法，難可得危，極天下兵共往攻之，不能得勝。
- (8) 佛告承相：若使越祇國人持一法者尚不可攻，何況盡持如是七法！於是世尊即說偈言：

利勝不足恃，雖勝猶復苦，當自求勝法，已勝無所生。

- (9) 兩舍承相聞佛說偈，即得道跡，時會大小皆得須陀洹道。公即從坐起，白佛言：國事煩多，欲還請辭。佛言：可宜知是時。即從坐起，禮佛而去，還至具事白王，即止不攻。持佛嚴教，以化國內，越祇國人即來順命，上下相奉，國遂興隆。

## 生死品第三十七

### 【70】

- (1) 昔佛在舍衛國祇洹精舍，為天人、國王、大臣廣說妙法。
- (2) 有一梵志長者居在路側，財富無數，正有一子，其年二十，新為娶婦，未滿七日，夫婦相敬，言語相順，婦語其夫：欲至後

園中看戲，為得爾不？上春三月夫婦相將至後園中，有一柰樹，高大華好，婦欲得華，無人與取。夫知婦意，欲得柰華，即便上樹，正取一華，復欲得一，展轉上樹乃至細枝，枝折墮地，傷中即死。

- (2) 居家大小，奔波跳走，往趣兒所，呼天傷哭，斷絕復甦，中外宗族來者無數，皆甚悲痛，聞者莫不傷心，見者莫不痛哀。父母妻息怨咎天地，謂為不護，棺殮衣被，如法遣送，還家啼泣，不能自止。
- (3) 於是世尊愍傷其愚，往問訊之，長者室家大小見佛，悲感作禮，具陳辛苦。佛語長者：止息聽法！萬物無常，不可久保，生則有死，罪福相迫，此兒三處為其哭泣，懊惱斷絕亦復難勝，竟為誰兒？何者為親？
- (4) 於是世尊即說偈言：

命如華果熟，常恐會零落，已生皆有苦，孰能致不死。  
從初樂愛欲，可媿入胞影，受形命如電，晝夜流難止。  
是身為死物，精神無形法，假令死復生，罪福不敗亡。  
終始非一世，從愛癡久長，自作受苦樂，身死神不喪。

- (5) 長者聞偈意解忘憂，長跪白佛：此兒宿命，作何罪豐，盛美之壽而便中天？唯願解說本所行罪。
- (6) 佛告長者：乃往昔時有一小兒，持弓箭入神樹中戲，邊有三人亦在中看，樹上有雀，小兒欲射，三人勸言：若能中雀者世稱健兒。小兒意美，引弓射之，中雀即死墮地，三人共笑，助之歡喜而各自去，經歷生死無數劫中，所在相遭，共會受罪。
- (7) 其三人者，一人有福今在天上，一人生海中為化生龍王，一人今日長者身是。此小兒者，前生天上為天作子，命終來下為長者作子，墮樹命絕即生海中，為化生龍王作子，即以生日化生，金翅鳥王取而食之。今日三處懊惱涕哭，寧可言也，以其前世助其喜故，此三人者報以涕哭。
- (8) 於是世尊即說偈言：

識神造三界，善不善五處，陰行而默至，所往如響應。  
色欲不色有，一切因宿行，如種隨本像，自然報如影。

- (9) 佛說偈已，欲使長者意解，即以道力視其宿命，皆見天上龍中之事，長者意解，欣然即起，長跪叉手，白佛言：願及大小為佛弟子，奉受五戒，為優婆塞。佛即授戒，重為說法無常之義，大小歡欣皆得須陀洹道。

## 道利品第三十八

### 【71】

- (1) 昔有國王，治行正法，民慕其化，無有太子，以為愁憂；佛來入國，便出覲尊，聽經歡欣，即受五戒，一心奉敬，唯願有子，晝夜精進，三時不懈。
- (2) 有一給使，其年十一，常為王使，忠信奉法，不失威儀，謙卑忍辱，精進一心，學誦經偈，知時先起，已辦香火，數年之中，精進如是，不以為勞，卒得重病，遂致無常。
- (3) 其神來還，為王作子，乳舖長大，至年十五，立為太子。父王命終，襲代為王，驕慢自恣，姪洸欲樂，晝夜耽荒，不理國事，臣僚廢朝，民被其患。
- (4) 佛知其行，不會本識，將諸弟子，往到其國。王聞佛來，如先王法，大眾奉迎，稽首于地，卻坐王位。
- (5) 佛告王曰：國土人民、群僚百官，悉自如常不？王曰：為人年幼未能綏化，皆蒙聖恩，國土無他。
- (6) 佛告王曰：王今自知本所從來，作何功德得此王位？王曰：不審！頑愚不達，不知先世所從來也。
- (7) 佛告大王：本以五事得為國王，何等為五？一者布施，得為國王，萬民奉獻，宮觀殿堂，資財無極，二者興立寺廟，供養三尊床榻幃帳，以是為王，在於正殿御座理國，三者親身禮敬三尊及諸長德，以是為王，一切萬民莫不為之作禮，四者忍辱，身三口四，及意無惡，以是為王，一切見者莫不歡欣，五者學問，常求智慧，以是為王，決斷國事莫不奉用，行此五事，世世為王，於是世尊以偈頌曰：

人知奉其上，君父師道士，信戒施聞慧，終吉所生安。  
宿命有福慶，生世為人尊，以道安天下，奉法莫不從。

王為臣民主，常以慈愛下，身率以法戒，示之以休咎。  
處安不忘危，慮明福轉厚，福德之反報，不問尊以卑。

- (8) 佛告王曰：王前世時，為大王給使，奉佛以信，奉法以淨，奉僧以敬，奉親以孝，奉君以忠，常行一心，精進布施，勞身苦體，初不懈倦，是福追身，得為王子，補王之榮，今者富貴而反懈怠。夫為國王當行五事，何謂為五事？一者領理萬民，無有枉濫，二者養育將士，隨時稟與，三者念修本業，福德無絕，四者當信忠臣正直之諫，無受讒言以傷正直，五者節欲貪樂，心不放逸。行此五事名聞四海，福祿自來，捨此五事眾綱不舉，民困則思亂，士勞則勢不舉，無福鬼神不助，自用失大理，忠臣不敢諫，心逸國不理，臣孽民則怨，若如是者，身失令名，後則無福，於是世尊重說偈言：

夫為世間將，修正不阿枉，調心勝諸惡，如是為法王。  
見正能施惠，仁愛好利人，既利以平均，如是眾附親。

- (9) 佛說偈已，是時王大歡喜，起住佛前，五體投地，懺悔謝佛，即受五戒。佛重說法，得須陀洹道。

## 【72】

- (1) 昔佛在舍衛國祇樹精舍，為諸天人、國王、大臣、四輩弟子說無上大法。
- (2) 時舍衛國南有深山，其中常出野象。象有三色，白、青、黑者。國王欲得好名鬥大象，輒遣人往捕取將來，付調象師，三年之中，便可乘騎，亦可令鬥。
- (3) 時有一神象，龍之所生，身白如雪，尾赤如丹，兩牙如金色。獵師見此非常好象，還白國王，有此大象其形如是，宜大王乘。
- (4) 王即募捕象師三十餘人，遣令捕此象，人眾往到象所，張罽欲捕象，而此神象知諸人意，即便來前而墮罽中，眾人皆來而欲捕之。象便嗔恚，逆躡跳之，近者即死，遠者得走，象逐不置。
- (5) 時山齋有諸年少道人，多力勇健，山中學道大久，未得定意，遙見此象追逐殺人，道人憐愍人故，自恃勇健欲往救之。
- (6) 佛已遙見，恐此比丘為神象所殺。佛即到邊，放大光明，象見

佛光，怒止恚解，不復追逐殺人。比丘見佛，迎為作禮。

(7) 佛為比丘即說偈言：

勿妄燒神象，以招苦痛患，惡意為自殺，終不至善方。

(8) 比丘聞偈，即便稽首，懺悔謝過，內自篤責，深惟為非，即於佛前逮得應真。時捕象人即皆還，穌走者尋還，皆得道跡。

### 【73】

(1) 昔佛在羅閱祇耆闍崛山中，時國王瓶沙有一大臣，犯事免退，徙著南山中，去國千里外，由來無人，不熟五穀。

(2) 大臣到中，泉水流溢，五穀大熟，四方諸國有飢寒者，皆來至此山中，數年之中便有三四千家，來者給與田地，令得生活，其中三老諸長宿年共議，國之無君猶身之無首，相將至大臣所，舉大臣為國王。

(3) 大臣答長老曰：若以我為王者，當如諸國王之法，左右大臣、文武將士、上下朝直、發女闈宮、租稅穀帛，當如民法。

(4) 諸國老曰：唯然奉命，一隨王法。即立為王，處置群臣文武上下，發調人民築城作舍，宮殿樓觀，民被苦毒，不復堪諧，皆發想念，欲謀圖王。諸姦臣輩，將王出獵，去城三四十里，於曠野澤中，牽王欲殺。

(5) 王問左右：何緣殺我？答曰：民慕豐樂，奉王以禮，民困思亂，破家圖國。

(6) 王告之言：卿等自為，非我本造，枉殺我者，神祇知之，聽我發一願，死不有恨，即願曰：我本開荒，出穀養民，來者皆活，富樂無極，自共舉我，立為國王，依案諸國自共作此，今反殺我，我實無惡於此人民，若我死者，願作羅刹，還入故身中，當報此怨。

(7) 於是絞殺，棄屍而去，三日之後，王神即作羅刹，還入故身中，自名阿羅婆，即起入宮，絞殺新王，并及後宮嫔女、左右姦臣，即皆殺之。羅刹瞋恚出宮，盡欲殺人。

(8) 國中三老草索自縛，來向羅刹自首：此是姦臣所為，非是細民所可能知，乞丐原恕，願還治國。

(9) 曰：我是羅刹，何與人等共從事也，食飲當得人肉。羅刹急性，

忿不思難。

- (10) 三老曰：國是王許，故當如前，食飲所須，當相差次。國老共出，宣令人民皆共探籌，以此為次，家出一小兒，生用作食，食羅刹王。
- (11) 三四千家正有一戶，為佛弟子，居門精進，五戒不犯，隨民探籌，得第一籌，有一小兒，當先食鬼王。賢者大小，懊惱啼哭，遙向崛山，為佛作禮，悔過自責。
- (12) 佛以道眼見其辛苦，便自說言：因是小兒，當度無數人，便獨飛往至羅刹門，現變光相，照其宮內。
- (13) 羅刹見光，疑是異人，即出見佛，便起毒心，欲前[口\*翕]佛，光刺其目，擔山、吐火，皆化為塵，至久疲頓，然後降化，請佛入坐，頭面作禮，佛為說經，一心聽法，即受五戒，為優婆塞。
- (14) 里吏催食，奪兒將來，室家嗥哭，隨道而來，觀者無數，為之悲哀。吏抱兒撒食，著羅刹前。
- (15) 羅刹即持此小兒，擎食至佛前，長跪白佛言：國人相差次，以小兒為食，我今受佛五戒，不復得食此小兒，請以小兒布施佛，為佛作給使。
- (16) 佛為受之，即說咒願。羅刹歡喜，得須陀洹道。佛以小兒著鉢中，撒出宮門，還其父母而告之曰：快養小兒，勿復愁憂！
- (17) 眾人見佛，莫不驚愕，怪是何神，此兒何福而獨救之，羅刹所食，奪還父母？
- (18) 於是世尊在於大眾中央而說偈言：

戒德可恃怙，福報常隨己，見法為人長，終遠三惡道。

戒慎除苦畏，福德三界尊，鬼龍邪毒害，不犯有戒人。

- (19) 佛說偈已，無央數人，見佛光像，乃知至尊三界無比，便皆歸化為佛弟子，聞偈歡欣，皆得道跡。

#### 【74】

- (1) 昔佛在波羅奈國鹿野場上，為天人、龍鬼、國王、臣民不可計眾而為說法。
- (2) 時大國王太子將從小國王世子五百餘人，往到佛所為佛作禮，

卻坐一面而聽法。諸太子等即白佛言：佛道清妙，玄遠難及，自古以來，頗有國王太子、大臣長者之子，捨國吏民、恩愛、榮樂，行作沙門者不？

- (3) 佛告諸太子：世間國土榮樂恩愛，如幻如化，如夢如響，卒來卒去，不可常保，又國王太子以三事故不能得道，何謂三事？一者憍恣，不念學問佛經妙義以濟神本，二者貪取，不念布施下貧困厄，群臣將士所有財寶，不與民共，以修財本，三者不能遠離色欲愛樂之事，捨棄牢獄憂煩之惱，行作沙門，滅眾苦難，以修身本，是以菩薩所生為王，除此三事，自致得佛。又有三事，何謂為三？一者少壯學問，領理國土，率化民庶，使行十善，二者中以財施貧窮孤寡，群臣將士與民同歡，三者每計無常命不久留，宜當出家行作沙門，斷苦因緣，勿更生死。三事不施，獨無所得。
- (4) 於是世尊而自陳曰：昔我前世作轉輪聖王，名曰南王皇帝，七寶導從，宮觀浴池，行宮戲園，及群臣、太子、夫人、嫫女、象馬、廚宰，各八萬四千，有子千人，勇猛精銳，一人當千，飛行虛空，周遊四方，自在所為，無當前者，其壽八萬四千歲，以法治政，不枉人民。
- (5) 爾時聖王歎自念言：人命短促，無常難保，但當作福，以求道真，念常布施世間人民，所有財物與民共之，已種福德，唯當出家行作沙門，斷絕貪欲乃得滅苦。王即敕梳頭人：若見頭髮白，便當啟我。至久數萬歲，梳頭人啟言：白髮已生。敕令拔之舉著案上，王見白髮，涕泣命曰：第一使者忽然復至，今頭已白，宜當出家行作沙門，求自然道，擊髮掌中，自說偈言：

今我上體首，白生為被盜，已有天使召，時正宜出家。

- (6) 即召群臣立太子為王，行作沙門，入山修道，畢人之壽，即生第二天上為天帝釋。
- (7) 太子於後領理天下，亦如大王，復敕梳頭人：若見白髮便當啟我。至久復啟：白髮已生。敕令拔之，擊著掌中而說偈言：

今我上體首，白生為被盜，已有天使召，時正宜出家。

- (8) 復召群臣立太子為王，即行作沙門，入山修道，畢人之壽，復生天上為天帝釋。
- (9) 前天帝釋，畢天之壽，下生世間，為聖王作太子，此三聖主更為父子，上為天帝，下為聖主，中為太子，各各三十六反，數千萬歲，終而復始，行此三事，自致得佛。
- (10) 爾時父者，今我身是也。太子者，舍利弗是也。王孫者，阿難是也。更相從生，展轉為王，以化天下，是以特尊，三界無比。
- (11) 佛說是時，國王太子并諸太子，皆大歡喜受佛五戒，為優婆塞，得須陀洹道。

### 吉祥品第三十九

#### 【75】

- (1) 昔佛在羅閱祇耆闍崛山中，為天、人、龍、鬼，轉三乘法輪。
- (2) 時山南恒水岸邊有尼捷梵志，先出耆舊，博達多知，德向五通，明識古今，所養門徒有五百人，教化指授皆悉通達，天文、地理、星宿、人情，無不瞻察，觀略內外，吉凶禍福，豐儉出沒，皆包知之。梵志弟子先佛所行，應當得道，歎自相將，至水岸邊，屏坐論語，自共相問：世間諸國人民所行，以何等事為世吉祥？
- (3) 徒等不了，往到師所，為師作禮，叉手白言：弟子等學久，所學已達，不聞諸國以何為吉祥？
- (4) 尼捷告曰：善哉問也，閻浮利地有十六大國、八萬四千小國，諸國各有吉祥，或金或銀、水精琉璃、明月神珠、象馬車輿、玉女珊瑚、珂貝妓樂、鳳凰孔雀，或以日月星辰、寶瓶四華，梵志道士！此是諸國之所好喜吉祥瑞應，若當見是稱善無量，此是瑞應國之吉祥。
- (5) 諸弟子曰：寧可更有殊特吉祥，於身有益，終生天上？
- (6) 尼捷答曰：先師以來未有過此，書籍不載。
- (7) 諸弟子曰：近聞釋種出家為道，端坐六年，降魔得佛，三達無礙，試共往問，所知博採，何如大師？
- (8) 師徒弟子五百餘人，經涉山路往到佛所，為佛作禮，坐梵志位，叉手長跪，白佛世尊曰：諸國吉祥所好如此，不審更有勝是者不？

(9) 佛告梵志：如卿所論世間之事，順則吉祥，反則凶禍，不能令人濟神度苦，如我所聞吉祥之法，行者得福，永離三界，自致泥洹。於是世尊而作頌曰：

佛尊過諸天，如來常現義，有梵志道士，來問何吉祥？  
於是佛愍傷，為說真有要，已信樂正法，是為最吉祥。  
亦不從天人，希望求僥倖，亦不禱神祠，是為最吉祥。  
友賢擇善居，常先為福德，敕身承貞正，是為最吉祥。  
去惡從就善，避酒知自節，不婬於女色，是為最吉祥。  
多聞如戒行，法律精進學，修己無所爭，是為最吉祥。  
居孝事父母，治家養妻子，不為空乏行，是為最吉祥。  
不慢不自大，知足念反覆，以時誦習經，是為最吉祥。  
所聞常欲忍，樂欲見沙門，每講輒聽受，是為最吉祥。  
持齋修梵行，常欲見賢明，依附明智者，是為最吉祥。  
已信有道德，正意向無疑，欲脫三惡道，是為最吉祥。  
等心行布施，奉諸得道者，亦敬諸天人，是為最吉祥。  
常欲離貪婬，遇癡瞋恚意，能習成道見，是為最吉祥。  
若以棄非務，能勤修道用，常事於可事，是為最吉祥。  
一切為天下，建立大慈意，修人安眾生，是為最吉祥。  
智者居世間，常習吉祥行，自致成慧見，是為最吉祥。

(10) 梵志師徒聞佛說偈，欣然意解，甚大歡喜，前白佛言：甚妙世尊！世所希有，由來迷惑未及闕明，唯願世尊，矜愍濟度，願身自歸佛法三尊，得作沙門，冀在下行。

(11) 佛言：大善，善來比丘！即成沙門，內思安般，逮得應真。聽者無數，皆得法眼。

※※※※※※※※※※※※※※※※※※※※※※※※※※※※※※

## 《法句經》選集

# 《法集要頌經》33 品

法救集，天息災譯  
林崇安編，內觀教育基金會出版  
【內觀教育版】2004

### 法集要頌經卷第一

#### 有為品第一

- 01 能覺悟煩惱，宜發歡喜心，今聽我所集，佛所宣法頌。
- 02 如是佛世尊，一切智中師，慈悲為有情，廣說真實語。
- 03 一切行非常，皆是興衰法，夫生輒還終，寂滅最安樂。
- 04 如燭熾焰時，擲物在暗處，不使智燈尋，恆為煩惱覆。
- 05 人身有形器，棄散在諸方，骸骨如鴿色，觀斯有何樂？
- 06 譬如人初夜，識託住母胎，日涉多遷變，逝而定不還。
- 07 晨朝睹好事，夜至則不現，昨所瞻視者，今夕則或無。
- 08 榮富焰熾盛，無常無時節，不揀擇貴賤，常被死王降。
- 09 或有在胎殞，或初誕亦亡，盛壯不免死，老耄甘心受。
- 10 若老或少年，及與中年者，恆被死來侵，云何不懷怖。
- 11 命如果自熟，常恐會零落，生已必有終，誰能免斯者？
- 12 譬如陶家師，埏埴作坯器，諸有悉破壞，人命亦如是。
- 13 如人彈琴瑟，具足眾妙音，絃斷無少聲，人命亦如是。
- 14 如囚被繫縛，拘牽詣都市，動則向死路，壽命亦如是。
- 15 如河急駛流，往而悉不還，人生亦如是，逝者皆不迴。
- 16 諸患集成身，生多眾苦惱，人命亦如是，為老死所伺。
- 17 所造成功勞，永世獲安樂，如杖擊急水，暫開還卻合。
- 18 如人操杖行，牧牛飲飼者，人命亦如是，亦即養命去。
- 19 夫人欲立德，晝夜勿空過，既獲得人身，一心思命盡。
- 20 不寐覺夜長，疲倦道路長，愚迷生死長，希聞於妙法。
- 21 有子兼有財，慳惜遇散壞，愚夫不自觀，何恃有財子。
- 22 百千非算數，族姓富男女，積聚多財產，無不皆衰滅。
- 23 富貴非聖財，恆為無常伺，猶如盲眼人，不能自觀察。

24 聚集還散壞，崇高必墜落，生者皆盡終，有情亦如是。  
25 行惡入地獄，修善則生天，若能修善者，漏盡得涅槃。  
26 諸佛與菩薩，緣覺及聲聞，尚捨有為身，何況諸有情？  
27 非空非海中，非入山窟間，無有地方所，脫止不受死。  
28 若住現在世，過去及未來，一切有為事，終歸於盡壞。  
29 智者能離繫，恆正念觀察，常思無漏道，是名真智者。  
30 如囚被繫縛，所欲無能益，亦如朽故車，不久見破壞。  
31 色變為老耄，戀家如在獄，不覺死來侵，愚夫不能知。  
32 雖壽滿百歲，亦被死相隨，為老病所逼，患終至後際。  
33 老至苦纏身，晝夜多痛惱，辛楚有千般，如魚入灰火。  
34 江河無停止，駛流去不迴，保惜膿漏軀，雖戀不能住。  
35 四大聚集身，無常詎久留，地種散壞時，神識空何用？  
36 此身多障惱，膿漏恒疾患，愚迷貪愛著，不厭求寂滅。  
37 今歲雖云在，冬夏不久停，凡夫貪世樂，中間不驚怖。  
38 父母與兄弟，妻子并眷屬，無常來牽引，無能救濟者。  
39 如是諸有情，舉動貪榮樂，無常老病侵，不覺生苦惱。  
40 剃髮為苾芻，宜應修止觀，魔羅不能伺，度生到彼岸。

## 愛欲品第二

01 慾我知汝根，意以思想生，我不思惟汝，則汝慾不有。  
02 因慾生煩惱，因慾生怖畏，離慾得解脫，無怖無煩惱。  
03 從愛生煩惱，從愛生怖畏，離愛得解脫，無怖無煩惱。  
04 果先甜後苦，愛慾亦如斯，後受地獄苦，燒煮無數劫。  
05 愚迷貪愛慾，戀著於妻子，為愛染纏縛，堅固難出離。  
06 賢聖示愛慾，莊嚴諸眷屬，遠離於妻子，堅固能利益。  
07 貪欲難解脫，離欲真出家，不貪受快樂，智者無所欲。  
08 世間貪欲人，種種非思惟，若能調伏者，是名真離欲。  
09 若人恆貪欲，處縛難解脫，唯慧能分別，煩惱斷不生。  
10 正念常興起，寂靜欲易除，自制以法戒，不犯善增長。  
11 常行貪欲人，愚者共狎習，念定不放逸，次第獲無漏。  
12 剎那修止觀，能離諸罪垢，我慢自消除，解脫獲安樂。  
13 若人不斷欲，如皮入火燒，剎那見焦壞，受罪無央數。  
14 苾芻慎欲樂，放逸多憂愁，若離於愛欲，正念受快樂。  
15 無厭有何足，不足何有樂，無樂有何憂，有愛有何樂？

- 16 寂靜智慧足，能長無漏道，貪愛若不足，非法受中夭。
- 17 見色心迷惑，不自觀無常，愚以為美善，不知其非真。
- 18 愚以貪自縛，不求度彼岸，貪財為愛欲，害人亦自縛。
- 19 世容眾妙欲，此欲最味少，若比天上樂，迦哩灑跋拏。
- 20 眾山盡為金，猶如鐵圍山，此猶無厭足，正覺盡能知。
- 21 世間苦果報，皆因於貪欲，智者善調伏，應依此中學。

### 食品第三

- 01 極貪善顯現，有情懷疑慮，若復增貪意，自作堅固縛。
- 02 離貪善觀察，疑慮得消除，棄捨彼貪愛，堅固縛自壞。
- 03 以欲網自弊，以愛蓋自覆，愚情自恣縛，如魚入釣手，  
死命恒來逼，如犢逐愛母。
- 04 貪著放逸者，如猿逢果樹，貪意甚堅牢，趣而還復趣。
- 05 夫貪愛潤澤，思想為滋蔓，貪欲深無底，老死是用增。
- 06 貪欲多虛誑，貪欲懷吝惜，若以慧分別，正觀獲安樂。
- 07 由貪受生死，奔波樂向前，群生無慧眼，不能自觀察。
- 08 愚迷貪所執，沈淪豈覺知，若修瑜伽行，魔王不能伺。
- 09 貪垢難消釋，如犢戀愛母，離貪免沈淪，離貪得解脫。
- 10 因貪增喧諍，因愛饒毀謗，苾芻修止觀，證得寂靜果。
- 11 貪意如良田，遇風雨增長，若遠離貪愛，煩惱不能侵。
- 12 貪欲若薄劣，如水滴蓮上，彼煩惱易除，可說為智者。
- 13 伐樹不伐根，雖伐猶增長，拔貪不盡根，雖伐還復生。
- 14 貪欲如種田，耕之去雜穢，愛苗若不耘，善果不堅貞。
- 15 貪心與愛心，分別本不二，造惡俱苦受，云何不生悔？
- 16 貪性初為種，愛性受胞胎，有情戀不息，往來難出離。
- 17 諸天及人民，依愛而止住，愛往眾結隨，剎那亦不停，  
時過復生憂，入獄方自覺。
- 18 緣流愛不住，欲網覆瘡根，枝蔓增飢渴，數數增苦受。
- 19 譬如自造箭，還自傷其體，內箭亦如是，愛箭傷有情。
- 20 能覺知是者，愛苦共生有，無欲無有想，苾芻真度世。

### 放逸品第四

- 01 戒為甘露道，放逸為死徑，不貪則不死，失道乃自喪。
- 02 智者守道勝，終不為迷醉，不貪致喜樂，從是得聖道。

- 03 恒思修善法，自守常堅固，智者求寂靜，吉祥無有上。
- 04 迷醉如自禁，能去之為賢，已昇智慧堂，去危乃獲安。
- 05 智者觀愚人，譬如山與地，當念捨憍慢，智者習明慧。
- 06 發行不放逸，約己調伏心，能善作智燈，黑闇自破壞。
- 07 正念常興起，意靜易滅除，自制以法命，不犯善名稱。
- 08 專意莫放逸，習意牟尼戒，不親卑漏法，不與放逸會，  
不種邪見根，不於世增惡。
- 09 正見增上道，世俗智所察，歷於百千生，終不墮地獄。
- 10 修習放逸人，愚人所狎習，止觀不散亂，如財主守藏。
- 11 莫貪樂鬥諍，亦勿嗜欲樂，思念不放逸，可以獲大安。
- 12 不為時自恣，能制漏得盡，放逸魔得便，如師子搏鹿。
- 13 放逸有四事，好犯他人婦，初獄二匙福，毀三睡眠四。
- 14 無福利墮惡，畏而畏樂寡，王法加重罪，身死入地獄。
- 15 本情不自造，情知不自為，不慮邪徑路，愚者念力求。
- 16 智者喻明燈，闇者從得燭，示導世間人，如日將無日。
- 17 若所作不善，如彼無目人，涉道甚艱難，路險懷恐怖。
- 18 善法若增長，魔羅不得便，漏盡證寂滅，可獲真實果。
- 19 惡法若增長，魔羅常伺便，失彼寂滅道，受苦無窮盡。
- 20 所謂持法者，不必多誦習，若少有所聞，具足法身行。
- 21 雖誦習多義，放逸不從正，如牧數他牛，難獲沙門果。
- 22 若聞惡而忍，說行人讚嘆，消除貪瞋癡，彼獲沙門性。
- 23 讚歎不放逸，毀彼放逸人，恒獲人天報，最上為殊勝。
- 24 若人不放逸，智者所讚歎，所作善增長，能生諸善法。
- 25 若行放逸者，現法無能益，安情如不動，爾乃說為智。
- 26 苾芻懷謹慎，放逸多憂愆，如象拔淤泥，難救深海苦。
- 27 苾芻懷謹慎，放逸多憂愆，抖擻諸罪塵，如風飄落葉。
- 28 苾芻懷謹慎，放逸多憂愆，結使深纏縛，如火焚枯薪。
- 29 苾芻懷謹慎，放逸多憂愆，各各順次第，得盡諸結使。
- 30 苾芻懷謹慎，放逸多憂愆，義解分別句，寂靜永安寧。
- 31 苾芻懷謹慎，放逸多憂愆，煩惱若消除，能得涅槃樂。
- 32 放逸不發起，善法應須修，今世至後世，得行法快樂。
- 33 放逸不發起，煩惱自然伏，善法堅習學，決定得涅槃。
- 34 長行於放逸，剎那無暫息，命終入地獄，剎那亦無歇。
- 35 放逸不憶念，亦不習威儀，耽睡不相應，此是戒障礙。

- 36 常離不相應，使不壞其念，猶念恒調伏，塵垢得消除。  
37 苾芻懷謹慎，持戒勿破壞，善守護自心，今世及後世。  
38 苾芻勿放逸，捨家順佛教，抖擻無常軍，如象出蓮池。  
39 依此毘尼法，不懷放逸行，消除生死輪，永得盡苦惱。

### 愛樂品第五（念品）

- 01 愛處生憂愁，愛處生怖畏，若無所愛樂，何愁何怖畏。  
02 由愛生憂愁，由愛生怖畏，若遠離念愛，遂捨狂亂終。  
03 夫人懷憂愁，世苦無數量，斯由念恩愛，無念則無愁。  
04 是故不生念，念者是惡累，彼則無諸縛，無念無不念。  
05 念為求方便，非義不設權，權慧致大義，自致第一尊。  
06 莫與愛念會，亦莫不念俱，念愛不見苦，不愛念憂戚，  
於中生愁感，消滅人善根。  
07 愛念就後世，朋友多親眷，長夜憂愁恨，念離為甚苦。  
08 念色金色容，天身而別住，樂極而害至，為死王所錄。  
09 若人處晝夜，消滅念愛色，自掘深根源，不越死徑路。  
10 不善形善色，愛色言非愛，若謂樂著色，放逸之所使。  
11 夫自念欲者，不與惡共居，此則難獲得，樂為惡根本。  
12 夫欲自念者，宜自善守護，如防護邊城，乃牢固牆塹。  
13 夫欲自念者，藏己仍堅密，猶如防邊城，內外悉牢固。  
14 當自善防護，後剎那虛悔，時過則生憂，須臾墮地獄。  
15 遍於諸方求，令心中間察，頗有斯等類，不愛乃愛彼，  
以己喻彼命，是故不害人。  
16 一切皆懼死，莫不畏刀杖，怨己可為喻，勿殺勿行杖。  
17 譬如久行人，從遠吉卻還，親厚亦安和，歸來懷慶悅。  
18 好福行善者，從此達於彼，自受多福祚，如親厚來喜。  
19 起從至聖教，禁制不善心，近者則見愛，離道莫親愛。  
20 近者與不近，所往皆有異，近道則生天，不近墮地獄。  
21 樂法戒成就，成信樂而習，能誠自身者，為人所愛敬。  
22 為人所敬故，皆由己所造，現世得名譽，後生於天上。  
23 教習使稟受，制止非法行，善者之所念，惡者當遠離。  
24 善與不善者，此二俱不別，善者生天上，不善墮地獄。

## 持戒品第六

- 01 智者能護戒，福致三種報，現名聞得利，終後生天上。
- 02 當見持戒者，護之為明智，得成真正見，彼獲世安靜。
- 03 持戒得快樂，令身無煩惱，夜睡眠恬淡，寤則長喜悅。
- 04 戒終老死安，戒善止亦寧，慧為人之寶，福德賊難脫。
- 05 何法終為善，何法善安止，何法為人寶，何盜不能取？
- 06 戒法終為安，戒法善安止，慧為人之寶，唯福不能盜。
- 07 修戒行布施，作福為良田，從是至彼岸，常到安樂處。
- 08 苾芻立戒德，守護諸根門，飲食知節量，寤寐意相應。
- 09 意常生覺悟，晝夜精勤學，漏盡心明解，可致圓寂道。
- 10 智者立禁戒，專心習智慧，苾芻無熱惱，盡果諸苦除。
- 11 以戒常伏心，守護正定意，內學修止觀，無忘為正智。
- 12 蠲除諸罪垢，盡慢勿生疑，終身求法戒，勿遠離聖念。
- 13 戒定慧解脫，應當善觀察，彼已離塵垢，盡煩惱不生。
- 14 集白淨解脫，無智皆以盡，超越魔羅界，如日光明照。
- 15 我慢及迷醉，苾芻應外避，戒定慧三行，求滿勿遠離。
- 16 既不放自恣，諸有勿想念，是故捨陰蓋，不生如是障。
- 17 苾芻防禁戒，恒見學此者，直趣涅槃路，速得淨如是。
- 18 花香不逆風，芙蓉梅檀香，德香逆風薰，德人遍聞香。
- 19 烏鉢[口\*縛]哩史，多[言\*我]羅梅檀，如是等花香，勿比於戒香。
- 20 若人能持戒，清淨不放逸，正智得解脫，是名安樂處。
- 21 此道無有上，消除禪定魔，賢聖德難量，得達八正路。

## 善行品第七

- 01 守護身惡行，自正護身行，守護身惡者，常修身善行。
- 02 守護口惡行，自正護口行，守護口惡者，常修口善行。
- 03 守護意惡行，自正護意行，守護意惡者，恒修意善行。
- 04 身當棄惡行，及棄口惡行，意亦棄惡行，及諸穢惡法。
- 05 身當修善行，修口善亦然，及修意善者，無欲盡諸漏。
- 06 身當修善行，修口意亦爾，今世及後世，永得生善處。
- 07 慈仁行不殺，常能善攝身，彼得無盡位，所適皆無患。
- 08 不行殺為仁，常能慎過言，彼得無盡位，所適皆無患。
- 09 過去身惡業，應當自悔恨，今身不放逸，智生罪除滅。
- 10 過去口惡業，應當自悔恨，今若不妄語，智生罪除滅。

- 11 過去意惡業，應當自悔恨，今意常清淨，智生罪除滅。
- 12 慎身為勇捍，慎口捍亦然，慎意為勇捍，一切結亦然，此處名不死，所適無憂患。
- 13 護身為善哉，護口善亦然，護意為善哉，護一切亦然，苾芻護一切，能盡諸苦際。
- 14 護口意清淨，身終不為惡，能淨此三業，是道大仙說。

### 語言品第八

- 01 妄語入地獄，作之言不作，二罪後俱受，是行自牽去。
- 02 恒懷暴惡人，斧在口中出，所以自傷身，由其出惡言。
- 03 說法自悅人，口出無量義，使我懷妊身，不慚此儀式。
- 04 譽惡惡還譽，是二俱為惡，好以口快鬥，彼後皆無安。
- 05 爭為微少利，如掩失財寶，從彼致鬥諍，合意向惡道。
- 06 百千尼羅浮，三十六五獄，誹謗賢聖者，口意發惡願。
- 07 無道墮惡道，自增地獄苦，遠愚修忍意，念諦則無犯。
- 08 若倚內寶藏，依賢聖活命，愚者墮惡道，猶願邪見作。
- 09 以失今良會，更立誓願求，終不見聖諦，況欲見究竟。
- 10 竹蘆生實乾，還害其自軀，若吐言當善，不演惡法教。
- 11 從善得解脫，為惡不得解，善解者為賢，是為脫惡趣，聖賢解不然，如彼愚得解。
- 12 苾芻挹損意，不躁言得忠，義說如法說，所語言柔軟。
- 13 善說賢聖教，法說如法二，念說如念三，諦說如諦四。
- 14 是以言語者，必使心無患，亦不剋有情，是為能善言。
- 15 言使投意可，亦令得歡喜，不使至惡意，出言眾悉可。
- 16 至誠甘露說，說法無有上，諦說義如法，是為立道本。
- 17 如說佛言者，是吉得滅度，為能斷苦際，是謂言中上。

### 業品第九

- 01 應遠離一法，所謂妄語人，無惡不經歷，不免後世苦。
- 02 寧吞熱鐵丸，渴飲洋銅汁，不以無戒身，食人信施物。
- 03 犯戒放逸人，國中如肉團，無慚不畏罪，後受地獄殃。
- 04 若人畏苦報，亦不樂行苦，勿造諸惡行，念尋生變悔。
- 05 至誠為諸惡，自作教他作，不免於苦報，欲避有何益。
- 06 非空非海中，非入山石間，莫能於此處，避免宿惡殃。

- 07 眾生有苦惱，不免於老死，唯有仁智者，能免纏縛罪。
- 08 妄語求賄賂，自所行不正，怨譖良善人，以枉治善士，  
罪纏斯等人，沒溺深險坑。
- 09 夫士為行者，好之與暴惡，各自為己身，終以不敗亡。
- 10 動轉屈身形，唯影恒親附，或起或往來，不離其形影。
- 11 不但影隨形，形亦自隨影，猶行善惡行，終不離自身。
- 12 遂貪食毒味，不從吾往言，為毒之所害，後乃自覺悟。
- 13 愚心不開悟，習惡不從吾，受地獄苦痛，後方悟其教。
- 14 戲笑為其惡，已作身自受，號泣受罪報，隨行而罪至。
- 15 惡不即時受，如[(殼-一)/牛]牛漚汁，罪在於陰伺，譬如灰覆火。
- 16 惡不即時受，如彼鋒利劍，不慮於後世，當受其苦報。
- 17 惡為惡所縛，為惡不自覺，至惡知惡至，受惡惡根源。
- 18 如鐵生翳垢，反食其自身，惡生於自心，還當壞其體。

### 正信品第十

- 01 信慚戒布施，上士譽此法，斯道明智說，得生於天界。
- 02 愚不修天行，亦不讚布施，正直隨喜施，彼得後世樂。
- 03 信者真人長，念法所安住，近者應得上，智壽中中賢。
- 04 人業何者上，何行致歡樂，何要出要者，何壽壽中上。
- 05 信者真人長，念法所安住，實者意得上，智壽壽中賢。
- 06 信財乃得道，自致法滅度，善聞從慧得，得脫一切縛。
- 07 信之與戒法，慧意則能行，健夫度恚怒，從是得脫淵。
- 08 信使戒成就，亦獲壽及慧，在在則能行，處處見供養。
- 09 施共與鬥集，此業智不處，施時非鬥時，速施何疑慮。
- 10 此方出世利，慧信為智母，是財出世寶，家產則非常。
- 11 欲見諸真者，樂聽聞法教，能捨慳垢心，此乃為上信。
- 12 信能渡有河，其福難侵奪，能禁止竊盜，閑靜沙門樂。
- 13 沙門恒來至，智者所見樂，及餘篤信者，聞則生歡喜。
- 14 若人懷懊惱，貪他人衣食，彼人晝夜寐，不獲三摩地。
- 15 若人能斷貪，如截多羅樹，彼人則晝夜，及獲三摩地。
- 16 無信不修行，好剝正言說，如掘取清泉，掘泉揚其泥。
- 17 智者習信行，樂仰清淨流，如善取泉水，思冷不擾濁。
- 18 信智不染他，惟智與賢仁，非好則遠之，可好則近學。
- 19 樂信與不樂，寂默自應思，遠離無信者，信仁應行之。

◎無常及欲貪，放逸與愛樂，戒善行語言，業信為第十。

### 沙門品第十一

- 01 斷漏降伏他，離欲名梵行，不犯牟尼戒，無一願不滿。
- 02 行力若緩慢，作善與不善，梵行不清淨，不獲於大果。
- 03 所有緩慢業，劣意盡除之，修習清淨行，獲果盡無餘。
- 04 譬如執利劍，執緩則傷手，沙門不禁制，地獄縛牽引。
- 05 又如執利劍，執緊不傷手，沙門禁制戒，漸近涅槃路。
- 06 難曉則難了，沙門少智慧，諸想多擾亂，愚者致苦惱。
- 07 沙門為何行，如意不自禁，步步數黏著，但隨思想走。
- 08 學難捨罪難，居在家亦難，會止同利難，艱難不過是。
- 09 袈裟在肩披，為惡不捐棄，常念行惡者，斯則墮惡道。
- 10 畏罪懷驚懼，假名為沙門，身披僧伽胝，如剗娑羅皮。
- 11 所謂長者，不必以耆年，形熟鬢髮白，愚癡不知罪。
- 12 能知罪福者，身淨修梵行，明遠純清潔，是名為長老。
- 13 所謂沙門者，不必剃鬚髮，妄語多貪愛，有欲如凡夫。
- 14 世稱名沙門，汝亦言沙門，形服似沙門，譬如鶴伺魚。
- 15 如離實不離，袈裟除不除，持鉢實不持，非俗非沙門。
- 16 所言沙門者，消除宰兔羅，守護微細愆，是名真梵行。
- 17 所言沙門者，息心滅意想，穢垢盡消除，故說為出家。

### 法集要頌經卷第二

#### 正道品第十二

- 01 正道四聖諦，智慧所觀察，破壞愛輪迴，如風吹塵散。
- 02 能見聖諦者，寂靜應觀察，滅除煩惱見，如雨灑微塵。
- 03 八正最上道，四諦為法跡，是道名無為，智燈照愚暗。
- 04 道為八真妙，聖諦四句上，無欲法之最，明眼善觀察。
- 05 智為出世長，快樂證無為，知受正教者，永盡生老死。
- 06 一切行無常，如慧所觀察，若能覺此苦，行道淨其跡。
- 07 一切諸行苦，如慧之所見，若能覺此苦，行道淨其跡。
- 08 一切諸行空，如慧之所見，若能覺此苦，行道淨其跡。
- 09 一切法無我，如慧之所見，若能覺此苦，行道淨其跡。
- 10 吾已說道跡，愛箭而為射，宜以自勗勵，諦受如來言。
- 11 吾已說道跡，拔愛堅固刺，宜以自勗勵，諦受如來言。

- 12 此道無別法，見諦之所淨，趣向滅眾苦，能壞魔羅軍。
- 13 此道無有餘，見諦能證果，趣向滅眾苦，能破魔羅軍。
- 14 是道更無過，一趣如淵流，如能仁入定，在眾頻演道。
- 15 一人見生死，得道為祐助，此道度當度，截流至彼岸。
- 16 究竟道清淨，已盡生死源，辯才無邊界，明見宣說道，  
可趣服甘露。
- 17 前未聞法輪，轉為哀眾生，禮拜奉事者，化之度三有。
- 18 三念可念善，三念當離惡，從念而有行，滅之為正斷。
- 19 三觀為轉念，逮獲無上道，得三除三窟，無量修念待。
- 20 能除三有垢，攝定用縛意，智慧禪定力，已定攝外亂。
- 21 世間生滅法，一一彼無邊，覺道獲解脫，快樂無窮盡。
- 22 積善得善行，讚歎得名譽，逮賢聖八品，修道甘露果。

### 利養品第十三

- 01 芭蕉以實死，竹蘆實亦然，駉驢坐妊終，人為貪利喪。
- 02 如是貪無利，當知從癡生，愚為此害賢，首落分于地。
- 03 貪利不善性，苾芻勿羨之，住處多愛戀，希望他供養。
- 04 在家及出家，族姓諸愚迷，貪利興嫉心，我為降伏彼。
- 05 愚為愚計想，欲慢日夜增，異哉得利養，圓寂趣不同。
- 06 能論知足者，苾芻真佛子，不貪著名譽，喜悅是智人。
- 07 不愛著一切，不諂於他人，不依他活命，當自守法行。
- 08 自利尚無貪，豈貴他名譽，百味如膏車，支形得行道。
- 09 苾芻貪利養，不得三摩地，知足常寂靜，止觀可成就。
- 10 苾芻遠利譽，常足不貪求，但三衣飲食，真活命快樂。
- 11 苾芻不捨利，如毒蛇同室，坐臥睡寐畏，皆由貪活命。
- 12 苾芻不捨利，下劣中劣喜，一法應觀察，少智難得脫。
- 13 謹慎常依戒，無貪智者讚，淨行正根力，應當自思惟。
- 14 具足得三明，解脫獲無漏，寡智眇識人，無所憶念知。
- 15 其於諸飲食，依於他人得，而有惡法生，由利養憎嫉。
- 16 自利多結怨，徒服三法衣，但望美飲食，不奉諸佛教。
- 17 當知是過失，利養為大怖，少智不審慮，苾芻應釋心。
- 18 苾芻說出家，三業應調伏，不邪命自活，心善常思惟。
- 19 微細病難忍，利養最難離，供養心不動，天龍致禮拜。

#### 怨家品第十四

- 01 不怨而興怨，不謗而造業，愚迷受輪迴，今世及後世。
- 02 先自作漏業，然後害他人，彼此相興害，如鳥墮羅網。
- 03 破他還自破，冤家遇冤家，毀他還自毀，瞋他還自瞋。
- 04 斯何沙門行，不知正法本，壽既獲短促，捨冤復結冤。
- 05 眾相共毀謗，各發恚怒聲，歡心平等忍，此忍最無比。
- 06 斷骨而命終，牛馬死財失，國界則喪亂，聚集還復得。
- 07 汝等不興惡，此法得離怨，他怨能忍受，說之名為智。
- 08 若知此說勝，愚迷求快樂，現在無怨意，未來亦無恨。
- 09 不可怨以怨，終已得快樂，行忍怨自息，此名如來法。
- 10 若人致毀罵，彼勝我不勝，快樂從意者，怨終得休息。
- 11 若人親善友，共遊於世間，不積有冤餘，專念同其意。
- 12 設不得善友，獨遊無伴侶，應觀諸國土，獨善不造惡。
- 13 學無同伴侶，又不得親友，寧獨守善行，不與愚人偕。
- 14 樂戒學法行，奚用伴侶為，如龍好深淵，如象樂曠野。

#### 憶念品第十五

- 01 入息出息念，具滿諦思惟，常依次第行，按如佛所說。
- 02 是則照世間，如雲開月現，起止覺思惟，坐臥不廢忘。
- 03 苾芻立是念，現利未來勝，始得終最勝，逝不睹生死。
- 04 若見身所住，六觸以為最，苾芻常一心，便自知圓寂。
- 05 以有是諸念，自身恒逮行，若其不如是，終不得意行。
- 06 是隨本行者，如是度愛勞，若能寤意念，一心定歡喜。
- 07 若能寤意念，解脫一心樂，應時等法行，得度生死地。
- 08 苾芻寤意念，當令念相應，生死煩惱斷，獲得圓寂果。
- 09 常當聽妙法，自覺寤其意，能覺之為賢，終始無怖畏。
- 10 以覺意得應，晝夜慕習學，解脫甘露要，決定得無漏。
- 11 若人得善利，而來自歸佛，是故當晝夜，一心常念佛。
- 12 若人得善利，而來自歸法，是故當晝夜，一心常念法。
- 13 若人得善利，而來自歸僧，是故當晝夜，一心常念僧。
- 14 善知自覺者，是瞿曇聲聞，應當於晝夜，一心恒念佛。
- 15 善知自覺者，是瞿曇聲聞，應當於晝夜，一心恒念法。
- 16 善知自覺者，是瞿曇聲聞，應當於晝夜，一心恒念僧。
- 17 善知自覺者，是能仁弟子，應當於晝夜，一心恒念戒。

- 18 善知自覺者，是能仁弟子，應當於晝夜，一心恒念施。
- 19 善知自覺者，是能仁弟子，應當於晝夜，一心恒念天。
- 20 善知自覺者，是能仁弟子，應當於晝夜，一心恒念身。
- 21 善知自覺者，是能仁弟子，應當於晝夜，一心念靜慮。
- 22 善知自覺者，是能仁弟子，應當於晝夜，一心念不殺。
- 23 善知自覺者，是能仁弟子，應當於晝夜，一心念不盜。
- 24 善知自覺者，是能仁弟子，應當於晝夜，一心常念空。
- 25 善知自覺者，是能仁弟子，應當於晝夜，一心念無相。
- 26 善知自覺者，是能仁弟子，應當於晝夜，一心念無願。
- 27 善知自覺者，是能仁弟子，應當於晝夜，一心念出世。
- 28 善知自覺者，是能仁弟子，應當於晝夜，一心念意樂。
- 29 善知自覺者，是能仁弟子，應當於晝夜，一心念圓寂。

### 清淨品第十六（雜品）

- 01 當念自覺悟，作時勿虛妄，行要修亦安，所造時真實。
- 02 人當求方便，自致獲財寶，彼自觀亦然，意願即果之。
- 03 坐臥求方便，發起於精進，如工鍊真金，除其塵垢冥，  
不為闇所蔽，永離老死患。
- 04 不羞而反羞，反羞而不羞，不畏而現畏，畏現而不畏，  
生為人邪見，死定入地獄。
- 05 人先為放逸，後止而不犯，是光照世間，如月現雲消。
- 06 人先為放逸，後止而不犯，以善而滅之，是光照世間。
- 07 若人為罪惡，修善而能除，世間由樂著，而空念其義。
- 08 少年而出家，求佛深妙法，是光照世間，如月晃雲散。
- 09 現世不施害，死而無憂戚，彼見道無畏，離苦獲安穩。
- 10 現世不施害，死而無憂戚，彼見道無畏，眷屬中最勝。
- 11 除斷濁黑業，惟修白淨行，度愛得清淨，棄捨穢惡行。
- 12 持戒常清淨，清淨晡沙他，三業恒清淨，清淨名出家。
- 13 愛欲意為田，姪怒癡為種，故施度世者，得福無有量。
- 14 猶如穢惡田，瞋恚滋蔓生，是故當離恚，施報無有量。
- 15 猶如穢惡田，愚癡滋蔓生，是故當離愚，獲報無有量。
- 16 猶如穢惡田，憍慢滋蔓生，是故當離慢，獲報無有量。
- 17 猶如穢惡田，慳吝滋蔓生，是故當離慳，獲報無有量。
- 18 猶如穢惡田，愛樂滋蔓生，是故當離愛，獲報無有量。

- 19 六識王為主，愛染為眷屬，無染則離愛，染著是愚癡。  
20 骨幹以為城，肉血而塗飾，門根盡開張，結賊得縱逸。  
21 有緣則增苦，觀彼二因緣，滅之由賢眾，不從外愚除。

### 水喻品第十七

- 01 淨心常憶念，無所有貪愛，已度愚癡淵，如鵝守枯池。  
02 彼心既棄捨，翱翔昇虛空，修行出世間，能破魔羅眾。  
03 少不修梵行，至老不積財，愚癡樂睡眠，由己不修善。  
04 少不修梵行，至老不積財，鴛鴦守空池，守故有何益。  
05 莫輕小惡罪，以為無殃報，水滴雖極微，漸盈於大器。  
06 惡業漸漸增，纖毫成廣大，莫輕小善業，以為無福報。  
    水滴雖極微，漸盈於大器，善業漸漸增，纖毫成廣大。  
07 猶如人渡河，縛筏而牢固，彼調度不度，聰叡乃調度。  
08 佛世尊已度，梵志度當度，苾芻入淵池，聲聞縛牢固。  
09 是泉而何用，水恒而停滿，拔愛根本除，復欲何所望。  
10 水工調舟船，弓師能調角，巧匠樂調木，智者能調身。  
11 猶如深淨泉，表裏甚清徹，聞法得清淨，智者生歡喜。  
12 猶如深淨泉，表裏甚清徹，智者聞妙法，歡喜無窮盡。  
13 忍心如大地，不動如虛空，聞法喻金剛，獲味免輪迴。

### 華喻品第十八

- 01 何人能擇地，捨地獄取天，惟說善法句，如採善妙華。  
02 學人能擇地，捨地獄取天，善說妙法句，能採眾妙華。  
03 截林勿截樹，因林生怖畏，截林而滅已，苾芻得圓寂。  
04 截林不斷根，因林生怖畏，未斷分毫間，令意生纏縛。  
05 截林勿斷根，因林生怖畏，心纏最難離，如犢戀愛母。  
06 當自斷愛戀，猶如枯蓮池，息跡受正教，佛說圓寂樂。  
07 猶如可意華，色好而無香，巧言華如是，無果不獲報。  
08 猶如可意華，色好而香潔，巧言善如是，必獲其好報。  
09 猶如蜂採華，不壞色與香，但取味飛去，苾芻入聚然。  
10 不違他好惡，勿觀作不作，但自觀身行，若正若不正。  
11 如田糞穢溝，而近于大道，其中生蓮華，香潔甚可悅。  
12 有生必有終，凡夫樂處邊，慧人愛出離，真是佛聲聞。  
13 多集眾妙華，結鬘為步搖，有情積善根，後世轉殊勝。

- 14 如末哩妙華，末拘羅清淨，貪欲瞋若除，苾芻淨香潔。
- 15 如人採妙華，專意不散亂，因眠遇水漂，俄被死王降。
- 16 如人採妙華，專意不散亂，欲意無厭足，常為窮所困。
- 17 如人採妙華，專意不散亂，未獲真財寶，長為窮所困。
- 18 若不見死王，慧照如淨華，苾芻到彼岸，如蛇脫故皮。
- 19 貪瞋癡若斷，如棄毒華根，苾芻到彼岸，如蛇脫故皮。
- 20 貪根若除斷，如華水上浮，苾芻到彼岸，如蛇脫故皮。
- 21 恚根若除斷，如華水上浮，苾芻到彼岸，如蛇脫故皮。
- 22 癡根若除斷，如華水上浮，苾芻到彼岸，如蛇脫故皮。
- 23 如人結花鬘，意樂貪無足，不盡現世毒，三根常纏縛。
- 24 觀身如坏器，幻法如野馬，斷魔華開敷，不睹死王路。
- 25 是身如聚沫，知此幻化法，斷魔華開敷，不睹死王路。
- 26 我慢根除斷，如華水上浮，苾芻到彼岸，如蛇脫故皮。
- 27 慳吝根若斷，如華水上浮，苾芻到彼岸，如蛇脫故皮。
- 28 愛支根若斷，如華水上浮，苾芻到彼岸，如蛇脫故皮。
- 29 若無煩惱根，獲報善因果，苾芻到彼岸，如蛇脫故皮。

### 馬喻品第十九

- 01 譬馬調能軟，隨意如所行，信戒及精進，定法要具足。
- 02 獲法第一義，利用故無窮，一心行和忍，得免輪迴苦。
- 03 忍和意得定，能斷諸苦惱，從是得住定，如馬善調御，  
斷恚獲無漏，如馬能自調，棄惡至平坦，後受生天樂。
- 04 不恣在放恣，於眠多覺悟，如羸馬比良，棄惡乃為賢。
- 05 若人有慚愧，智慧可成就，是故易誘進，如策於良馬。
- 06 譬馬若調平，可堪王乘騎，能調為人賢，乃受誠信語。
- 07 雖為常調伏，如彼新馳馬，亦如善龍象，不如自調者。
- 08 彼人不能乘，人所亦不至，惟自調伏者，乃到調方所。
- 09 彼人不能乘，人所亦不至，惟自調伏者，乃滅一切苦。
- 10 彼人不能乘，人所亦不至，惟自調伏者，得至圓寂路。
- 11 應常自調伏，亦如止奔馬，能自防制者，念度苦原際。
- 12 如馬可王乘，彼地希有生，苾芻善調伏，解脫一切苦。
- 13 惟自調伏者，善意如良馬，亦如大象龍，自調最為上。
- 14 如王乘智馬，國中所希有，苾芻善調伏，能斷於纏縛。
- 15 惟自調伏者，此善最無比，亦如善象龍，意念到彼岸。

16 自師自衛護，自歸求自度，是故躬謹慎，如商賈智馬。

## 瞋恚品第二十

- 01 除瞋去我慢，遠離諸煩惱，不染彼名色，冤家無有伴。  
02 除恚得善眠，恚盡不懷憂，恚為毒根本，苾芻為甘甜，  
賢聖悉能除，斷彼善眠睡。  
03 人興恚怒心，作諸不善業，後恚若得除，智火漸熾盛。  
04 無慚復無愧，復好生瞋怒，為瞋所纏縛，如闇失明燈。  
05 彼力非為力，以恚為力者，恚為凡朽法，不知善響應。  
06 有力近猛軍，無力退怯弱，能忍為上將，宜當忍勿贏。  
07 舉眾共輕之，有力名為忍，能忍最為上，宜當懷忍贏。  
08 自我與彼人，大畏不可救，如知彼瞋恚，宜滅己中瑕。  
09 二俱行其義，我與彼亦然，如知彼瞋恚，宜忍彼中瑕。  
10 俱行於二義，我忍彼亦然，愚謂我無力，觀法亦復爾。  
11 若愚勝於智，麤言及惡語，欲常得勝者，於言宜寂默。  
12 常習智者教，不與愚人集，能忍穢陋言，故說忍中上。  
13 恚者不發言，處眾若屏處，人恚以熾然，終已不自覺。  
14 諦說不瞋恚，乞者念以施，三分有定處，自然處天宮。  
15 息意何有恚，自檢壽中明，等智定解脫，知己無有恚。  
16 若為惡意者，怒有怒果報，怒不報其怒，勝其彼鬥負。  
17 忍辱勝於怨，善勝不善者，勝者能施善，真誠勝欺善。  
18 無恚亦不害，恒念真實行，愚者自生恚，結冤常存在。  
19 恚能自制斷，如止奔走車，是為善調御，去冥入光明。  
◎沙門及正道，利養怨憶念，清淨水兼華，馬恚為第十。

## 如來品第二十一

- 01 自獲正覺最無等，一染世間一切法，  
具一切智力無畏，自然無師亦無證。  
02 自獲正覺最無等，不染一切世間法，  
具一切智力無畏，自然無師無保證。  
03 善逝獨證無等倫，應現世間成正道，  
如來諸天世中尊，一切神通智圓滿。  
04 我為佛世尊，斷漏無婬欲，諸天及世人，一切從吾心。  
05 我既無師保，亦獨無伴侶，積諸行得佛，自然通聖道。

- 06 己勝不受惡，一切世間勝，叡智廓無邊，誘蒙吾為勝。
- 07 今往波羅奈，欲擊甘露鼓，當轉於法輪，未曾有轉者。
- 08 智人不處愚，觀世而隨化，說於無垢跡，永息無有上。
- 09 勇猛師子吼，正法名如來，法說及義說，覺者永安寧。
- 10 勇健立靜慮，出家日夜滅，諸天常衛護，為佛所稱記。
- 11 於彼天人中，歎說正等覺，速修而自覺，最後離胎身。
- 12 說諸過去佛，及以當來者，現在正等覺，多除群生憂。
- 13 盡皆尊重法，已敬今敬者，若當生恭敬，是謂佛法要。
- 14 若欲自求要，正身最第一，信敬於正法，憶念佛教戒。
- 15 諸有不信佛，如此群盲類，當墮於惡道，如商遇羅剎。
- 16 船師能度水，精進為橋梁，人以種姓繫，度者為勇健。
- 17 如來無等倫，愛盡無所積，解脫心無漏，恩慧天世人。
- 18 思惟二觀行，善觀二閑靜，除冥超神仙，善獲得自在。
- 19 譬人立山頂，遍見村落人，審觀法如是，如登樓觀園。
- 20 若人恒觀察，煩惱永不生，降甘露法雨，連注無窮盡。

## 多聞品第二十二

- 01 多聞善能行，修善無煩惱，所行業障消，沙門獲妙果。
- 02 愚迷不覺知，好行不死法，善解知法者，病如芭焦樹。
- 03 猶如蓋屋密，闇冥無所見，雖有眾妙色，有目不見明。
- 04 猶如有一人，智達廣博學，不聞則不知，善法及惡法。
- 05 譬如執明燭，悉見諸色相，聞已盡能知，善惡之所趣。
- 06 雖稱為多聞，禁戒不具足，為法律所彈，所聞便有闕。
- 07 行人雖少聞，禁戒悉具足，於法律所稱，於聞便有闕。
- 08 雖少多有聞，持戒不完具，二俱被呵責，所願而皆失。
- 09 多聞能持固，奉法為垣墻，精進難毀譽，從是三學成。
- 10 多聞能奉法，智慧常定意，如彼闇浮金，孰能說有瑕。
- 11 智博為多聞，持戒悉完具，二俱得稱譽，所聞而盡獲。
- 12 多聞如寶鏡，照法盡無餘，自照兼照他，二俱生喜悅。
- 13 多聞如瓔珞，自身先嚴飾，有情生喜悅，愛樂無窮盡。
- 14 諸有稱己色，有歎說名德，斯皆諸貪欲，然自不覺知。
- 15 聞為知法律，解疑亦見正，從聞捨非法，行到不死處。
- 16 內無人自知，外無人所見，內不見其果，便隨聲而住。
- 17 內既而知之，外無人所見，二果俱已成，便隨聲而住。

- 18 內有而所知，外有而所見，彼有其明智，不隨聲而住。  
19 耳識多所聞，眼識多所見，聞見不牢固，事由義析理。  
20 智牢善說快，聞知定意快，彼不用智定，速行放逸者。  
21 賢聖樂於法，所行應於口，以忍思惟空，聞意則牢固。

### 己身品第二十三

- 01 常習善語言，沙門思坐起，一坐而所樂，欲求於息心。  
02 一坐而一臥，獨步而無伴，當自降伏心，自樂居山林。  
03 千千而為敵，一夫能勝之，莫若自伏心，便為戰中勝。  
04 自勝而為上，如彼眾生心，自降為大士，眾行則具足。  
05 非天彥達[口\*縛]，非魔及梵天，棄勝最為上，如智慧苾芻。  
06 先自而正己，然後正他人，若自而正者，乃謂之上士。  
07 先自而正己，然後正他人，若自而正者，不侵名真智。  
08 當自而修剋，隨其教訓之，己不被教訓，焉能教訓他。  
09 念自而修剋，使彼而信解，我已意專心，智者所習學。  
10 為己或為彼，多有不成就，其有學此者，自正兼訓彼。  
11 身全得存道，爾時豈容彼，己以被降伏，智者演其義。  
12 自己心為師，不隨他為師，自己為師者，獲真智人法。  
13 自己心為師，不依他為師，自己為師者，得譽獲利樂。  
14 自己心為師，不依他為師，自己為師者，獲智為天人。  
15 自己心為師，不依他為師，自己為師者，久受生天樂。  
16 自己心為師，不依他為師，自己為師者，親族中最勝。  
17 自己心為師，不依他為師，自己為師者，煩惱中無憂。  
18 自己心為師，不依他為師，自己為師者，斷除一切縛。  
19 自己心為師，不依他為師，自己為師者，能破諸惡趣。  
20 自己心為師，不依他為師，自己為師者，長作真智師。  
21 自己心為師，不依他為師，自己為師者，解脫一切苦。  
22 自己心為師，不依他為師，自己為師者，速證圓寂果。

### 法集要頌經卷第三

#### 廣說品第二十四

- 01 雖說百伽陀，句義不周正，不如解一句，聞乃得解脫。  
02 雖說百伽陀，不明有何益，不如解一義，聞乃得止息。  
03 雖解多伽陀，不行無所益，不如行一句，習行可得道。

- 04 若人壽百歲，毀戒意不息，不如一日中，供養持戒人。
- 05 若人壽百歲，懈怠劣精進，不如一日中，勇猛行精進。
- 06 若人壽百歲，不觀生滅法，不如一日中，而解生滅法。
- 07 若人壽百歲，不觀成敗事，不如一日中，睹微知所忌。
- 08 若人壽百歲，不見無漏句，不如一日中，得見無漏道。
- 09 若人壽百歲，不見無動句，不如一日中，得見無動道。
- 10 若人壽百歲，不睹難見句，不如一日中，得見微妙道。
- 11 若人壽百歲，不見無生句，不如一日中，得見無生道。
- 12 若人壽百歲，不見無作句，不如一日中，得見無作道。
- 13 若人壽百歲，不見最上句，不如一日中，得見最上道。
- 14 若人壽百歲，不見寂滅句，不如一日中，得見寂滅道。
- 15 若人壽百歲，不見甘露句，不如一日中，得服甘露味。
- 16 若人壽百歲，不見無垢句，不如一日中，得見清淨道。
- 17 若人壽百歲，不見離垢句，不如一日中，離垢得解脫。
- 18 雖復壽百歲，山林祭火神，不如須臾間，觀身而積行。
- 19 雖復百歲中，山林祭火神，不如須臾間，正見得解脫。
- 20 從月至於月，愚者用飲食，彼人不信佛，十六不獲一。
- 21 若人禱神祀，經歲望其福，彼於四分中，亦不獲其一。
- 22 從月至於月，愚者用飲食，不生慈愍心，十六不及一。
- 23 從月至於月，愚者用飲食，彼不知法數，十六不及一。
- 24 從月至於月，常行平等會，彼人不信佛，十六不及一。
- 25 從月至於月，常行平等會，彼人不信法，十六不及一。
- 26 從月至於月，常行平等會，彼人不信僧，十六不及一。
- 27 月月常千祀，恒施於平等，彼無慈愍心，十六不及一。
- 28 月月常千祀，恒施於平等，彼不恤蠕動，十六不及一。
- 29 月月常千祀，恒施於平等，若無悲念心，十六不及一。
- 30 月月常千祀，恒施於平等，彼懷怨恨心，十六不及一。
- 31 月月常千祀，恒施於平等，不見擇滅法，十六不及一。
- 32 月月常千祀，終身而不輟，不如須臾間，一心念真法。
- 33 一念福無邊，勝彼終身祀，雖終百歲壽，奉事祀火神。
- 34 不如須臾間，供養佛法僧，一念供養福，勝彼終身祀。

## 善友品第二十五

- 01 無信懷憎嫉，鬥亂彼此人，智者所棄嫌，愚習以為樂。

- 02 有信無憎嫉，精進信多聞，智者所敬待，賢聖以為樂。
- 03 不親惡知識，不與非法會，親近善知識，恆與正法會。
- 04 行路念防慮，持戒多聞人，思慮無量境，聞彼善言教，  
各各知差別。
- 05 近惡自陷溺，習善致名稱，妙者恆自妙，此由身真正。
- 06 善者終以善，斯由親近善，智慧為最上，持戒永寂滅。
- 07 如魚湊臭爛，人貪競取之，意者不覺臭，習惡亦如是。
- 08 多[言\*我]波羅葉，眾生往採取，葉薰香遠布，習善亦如是。
- 09 親近惡知識，罪垢日夜增，如豬身不淨，自污兼污他。
- 10 己自不習惡，親近習惡者，為人所輕笑，惡名日夜熾。
- 11 觀習而習之，知近而親近，毒箭在其束，淨者被其污，  
勇夫能除污，去惡不為伴。
- 12 是故知果報，智人悉分別，非親慎莫習，習當近於賢，  
苾芻修行道，忍苦盡諸漏。
- 13 愚人盡形壽，承事明智人，亦不知真法，如杓斟酌食。
- 14 智若須臾間，承事賢聖人，一一知真法，如舌了眾味。
- 15 智者尋一句，演出無量義，愚者誦千句，不解一句義。
- 16 一句義成就，智者所修學，愚者好遠離，真佛之所說。
- 17 怨憎有智勝，不隨親友義，愚者訓非道，漸趣地獄徑。
- 18 愚者自稱愚，當知善黠慧，愚人自稱智，是謂愚中甚。
- 19 若復歎譽愚，毀訾智者身，毀智猶有勝，歎愚不為上。
- 20 莫見愚聞聲，亦莫與愚居，與愚同居難，猶如怨同處。
- 21 莫見愚聞聲，亦莫與愚居，與愚同居難，猶如怨同處，  
當選擇共居，如與親親會。
- 22 是故事多聞，并及持戒者，如是人中上，如月在眾星。

### 圓寂品第二十六

- 01 如龜藏其六，苾芻攝意想，無倚無害彼，圓寂無言說。
- 02 忍辱第一道，佛說圓寂最，不以懷煩熱，害彼為沙門。
- 03 言當莫羸獷，所說應辯才，少聞其論難，反受彼屈伏。
- 04 數自興煩惱，猶彼器敗壞，生死數流轉，長沒無出期。
- 05 若不自煩惱，猶器完牢具，如是至圓寂，永無諸塵翳。
- 06 無病第一利，知足第一富，知親第一友，圓寂第一樂。
- 07 飢為第一患，行為第一苦，如實知此者，圓寂第一樂。

- 08 最妙聖言教，流布無窮際，世共傳習者，實無有厭時。
- 09 如是無等倫，所說善言教，身苦所逼迫，何過飢患苦。
- 10 趣善之徒少，趣惡之徒多，如實知此者，速求於圓寂。
- 11 有緣生善處，有緣生惡趣，有緣般涅槃，如斯皆有緣。
- 12 鹿歸於田野，鳥歸於虛空，義歸於分別，真人歸寂滅。
- 13 不以懈怠意，怯弱有所至，欲求於圓寂，焚燒諸縛著。
- 14 苾芻速杼船，以杼便當輕，求斷貪欲情，然後至圓寂。
- 15 我有本以無，本有我今無，非無亦非有，如今不可獲。
- 16 難見諦不動，善觀而不動，當察愛盡源，是謂名業際。
- 17 斷愛除其欲，竭河無流兆，能明此愛本，是謂名苦際。
- 18 無身滅其想，諸痛得清涼，眾行永止息，識想不復興，  
如實知此者，是謂名苦際。
- 19 住動虛則靜，非近非有樂，無動得輕安，靜乃獲圓寂。
- 20 亦不由往來，往來絕生滅，老死煩惱除，斷苦獲圓寂。
- 21 吾已無往來，不去而不來，不沒不復生，此際名圓寂。
- 22 智生之本末，有為知無為，生死所纏縛，縛者而難制。
- 23 如是四大身，五蘊苦惱集，安住觀實苦，盡苦獲圓寂。
- 24 諸法無往來，往來恒生滅，老病死遷流，無漏獲圓寂。
- 25 苾芻有世生，有造無作行，有無生無有，無作無所行。
- 26 苾芻吾已知，無復諸地入，無有虛空入，無諸入用入。
- 27 無想非想入，無今世後世，亦無日月想，無往亦無來。
- 28 從食因緣有，從食致憂樂，而此要滅者，諸苦法已盡。
- 29 非食命不濟，孰能不搏食，夫立食為先，然後乃至道。
- 30 地種及水火，是時風無吹，光焰所不照，亦不見其實。
- 31 非月非有光，非日非有照，審諦觀此者，乃應真圓寂。
- 32 端正色縱容，得脫一切苦，非色非無色，得脫第一苦。
- 33 究竟不恐懼，越縛無狐疑，未斷有欲刺，豈知身為患。
- 34 所謂究竟者，圓寂為第一，盡斷諸想著，文句不錯謬。
- 35 知節不知節，最勝捨有行，內自思惟行，如卵壞其膜。
- 36 眾施法施勝，眾樂法樂上，眾力忍力最，愛盡圓寂樂。

### 觀察品第二十七

- 01 善觀已瑕隙，使己不露外，彼彼自有隙，如彼飛輕塵。
- 02 若己稱無瑕，罪福俱并至，但見他人隙，恒懷無明想。

03 知慚壽中上，焉以貪牽縛，力士無畏忌，斯等命短促。  
04 知慚不盡壽，恒求清淨行，威儀不缺漏，當觀真淨壽。  
05 世間普盲冥，智眼眇眇耳，群鳥墮羅網，生天不足言。  
06 觀世衰耗法，但見眾色變，愚者自繫縛，為闇所纏繞，  
亦不見於行，觀而無所有。  
07 眾生皆有我，為彼而生患，一一不相見，不睹邪見刺。  
08 觀此刺因緣，眾生多染著，我造彼非有，彼造非我有。  
09 眾生為慢纏，染著於憍慢，為見所迷惑，不免生死際。  
10 已得與當得，二俱受塵垢，習於病根本，及覺諸所學。  
11 觀諸持戒者，梵行清淨人，瞻侍病瘦者，是謂至邊際。  
12 當觀水上泡，亦觀幻野馬，如是不觀身，亦不見死至。  
13 當觀水上泡，亦觀幻野馬，如是不觀世，亦不見死王。  
14 如是當觀身，如王雜色車，愚者所染著，善求遠離彼。  
15 如是當觀身，如王雜色車，愚者所染著，智者遠離之。  
16 如是當觀身，眾病之所因，病與愚合會，焉能可恃怙。  
17 當觀畫形像，摩尼紺青髮，愚者以為緣，不求越彼岸。  
18 當觀畫形像，摩尼紺青髮，愚者以為緣，智者所厭患。  
19 強以彩畫形，莊嚴醜穢身，愚者以為緣，亦不求丐度。  
20 爪髮為八分，雙部眼耳璫，愚者所染著，亦不求自度。  
21 著欲染於欲，不究結使緣，不以生結使，當度欲有流。  
22 非園脫於園，脫園復就園，當復觀此人，脫縛復就縛。  
23 今捨天王位，不造生死本，求離地獄苦，願說圓寂樂。  
24 青衣白蓋身，御者御一輪，觀彼未斷垢，求便斷縛著。  
25 人多求自歸，山川樹木神，園觀及神祀，望免苦患難。  
26 此非自歸上，亦非有吉利，如有自歸者，不脫一切苦。  
27 若有自歸佛，及法苾芻僧，修習聖四諦，如慧之所見。  
28 苦因緣苦生，當越此苦本，賢聖八品道，滅盡甘露際。  
29 是為自歸上，非不有吉利，如有自歸者，得脫一切苦。  
30 觀已觀當觀，不觀亦當觀，觀而復重觀，觀而不復觀。  
31 觀而復重觀，分別彼性本，計畫以為夜，寶身壞不久。  
32 觀而不重觀，雖見亦不見，如見而不見，觀而亦不見。  
33 云何見不見，何說見不見，因何見不見，因為出何見。  
34 猶若不觀苦，常當深自觀，以解苦根原，是為明妙觀。  
35 誰令凡夫人，不觀眾行本，因彼而觀察，去冥見大明。

## 罪障品第二十八

- 01 諸惡業莫作，諸善業奉行，自淨其意行，是名諸佛教。
- 02 惠施獲福報，不藏恚怒懷，以善滅其惡，欲怒癡無餘。
- 03 獨行勿逐愚，欲群當逐智，智者滅其惡，如鶴擇乳飲。
- 04 觀世若干變，知法起滅跡，賢聖不樂世，愚者不處賢。
- 05 解知念待味，思惟休息義，無熱無飢想，當服於法味。
- 06 人不損其心，亦不毀其意，以善永滅惡，不憂隨惡道。
- 07 人欲鍊其神，要當數修琢，智者易彫飾，乃名世之雄，  
能親近彼者，安穩無憂惱。
- 08 永息無過者，柔和不卒暴，吹棄諸惡法，如風落其葉。
- 09 無故畏彼人，謗毀清淨者，尋惡獲其力，煙雲風所吹。
- 10 人之為善惡，各各自知之，修善得善果，為惡隨惡趣。
- 11 達己淨不淨，何慮他人淨，愚者不自鍊，如鐵鑽鈍鋼。
- 12 若眼見非邪，黠人求方便，智者善壽世，亦不為眾惡。
- 13 商人在路懼，伴少而貨多，經過險難處，然有折軸憂。
- 14 有身無瘡疣，不為毒所害，毒無奈瘡何，無惡無所造。
- 15 多有行眾惡，必為身作累，施善布恩德，此事甚為難。
- 16 善哉修善者，傷哉為甚惡，惡惡自為易，惡人為善難。
- 17 愚者自謂正，猶惡不成熟，惡已成熟滿，諸苦亦復熟。
- 18 賢者見於惡，不為惡所熟，如惡以不熟，惡者觀其惡。
- 19 賢者觀其惡，乃至賢不熟，設以賢熟者，賢賢自相觀。
- 20 人雖為惡行，亦不數數行，於彼意不樂，知惡之為苦。
- 21 人能作其福，亦當數數造，於彼意願樂，善愛其福報。
- 22 先當制善心，攝持惡根本，由是興福業，心由樂於惡。
- 23 為惡雖復少，後世受苦深，當獲無邊福，如毒在心腹。
- 24 為福雖微少，後受大福德，當獲大果報，如種獲真實。
- 25 無過而強輕，無恚而強侵，當於十品處，便當趣於彼。
- 26 痛癢語麤獷，此形必壞敗，眾病所逼切，心亂而不定。
- 27 宗族別離散，財貨費耗盡，為賊所劫掠，所願不從意。
- 28 或復無數變，為火所焚燒，身壞無智慧，亦趣於十品。
- 29 作惡勿言無，人作言無罪，屏隈言無罪，斯皆有證驗。
- 30 作惡言有憂，久作亦言憂，憂屏隈亦言，憂彼報亦憂。
- 31 此憂彼亦憂，惡行二俱憂，彼憂彼受報，見行乃審知。
- 32 此喜彼亦喜，福行二俱喜，彼行彼受報，見行自清淨。

- 33 此煮彼亦煮，罪行二俱煮，彼煮彼受報，見行自有驗。  
34 作福不作惡，皆由宿行法，終不畏死徑，如船截流渡。

### 相應品第二十九

- 01 夜光照于冥，至日未出間，日光布大明，夜光便黯黩。  
02 察者布光明，如來未出頃，佛出放大明，無察無聲聞。  
03 不堅起堅想，堅起不堅想，後不至於堅，由起邪見故。  
04 堅而知堅者，不堅知不堅，被人求於堅，正治以為本。  
05 愚者以為堅，反被九結縛，如鳥墮羅網，斯由愛深固。  
06 諸有懷狐疑，今世及後世，禪定盡能滅，無惱修梵行。  
07 無塵離於塵，能持此服者，無御無所至，此不應法服。  
08 若能除垢穢，修戒等慧定，彼應思惟業，此應服袈裟。  
09 不以柔和言，名稱有所至，人有善顏色，乃懷巧偽心。  
10 有能斷是者，永拔其根本，智者除諸穢，乃名為善色。  
11 不以色縱容，暫睹知人意，世多違行人，遊蕩在世界。  
12 如彼虛偽鉅，其中純有銅，獨遊無畏忌，內穢外不淨。  
13 貪饕不自節，三轉隨時行，如圈被養豬，數數受胞胎。  
14 人能專其意，於食知止足，趣欲支其形，養壽守其道。  
15 觀淨而自淨，諸根不具足，於食無厭足，斯等凡品行，  
轉增於欲意，如屋壞穿漏。  
16 當觀不淨行，諸根無缺漏，於食知止足，有信執精進，  
不恣於欲意，如風吹泰山。  
17 空閑甚可樂，然人不樂彼，無欲常居之，非欲之所處。  
18 難移難可動，如彼重雪山，非賢則不現，猶夜射冥室。  
19 賢者有千數，智者在叢林，義理極深邃，智者所分別。  
20 多有眾生類，非射而不值，今觀此義理，無戒人所恥。  
21 觀有知恐怖，變易知有無，是故不樂有，當念遠離有。  
22 無信無反復，穿牆而盜竊，斷彼希望思，是名為勇士。  
23 除其父母緣，王家及二種，遍滅其境界，無垢為梵行。  
24 若人無所依，知彼所貴食，空及無相願，思惟以為行。  
25 鳥飛於虛空，而無足跡現，如彼行行人，言說無所趣。  
26 諸能斷有本，不依於未然，空及無相願，思惟以為行。  
27 希有諸眾生，多不順其性，有度不度者，為滅甚為難。  
28 諸有平等說，法法共相觀，盡斷諸結使，無復有熱惱。

- 29 行路無復憂，終日得解脫，一切結使盡，無復有眾惱。  
30 如鳥飛虛空，而無有所礙，彼人獲無漏，空無相願定。  
31 如鳥飛虛空，而無有所礙，行人到彼岸，空無相願定。  
32 無造無有造，造者受煩惱，非造非無造，前憂後亦憂。  
33 造者為善妙，以作不懷憂，造而樂而造，生天受歡樂。  
34 虛空無轍跡，沙門無外意，眾人盡樂惡，唯佛淨無穢。  
35 虛空無轍跡，沙門無外意，世間皆無常，佛無我所有。  
36 諸天及世人，一切行相應，得脫一切苦，離愛免輪迴。  
37 諸天及世人，一切行相應，能遠諸惡業，不墮於惡趣。  
38 亦復不知論，賢愚無差別，若復知論義，所說無垢跡。  
39 說應法議論，當豎仙人幢，法幢為仙人，仙人為法幢。  
40 或有寂然罵，或有在眾罵，或有未聲罵，世無不罵者。  
41 一毀及一譽，但利養其名，非有亦非有，則亦不可知。  
42 智人所稱譽，若好兼及醜，智人無缺漏，慧定得解脫，  
如紫磨真金，內外徹清淨。  
43 猶如安明山，不為風所動，智人亦如是，不為毀譽動。  
44 如樹無有根，無枝況有葉，健者以解縛，誰能毀其德？  
45 無垢無有住，身塹種苦子，最勝無有愛，天世人不知。  
46 猶如網叢林，無愛況有餘，佛有無量行，無跡誰跡將。  
47 若有不欲生，以生不受有，佛有無量行，無跡誰跡將。  
48 若欲滅其想，內外無諸因，亦無過色想，四應不受生。  
49 捨前及捨後，捨間越於有，一切盡皆捨，不復受生老。

#### 法集要頌經卷第四

##### 樂品第三十

- 01 忍勝則怨賊，自負則自鄙，息意則快樂，無勝無負心。  
02 若人擾亂彼，自求安樂世，遂成其怨憎，終不得解脫。  
03 善樂於愛欲，以杖加群生，於中自求安，後世不得樂。  
04 人欲得歡樂，杖不加群生，於中自求樂，後世亦得樂。  
05 樂法樂學行，慎莫行惡法，能善行法者，今世後世樂。  
06 護法行法者，修法獲善報，此應法律教，行法不趣惡。  
07 護法行法者，如蓋覆其形，此應法律教，行法不趣惡。  
08 惡行人地獄，所生墮惡道，非法自陷溺，如手把虵蛇。  
09 不以法非法，二事俱同報，非法入地獄，正法生於天。

- 10 施與戰同處，此德智不譽，施時亦戰時，此事二俱等。
- 11 人遭百千變，等除憍慢怨，時施清淨心，健夫最為勝。
- 12 忍少得勝多，戒勝懈怠多，有信慧施者，後身受善報。
- 13 快樂施福報，所願皆全成，速得第一滅，漸入無為際。
- 14 若彼求方便，賢聖智慧施，盡其苦原本，當知獲大報。
- 15 愛法善安穩，心意潔清淨，賢聖所說法，智者所娛樂。
- 16 若人心樂禪，亦復樂不起，亦樂四意止，并及七覺意，  
及彼四神足，賢聖八品道。
- 17 善樂於搏食，善樂攝法服，善樂於經行，樂處於山藪。
- 18 已逮安樂處，現法而無為，已越諸恐懼，超世諸染著。
- 19 善樂於念持，善觀於諸法，善哉世無害，養育眾生類。
- 20 世無欲愛樂，越諸染著意，能滅己憍慢，此名第一樂。
- 21 耆年持戒樂，有信成就樂，分別義趣樂，不造眾惡業。
- 22 世有父母樂，眾集和亦樂，世有沙門樂，靜志樂亦然。
- 23 諸佛出興樂，說法堪受樂，眾僧和合樂，和則常有安。
- 24 持戒完具樂，多聞廣知樂，睹見真人樂，解脫行跡樂。
- 25 德水清涼樂，法財自集快，得智明慧快，滅慢無邪快。
- 26 得睹諸賢樂，同會亦復樂，不與愚從事，畢固永已樂。
- 27 不與愚從事，經歷無數日，與愚同居難，如與怨憎會，  
與智同處易，如共親親會。
- 28 人智甚難遇，終不虛託生，設當託生處，彼家必蒙慶。
- 29 一切得安穩，梵志取滅度，不為欲所染，盡脫於諸處。
- 30 盡斷不祥結，降伏內煩惱，永息得睡眠，心識得清徹。
- 31 慎莫著於樂，當就護來行，當念捨於世，觀於快樂事。
- 32 如世欲歡樂，及彼天上樂，此名為愛極，十六未獲一。
- 33 欲捨於重擔，更不造重業，重擔世之苦，能捨最快樂。
- 34 盡斷諸愛欲，及滅一切行，并滅五蘊本，更不受三有。
- 35 義聚則有樂，朋友食福樂，彼滅寂然樂，展轉普及人，  
苦以樂為本。
- 36 猶彼焰火爐，赫焰而熾然，漸漸而還滅，不知所湊處。
- 37 如是等見人，免於愛欲泥，去亦無處所，以獲無動樂。
- 38 中間無有恙，有變易不停，除憂無有愁，寂然觀世有。
- 39 有樂無有惱，正法而多聞，設見有所損，人人貪於色。
- 40 無結世善壽，大法知結源，人當明結瑕，人人心縛著，

亦縛於色本。

- 41 一切受辱苦，一切任己樂，勝負自然興，竟不有所獲。  
42 諸欲得樂壽，能忍彼輕報，忍者忍於人，不忍處諸有。  
43 諸欲得樂壽，於惑而無惑，惑者惑於人，我斯無有惑。  
44 諸欲得樂壽，終已無結者，當食於念食，如彼光音天，  
恒以念為食，意身無所燒。  
45 眾生見苦樂，聖法無損壞，雖值觸樂跡，無跡焉有觸。  
46 如苾芻在定，不著一切垢，眾生遭苦樂，而不能覺知。  
◎如來與多聞，己身廣善友，圓寂觀罪障，相應樂第十。

### 護心品第三十一

- 01 心輕難調伏，為欲所居懷，降心則為善，以降便輕安。  
02 如魚在旱地，以離於深淵，心識極惶懼，魔眾而奔馳。  
03 心走非一處，猶如日光明，智者所能制，如鉤止惡象。  
04 今我論此心，無堅不可見，我今欲訓誨，慎莫生瑕隙。  
05 汝心莫遊行，恣意而放逸，我今還攝汝，如御暴逸象。  
06 生死無有量，往來無端緒，求於屋舍者，數數受胞胎。  
07 以觀此居屋，更不造諸舍，梁椽看已壞，臺閣則摧折。  
08 心已離諸行，中間是己心，心多為輕躁，難持難調護。  
09 智者能自正，如匠搦箭直，有患則知患，有患知有患。  
10 是意皆自造，非干父母為，除邪就正定，為福勿迴復。  
11 蓋屋若不密，天雨則常漏，人不思惟行，恒歷姪怒癡。  
12 蓋屋若不密，天雨則常漏，人自思惟行，永無姪怒癡。  
13 心為諸法本，心尊是心使，心若念惡行，即言即惡行，  
罪苦自追隨，車轢終于轍。  
14 心為諸法本，心尊是心使，心若念善行，即言即善行，  
福慶自追隨，如影隨其形。  
15 不以不淨意，亦及瞋怒人，欲得知法者，正等覺所說。  
16 諸有除貢高，心意極清淨，能捨傷害懷，乃得聞正法。  
17 心不住止息，亦不知善法，迷於出世事，無有正知見。  
18 三十六使流，并及心意漏，數數有邪見，依於欲想結。  
19 捨意放其根，人隨意迴轉，為少減名稱，如鳥捨空林。  
20 在靜自修學，慎勿逐欲跡，莫吞熱鐵丸，嗥哭受其報。  
21 應修而不修，恃力不精勤，自陷人形卑，懈怠不解慧。

- 22 亂觀及正觀，皆由意所生，能覺知心觀，愚心數數亂。  
23 智者如是觀，念者專為行，咄嗟意無著，惟佛能滅此。  
24 觀身如空瓶，安心如丘城，以慧與魔戰，守勝勿復失。  
25 觀身如聚沫，如陽焰野馬，以慧與魔戰，守勝勿復失。  
26 心念七覺意，等意不差違，當捨愚惑意，樂於不起忍，  
盡漏無有漏，於世取滅度。  
27 當自護其意，若犛牛護尾，有施於一切，終不離其樂。  
28 一龍出眾龍，龍中六牙者，心心自平等，獨樂於曠野。  
29 不以能害心，盡為一切人，慈心為眾生，彼無有怨恨。  
30 慈心為一人，便護諸善本，盡當為一切，賢聖福稱上。  
31 普慈於一切，愍念眾生類，修行於慈心，後受無極樂。  
32 若以踊躍意，歡喜不懈怠，修於諸善法，獲致安穩處。  
33 自則致歡喜，身口意相應，以得等解脫，苾芻息意快，  
一切諸結盡，無復有塵勞。  
34 正使五音樂，不能悅人意，不如一正心，向於平等法。  
35 最勝得善眼，亦不計有我，諸有心樂禪，不樂於欲意。  
36 最勝踊躍意，亦不見有我，諸有心樂禪，不樂於欲意。  
37 諸結永已盡，如山不可動，於染無所染，於恚不起恚。  
38 諸有如此心，焉知苦蹤跡，無害無所染，具足於戒律。  
39 於食知止足，及諸床臥具，修意求方便，是謂諸佛教。  
40 行人觀心相，分別念待意，以得入禪定，便獲喜安樂。  
41 護意自莊嚴，嫉彼而營己，遭憂不患苦，智者審諦住。  
42 人不守護心，為邪見所害，兼懷掉戲意，斯等就死徑。  
43 是故當護心，等修清淨行，正見恒在前，分別起滅法。  
44 苾芻降睡眠，盡苦更不造，降心復於樂，護心勿復調。  
45 有情心所誤，盡受地獄苦，降心則致樂，護心勿復調。  
46 護心勿復調，心為眾妙門，護而不漏失，便在圓寂道。

### 苾芻品第三十二

- 01 苾芻若乞食，以得勿積聚，天人所歎譽，生淨無瑕穢。  
02 苾芻為慈愍，愛敬於佛教，深入妙止觀，滅穢行乃安。  
03 苾芻諸愛盡，捨愛去貢高，無我去吾我，此義孰不親。  
04 當知是法行，身之出要徑，如象御強敵，苾芻恒習行。  
05 人不壽劫盡，內與自心諍，護身念道諦，苾芻惟淨安。

- 06 念親同朋友，正命無雜糅，施知應所施，亦合威儀具，  
苾芻備眾行，乃能盡苦際。
- 07 樂法意欲法，思惟安穩法，苾芻依法行，正而勿廢忘。
- 08 當學入空定，苾芻常安靜，愛樂非人處，觀察平等法。
- 09 當制於五蘊，服意如水流，清淨恒和悅，為飲甘露味。
- 10 如彼極峻山，不為風所動，苾芻盡愚癡，所在不傾動。
- 11 一切諸名色，非有莫生惑，不近則不愛，乃名真苾芻。
- 12 苾芻非剃髮，慢誕無戒律，捨貪思惟道，乃應真苾芻。
- 13 息心非剃髮，放逸無志信，能滅眾苦惱，為勝大沙門。
- 14 苾芻得慈定，承受諸佛教，極得滅盡跡，無親慎莫睹。
- 15 心喜極歡悅，加以受念者，苾芻多熙怡，盡空無根源。
- 16 息身而息意，攝口亦乃善，捨世為苾芻，度苦無有礙。
- 17 無禪則無智，無智則無禪，道從禪智生，得近圓寂路。
- 18 禪行無放逸，莫為欲亂心，無吞洋銅汁，自惱焦形軀。
- 19 能自護身口，護意無有惡，後獲禁戒法，故號為苾芻。
- 20 諸有修善法，七覺意為本，此名為妙法，故名定苾芻。
- 21 如今現所說，自知苦盡源，此名為善本，是無漏苾芻。
- 22 不以持戒力，及以多聞義，正使得定意，不著於文飾，  
苾芻有所倚，盡於無漏行。
- 23 當觀正覺樂，勿近於凡夫，觀此現世事，分別於五蘊。
- 24 修行勿作惡，必強自制心，捨家而得解，意猶復染著。
- 25 習行懈緩者，勞意勿除之，非淨則梵行，焉致大財寶。
- 26 心得永休息，苾芻攝意行，以盡老病死，便脫魔羅縛。
- 27 心已得永寂，苾芻攝意行，以盡老病死，更不復受有。
- 28 以斷於愛相，苾芻攝意行，以盡老病死，更不復受有。
- 29 無有結使心，苾芻攝意行，以盡老病死，更不復受有。
- 30 不能斷有根，苾芻攝意行，以盡老病死，更不復受有，  
能斷三毒根。
- 31 苾芻攝意行，以盡老病死，更不復受有，以脫於魔界。
- 32 以勝叢林刺，及除罵詈者，猶憑妙高山，苾芻不受苦。
- 33 不念今後世，觀世如幻夢，苾芻勝彼此，如蛇脫故皮。
- 34 能斷愛根本，盡竭欲深泉，苾芻勝彼此，如蛇脫故皮。
- 35 能斷於五欲，斷於欲根本，苾芻勝彼此，如蛇脫故皮。
- 36 能斷於五結，拔於愛欲刺，苾芻勝彼此，如蛇脫故皮。

- 37 諸有無家業，又斷不善根，苾芻勝彼此，如蛇脫故皮。
- 38 諸有不熱惱，又斷不善根，苾芻勝彼此，如蛇脫故皮。
- 39 斷欲無遺餘，如拔不牢固，苾芻勝彼此，如蛇脫故皮。
- 40 愛生如流溢，猶蛇含毒藥，苾芻勝彼此，如蛇脫故皮。
- 41 諸有斷相觀，內不造其心，苾芻勝彼此，如蛇脫故皮。
- 42 貪根若斷盡，是名真苾芻，降伏魔羅軍，得盡苦輪迴。
- 43 瞋根若斷盡，是名真苾芻，解脫諸煩惱，得盡苦輪迴。
- 44 癡根若斷盡，是名真苾芻，遠離於纏縛，得盡苦輪迴。
- 45 慢根若斷盡，是名真苾芻，能離於愛染，得盡苦輪迴。
- 46 慳吝若斷盡，是名真苾芻，信樂於正覺，得盡苦輪迴。
- 47 貪心聚落刺，苾芻應思惟，若能遠離彼，佛說真苾芻。
- 48 瞋心聚落刺，苾芻應思惟，能離於瞋恚，佛說真苾芻。
- 49 癡心聚落刺，苾芻應思惟，若離於愚癡，佛說真苾芻。
- 50 慢心聚落刺，苾芻應思惟，若能離憍慢，佛說真苾芻。
- 51 慳吝聚落刺，苾芻應思惟，若能離慳吝，佛說真苾芻。
- 52 調伏貪愛念，如藥解蛇毒，苾芻能破壞，如蛇脫故皮。
- 53 調伏瞋恚念，如藥解蛇毒，苾芻能破壞，如蛇脫故皮。
- 54 調伏愚癡念，如藥解蛇毒，苾芻能遠離，如蛇脫故皮。
- 55 調伏憍慢念，如藥解蛇毒，苾芻能遠離，如蛇脫故皮。
- 56 調伏慳吝念，如藥解蛇毒，苾芻能遠離，如蛇脫故皮。
- 57 貪欲彼若發，斷截如蘆葦，煩惱如海深，苾芻應精進。
- 58 瞋恚彼若發，斷截如蘆葦，煩惱深如海，苾芻應精進。
- 59 愚癡彼若發，斷截如蘆葦，煩惱如海深，苾芻應精進。
- 60 憍慢彼若發，斷截如蘆葦，煩惱深如海，苾芻應精進。
- 61 慳吝彼若發，斷截如蘆葦，煩惱如海深，苾芻應精進。
- 62 持戒謂苾芻，有空乃行禪，行空究其源，無為最為樂。
- 63 苾芻忍所憂，分別床臥具，當習無放逸，斷有愛無餘。

### 梵志品第三十三

- 01 所謂梵志者，不但在裸形，居險臥荊棘，而名為梵志。
- 02 棄身無依倚，不誦異法言，惡法而盡除，是名為梵志。
- 03 今世行淨因，後世無穢果，無習諸惡法，是名為梵志。
- 04 若倚於愛欲，心無所貪著，已捨已得正，是名滅終苦。
- 05 諸有無所倚，恒習於正見，常念盡有漏，是名為梵志。

- 06 愚者受猥髮，并及床臥具，內懷貪著意，文飾外何求。
- 07 被服弊惡衣，躬稟善法行，閑居自思惟，是名為梵志。
- 08 見凡愚往來，墮墜受苦惱，欲獨度彼岸，不好他言說，  
惟滅惡不起，是名為梵志。
- 09 截流而已渡，無欲如梵天，智行以盡漏，是名為梵志。
- 10 不以水清淨，多有人沐浴，能除弊惡法，是名為梵志。
- 11 非剃為沙門，稱吉為梵行，若能滅眾惡，是則為道人。
- 12 彼以不二行，清淨無瑕穢，諸欲斷縛著，是名為梵志。
- 13 出家為梵行，入正為沙門，棄捨眾穢行，是則名捨家。
- 14 人無幻惑意，無慢無疑惑，無貪無我想，是名為梵志。
- 15 我不說梵志，託父母生者，彼多眾瑕穢，滅則為梵志。
- 16 身口及與意，清淨無過失，能攝三種行，是名為梵志。
- 17 見罵見相擊，默受不生怒，有大忍辱力，是名為梵志。
- 18 若見相侵欺，但念守戒行，端身自調伏，是名為梵志。
- 19 世所稱善惡，脩短及巨細，無取若無與，是名為梵志。
- 20 身為善行本，口意應無犯，能辨三妙處，是名為梵志。
- 21 來不作歡悅，去亦無憂愁，於聚應遠聚，是名為梵志。
- 22 以斷於恩愛，離家無愛欲，愛欲若已盡，是名為梵志。
- 23 適彼則無彼，彼彼適亦無，捨離於貪欲，是名為梵志。
- 24 適彼則無彼，彼彼適則虛，不染三惡處，是名為梵志。
- 25 能捨於家業，拔於愛欲本，無貪能知足，是名為梵志。
- 26 如今盡所知，究其苦源際，無復欲愛心，是名為梵志。
- 27 於罪并與福，兩行應永除，無憂無有塵，是名為梵志。
- 28 於罪并與福，兩行應永除，三處無染著，是名為梵志。
- 29 猶如眾華葉，以針貫芥子，不為欲所染，是名為梵志。
- 30 心喜無塵垢，如月盛圓滿，謗毀以盡除，是名為梵志。
- 31 如月清明朗，懸處於虛空，不染於愛欲，是名為梵志。
- 32 避諍而不諍，犯而不慍怒，惡來以善待，是名為梵志。
- 33 深解微妙慧，辯道不正道，體解無上義，是名為梵志。
- 34 諸在世間人，乞索而自濟，無我若無著，不失梵志行，  
說智無涯際，是名為梵志。
- 35 若能棄欲愛，去家捨諸受，以斷於欲漏，是名為梵志。
- 36 慈愍於有情，使不生恐懼，不害有益善，是名為梵志。
- 37 避怨則無怨，無所於傷損，志其邪僻見，是名為梵志。

- 38 于前及于後，及中則無有，無操無捨行，是名為梵志。
- 39 去其姪怒癡，憍慢諸惡行，針貫於芥子，是名為梵志。
- 40 城以塹為固，來往受其苦，欲適度彼岸，不宜受他語，  
惟能滅不起，是名為梵志。
- 41 人能斷愛欲，今世及後世，有愛應已盡，是名為梵志。
- 42 有情無希望，今世及後世，以無所希望，是名為梵志。
- 43 自己識不知，天人彥達[口\*縛]，能知無量觀，是名為梵志。
- 44 歸命人中尊，歸命人中上，不審今世尊，為因何等禪？  
惟願天中天，敷演其教戒。
- 45 自識於宿命，得見天人道，知生盡苦原，智心永寂滅。
- 46 自知心解脫，脫欲無所著，三明已成就，是名為梵志。
- 47 自識於宿命，知有情因緣，如來覺無著，是名為梵志。
- 48 盡斷一切結，亦不有熱惱，如來覺無著，是名為梵志。
- 49 仙人龍中上，大仙最為尊，無數佛沐浴，是名為梵志。
- 50 所有煩惱盡，度流而無漏，從此越彼岸，是名為梵志。
- 51 苾芻塚間衣，觀於欲非真，坐樹空閑處，是名為梵志。
- 52 人若無識知，無語無言說，體冷無溫暖，是名為梵志。
- 53 棄緣捨居家，出家無所畏，能服甘露味，是名為梵志。
- 54 斷絕於世事，口無羸獷言，八正道審諦，是名為梵志。
- 55 遠逝獨遊行，隱藏無形影，難降能自調，是名為梵志。
- 56 無形不可見，此亦不可見，解知此句者，念則有所由，  
覺知結使盡，是名為梵志。
- 57 能斷生死河，能忍超度世，自覺出苦塹，是名為梵志。
- 58 當求截流度，梵志無有欲，內自觀諸情，是名為梵志，  
能知如是者，乃名為梵志。
- 59 學先去其母，率君及二臣，盡勝諸境界，是名為梵志。
- 60 諸有知深法，不問老以少，審諦守戒信，猶祀火梵志。
- 61 於己法在外，梵志為最上，一切諸有漏，皆盡皆無餘。
- 62 或復觀於法，皆盡皆無餘，或復觀合會，皆盡皆無餘，  
或復觀因緣，皆盡皆無餘。
- 63 猶如內法本，梵志為在表，若使共床褥，如彼薄俱羅。
- 64 猶如內法本，梵志為在表，知生知老病，轉知於死徑。
- 65 日照照於晝，月照照於夜，甲兵照於軍，禪照於道人，  
佛出照天下，能照一切冥。

- 66 梵志無有是，有憂無憂念，如如意所轉，彼彼滅狐疑。  
67 出生諸深法，梵志習入禪，能解狐疑網，身知其苦痛。  
68 出生諸深法，梵志習入禪，遍照一切世，猶日在虛空。  
69 出生諸深法，梵志習入禪，能禦魔羅敵，如佛脫眾垢。  
◎護心及苾芻，梵志品在末，依次品而說，具足三十二。

【聖尊者法救集《諸佛法頌偈》竟】

※※※※※※※※※※※※※※※※※※※※※※※※※※※※※※

# 《法句經》及其譬喻的演變略探

林崇安 (2004,3,24)

## 一、前言

《法句經》是釋尊時期在印度各地流傳的佛陀偈頌，對印度大眾的教化起了很大的作用，支謙（西元 225 年頃）說：「其在天竺始進業者，不學《法句》，謂之越敘。此乃始進者之洪漸，深入者之奧藏也。」今日斯里蘭卡（錫蘭）也要求出家眾在受比丘戒前能夠背誦《法句經》。為了使大眾能正確地瞭解佛法，《法句經》便是一個重要的入門。釋尊時期的佛法歸入十二分教：1 契經（修多羅），2 應頌，3 記說，4 諷誦（伽他），5 自說（憂陀那），6 因緣，7 譬喻，8 本事，9 本生，10 方廣，11 希法，12 論議。《法句經》便是屬於此中的「自說」（憂陀那）。佛滅五六百年以後，為了將《法句經》偈頌的來龍去脈交待清楚，便將因緣、譬喻、本生、本事等相關資料編集進來，而有北傳的《法句譬喻經》、《出曜經》和南傳的《法句註》。以下依據相關的經論，鉤勒出釋尊時期《法句經》的形成，以及在佛滅後法句譬喻/因緣的演變情形。

## 二、《法句經》的形成

釋尊成佛後，先對五比丘傳《轉法輪經》，而後度化了六十賢部等人。這些證得阿羅漢聖位的弟子們也往印度各地弘法，為了便於傳法，便開始編集佛陀的教法，將佛陀所教導的經典傳誦出去。最初所傳誦的第一類經典是偈頌型的自說和諷誦。另一類經典是散文型的契經，有時在契經的結尾配上應頌。《根本說一切有部毘奈耶藥事》記載著，輸波勒迦城的商主圓滿（富樓那）與商人共入大海時，商人們常誦佛陀所說的偈、經：

彼諸商人，晝夜常誦《啞拖南頌》、《諸上座頌》、《世羅尼頌》、《牟尼之頌》、《眾義》、《經》等，以妙音聲，清朗而誦。圓滿聞已，而問言曰：汝等善能歌詠。諸商答曰：商主！此非歌詠。圓滿問曰：是何言辭？商人報曰：是佛所說。（T24, p11b）

此處商人們日夜所常誦的《嗚拖南頌=憂陀那》就是偈頌型的「自說」。《諸上座頌》、《世羅尼頌》、《牟尼之頌》、《眾義》則是偈頌型的「諷誦」。《別譯雜阿含經》也記載著：

爾時，尊者阿那律從佛遊行，至彼摩竭提國鬼子母宮。時阿那律中夜早起，正身端坐，誦《法句偈》及《波羅延》、《大德之偈》，又復高聲誦習其義及《修多羅》等。(T2, p480c)

此處指出，釋尊十大弟子之一的阿那律尊者，一早起來就誦《法句偈》等，《法句偈》是屬於偈頌型的「自說」，所誦的《波羅延》、《大德之偈=諸上座頌》是屬於偈頌型的「諷誦」。由上可知，釋尊時期的佛弟子們，包括在家的商人以及出家眾，早上以誦《自說=嗚拖南=憂陀那》等作功課，且以《法句偈》為先。所謂「自說」(憂陀那)是釋尊生活中感興的偈頌；法句偈是釋尊傳法時即興的偈頌，歸屬「自說」這一分教。《大毗婆沙論》說：

自說云何？謂諸經中，因憂喜事世尊自說。因喜事者，如佛一時見野象王，便自頌曰：「象王居曠野，放暢心無憂，智士處閑林，逍遙志恬寂。」因憂事者，如佛一時見老夫妻，便自頌曰：「少不修梵行，喪失聖財寶，今如二老鶴，共守一枯池。」(T27, p660a)

這些「自說」很早就已傳出，《雜阿含經》記載著釋尊先說《優陀那偈》而後才開示經義：

一時，佛住毘舍離耆婆拘摩羅藥師菴羅園。爾時，世尊說一切《優陀那偈》已，告尊者阿難：眼無常、苦、變易、異分法。…(T2, p52b)

釋尊時期所編集的《法句偈》，在釋尊入滅時之內容為何？由今日南北傳所保存的《法句偈》之原始共通部分，可以推知其內容從〈雙要品〉到〈婆羅門品〉，共計二十六品，在釋尊晚期已傳誦於印度各地（其情形猶如漢地唐詩三百首之普受社會大眾歡迎），《法句經=法

句偈》中一些有名的偈頌，例如：〈雙要品〉的「心為法本偈」：

心為法本，心尊心使，中心念惡，即言即行，  
罪苦自追，車轆于轍。  
心為法本，心尊心使，中心念善，即言即行，  
福樂自追，如影隨形。(T4, p562a)

〈述佛品〉的「諸惡莫作偈」：

諸惡莫作，諸善奉行，自淨其意，是諸佛教。(T4, p567b)

小結：《法句偈》26品本＝初期集本【A】，是釋尊在世時即開始編集，在釋尊入滅時已初步成型。

### 三、佛滅後的集成

佛滅當年的第一結集，先結集經藏，後結集律藏。結集經藏時，會中五百阿羅漢致力於編集四阿含，對於小品的《法句偈》、《大德之偈＝諸上座頌》等，則不歸入此次的會內結集，因為這些偈頌早已傳誦印度各地，眾所周知。此時印度各地所傳誦的《法句偈》26品，約有四百多偈。

佛滅百年時的第二結集，先結集律藏，後結集經藏。結集經藏時，一方面將四阿含略加調整，一方面將第一結集未編入的自說、諷誦、本事等短篇的偈、經，編成《雜藏》，稱之為《小部》，如此共成五部或五阿含。此次所集的《雜藏＝小部》的內容含有：

(1) 將諷誦中的《尸路偈》、《牟尼偈》、《眾義品》、《波羅延那》，編成《小部·經集》。將諷誦中的《諸上座所說偈》，編入《小部·諸上座所說偈》；將《比丘尼所說偈》，編入《小部·比丘尼所說偈》。

(2) 將自說中的《憂陀那》，編入《小部·憂陀那》。將自說中的《法句偈》，編入《小部·法句經》。

(3) 將本事中的《增一式如是語＝本事經》，編成《小部·如是語》。

所以，《法句偈》是在第二結集時，才正式納入會內結集。第二

結集後，參與者下傳後，形成上座系。未參與第二結集者（說有系、大眾系、犢子系）則大致維持原狀。

到了阿育王第三結集時期（約佛滅二三四四年），上座系將《小部》更增補成十四分：1《法句經》、2《譬喻》、3《憂陀那》、4《如是語》、5《經集》（內含《尸路偈》、《牟尼偈》、《眾義品》、《波羅延那》等）、6《天宮事》、7《餓鬼事》、8《諸上座所說偈》、9《比丘尼所說偈》、10《本生》、11《義釋》、12《無礙解道》、13《佛種性經》，14《行藏》。今日南傳的《小部》，在《法句經》之前，增加一《小誦經》，故成十五分。此處的《法句經》是 26 品本＝初期集本【A】，這 26 品是：

A1 雙要品、A2 放逸品、A3 心意品、A4 華香品、A5 愚闇品、A6 明哲品、A7 羅漢品、A8 述千品、A9 惡行品、A10 刀仗品、A11 老耄品、A12 愛身品、A13 世俗品、A14 述佛品、A15 安寧品、A16 好喜品、A17 忿怒品、A18 塵垢品、A19 奉持品、A20 道行品、A21 廣衍品、A22 地獄品、A23 象品、A24 愛欲品、A25 沙門品、A26 梵志品。

小結：第三結集（西元前 251 年頃）時，在印度的《法句偈》，內容仍未變，從〈雙要品〉到〈婆羅門品〉，維持《法句偈》26 品本＝初期集本【A】。

佛滅後《法句經》一直在印度本土傳誦著，到了西元 50 年頃，說有系的法救尊者，在印度北部另外編集出新的《法句經》，從〈無常品〉到〈梵志品〉，共計三十三品。《大毘婆沙論》說：

佛去世後，大德法救展轉隨聞，隨順纂集，制立品名：謂集無常頌立為〈無常品〉，乃至梵志頌立為〈梵志品〉。（T27, p1b）

法救所編集的是《法句偈》33 品本＝中期集本【B】，但是法救所編集的偈頌已擴及「諷誦」，而不只是早期所說的感興趣的「自說」而已。中期集本【B】的 33 品是：

B1 有為品、B2 愛欲品、B3 貪品（A24 愛欲品）、B4 放逸品（A2 放逸品）、B5 愛樂品（A16 好喜品）、B6 持戒品、B7 善行品、B8 語言品、B9 業品、B10 正信品、B11 沙門品（A22 地獄品）、

B12 正道品 (A20 道行品)、B13 利養品、B14 怨家品、B15 憶念品、B16 清淨品、B17 水喻品、B18 華喻品 (A4 華香品)、B19 馬喻品 (A23 象品)、B20 瞋恚品 (A17 忿怒品)、B21 如來品、B22 多聞品、B23 己身品 (A12 愛身品)、B24 廣說品 (A8 述千品)、B25 善友品、B26 圓寂品、B27 觀察品 (A14 述佛品)、B28 罪障品 (A9 惡行品、A10 刀仗品)、B29 相應品 (A1 雙要品、A7 羅漢品)、B30 樂品 (A15 安寧品)、B31 護心品 (A3 心意品)、B32 苾芻品 (A19 奉持品、A25 沙門品)、B33 梵志品 (A26 梵志品)。

將初期集本【A】與中期集本【B】比對各偈的內容後，在這 33 品本內，許多品與初期 26 品本相關，例如，B3 貪品 (A24 愛欲品)，表示 B3 貪品與 A24 愛欲品相關。今所示出有明顯相關的是 A1-4、A7-10、A12、A14-17、A19-20、A22-26 等，而舊有的 A5 愚闇品、A6 明哲品、A11 老耄品、A13 世俗品、A18 塵垢品、A21 廣衍品等則拆散到其他諸品內。在這 33 品本內，由法救編入的新偈是 B1、B6、B8、B10、B15、B26 等品，此中 B8 的新偈主要是摘自《經集》。

小結：西元 50 年頃，在印度的《法句經》有 26 品本＝初期集本【A】；又有法救所編集的《法句偈》33 品本＝中期集本【B】。

到了西元 200 年頃，在印度另外出現混合型的《法句經》：從〈無常品〉到〈梵志品〉，共計三十九品，但仍標示為法救所編。此《法句偈》39 品本＝後期集本【C】，主要是將初期集本 26 品【A】，增補其他 13 品而成，其偈頌也擴及「諷誦」。後期集本【C】的 39 品是：

C1 無常品 (B1)、C2 教學品、C3 多聞品、C4 篤信品 (B10)、C5 戒慎品 (B6)、C6 惟念品 (B15)、C7 慈仁品、C8 言語品 (B8)、C9 雙要品 (A1)、C10 放逸品 (A2)、C11 心意品 (A3)、C12 華香品 (A4)、C13 愚闇品 (A5)、C14 明哲品 (A6)、C15 羅漢品 (A7)、C16 述千品 (A8)、C17 惡行品 (A9)、C18 刀仗品 (A10)、C19 老耄品 (A11)、C20 愛身品 (A12)、C21 世俗品 (A13)、C22 述佛品 (A14)、C23 安寧品 (A15)、C24 好喜品 (A16)、C25 忿怒品 (A17)、C26 塵垢品 (A18)、C27 奉持品 (A19)、C28 道行品 (A20)、C29 廣衍品 (A21)、C30 地獄品 (A22)、

C31 象品 (A23)、C32 愛欲品 (A24)、C33 利養品 (B13)、C34 沙門品 (A25)、C35 梵志品 (A26)、C36 泥洹品 (B26)、C37 生死品、C38 道利品、C39 吉祥品。

此處，C1 無常品 (B1)，表示 C1 無常品與中期集本的 B1 (有為品) 相關，餘仿此。此 39 品中，一部分與初期集本【A】直接相關，主要是 C9-32、C34-35 等二十六品；一部分與中期集本【B】相關，主要是 C1、C4-6、C8、C33、C36 等七品；另外增編的一部分是屬於諷誦的 C2、C3、C7、C37-39 等六品，此中 C39 的新偈主要是摘自《經集》。總之，《法句經》後期 39 品本【C】，是屬於混合型，由三部分組成。

小結：西元 200 年頃，在印度北部的《法句經》，有 26 品本＝初期集本【A】；有法救所編集的《法句偈》33 品本＝中期集本【B】。又有標示為法救所編的《法句偈》39 品本＝後期集本【C】。

#### 四、《法句經》的南傳演變

阿育王第三結集後，於西元前 250 年由摩哞陀等人將五部或五阿含往南傳到錫蘭等國，因而歸屬在《小部》中的《法句偈》也就傳到這些國家了。西元前 80 年頃，於錫蘭將佛經記錄成文字。現存南傳《法句經》，是上座銅牒部巴利文的傳本，從〈雙要品〉到〈婆羅門品〉，共計二十六品，四百二十三頌，編於南傳大藏經《小部》之第二單元。

到了西元 430 年頃，覺音論師到錫蘭著出《法句註》26 品，註中共有 305 篇法句偈頌的譬喻/因緣。

小結：西元 430 年頃，南傳的《法句經》有 26 品本＝初期集本【A】；及 26 品本的譬喻/因緣＝《法句註》。

#### 五、《法句經》的北傳演變

(1) 西元 224 年頃，支謙先得維祇難帶來的五百偈初本 (T4,p566c)，共 26 品 498 偈，為《法句經》初期集本【A】。於 225 年頃，維祇難、竺將炎等人譯出此初本。

(2) 後來，竺將炎又帶來 13 品，補成 39 品 752 偈 (偈數算法不同，或算作 757 偈、758 偈、759 偈)，此即《法句偈》39 品本＝後

期集本【C】。於 225 年頃，維祇難、竺將炎等人譯出，從〈無常品〉到〈吉祥品〉共計三十九品，為《法句經》混合本。

(3) 於 290-306 年，法炬、法立共同譯出《法句譬喻經＝法句本末經＝法喻經》，從〈無常品〉到〈吉祥品〉，共計三十九品，為《法句經》混合本，有法句偈頌之譬喻/因緣 75 篇。

(4) 於 383 年，竺佛念譯出法救編的《出曜經＝法句錄》，內含約 825-862 偈，從〈無常品〉到〈梵志品〉，共計三十三品，此即《法句偈》33 品本＝中期集本【B】。並有法句偈頌之譬喻/因緣，以及對偈頌略作註釋。

(5) 於 990-1000 年，天息災譯出法救編的《法集要頌＝諸佛法頌偈》，約 928 偈，從〈有為品〉到〈梵志品〉共計三十三品，此即《法句偈》33 品本＝中期集本【B】。

小結：西元 383 年，在漢地已有：

【A】《法句經》26 品本＝初期集本；及其譬喻/因緣：含在《法句譬喻經》內。

【B】《法句偈》33 品本＝《法句經》中期集本，是法救所編集；及其譬喻/因緣＝《出曜經》。

【C】《法句偈》39 品本＝《法句經》後期集本，但仍標示為法救所編集；及其譬喻/因緣＝《法句譬喻經》。

至於在藏地，西元 750 年頃譯出《法句偈》33 品本＝中期集本【B】，是法救所編集；及其譬喻/因緣＝法句釋（般若鎧著）。

## 六、譬喻/因緣的演變

佛滅四五百年以後，對於十二分教中的「應頌」、「諷誦」和「自說」間的差異不再明確，對於「譬喻」、「因緣」、「本事」和「本生」間的區分也變得模糊，依《大毗婆沙論》(T27,p660a)的解說：「因緣」是諸經以及制立學處的因緣。譬喻（阿波陀那）是釋尊所說的長篇譬喻，如《長壽王本起經》。本生是指佛陀過去生中的熊、鹿等諸本生，和與提婆達多相關的《本生事》等。「本事」則是有關過去的大王、諸佛這些前際所見聞之事。由於「譬喻」、「因緣」、「本事」和「本生」間的區分變得模糊，所以，佛滅四五百年以後，對《法句經＝法句偈》的譬喻/因緣的看法就不一致，加上編選者的取舍有所不同，因而呈現不小的差異性。今以〈雙要品〉的「心為法本」的兩個偈頌為例來

作說明：

(1) 北傳《法句譬喻經》39 品本（290-306 年譯）的說法：

昔舍衛國王，名波斯匿，來至佛所，下車卻蓋，解劍脫履，拱手直進，五體投地，稽首足下，長跪白佛：願以來日，於四街道，施設微食，欲使國人，知佛至尊；願令眾生，遠鬼妖蠱，悉奉五戒，以消國患。佛言：善哉！夫為國主，宜有明導，率民以道，求來世福。王曰：至真請退嚴辦。手自為饌，身往奉迎。佛與眾僧，俱至四衢，佛至就座，即行澡水，手自斟酌。佛飯食畢，於四道頭，為王說法，觀者無數。

時有兩商人，一人念曰：佛如帝王，弟子猶忠臣，佛陳明法，弟子誦宣。斯王明矣，知佛可尊，屈意奉之。

一人念曰：斯王愚哉！爾為國王，將復何求？佛者若牛，弟子猶車，彼牛牽車東西南北，佛亦如是，子有何道而下意奉之？二人俱去，行三十里，亭宿沽酒共飲，平論屬事。其善念者四王護之。其惡念者太山鬼神令酒入腹，如火燒身，出亭路臥，宛轉轍中，晨商人車五百乘轆殺之焉。

伴明日求之已然曰：還國見疑，殺人取物去，不義輕身委財，逝至他國。國王崩亡，無有大子，讖書云：中土有微人，當王斯土。故王有神馬，任王必屈膝，即具嚴駕神馬印綬，行求國主，觀者數千。商人亦出，國太史曰：彼有黃雲之蓋，斯王者氣也。神馬屈膝舐商人足。群臣豫作香湯澡浴，拜為國王。…於是世尊即說偈言：

- (a) 心為法本，心尊心使，中心念惡，即言即行，  
罪苦自追，車轆於轍。
- (b) 心為法本，心尊心使，中心念善，即言即行，  
福樂自追，如影隨形。(T4, p583a)

(2) 北傳《出曜經》33 品本（383 年譯）的說法：

爾時世尊告諸比丘：自今以後，先說勸食偈，然後乃食。舍衛城里有二乞兒，至眾僧中乞食，正值聖眾未說勸食之偈，其中

有一乞兒，嫉妒心盛，便發惡心：設我後得自在為國王者，當以車輪，輾斷爾許道人頭。說偈之後，乞兒乞食得貲無央數，出在路側，飽滿睡眠。數百群車，路由其中，輾斷其頭，死入地獄，受苦無量。

彼第二乞兒，內心自念：設我後得富貴為王者，盡當供養爾許聖眾，使不渴乏。時彼乞兒乞充本意，尋出臥在樹下睡眠，神識澹靜，無有亂想。爾時彼國喪失國主，更無復嗣繼王者種，群臣百僚雲集共論：今國無主，復無繼嗣，將恐人民散在不久亡國破家，由是而興。君等各各，欲何方謀，令國全在，民無異趣？中有智臣明達第一，告諸人民：我等失主，且無繼嗣，宜可遣使巡行國界，若有威相福祿足者，使紹王位。即遣按行。見一樹下有人眠睡，日光以轉，樹影不移，蔭覆人身，如蓋在上。使者見之即往觀視，人中奇異何復是過？此人正應紹繼王位。即喚使覺，扶輿輦載，前後圍繞，將詣王宮。人稱萬歲，國界清泰。爾時世尊觀此二義已，即說斯偈：

- (a) 心為法本，心尊心使，中心念惡，即言即行，罪苦自追，車輾于轍。
- (b) 心為法本，心尊心使，中心念善，即言即行，福慶自隨，如影隨形。(T4, p760b)

(3) 北傳《增壹阿含經》(384-397年譯)的說法：

佛告(波斯匿)王曰：「意根最為重，餘二者輕。」爾時，世尊便說斯偈：

- (a) 心為法本，心尊心使，心之念惡，即行即施，於彼受苦，輪輾于轍。
- (b) 心為法本，心尊心使，中心念善，即行即為，受其善報，如影隨形。(T2, p827b)

(4) 南傳《法句註》26品本(覺音430年頃著)的說法：

釋尊對一位瞎眼的上座踩死昆蟲之事件，指出由於是無心之過，

所以不算犯戒。並解釋其瞎眼的果報，是由於其前世為醫時，刻意使一女人瞎眼的緣故。所以釋尊說：

**(a) 諸法意先導，意主意造作。若以染污意，或語或行業，是則苦隨彼，如輪隨獸足。**

另有一位婆羅門，臨終時看到釋尊，他對佛生起敬信心而死，結果投生為忉利天人。所以釋尊對這一事件說：

**(b) 諸法意先導，意主意造作。若以清淨意，或語或行業，是則樂隨彼，如影不離形。**

由以上所舉出的「心為法本」二頌的譬喻/因緣，可以看出這四種說法有顯著的不同：(1)《出曜經》和(2)《法句譬喻經》是從起因略有不同的一個事件中，依二人的不同心態與遭遇來解說二頌。(3)北傳《增壹阿含經》是從一個事件，直接作為開示後的結頌，(4)南傳《法句註》是以二個無關的事件中，依二人的不同遭遇來解說二頌，且於第一人提及前世的本事。從這一個例子，即可看出《法句經》的譬喻/因緣，是後人由經律中採取相關的資料編配而成，由於編輯者的取捨不同，所以呈現出不小的差異。

## 七、結語

從釋尊時期開始，佛弟子們就很重視《法句經》的誦讀，《雜事》中記載著，阿難尊者在佛陀入滅以後，在竹林園聽到比丘背錯《法句經》的偈頌，經他勸導無效，不由得感觸良多，交待完後事，便入涅槃了。事件的經過如下：

有一苾芻而說頌曰：

**若人壽百歲，不見水白鶴，不如一日生，得見水白鶴。**

時阿難陀聞已，告彼苾芻曰：汝所誦者，大師不作是語，然佛世尊作如是說：

若人壽百歲，不了於生滅，不如一日生，得了於生滅。

…彼聞教已，便告其師。師曰：阿難陀老闍，無力能憶持，出言多忘失，未必可依信。汝但依舊如是誦持。時尊者阿難陀，覆來聽察，見依謬說，報言：子！我已告汝，世尊不作是說。時彼苾芻悉以師語白尊者知。尊者聞已作如是念：今此苾芻我親教授，既不用語，知欲如何？假令尊者舍利子、大目乾連、摩訶迦攝波事亦同此，彼諸大德並已涅槃，如來慈善根力，能令法眼住世千年，乃傷歎曰：

尊宿已過去，新者不齊行，寂慮我一身，猶如殼中鳥，  
過去親皆散，知識亦隨亡，於諸知識中，無過定中念，  
所有世間燈，明照除眾闇，能破愚癡惑，此等亦皆無，  
所化者無邊，能導者但一，如野孤制底，殘林唯一樹。

時具壽阿難陀，告奢搦迦苾芻曰：尊者大迦攝波以世尊教付囑於我，已般涅槃。我今轉付於汝，而取滅度。汝可守護。

(T24, p409c)

此處阿難尊者最後所誦出的偈頌，便是本文所說的「自說」(憂陀那)。以上已略述《法句經》的流傳和演變的情形，今依年代的先後，列出傳到印度以外的《法句經》及其譬喻/因緣，作為本文的總結：

- (1) 南傳《法句經》26 品本：共 423 偈，西元前 250 年傳到錫蘭，有幾種漢譯本。
- (2) 北傳《法句經》26 品本：共 490 偈，是西元 225 年頃，維祇難、竺將炎等人所譯初本。
- (3) 北傳《法句經》39 品本：共 758 偈，是西元 225 年頃，維祇難、竺將炎等人所譯的混合本。
- (4) 北傳《法句譬喻經》39 品本：是西元 290-306 年法炬、法立共同譯出的混合本，內含法句偈的「75 篇」譬喻/因緣。
- (5) 北傳《出曜經》33 品本：偈為法救(西元 50 年頃)編，383 年竺佛念譯出，有法句偈的譬喻/因緣，並對偈頌略作註釋。

(6) 南傳《法句註》26 品本：430 年頃覺音所註釋，共有法句偈的「305 篇」譬喻/因緣。

(7) 藏傳《法句經》33 品本及《法句釋》33 品本：750 年頃譯成藏文，其註釋含有法句偈的譬喻/因緣。

(8) 北傳《法集要頌》33 品本：約 928 偈，法救所編，990-1000 年天息災譯出。



《法句經選集》/林崇安編輯.

--[桃園縣]中壢市：內觀教育基金會, 民 93

面：29x21 公分 -- (佛法教學系列：S2)

ISBN：986-7606-02-7 (平裝)

1. 本緣部

221.86

93007052

## 《法句經選集》

---

編輯：林崇安教授

出版：[桃園縣]中壢市內觀教育基金會

助印郵撥：19155446 財團法人內觀教育基金會

通訊：320 中壢郵政 9-110 信箱。或：

桃園縣大溪鎮頭寮福安里十鄰 12 之 3 (大溪內觀教育禪林)

電話和手機：(03)485-2962；0937-126-660

傳真：(03)425-8073

網址：<http://www.insights.org.tw>

初版：**【內觀教育版】2004**

再版日期：2008 年 3 月